

বিবিধ প্রবন্ধ ।

শ্রীবঙ্কিম চন্দ্র চট্টোপাধ্যায়

প্রণীত ১২৯১ ১২৯২

শ্রী বঙ্কিম চন্দ্র চট্টোপাধ্যায়

কলিকাতা ।

নূতন সংস্কৃত বন্দন ।

১২৯৪



মূল্য ১১০ দেড় টাকা।

PRINTED BY H. M. MOOKERJEA & Co.

AT THE "NEW SANSKRIT PRESS."

6, BALARAM DEY'S STREET,

Published by Umacharan Banerji,

Pratap Chandra Chatterji's Lane

CALCUTTA.

বিজ্ঞাপন ।

ইতিপূর্বে কতকগুলি প্রবন্ধ “বিবিধ সমালোচনা” নামে আর কতকগুলি “প্রবন্ধ পুস্তক” নামে প্রকাশিত করা গিয়াছিল। এক্ষণে উভয় গ্রন্থই অপ্রাপ্য।

দুই খানি পৃথক সংগ্রহ নিম্প্রয়োজন বিবেচনায়, এক্ষণে ঐ প্রবন্ধগুলি এক পুস্তকে সংকলন করিয়া “বিবিধ প্রবন্ধ” নাম দেওয়া গেল। যে সকল প্রবন্ধ পূর্বে “বিবিধ সমালোচনা” এবং “প্রবন্ধ পুস্তকে” প্রকাশিত করা গিয়াছিল, তাহার মধ্যে কোন কোন প্রবন্ধ এবার পরিত্যাগ করা গিয়াছে।

এই সকল প্রবন্ধ অনেক বৎসর পূর্বে বঙ্গদর্শনে প্রকাশিত হইয়াছিল। কোন কোন বিষয়ে এক্ষণে আমার মত পরিবর্তিত হইয়াছে; কোন কোন স্থানে ভ্রম সংশোধন করা গিয়াছে। কিন্তু অনেক স্থানে বিশেষ কারণ বশতঃ প্রবন্ধ যেমন ছিল, তেমনি রাখিতে হইয়াছে।

সূচীপত্র

বিষয় ।	পৃষ্ঠা ।
উদ্ভবচরিত	১
গীতি-কাব্য	৩০
প্রকৃত এবং অপ্রকৃত	৭১
বিদ্যাপতি ও জয়দেব	৮১
আর্য্যজাতির স্মরণ শিল্প	৮৯
শ্রীপদী	৯৫
অনুকরণ	১১৪
শকুন্তলা, মিরশ্বা এবং দেস্‌দিমোনা.....	১২৬
বাঙ্গালির বাহুবল	১৪১
ভালবাসার অত্যাচার	১৫৩
জ্ঞান	১৬৬
সাংবাদর্শন	১৭৮
ভারতকলঙ্ক	২১৭
ভারতবর্ষের স্বাধীনতা এবং পরাধীনতা	২৩৭
প্রাচীন ভারতবর্ষের রাজনীতি	২৫০
প্রাচীনা এবং নবীনা	২৬২

কম্পনা

বাহিরে যাইবে না

বিবিধ প্রবন্ধ

উত্তরচরিত

উত্তরচরিতের উপাখ্যান ভাগ রামায়ণ হইতে গৃহীত। ইহাতে রামকর্তৃক সীতার প্রত্যাখ্যান ও তৎসঙ্গে পুনর্মিলন বর্ণিত হইয়াছে। স্থূল বৃত্তান্ত রামায়ণ হইতে গৃহীত বটে, কিন্তু অনেক বিষয় ভবভূতির স্বকপোলকল্পিত। রামায়ণে বেরূপ বাগ্মীকির আশ্রমে সীতার বাস, এবং বেরূপ ঘটনায় পুনর্মিলন, এবং মিলনান্তেই সীতার ভূতলপ্রবেশ ইত্যাদি বর্ণিত হইয়াছে, উত্তরচরিতে সে সকল সেরূপ বর্ণিত হয় নাই। উত্তরচরিতে সীতার রসাতলবাস, লবের যুদ্ধ এবং তদন্তে সীতার সহিত রামের পুনর্মিলন ইত্যাদি বর্ণিত হইয়াছে। এইরূপ ভিন্ন পন্থায় গমন করিয়া, ভবভূতি রসজ্ঞতার এবং আত্মশক্তি-জ্ঞানের পরিচয় দিয়াছেন। কেন না যাহা একবার বাগ্মীকিকর্তৃক বর্ণিত হইয়াছে, পৃথিবীর কোন্ কবি তাহা পুনর্বর্ণন করিয়া প্রশংসাতাজন হইতে পারেন? যেমন ভবভূতি এই উত্তরচরিতের উপাখ্যান অন্য কবির গ্রন্থ হইতে গ্রহণ করিয়াছেন, তেমনি সেক্ষপীয়র তাঁহার রচিত প্রায় সকল নাটকেরই উপা-

খ্যান ভাগ অন্য গ্রন্থকারের গ্রন্থ হইতে সংগ্রহ করিয়াছেন, কিন্তু তিনি ভবভূতির ন্যায় পূর্ব কবিগণ হইতে ভিন্ন পথে গমন করেন নাই। ইহারও বিশেষ কারণ আছে। সেক্ষপীয়র অদ্বিতীয় কবি। তিনি দ্বীয় শক্তির পরিমাণ বিলক্ষণ বুঝিতেন—কোন্ মহাত্মা না বুঝেন? তিনি জানিতেন যে, যে সকল গ্রন্থকারদিগের গ্রন্থ হইতে তিনি আপন নাটকের উপাখ্যান ভাগ গ্রহণ করিয়াছিলেন, তাঁহারা কেহই তাঁহার সঙ্গে কবিত্ব-শক্তিতে সমকক্ষ নহেন। তিনি যে আকাশে আপন কবিত্বের প্রোজ্জ্বল কিরণমালা বিস্তার করিবেন, সেখানে পূর্বগামী নক্ষত্রগণের কিরণ লোপ পাইবে। এজন্য ইচ্ছাপূর্বকই পূর্ব-লেখকদিগের অনুবর্তী হইয়াছিলেন। তথাপি ইহাও বলিয়া, যে কেবল একখানি নাটকের উপাখ্যান ভাগ তিনি হোমর হইতে গ্রহণ করিয়াছিলেন, এবং সেই ট্রেলস্ ও ক্রেসিদা নাটক প্রণয়ন কালে, ভবভূতি যেরূপ রামায়ণ হইতে ভিন্ন পথে গমন করিয়াছেন, তিনিও তেমনি ইলিয়দ হইতে ভিন্ন পথে গিয়াছেন।

ভবভূতিও সেক্ষপীয়রের ন্যায় আপন ক্ষমতার পরিমাণ জানিতেন। তিনি আপনাকে, সীতানির্কাসন রুত্তান্ত অবলম্বন পূর্বক একখানি অত্যুৎকৃষ্ট নাটক প্রণয়নে সমর্থ বলিয়া, বিলক্ষণ জানিতেন। তিনি ইহাও বুঝিতেন যে, কবিগুরু বাগ্নীকির সহিত কদাচ তিনি তুলনাকাজক্ষী হইতে পারেন না। অতএব তিনি কবিগুরু বাগ্নীকিকে প্রণাম * করিয়া তাঁহা হইতে দূরে

* ইদং শুক্রভাঃ পূর্বেভ্যো নমোবাকং প্রশাস্মহে ।

অবস্থিতি করিয়াছেন । ইহাও স্মরণ রাখা উচিত যে, অস্বদে-
শীয় নাটকে মৃত্যুর প্রয়োগ নিষিদ্ধ * বলিয়া, ভবভূতি স্বীয়
নাটকে সীতার পৃথিবী প্রবেশ বা তদ্বৎ শোকাবহ ব্যাপার
বিন্যস্ত করিতে পারেন নাই ।

উত্তরচরিতের চিত্রদর্শন নামে প্রথমাস্ক বঙ্গীয় পাঠক সমীপে
বিলক্ষণ পরিচিত ; কেন না শ্রীযুক্ত ঈশ্বরচন্দ্র বিদ্যাসাগর মহা-
শয় এই অঙ্ক অবলম্বন করিয়া, স্বপ্রণীত সীতার বনবাসের প্রথম
অধ্যায় লিখিয়াছেন । এই চিত্রদর্শন রুবিমূলতকৌশলময় ।
ইহাতে চিত্রদর্শনোপলক্ষে রামসীতার পূর্ববৃত্তান্ত বর্ণিত আছে ।
ইহার উদ্দেশ্য এমত নহে যে কবি সংক্ষেপে পূর্বঘটনার সকল
বর্ণন করেন । রামসীতার অলৌকিক, অসীম, প্রগাঢ় প্রণয়
বর্ণন করাই ইহার উদ্দেশ্য । এই প্রণয়ের স্বরূপ অনুভব
করিতে না পারিলে, সীতানির্কাসন যে কি ভয়ানক ব্যাপার
তাহা হৃদয়ঙ্গম হয় না । সীতার নির্কাসন সামান্য স্ত্রী বিয়োগ
নহে । স্ত্রীবিসর্জন মাত্রই ক্লেশকর—মর্মান্তিক । যে কেহ
আপন স্ত্রীকে বিসর্জন করে, তাহারই হৃদয়োত্তেদ হয় । যে
বাল্যকালের ক্রীড়ার সঙ্গিনী, কৈশোরে জীবন সুখের প্রথম
শিক্ষাদাত্রী, যৌবনে যে সংসার সৌন্দর্যের প্রতিমা, বার্কিক্যে
যে জীবনাবলম্বন—ভাল বাসুক বা না বাসুক, কে সে স্ত্রীকে
ত্যাগ করিতে পারে ? গৃহে যে দাসী, শয়নে যে অপ্সরা, বিপদে
যে বন্ধু, রোগে যে বৈদ্য, কার্যে যে মন্ত্রী, ক্রীড়ায় যে সখী,

*দূরাহ্বানং বধো যুদ্ধং রাজ্যদেশাদিবিপ্লবঃ ।

বিবাহো ভোজনং শাপোৎসর্গো মৃত্যুরতস্তথা ॥

সাহিত্যদর্পণে ।

বিদ্যায় যে শিষ্য, ধর্ম্মে যে গুরু ;—ভাল বাসুক বা না বাসুক
কে সে স্ত্রীকে সহজে বিসর্জন করিতে পারে ? আশ্রমে যে
আরাম, প্রবাসে যে চিন্তা,—স্বাস্থ্যে যে সুখ, রোগে যে ঔষধ,—
অর্জনে যে লক্ষ্মী, ব্যয়ে যে ষণঃ,—বিপদে যে বুদ্ধি, সম্পদে যে
শোভা—ভাল বাসুক বা না বাসুক, কে সে স্ত্রীকে সহজে বিস-
র্জন করিতে পারে ? আর যে ভাল বাসে, পত্নী বিসর্জন তাহার
পক্ষে কি ভয়ানক দুর্ঘটনা ! আবার যে রামের গায় ভাল
বাসে ? যে পত্নীর স্পর্শমাত্রে অস্থিরচিত্ত,—জানে না যে,

—————“সুখমিতি বা দুঃখমিতি বা,
প্রবোধো নিদ্রা বা কিমু বিষবিষর্পঃ কিমু মদঃ ।
তব স্পর্শে স্পর্শে মম হি পরিমূঢ়ে প্রিয়গ্ণো,
বিকারশ্চৈতন্ত্যং ভ্রময়তি সমুন্মীলয়তি চ ॥” *

যাহার পক্ষে—

“স্নানশ্চ জীবকুমুমশ্চ বিকাশনানি,
সন্তর্পণানি সকলে প্রিয়মোহনানি ।
এতানি তানি বচনানি সরোরুহাক্র্যাঃ,
কর্ণামৃতানি মনসশ্চ রসায়নানি ॥” †

* “এক্ষণে আমি সুখভোগ করিতেছি, কি দুঃখভোগ করিতেছি ;
নিদ্রিত আছি, কি জাগরিত আছি ; কিম্বা কোন বিষ প্রবাহ দেহে
বস্তুপ্রবাহের সহিত মিশ্রিত হইয়া, আমার একরূপ অবস্থা ঘটাইয়া দিয়াছে,
অথবা মদ (মাদক দ্রব্য সেবন) জনিত মত্ততাবশতঃ একরূপ হইতেছে, ইহার
কিছুই স্থির করিতে পারিতেছি না ।” নৃসিংহ বাবুর অনুবাদ, ৩০ পৃষ্ঠা ।

এই প্রবন্ধ নৃসিংহ বাবুর অনুবাদের সমালোচনা উপলক্ষে লিখিত হইয়া-
ছিল । অতএব সে অনুবাদ সর্ব্বাঙ্গে সম্পূর্ণ না হইলেও তাহাই উদ্ধৃত হইবে ।

† “কালনয়নে ! তোমার এই বাক্যগুলি, শোকাদিসমুত্তপ্ত জীবনরূপ
কুমুমের বিকাশক, ইন্দ্রিয়গণের মোহন ও সন্তর্পণ স্বরূপ, কর্ণের অমৃত

যাহার বাহু সীতার চিরকালের উপাধান,—

আবিবাহসময়াদৃগৃহে বনে,
শৈশবে তদনু যৌবনে পুনঃ ।
স্বাপহেতুরনুপাশ্রিতোহুগ্ৰয়া,
রামবাহুরূপধানমেব তে ॥” *

যার পত্নী—

—“গেহে লক্ষ্মীরিয়মমৃতবর্তিন রনয়োরসাবস্থাঃ স্পর্শো-
বপুষি বহলচন্দনরসঃ ।

অয়ং কণ্ঠে বাহুঃ শিশিরমহনো মৌক্তিকসরঃ ॥” †

তাহার কি কষ্ট, কি সর্বনাশ, কি জীবনসর্বস্বধ্বংসাদিক
যন্ত্রণা ! তৃতীয়ান্ধে সেই যন্ত্রণার উপযুক্ত চিত্র প্রণয়নের উদ্যো-
গেই প্রথমান্ধে কবি এই প্রণয় চিত্রিত করিয়াছেন । এই প্রণয়
সর্বপ্রফুল্লকর মধ্যাহ্নসূর্য্য—সেই বিরহ যন্ত্রণা ইহার ভাবী
করালকাদম্বিনী,—যদি সে মেঘের কালিমা অনুভব করিবে,
তবে আগে এই সূর্য্যের প্রখরতা দেখ । যদি সেই অনন্ত
বিস্তৃত অন্ধকারময় দুঃখসাগরের ভীষণ স্বরূপ অনুভব করিবে,
তবে এই সুন্দর উপকূল,—প্রাসাদশ্রেণীসমুজ্জ্বল, ফলপুষ্প

স্বরূপ, এবং মনের মানিপরিহারক (রসায়ন) ঔষধ স্বরূপ ।” ঐ
৩১ পৃষ্ঠা ।

* “রামবাহু বিবাহের সময় হইতে, কি গৃহ, কি বনে, সর্বত্রই
শৈশবাবস্থায় এবং পরে যৌবনাবস্থাতেও তোমার উপাধানের (মাধায়
দিবার বালিসের) কার্য্য করিয়াছে ।” ঐ-ঐ পৃষ্ঠা ।

† “ইনিই আমার গৃহের লক্ষ্মী স্বরূপ, ইনিই আমার নয়নের অমৃত-
শলাকাস্বরূপ, ইহারই এই স্পর্শ গাত্রলগ্ন চন্দনস্বরূপ সুখপ্রদ, এবং
ইহারই এই বাহু আমার কণ্ঠস্থ শীতল এবং কোমল মুক্তাহার স্বরূপ ।”
ঐ-ঐ পৃষ্ঠা ।

পরিশোভিত বৃক্ষবাটিকা পরিমণ্ডিত, এই সর্বসুখময় উপকূল দেখ। এই উপকূলেধরী সীতাকে রমচন্দ্র নিদ্রিতাবস্থায় ঐ অতলস্পর্শী অন্ধকারসাগরে ডুবাইলেন।

আমরা সেই মনোমোহিনী কথার ক্রমশঃ সমালোচনা করিব।

অন্ধমুখে, লক্ষ্মণ রাম সীতাকে একখানি চিত্র দেখাইতেছেন। জনকাদির বিচ্ছেদে দুর্মনায়মানা গর্ভিণী সীতার বিনোদনার্থ এই চিত্র প্রস্তুত হইয়াছিল। তাহাতে সীতার অগ্নিশুদ্ধি পর্য্যন্ত রামসীতার পূর্ব বৃত্তান্ত চিত্রিত হইয়াছিল। এই “চিত্রদর্শন” কেবল প্রেমপরিপূর্ণ—স্নেহ যেন আর ধরে না। কথার কথায় এই প্রেম। যখন অগ্নিশুদ্ধির কথার প্রসঙ্গমাত্রে রাম, সীতাবমাননা ও সীতার পীড়ন জন্য আত্মতিরস্কার করিতেছিলেন—তখন সীতার কেবল “হোহু অজ্জউত্ত হোহু—এহি প্রেক্খন্স দাব দে চরিদং”—এই কথাতেই কত প্রেম! যখন মিথিলাবৃত্তান্তে সীতা রামের চিত্র দেখিলেন, তখন কত প্রেম উছলিয়া উঠিল! সীতা দেখিলেন,

“অয়হে দলত্তনবনীলুপ্পলসামলসিনিদ্ধমসিগসোহমাণমং-
সলেণ দেহসোহগ্গেণ বিক্কঅখিমিদতীদদীসমাণসোম্মসুন্দর-
সিরী অনাদরক্খুড়িদসক্করসরাসণো সিহুগুম্ভমুহমগুলো অজ্জ-
উত্তো আলিহিদো।”*

* আহা! আর্দ্রাপুস্ত্রের কি সুন্দর চিত্র! প্রকুলপ্রায় নবনীলোৎপল-
বৎ শ্ৰাঞ্চলস্নিগ্ধ কোমল শোভাবিশিষ্ট কি দেহ-সৌন্দর্য্য! কেমন অব-
লীলাক্রমে হরধনু ভাঙিতেছেন, মুখমণ্ডল কেমন শিথণ্ডে শোভিত! পিতা
বিস্মত হইয়া এই সুন্দর শোভা দেখিতেছেন! আহা কি সুন্দর!

যখন রাম সীতার বধূবেশ মনে করিয়া বলিলেন,
 প্রতনুবিরলেঃ প্রাত্তোন্নীলম্ননোহর কুন্তলে-
 দ্ধিশন মুকুলৈমুগ্গালোকং শিশুদধতীমুখম্ ।
 ললিতললিতৈজে'গাং স্নাপ্রাট্টৈরকৃত্রিমবিভ্রমৈ-
 রকৃতমধুরৈরস্থানাংমে কুত্ৰহলমঙ্গকৈঃ ।—

যখন গোদাবরীতীর স্মরণ করিয়া কহিলেন,
 কিমপি কিমপি মন্দং মন্দমাসত্তিযোগা-
 দবিরলিতকপোলং জল্লতোরক্রমেণ ।
 অশিথিলপরিবৃত্তব্যাপৃতেকৈকদোষণে-
 রবিদিতগতযামা রাত্রিরেব ব্যরংসীং ॥†

যখন যমুনাতটস্থ শ্যামবট স্মরণ করিয়া কহিলেন,
 অলসলুলিতমুগ্গান্যধবসঞ্জাতখেদা-
 দশিথিলপরিবৃত্তৈস্তদ'ন্তসংবাহনানি ।
 পরিমুদিতমৃগালীতুর্কলান্যঙ্গকানি
 তুমুরসি মম কৃত্বা যত্রনিদ্রামবাণ্ডা ॥ ‡

* “মাতৃগণ তৎকালে বালা জানকীর অঙ্গ সৌষ্ঠবাদি দেখিয়া কি স্মৃথীই হইয়াছিলেন, এবং ইনিও অতি সুন্দর সুন্দর ও অনতি-নিবিড় দন্ত-
 ঙ্গলি, তাহার উভয়পার্শ্বস্থ মনোহর কুন্তলমনোহর মুখশ্রী, আর সুন্দর চন্দ্র-
 কিরণ-সদৃশ নিশ্চল এবং কৃত্রিমবিলাস রহিত ক্ষুদ্র ক্ষুদ্র হস্ত গদাদি অঙ্গ-
 দ্বারা তাহাদের আনন্দের একশেষ করিয়াছিলেন ।”

নৃসিংহ বাবুর অনুবাদ । এই কবিতাটি বালিকা বধুর বর্ণনার চূড়ান্ত ।

† “একত্র শয়ন করিয়া পরস্পরের কপোলদেশ পরস্পরের কপোলের
 সহিত সংলগ্ন করিয়া এবং উভয়ে এক এক হস্ত দ্বারা গাঢ় আলিঙ্গন
 করিয়া অনবরত মৃহস্বরে ও যদৃচ্ছাক্রমে বহুবিধ গল্প করিতে করিতে
 অস্ত্রাতমারে রাত্রি আতবাহিত করিতাম ।”

‡ “যেখানে তুমি পথজনিত পরিভ্রমে ক্লান্তা হইয়া ঈষৎ কম্পবান্
 তথাপি মনোহর এবং গাঢ় আলিঙ্গন কালে অভ্যন্ত মর্দনদায়ক আর

যখন নিদ্রাভঙ্গান্তে রামকে দেখিতে না পাইয়া কৃত্রিম কোপে সীতা বলিলেন,—

ভোহু মে কুবিস্মং জই মে পেক্খমাণা অন্তোণো পহ-
বিস্মং । *

তখন কত প্রেম উছলিয়া উঠিতেছে ! কিন্তু এই অতি বিচিত্র কবিত্বকৌশলময় চিত্রদর্শনে আরও কতই সুন্দর কথা আছে ! লক্ষ্মণের সঙ্গে সীতার কোতুক, “বচ্ছ ইঅং বি অবরা কা ?”—মিথিলা হইতে বিবাহ করিয়া আসিবার কথায় দশরথকে রামের স্মরণ—“স্মরামি ! হন্তু স্মরামি !” মন্ত্ররার কথায় রামের কথা অন্তরিত করণ ইত্যাদি । সুর্গনখার চিত্র দেখিয়া সীতার ভয় আমাদের অতি মিষ্ট লাগে,—

সীতা । হা অজ্জউত্ত এত্তিঅং দে দংসণং

রামঃ । অয়ি বিপ্রয়োগত্রস্তে ! চিত্রমেতং ।

সীতা । যধাতথা হোহু দুজ্জণো অসুহংউপ্পাদেই ।†

স্ত্রীচরিত্র সম্বন্ধে এটি অতি সুমিষ্ট ব্যঙ্গ ; অথচ কেবল ব্যঙ্গ নহে ।

কালিদাসের বর্ণনাশক্তি অতি প্রসিদ্ধ, কিন্তু ভবভূতির বর্ণনাশক্তিও উত্তম । কালিদাসের বর্ণনা তাঁহার অতুল উপমা-প্রয়োগের দ্বারা অত্যন্ত মনোহারিণী হয় । ভবভূতির উপমা-

দলিত মুণালিনীর ন্যায ম্লান ও দুর্জল হস্তাদি অঙ্গ আমার বক্ষঃস্থলে রাখিয়া নিদ্রা গমন করিয়াছিলে।” ঐ বাবুর অনুবাদ ।

* হৌক—আমি রাগ করিব—যদি তাঁহাকে দেখিয়া না ভুলিয়া যাই ।

† সীতা । হা আর্ষ্যপুত্র, তোমার সঙ্গে এই দেখা ।

রাম । বিরহের এত ভয়—এ যে চিত্র ।

সীতা । বাহাই হউক না—দুর্জন হলেই মন্দ ঘটায় ।

প্রয়োগ অতি বিরল ; কিন্তু বর্ণনীয় বস্তু তাঁহার লেখনীমুখে স্বাভাবিক শোভার অধিক শোভা ধারণ করিয়া বসে । কালিদাস, একটা একটা করিয়া বাছিয়া বাছিয়া সুন্দর সামগ্রীগুলি একত্রিত করেন ; সুন্দর সামগ্রীগুলির সঙ্গে তদীয় মধুর ক্রিয়া সকল সূচিত করেন, তাহার উপর আবার উপমাচ্ছলে আরও কতকগুলিন সুন্দর সামগ্রী আনিয়া চাপাইয়া দেন । এজন্য তাঁহার বৃত্ত বর্ণনা, যেমন স্বাভাবের অবিকল অনুরূপ, তেমনি মাধুর্য্য পরিপূর্ণ হয় ; বীভৎসাদি রসে কালিদাস সেই জন্য সফল হয়েন না । ভবভূতি বাছিয়া বাছিয়া মধুর সামগ্রী সকল একত্রিত করেন না ; যাহা বর্ণনীয় বস্তুর প্রধানাংশ বলিয়া বোধ করেন, তাহাই অঙ্কিত করেন । দুই চারিটা স্থূল কথায় একটা চিত্র সমাপ্ত করেন— কালিদাসের ন্যায় বেবল বসিয়া বসিয়া তুলি ঘসেন না । কিন্তু সেই দুই চারিটা কথায় এমন একটু রস ঢালিয়া দেন, যে তাহাতে চিত্র অত্যন্ত সমৃদ্ধ, কখন মধুর, কখন ভয়ঙ্কর, কখন বীভৎস হইয়া পড়ে । মধুরে, কালিদাস অদ্বিতীয়— উৎকটে ভবভূতি ।

উপরে উক্তরচরিতের প্রথমাক্ষ হইতে উদাহরণস্বরূপ কতকগুলিন বর্ণনা উদ্ধৃত হইয়াছে,—যথা রামচন্দ্র ও জানকীর পরস্পরের বর্ণিত বরকন্যা রূপ । ভবভূতির বর্ণনাশক্তির বিশেষ পরিচয় দ্বিতীয় ও তৃতীয়াক্ষে জনস্থান এবং পঞ্চবটী, এবং ষষ্ঠাক্ষে কুমারদিগের যুদ্ধ । প্রথমাক্ষ হইতে আমরা আর একটি সংক্ষিপ্ত উদাহরণ উদ্ধৃত করি ।

“বচ্ছ এসো কুসমিদক অম্বতরুত গুবিদবরহিণো কিণ্ণাম-
হেয়ো গিরি, জত্থ, অনুভাবসোহগ্গমেত্তপরিমেসধূসরসিরী

মুহুর্তং মুচ্ছন্তো তু এ পরুপৈণ অবলম্বিতো তরুতলে অজ্জউত্তো আলিহিতো ।*

দুইটিমাত্র পদে কবি কত কথাই ব্যক্ত করিলেন ! কি করুণ-
রসচরমস্বরূপ চিত্র সৃজিত করিলেন !

চিত্র দর্শনান্তে সীতা নিদ্রা গেলেন । ইত্যবসরে দুশ্মুখ
আসিয়া সীতাপবাদ সম্বাদ রামকে শুনাইল । রাম সীতাকে
বিসর্জন করিবার অভিপ্রায় করিলেন ।

রামচন্দ্রের চরিত্র নির্দোষ, অকলঙ্ক, দেবোপম বলিয়া
ভারতে খ্যাত, কিন্তু বহুতঃ বাল্মীকি কখন রামচন্দ্রকে নির্দোষ
বা সর্বগুণবিভূষিত বলিয়া প্রতিপন্ন করিতে ইচ্ছা করেন নাই ।
রামায়ণগীত শ্রীরামচন্দ্রের চরিত্রের অনেক দোষ, কিন্তু সে
সকল দোষ গুণাতিরেকমাত্র । এই জন্য তাঁহার দোষগুলিনও
মনোহর ! কিন্তু গুণাতিরেকে যে সকল দোষ, তাহা মনো-
হর হইলেও দোষ বটে । পরশুরাম অতিরিক্ত পিতৃতুল
বলিয়া মাতৃহত্যা, তাহা বলিয়া কি মাতৃবধ দোষ নহে ? পাণ্ডু-
বেরা মাতৃ-কথার অতিরিক্ত বশ বলিয়া এক পত্নীর পঞ্চ স্বামী,
তাই বলিয়া কি অনেকের একপত্নীত্ব দোষ নয় ?

রামচন্দ্রও অনেক নিন্দনীয় কৰ্ম্ম করিয়াছেন ।—যথা বালি-
বধ । কিন্তু তিনি যে সকল অপরাধে অপরাধী, তন্মধ্যে এুই
সীতা বিসর্জনাপরাধ সর্বাপেক্ষা গুরুতর । শ্রীরামের চরিত্র

* বৎস, এই যে পরুত, যদুপরে কুম্বিত কদম্ব ময়ুরেরা পুচ্ছ ধরি-
তেছে—উহার নাম কি ? দেখিতেছি, তরুতলে আর্ঘ্যপুঞ্জ লিখিত—তাঁহার
পুঞ্জ সৌন্দর্যের পরিণেমাত্র ধুবরীতে তাঁহাকে চেনা যাইতেছে । তিনি
মুহুর্তঃ মুচ্ছা যাইতেছেন—কাঁদিত কাঁদিত তুমি তাঁহাকে ধরিয়া আছ।

কোন দোষে কলুষিত করিয়া কবি তাঁহাকে এই অপরাধে অপরাধী করিয়াছেন, তাহার আলোচনা করা যাউক ।

যাঁহারা সাম্রাজ্য শাসনে ব্রতী হইলেন, প্রজারঞ্জন তাঁহাদিগের একটি মহৎকর্ম । গ্রীক ও রোমক ইতিবৃত্তে ইহার অনেক উদাহরণ প্রকাশিত আছে । কিন্তু ইহার সীমাও আছে । সেই সীমা অতিক্রম করিলে, ইহা দোষরূপে পরিণত হয় । যে রাজা প্রজার হিতার্থ আপুনার আহিত করেন সে রাজার প্রজারঞ্জন প্রবৃত্তি গুণ । ক্রটস কৃত আত্ম পুত্রের বধ দণ্ডাজ্ঞা এই গুণের উদাহরণ । যে রাজা প্রজার প্রিয় হইবার জন্য হিতাহিত সকল কার্যেই প্রবৃত্ত, সেই রাজার প্রজারঞ্জন প্রবৃত্তি দোষ । নাপোলেরনদিগের যুদ্ধে প্রবৃত্তি ইহার উদাহরণ । রোবম্পীর ও দাতোকৃত বহু প্রজাবধ ইহার নিকৃষ্টতর উদাহরণ ।

ভবভূতির রামচন্দ্র এই প্রজারঞ্জন প্রবৃত্তির বশীভূত হইয়া সীতাকে বিসর্জন করেন । অনেকে স্বার্থসিদ্ধির জন্য প্রজারঞ্জক ছিলেন । কিন্তু রামচন্দ্রের চরিত্রে স্বার্থপরতামাত্র ছিল না । সুতরাং তিনি স্বার্থ জন্য প্রজারঞ্জে ব্রতী ছিলেন না । প্রজারঞ্জন রাজাদিগের কর্তব্য বলিয়াই, এবং ইক্ষ্বাকু বংশীয়দিগের কুলধর্ম বলিয়াই তাহাতে তাঁহার এতদূর দাঢ্য । তিনি অষ্টাবক্রের সমক্ষে পূর্বেই বলিয়াছিলেন,

স্নেহং দয়াং তথা সৌখ্যং যদি বা জানকীমপি,

আরাধনায় লোকস্য, মুঞ্চতো নাস্তি মে ব্যথা । *

* ‘প্রজারঞ্জনের অসুরোধে স্নেহ, দয়া, আত্মসুখ, কিম্বা জানকীকে বিসর্জন করিতে হইলেও আমি কোনরূপ ক্লেশ বোধ করিব না ।’ নৃসিংহ বাবুর অনুবাদ ।

এবং দুর্শ্বখের মুখে সীতার অপবাদ শুনিয়াও বলিলেন,
সত্যং কেনাপি কার্ষ্যেণ লোকস্যারাধনম্ ব্রতং ।

যং পূজিতং হি তাতেন মাঞ্চ প্রাণাংশ্চ মুক্ততা ॥*

ভবভূতির রামচন্দ্র এই বিষম ভ্রমে ভ্রান্ত হইয়া কুলধর্ম
এবং রাজধর্ম পালনার্থ, ভাষ্যাকে পবিত্রা জানিয়াও ত্যাগ
করিলেন। রামায়ণের রামচন্দ্র সেরূপ নহেন। তিনিও
জানিতেন যে সীতা পবিত্রা, —

অন্তরাত্মা চ মে বেত্তি সীতাং শুদ্ধাং যশস্বিনীম্ ।

তিনি কেবল রাজকুলমূলভ অকীর্তিশঙ্কা বশতঃ পবিত্রা পতি-
মাত্রজীবিতা পত্নীকে ত্যাগ করিলেন। “আমি রাজা শ্রীরামচন্দ্র
ইক্ষ্বাকুবংশীয়, লোকে আমার মহিষীর অপবাদ করে ! আমি
এ অকীর্তি সহিব না—যে স্ত্রীর লোকাপবাদ, আমি তাহাকে
ত্যাগ করিব।” এইরূপ রামায়ণের রামচন্দ্রের গর্ভিত চিত্ততাব ।

* বাস্তবিক সর্বত্রই, রামায়ণের রামচন্দ্র হইতে ভবভূতির
রামচন্দ্র অধিকতর কোমলপ্রকৃতি । ইহার এক কারণ এই,
উভয় চরিত্র, গ্রন্থ রচনার সময়োপযোগী । রামায়ণ প্রাচীন
গ্রন্থ । কেহ কেহ বলেন যে উত্তরকাণ্ড বাল্মীকি প্রণীত নহে ।
তাহা হউক বা না হউক ইহা যে প্রাচীন রচনা তদ্বিষয়ে সংশয়
নাই । তখন আর্ঘ্যজাতি বীরজাতি ছিলেন । আর্ঘ্য রাজগণ
বীরস্বভাবসম্পন্ন ছিলেন । রামায়ণের রাম মহাবীর, তাঁহার
চরিত্র গাভীর্য এবং ধৈর্য পরিপূর্ণ । ভবভূতি যৎকালে কবি —

* “লোকের আরাধনা করা সাধু ব্যক্তিদিগের পক্ষে সর্বতোভাবেই
বিধেয়, এবং এইটি তাঁহাদের পক্ষে মহৎব্রতস্বরূপ । কারণ সীতা আত্মাকে
এবং প্রাণ পরিভ্যাগ করিয়াও তাহা প্রতিপালন করিয়াছিলেন।”—ঐ ।

তখন ভারতবর্ষায়েরা আর সে চরিত্রের নহেন । ভোগাকাঙ্ক্ষা, অলসাদির দ্বারা, তাঁহাদের চরিত্র কোমলপ্রকৃত হইয়াছিল । ভবভূতির রামচন্দ্রও সেইরূপ । তাঁহার চরিত্রে বীর লক্ষণ কিছুই নাই । গান্ধীর্ঘ্য এবং ধৈর্যের বিশেষ অভাব । তাঁহার অধীরতা দেখিয়া কখন কখন কাপুরুষ বলিয়া ঘৃণা হয় । সীতার অপবাদ শুনিয়া ভবভূতির রামচন্দ্র যে প্রকার বালিকাসুলভ বিলাপ করিলেন, তাহাই ইহার উদাহরণ স্থল । তিনি গুনিয়াই মূর্ছিত হইলেন । তাঁহার পর দুর্মুখের কাছে অনেক কাঁদাকাটা করিলেন । অনেক সুদীর্ঘ বক্তৃতা করিলেন । তন্মধ্যে অনেক স্করুণ কথা আছে বটে, কিন্তু এত বাগাড়ম্বরে করুণরসের একটু বিঘ্ন হয় । এত বালিকার মত কাঁদিলে রামচন্দ্রের প্রতি কাপুরুষ বলিয়া ঘৃণা হয় । উদাহরণ ;—

“হা দেবি দেবযজনসম্ভবে ! হা স্বজন্মানুগ্রহপবিত্রিত-
বস্করে ! হা নিমিজনকবংশনন্दिनि ! হা পাবকবশিষ্ঠারুন্ধতী-
প্রশস্তশীলশালিনি ! হা রামময়জীবিতে ! হা মহারণ্যবাসপ্রিয়-
সখি ! হা প্রিয়স্তোকবাদিনি ! কথমেবং বিধায়ান্তবায়মীদৃশঃ
পরিণামঃ !”*

এইরূপ স্থলে রামায়ণের রামচন্দ্র কি করিয়াছেন ? কত কাঁদিয়াছেন ? কিছুই না । মহাবীরপ্রকৃত শ্রীরাম সভামধ্যে

* হা দেবি যজ্ঞভূমিসম্ভবে ! হা জন্মগ্রহণপবিত্রিতবস্করে ! হা নিমি
এবং জনকবংশের আনন্দদাত্রি ! হা অগ্নি বশিষ্ঠদেব এবং অরুন্ধতী সদৃশ
প্রশংসনীয় চরিতে ! হা রামময়জীবিতে ! হা মহাবনবাসপ্রিয়সহচরি !
হা মধুরভাষিণি ! হা মিতবাদিনি ! এইরূপ হইয়াও শেষে তোমার অদৃষ্টে
এই ঘটিল ।—নৃসিংহ বাবুর অনুবাদ ।

সীতাপবাদের কথা শুনিলেন। শুনিয়া সভাসদগণকে কেবল এই কথা জিজ্ঞাসা করিলেন, “কেমন সকলে কি এইরূপ বলে?” সকলে তাহাই বলিল। তখন ধীরপ্রকৃতি রাজা আর কাহাকে কিছু না বলিয়া সভা হইতে উঠিয়া গেলেন। মুর্ছাও গেলেন না,—মাতাও কুটিলেন না—ভূমেও গড়াগড়ি দিলেন না। পরে নিভৃত হইয়া, কাতরতাশূণ্ণা ভাষায় ভ্রাতৃবর্গকে ডাকাইলেন। ভ্রাতৃগণ আসিলে, পর্ষতবৎ অবিচলিত থাকিয়া, তাহাদিগকে আপন অভিপ্রায় জানাইলেন। বলিলেন, “আমি সীতাকে পবিত্রা জানি—সেই জগুই গ্রহণ করিয়াছিলাম—কিন্তু এক্ষণে এই লোকাপবাদ! অতএব আমি সীতাকে ত্যাগ করিব।” স্থিরপ্রতিজ্ঞ হইয়া, লক্ষ্মণের প্রতি রাজাজ্ঞা প্রচার করিলেন, “তুমি সীতাকে বনে দিয়া আইস।” যেমন অগ্ৰ্যন্ত্র নিত্যনৈমিত্তিক রাজকার্যে রাজানুচরকে রাজা নিযুক্ত করেন, সেইরূপ লক্ষ্মণকে সীতাবিসর্জনে নিযুক্ত করিলেন। চক্ষে জল, কিন্তু একটিও শোক-স্ফূটক কথা ব্যবহার করিলেন না। “মর্শ্মাণি কুন্ততি” ইত্যাদি কথ্য সীতাবিযোগাশঙ্কায় নহে—অপবাদ সম্বন্ধে। তথাপি তাঁহার এই কয়টি কথায় কত দুঃখই আমরা অনুভূত করিতে পারি! এইস্থল উত্তরকাণ্ড হইতে উদ্ধৃত এবং অনুবাদিত করিলাম।

তস্মৈবং ভাষিতং শ্রুত্বা রাঘবঃ পরমার্ভবং ।

উবাচ সুল্লদঃ সর্কান্ কথমেতদ্বদন্তি মাম্ ॥

সর্কে তু শিরসা ভূমাবভিবাদ্য প্রণম্য চ ।

প্লভ্যচ্ছ রাঘবং দীনমেবমেতন্ন সংশয়ঃ ॥

শ্রুত্বাতু বাক্যং কাকুৎস্থঃ সর্কেষাং সমুদীরিতম্ ।

বিসর্জয়ামাস তদা বয়স্থান্ শক্রহৃদনঃ ॥
 বিধজ্য তু সুহৃদ্বর্গং বুদ্ধ্যা নিশ্চিত্য রাখবঃ ।
 সমীপে দ্বাহমাসীনমিদং বচনমব্রবীং ॥
 শীঘ্রমানয় সৌমিত্রিং লক্ষণং শুভলক্ষণং ।
 ভরতং চ মহাভাগং শক্রঘ্নং চাপরাজিতং ॥

* * * *

তে তু দৃষ্ট্বা মুখং তস্ম সগ্রহং শশিনং যথা ।
 সঙ্ক্যাগতমিবাদিত্যং প্রভয়া পরিবর্জিতং ॥
 বাস্পপূর্ণে চ নয়নে দৃষ্ট্বা রামস্ত ধীমতঃ ।
 হতশোভং যথা পদ্ব মুখস্বীক্য চ তস্ম তে ॥
 ততোভিবাদ্য ত্বরিতাঃ পাদৌ রামস্ত মূর্কতিঃ ।
 তস্মুঃ সমাহিতাঃ সর্কে রামস্ত্রুণ্যবর্তয়ং ॥
 তান্ পরিধজ্য বাহুভ্যামুখাপ্য চ মহাবলঃ ।
 আসনেধাসতেতুক্ত্বা ততো বাক্যং জগাদ হ ॥
 ভবন্তো মম সর্কস্বং ভবন্তো জীবিতং মম ।
 ভবন্তিচ কৃতং রাজ্যং পালয়ামি নরেশ্বরাঃ ॥
 ভবন্তুঃ কৃতশাস্তার্থা বুদ্ধ্যা চ পরিনিষ্ঠিতাঃ ।
 সংভূয় চ মদর্থোয়মশেষ্টব্যো নরেশ্বরাঃ ॥
 তথা বদতি কাকুৎস্থে অবধানপরায়ণাঃ ।
 উদ্বিগ্নমনসঃ সর্কে কিন্নুরাজাভিধাস্তি ॥
 তেষাং সমুপবিষ্টানাং সর্কেষাং দীনচেতসাম্ ।
 উবাচ বাক্যং কাকুৎস্থো মুখেণ পরিভুষ্যতা ॥
 সর্কে শৃণুত ভদ্রশ্চো মা কুরুধ্বং মনোগ্রথা ।
 পৌরাণাং মম সীতায়া যাদৃশী বর্ততে কথা

পৌরাণবাদঃ সুমহান্ তথা জনপদস্ত চ ।

বর্ততে ময়ি বীভৎসামিম মর্শ্মাণি কৃত্ততি ॥

অহং কিল কুলে জাত ইক্ষাকুনাং মহাত্মনাম্ ।

সীতাপি সংকুলে জাতা জনকানাং মহাত্মনাম্ ॥

* * * * *

অন্তরাত্মা চ মে বেত্তি সীতাং শুদ্ধাং যশস্বিনীম্ ।

ততো গৃহীত্বা বৈদেহীমযোধ্যামহমাগতঃ ॥

অয়ং তু মে মহাবাদঃ শোকশ্চ হৃদি বর্ততে ।

পৌরাণবাদঃ সুমহাংস্তথা জনপদস্ত চ ।

অকীর্তি র্ম্ম গীয়েত লোকে ভূতস্ত কশ্চিৎ ॥

পততেবাধমাল্লৈ কান্ যাবচ্ছ ক প্রকীর্ততে ।

অকীর্তি নির্দ্যতে দেবৈঃ কীর্তিলৈ কেয়ু পূজ্যতে ॥

কীর্ত্যর্থং তু সমারম্ভঃ সর্কেষাং সুমহাত্মনাম্ ।

অথাহং জীবিতং জহ্যং দুঃখান্বা পুরুষর্ষভাঃ ॥

তস্মাদ্ভবন্তঃ পশ্যন্ত পতিতং শোকসাগরে ॥

নহি পশ্যামহং ভূতে কিঞ্চিদুঃখমতোধিকং ।

স ত্বং প্রভাতে সৌমিত্রে সুমন্ত্রাধিষ্ঠিতং রথং ॥

আরুহ সীতামারোপ্য বিষয়ান্তে সমুৎসজ ।

গঙ্গায়ান্ত পরে পারে বান্ধীকেষু মহাত্মনঃ ॥

আশ্রমো দিব্যসঙ্কাশ স্তমসাতীরমাশ্রিতঃ ।

তত্রৈনান্নি জনে দেশে বিসৃজ্য রঘুনন্দন ॥

শীঘ্রমাগচ্ছ সৌমিত্রে কুরুষ বচনং মম ।

নচ্যামিন্ প্রতিবক্তব্যং সীতাং প্রতি কথঞ্চন ॥

তস্মাদ্ভং গচ্ছ সৌমিত্রে নাত্র কার্যবিচারণা ।

অপ্রীতি হি পরা মহং তুষ্যেতং প্রতিবারিতে ॥
 শাপিতা হি ময়া যুয়ং পদাভ্যাং জীবনেন চ ।
 যেষাং বাক্যান্তরে ক্রয়ুরনুনেতুং কথঞ্চন ॥
 অহিতানাং তে নিত্যং মদভিষ্টুবিঘাতনাং ॥
 মানয়ন্তু ভবন্তো মাং যদি মচ্ছাসনে স্থিতাঃ ।
 ইতোদ্য নীয়তাং সীতাং কুরুষ্ব বচনং মম ॥*

* অনুবাদ । তাহার এই মত কথা শুনিয়া রাম, পরম হৃৎখিতের ন্যায় সূক্ষ্ম সকলকে জিজ্ঞাসা করিলেন, “কেমন, এইরূপ কি আমাকে বলে ?” সকলে ভূমিতে মস্তক নত করিয়া অভিবাদন ও প্রণাম করিয়া, হৃৎখিত রাখবকে প্রত্যুত্তবে কহিল, “এইরূপই বটে—সংশয় নাই।” তখন শক্রদমন রামচন্দ্র সকলের এই কথা শুনিয়া বয়সাবর্গকে বিদায় দিলেন । বন্ধুবর্গকে বিদায় দিয়া, বুদ্ধির দ্বারা অবধারিত কার্য্য সমীপে আসীন দৌবারিককে এই কথা বলিলেন যে শুভলক্ষণ সূমিত্রা-নন্দন লক্ষ্মণকে ও মহাভাগ ভরতকে ও অপরাঙ্কিত শক্রঘ্নকে শীঘ্র আন ।

..* তাঁহারা রামের মুখ, রাহুগ্রস্ত চন্দ্ৰের ন্যায় এবং সন্ধ্যাকালীন আদিত্যের ন্যায় প্রভাহীন দেখিলেন । ধীমান্ রামচন্দ্ৰের নয়নযুগল বাষ্প পূর্ণ এবং মুখ হতশোভ পদ্মের ন্যায় দেখিলেন । তাঁহারা ত্বরিত তাঁহার অভিবাদন করিয়া এবং তাঁহার পদযুগল মস্তকে ধারণ করিয়া সকলে সমাহিত হইয়া গৃহিলেন । রাম অশ্রুপাত করিতে লাগিলেন । পরে বাহুযুগলের দ্বারা তাঁহাদিগকে আলিঙ্গন ও উত্থাপন পূর্বক মহাবল রামচন্দ্র তাঁহাদিগকে “আমনে উপবেশন কর” এই বলিয়া কহিলেন, “হে নরেশ্বরগণ ! আমার সর্বস্ব তোমরা ; তোমরা আমার জীবন ; তোমাদের কৃত রাজ্য আমি পালন করি । তোমরা শাস্ত্রার্থ অবগত ; এবং তোমাদের বুদ্ধি পরিমার্জিত করিয়াছ । হে নরেশ্বরগণ, তোমরা

এই রচনা অতি মনোমোহিনী । রামায়ণের রাম, ক্ষত্রিয়, মহোজ্জ্বলকুলসম্ভূত, মহাত্মজস্বী । তিনি পৌরাণবাদ শ্রবণে, হৃদয় সিংহের গায় রোষে দুঃখে গর্জন করিয়া উঠিলেন ।

মিলিত হইয়া, যাহা বলি তাহার অর্থাস্থসন্ধান কর ।” রামচন্দ্র এই কথা বলিলে অবধানপরায়ণ ভাতৃগণ, “রাজা কি বলেন” ইহা ভাবিয়া উদ্ভিগ্ধচিত্ত হইয়া রহিলেন ।

তখন সেই দীনচেতা উপবিষ্ট ভাতৃগণকে পরিশুদ্ধমুখে রামচন্দ্র বলিতে লাগিলেন, “তোমাদিগের মঙ্গল হউক ! আমার সীতার সম্বন্ধে পৌরজনমধ্যে বেরূপ কথা বর্ত্তিরাছে, তাহা শুন-মন অন্যথা করিও না । জনপদে এবং পৌরজনমধ্যে আমার স্মহান্ অপবাদরূপ বীভৎস কথা রটিয়াছে, আমার তাহাতে মর্ষচ্ছেদ কারিতেছে । আমি মহাত্মা ইক্ষ্বাকুদিগের কুলে জন্মিয়াছি, সীতাও মহাত্মা জনকরাজের সৎ-কুলে জন্মিয়াছেন । আমার অন্তরাত্মাও জানে যে, যশস্বিনী সীতা শুদ্ধ-চারিত্রী ।

* * * * *

তখন আমি বৈদেহীকে গ্রহণ করিয়া অযোধ্যায় আসিলাম । এক্ষণে এই মহান্ অপবাদে আমার হৃদয়ে শোক বর্ত্তিতেছে । পৌরজন মধ্যে এবং জনপদে স্মহান্ অপবাদ হইয়াছে । লোকে যাহার অকীর্ত্তিগান করে যাবৎ সেই অকীর্ত্তি লোকে প্রকীর্ত্তিত হইবে তাবৎ সে অধমলোকে পতিত থাকিবে । দেবতারা অকীর্ত্তির নিন্দা করেন, এবং কীর্ত্তিই সকল লোকে পূজনীয় । সকল মহাত্মা ব্যক্তিদের যত্ব কীর্ত্তিরই জন্য । হে পুরুষধনগণ, আমি অপবাদভয়ে ভীত হইয়া জীবন ত্যাগ করিতে পারি, সীতার ত কথাই নাই ।

অতএব তোমরা দেখ আমি কি শোকসাগরে পতিত হইয়াছি ! আমি ইবার অধিক দুঃখ জগতে আর দেখি না । অতএব হে সৌমিত্রে !

ভবভূতির রামচন্দ্র তৎপরিবর্তে স্ত্রীলোকের মত পা ছড়াইয়া কাঁদিতে বসিলেন। তাঁহার ক্রন্দনের কিয়দংশ পূর্বেই উদ্ধৃত করিয়াছি। রামায়ণের সঙ্গে তুলনা করিবার জন্ত অবশিষ্টাংশও উদ্ধৃত করিলাম।

রাম । হা কষ্টমতিবীভংসকর্মা নৃশংসোহস্মি সংবৃত্তঃ

শৈশবাং প্রভৃতি পোষিতাং প্রিয়াং

সৌহৃদাদপৃথগাশয়ামিমাম্ ।

ছদ্মনা পরিদদামি মৃত্যবে

সৌনিকো গৃহশকুন্তিকামিব ॥

তং কিম্পর্শনীয়ঃ দেবীং দূষ্যামি ।

[সীতায়ঃ শিরঃ সৈরমুন্নময্য বাহ্মাকর্ষন্]

তুমি কল্যা প্রভাতে সুমন্ত্রাধষ্ঠিত রথে সীতাকে আরোপণ করিয়া স্বয়ং আরোহণ করিয়া, তাঁহাকে দেশান্তরে ত্যাগ করিয়া আইস। গঙ্গার অপর পারে তমসা নদীর তীরে মহাত্মা বাল্মীকি মুনির স্বর্গতুল্য আশ্রম। হে রঘুনন্দন! সেই বিজনদেশে তুমি ইঁহাকে ত্যাগ করিয়া শীঘ্র আইস,—আমার বচন রক্ষা কর—সীতাপরিত্যাগ বিষয়ে তুমি ইহার প্রতিবাদ কিছুই করিও না। অতএব হে সৌমিত্রে! যাও—এবিষয়ে আর কিছু বিচার করিবার প্রয়োজন নাই। তুমি যদি ইহার বারণ কর, তবে আমার পরমাপ্রীতিকর হইবে। আমি চরণের স্পর্শে এবং জীবনের দ্বারা তোমাদিগকে শপথ করাইতেছি—যে যে ইহাতে আমাকে অনুন্নয় করিবার জন্য কোনরূপ কোন কথা বলিবে, আমার অভীষ্টহানি হেতুক তাহার শত্রু খ্যাতি নিত্য বর্ধিবে। যদি আমার আজ্ঞাবহ থাকিয়া, তোমরা আমাকে সম্মান করিতে চাও, তোমরা তবে আমার বচন রক্ষা কর, অদ্য সীতাকে লইয়া যাও।

অপূর্বকর্ষচাণ্ডালময়ি মুখে বিমুঞ্চ মাম্ ।
শ্রিতাসি চন্দনভ্রাতৃত্যা দুর্কিপাকং বিষক্রমম্ ।

উখায় । হন্ত বিপর্ধ্যস্তঃ সম্প্রতি জীবলোকঃ পর্য্যবসিতং
জীবিতপ্রয়োজনং রামশ্চ শূন্যমধুনা জীর্ণারণ্যং জগং অসারঃ
সংসারঃ কষ্টপ্রায়ং শরীরম্ অশরণোহস্মি কিং করোমি কা
গতিঃ । অথবা ।

দুঃখসংবেদনায়ৈব রামে চৈতন্যমাহিতম্ ।
মর্ষোপঘাতিভিঃ প্রাণৈর্কজ্রকীলায়িতংস্থিরৈঃ ॥

হা অশ্ব অরুন্ধতি হা ভগবন্তৌ বশিষ্ঠবিশ্বামিত্রৌ হা ভগবন্
পাবক হা দেবি ভূতধাত্রি হা তাত জনক হা তাত হা মাতরঃ হা
পরমোপকারিন্ লঙ্কাপতে বিভীষণ হা প্রিয়সখ সূগ্রীব হা
সৌম্য হনুমন্ হা সখি ত্রিজটে মুষিতাস্থ পরিভূতাস্থ রাম-
হতকেন । অথবা কশ্চতেষামহমিদানীমাহ্বানে ।

তে হি মন্ত্রে মহাত্মানঃ কৃতঘ্নেন দুরাঅনা ।
ময়া গৃহীতনামানঃ স্পৃশ্যন্তু ইব পাপ্যনা ॥

যোঃ হম্ ।

বিস্রস্তাদুরসি নিপত্য লঙ্কানিভ্রা-
মুন্মুচ্য প্রিয়গৃহিণীং গৃহশ্চ শোভাম্ ॥
স্বাতঙ্কক্ষুরিতকঠোরগর্ভগুর্ধ্বীং
ক্রব্যান্ত্যে বলিমিব নিঘূর্ণঃ ক্ষিপামি ॥
সীত্যয়াঃ পাদৌ শিরসি কৃত্বা । দেবি দেবি অয়ং

পশ্চিমস্বে রামশ্চ শিরসা পাদপঙ্কজস্পর্শঃ

ইতি রোদিতি ।*

ইহার অনেকগুলিন কথা সক্রুণ বটে, কিন্তু ইহা আৰ্য্য-
বীৰ্য্যপ্রতিম মহারাজ রামচন্দ্রের মুখ হইতে নির্গত না হইয়া,

* হায় কি কষ্ট! নিষ্ঠুরের মত, কি স্বাভাবিক কর্মই করিতে প্রবৃত্ত হইয়াছি! বালাবহু হইতে যাহাকে শ্রিয়তমা বলিয়া প্রতিপালিত করিয়াছি; যিনি গাঢ় প্রণয় বশতঃ কোন রূপেই আপনাকে আশ্রয় হইতে ভিন্ন বোধ করেন না, আজ আমি সেই প্রিয়াকে মাংস বিক্রয়ী যেমন গৃহ-পালিতা পক্ষীগণকে অনায়াসে বধ করে, সেই রূপ ছল ক্রমে করাল কাল-গ্রামে নিপাতিত করিতে প্রবৃত্ত হইয়াছি। অতএব পাতকী স্মরণঃ অম্প শা আমি দেবীকে আর কেন কলঙ্কিত করি? (ক্রমে ক্রমে সীতার মস্তক আপনার বক্ষঃস্থল হইতে নামাইয়া বাহু আকর্ষণ পূর্বক) অধি মুঞ্জে! এ অভাগাকে পরিত্যাগ কর। আমি অনৃষ্টচর এবং অশ্রুতপূর্ব পাপ কর্ম করিয়া চণ্ডালত্ব প্রাপ্ত হইয়াছি! হায়! তুমি চন্দনবৃক্ষক্রমে এই ভয়ানক বিষবৃক্ষকে (কি কুক্ষণেই) আশ্রয় করিয়াছিলে? (উঠিয়া) হায় এক্ষণে জীবলোক উচ্ছিন্ন হইল। রামেরও আর জীবিত থাকিবার প্রয়োজন নাই। এক্ষণে পৃথিবী শূন্য এবং জীর্ণ অরণ্য সদৃশ নীরস বোধ হইতেছে। সংসার অসার হইয়াছে। জীবন কেবলমাত্র ক্লেশের নিদান-স্বরূপ বোধ হইতেছে। হায়! এতদিনে আশ্রয়বিহীন হইলাম। এখন কি করি (কোথায় যাই) কিছুই স্থির করিতে পারিতেছি না। (চিন্তা করিয়া) উঃ! আমার এখন কি গতি হইবে? অথবা (সে চিন্তায় আর কি হইবে?) যাবজ্জীবন দুঃখভোগ করিবার নিমিত্তই (হতভাগা) রামের দেহে প্রাণবায়ুর সঞ্চার হইয়াছিল, নতুবা নিজ জীবন পর্য্যন্তও কেন বজ্রের ন্যায় মর্শ্মভেদ করিতে থাকিবে? হা মাতঃ অরুন্ধতি! হা ভগবন্ বশিষ্ঠদেব! হা মহাত্মন্ বিশ্বামিত্র! হা ভগবন্ অগ্নে! হা নিখিল ভূতধাত্ত

আধুনিক কোন বাঙ্গালি বাবুর মুখ হইতে নির্গত হইলে উপ-
যুক্ত হইত। কিন্তু ইহাতেও কোন মান্য আধুনিক লেখকের
মন উঠে নাই। তিনি স্বপ্রণীত বাঙ্গালা গ্রন্থে আরও কিছু
বাড়াবাড়ি করিয়াছেন, তাহা পাঠকালে রামের কাহ্না পড়িয়া
আমাদিগের মনে হইয়াছিল যে, বাঙ্গালির মেয়েরা স্বামী বা
পুত্রকে বিদেশে চাকরি করিতে পাঠাইয়া এইরূপ করিয়া কাঁদে
বটে।

ভবভূতির পক্ষে ইহা বক্তব্য, যে উত্তর-চরিত নাটক ;
নাটকের উদ্দেশ্য ছাচিত্র ; রামায়ণ প্রভৃতি উপাখ্যান কাব্যের +
উদ্দেশ্য ভিন্নপ্রকার। সে উদ্দেশ্য কার্য্যপরম্পরার সরস বিবৃতি।
কে কি করিল, তাহাই উপাখ্যান কাব্যে লেখকেরা প্রতীয়মান
করিতে চাহেন ; সে সকল কার্য্য করিবার সময়ে কে কি

ভগবতি বসুন্ধরে ! হা তাত জনক ! হা পিতঃ (দশরথ !) হা কৌশল্যা
প্রভৃতি মাতৃগণ ! হা পরমোপকারিন্ লক্ষ্মাপতি বিভীষণ ! হা প্রিয়বন্ধো
সুগ্রীব ! হা সৌম্য হনুমন ! হা সখি ত্রিজটে ! আহি হতভাগ্য পাপিষ্ঠ
রাম তোমাদিগের সর্বনাশ (স্বর্গস্বাপহরণ) এবং অবমাননা করিতে প্রবৃত্ত
হইয়াছে। (চিত্ত) করিয়া) অথবা এই হতভাগ্য এখন তাঁহাদিগের নামো-
ল্লেখ করিবারও উপযুক্ত নহে। কারণ, এই পাপাত্মা কৃত্রিম পামর
কেবলমাত্র সেই সকল মহাত্মাদিগের নাম গ্রহণ করিলেও তাঁহারা পাপ-
পৃষ্ট হইবার সম্ভাবনা। যেহেতুক আমি দৃঢ়বিশ্বাস বশতঃ বক্ষঃস্থলে
নিম্নিতা প্রেমসীকে স্বপ্নাবস্থায় উদ্বেগ বশতঃ ঈষৎ কম্পিত গর্ভভরে মন্হরা
দেখিয়াও অনায়াসেই উন্মোচন পূর্বক নির্দয় হৃদয়ে মাঃসাশী রাক্ষস-
দিগকে উপহারের ন্যায় নিক্ষেপ করিতে সমর্থ হইয়াছি। (সীতার চরণদ্বয়
মস্তকদ্বারা গ্রহণপূর্বক) দেবি ! দেবি ! রামের দ্বারা তোমার পদপঙ্কজের
এই শেষ স্পর্শ হইল ! (এই বলিয়া রোদন করিতে লাগিলেন।)

ভাবিল, তাহা স্পষ্টীকৃত করিবার প্রয়োজন তাদৃশ বলবৎ নহে । কিন্তু নাটকে সেই প্রয়োজনই বলবৎ । নাটককারের নিকট আমরা নায়কের হৃদয়ের প্রকৃত চিত্র চাহি । সুতরাং তাঁহাকে চিত্তভাব অধিকতর স্পষ্টীকৃত করিতে হয় । অনেক বাগাড়ম্বর আবশ্যিক হয় । কিন্তু তথাপি 'উত্তরচরিতের প্রথমাকাঙ্কের রামবিলাপ মনোহর নহে । সে কথাগুলিন বীরবাক্য নহে—
নবপ্রেমমুগ্ধ অসঙ্গবান্ যুবকের কথা ।

প্রথমাকাঙ্ক ও দ্বিতীয়াঙ্কের মধ্যে দ্বাদশবৎসর কাল ব্যবধান । উত্তরচরিতের একটা দোষ এই যে, নাটকবর্ণিত ক্রিয়া সকলের পরস্পর কালগত নৈকট্য নাই । এ সম্বন্ধে উইণ্টার্স টেল নামক সেকুপীয়রকৃত বিখ্যাত নাটকের সঙ্গে ইহার বিশেষ সাদৃশ্য আছে ।

এই দ্বাদশবৎসর মধ্যে সীতা বমল সন্তান প্রসব করিয়া স্বয়ং পাতালে অবস্থান করিলেন, তাঁহার পুত্রেরা বায়ীকির আশ্রমে প্রতিপালিত এবং সুশিক্ষিত হইতে লাগিল । রামচন্দ্রের পূর্বপ্রদত্ত বরে দিব্যান্ত তাহাদের স্বতঃসিদ্ধ হইল । এদিকে রামচন্দ্র অশ্বমেধ যজ্ঞানুষ্ঠান করিতে লাগিলেন । লক্ষ্মণের পুত্র চন্দ্রকেতু সৈন্য লইয়া যজ্ঞের অগ্নরক্ষণে প্রেরিত হইলেন । কোন দিন রামচন্দ্র দৈবদেশে জানিলেন যে শম্বুক নামক কোন নীচজাতীয় ব্যক্তি তাঁহার রাজ্যমধ্যে তপশ্চারণ করিতেছে । ইহাতে তাঁহার রাজ্যমধ্যে অকাল মৃত্যু উপস্থিত হইতেছে । রামচন্দ্র ঐ শূদ্র তপস্বির শিরচ্ছেদ মানসে সশস্ত্রে তাহার অনুসন্ধানে নানা দেশ ভ্রমণ করিতে লাগিলেন । শম্বুক পঞ্চবটীর বনে তপঃ করিতেছিল ।

দ্বিতীয়াক্ষের 'বিষ্ণুস্তকে' মুনিপত্নী আত্রেয়ী এবং বনদেবতা বাসন্তীর প্রমুখাং এই সকল বৃত্তান্ত প্রকাশ হইয়াছে । যেমন প্রথমাক্ষের পূর্বে প্রস্তাবনা, সেইরূপ অন্যান্য অক্ষের পূর্বে একটী একটী বিষ্ণুস্তক আছে । এগুলি অতি মনোহর । কখন বিদূষী ঋষিপত্নী, কখন প্রেমময়ী বনদেবী, কখন তমসা মুরলা নদী, কখন বিদ্যাধর বিদ্যাধরী, এইরূপে সৌন্দর্যময়ী সৃষ্টির দ্বারা ভবভূতি বিষ্ণুস্তক সকল অতি রমণীয় করিয়াছেন । দ্বিতীয়াক্ষের আরম্ভই সুন্দর । যথা ;—

“অধ্বগবেশা তাপসী । অয়ে বন দেবতেয়ং ফলকুসুমপল্ল-
বার্ধেণ মামুপতিষ্ঠতে । (১)

শিক্ষা সম্বন্ধে আত্রেয়ীর কথা বড় সুন্দর—

“বিতরিত গুরুঃপ্রাক্তে বিদ্যা যথৈবতথা জড়ে
নচ খলু তয়োজ্ঞানে শক্তিং করোত্যপহন্তিচ ।
ভবতি চ তয়োভূয়ান্ ভেদঃফলংপ্রতি তদ্যথা
প্রভবতি শুচির্বিষ্বোদ্গ্রাহে মণিন্ মৃদাং চয়ঃ ॥ (২)

হরেন্দ্র হেমান উইলসন বলেন যে, উত্তরচরিতে কতকগুলি
এমত সুন্দর ভাব আছে যে তদপেক্ষা সুন্দর ভাব কোন ভাষা-

(১) অহো! এই বনদেবতা ফলপুষ্প পল্লবার্ধের দ্বারা আমার
অভ্যর্থনা করিতেছেন ।

(২) গুরু বুদ্ধিয়ান্কে যেমন শিক্ষা দেন, জড়কেও তদ্রূপ দিয়
থাকেন । কাহারও জ্ঞানের বিশেষ সাহায্য বা ক্ষতি করেন না । কিন্তু
তথাপি তাহাদের মধ্যে ফলের তারতম্য ঘটে । কেবল নিশ্চল মণিই
প্রতিবিন্দু গ্রহণ করিতে পারে ; মৃত্তিকা তাহা পারে না ।

তেই নাই। উপরে উদ্ধৃত কবিতা এই কথার উদাহরণরূপ
তিনি উল্লেখ করিয়াছেন।

রামচন্দ্র শম্বুকের সন্ধান করিতে করিতে পঞ্চবটীর বনে শম্বু-
ককে পাইলেন, এবং খড়্গদ্বারা তাহাকে প্রহার করিলেন। শম্বুক
দিব্য পুরুষ; রামের প্রহারে শাপমুক্ত হইয়া রামকে প্রণিপাত
করিল। এবং জনস্থানাদি রামচন্দ্রের রূপপরিচিত স্থান সকল
দেখাইতে লাগিল। উভয়ের কথোপকথনে বনবর্ণনা অতি
মনোহর।

নিষ্কশ্যামাঃ কচিদপরতো ভীষণাভোগরুক্ষাঃ

স্থানে স্থানে মুখরককুভো ঝাক্কৃতৈর্গির্করাণাম্ ।

এতে তীর্থাশ্রমগিরিসরিদগর্ভকান্তারমিশ্রাঃ

সন্দৃশ্যন্তে পরিচিতভূবো দণ্ডকারণ্যভাগাঃ ॥

এতানি খলু সর্বভূতলোমহর্ষণানি উন্নতচণ্ডশাপদকুলসকুল-
গিরিগহ্বরানি জনস্থানপর্যন্তদীর্ঘারণ্যানি দক্ষিণাং দিশমভি-
বর্তন্তে ।

তথাহি

নিষ্কুজস্তিমিতাঃ কচিৎ কচিদপি প্রোচগুসত্ত্বস্বনাঃ

স্বেচ্ছাসুপ্তগভীরঘোষভূজগশ্বাস প্রদীপ্তাগ্নয়ঃ ।

সীমানঃপ্রদরোদরেযু বিলসৎ স্বপ্নান্তসো যাস্বয়ং

ভৃষ্যন্তিঃ প্রতিসূর্য্যকৈরজগরস্বেদদ্রবঃ পীয়তে ॥

* * * *

অথৈতানি মদকলময়ুরকণ্ঠকোমলচ্ছবিভিরবকীর্ণানি পর্ব-
তৈরবিরলনিবিষ্টনীলবহলচ্ছায়তরুশওমণ্ডিতানি অসম্ভ্রান্ত দ্বিবিধ
মৃগযুথানি ।

শস্যতু মহানুভাবঃ প্রশান্তগন্তীরাণি মধ্যমারণ্যকানি ।

ইহ সমদশকুস্তাক্রান্তুবানীররবীরুৎ

প্রসবসুরভিশীতস্ফুতোয়াঃ বহন্তি ।

ফলভরপরিণামশ্যামজম্বুনিকুঞ্জ

স্থলনমুখরভূরিপ্রোতসো নির্ঝরিণ্যঃ ॥

অপিচ

• দধতি কুহরভাজামত্র ভল্লুকযুনা

মনুরসিত গুরুণি স্ত্যানমম্বুকৃতানি ।

শিশিরকটুকষায়ঃ স্ত্যায়তে শল্লকীনা-

মিভদলিতবিকীর্ণগ্রহিণিব্যন্দগন্ধঃ । (১)

প্রবন্ধের অসহ দৈর্ঘ্যাক্ষয় আর অধিক উদ্ধৃত করিতে পারিলাম না ।

(১) এই যে পরিচিতভূমি দণ্ডকারণ্য ভাগ দেখা যাইতেছে । কোথাও স্নিগ্ধশ্যাম, কোথাও ভয়ঙ্কর ক্লমদৃশ্য, কোথাও বা নির্ঝরিণের ঝরঝরশব্দে দিক্ সকল শব্দিত হইতেছে ; কোথাও পুণ্যতীর্থ, কোথাও মুনিগণের আশ্রমপদ, কোথাও পর্বত, কোথাও নদী এবং মধ্য মধ্য অরণ্য ।

ঐ যে জনস্থান পর্য্যন্ত দীর্ঘ অরণ্য সকল দক্ষিণদিগে চলিতেছে । এ সকল সর্বলোক লোমহর্ষণ—অত্র গিরিগহ্বর উন্নত প্রচণ্ড হিংস্র পশুগণে সমাকুল । কোথাও বা একেবারে নিঃশব্দ ; কোথাও পশুদিগের প্রচণ্ড গর্জন পরিপূর্ণ ; কোথাও বা স্বেচ্ছামুগ্ধ গভীর গর্জনকারী ভূজঙ্গের নিখাসে অগ্নি প্রজ্জলিত । কোথাও গর্ভে অল্প জল দেখা যাইতেছে । ভূষিত কৃকলাসেরা অঙ্গগরের ঘর্ষবিম্বু পান করিতেছে ।

* * * দেখুন, এই মধ্যমারণ্য সকল কেমন প্রশান্ত গন্তীর ! মদকল ময়ূরের কণ্ঠের ন্যায় কোমলচ্ছবি পর্বতে অধকীর্ণ ;

শম্বুক বিদায় পরে পুনরাগমন পূর্বক রামকে জানাইলেন যে, অগস্ত্য রামাগমন শুনিয়া তাঁহাকে আশ্রমে আমন্ত্রিত করিতেছেন । শুনিয়া রাম তথায় চলিলেন । গমনকালীন ক্রৌঞ্চাবত পর্বতাদির বর্ণনা অতি মনোহর । আমরা সচরাচর অনুপ্রাসালঙ্কারের প্রশংসা করি না, কিন্তু এরূপ অনুপ্রাসের উপর বিরক্ত হওয়াও যায় না ।

শুষ্ককুঞ্জকুটীরকৌশিকঘটাঘুৎকারবৎ কীচক
 স্তম্বাডম্বর মুকমৌকুলিকুলঃ ক্রৌঞ্চাবতোয়ং গিরিঃ ।
 এতস্মিন্ প্রচলাকিনাং প্রচলতামুদ্বৈজিতাঃ কূর্জিতৈ-
 রুদ্বৈলস্তি পুরাণরোহিণতরুঙ্কঙ্কেয়ু কুস্তীনসাঃ ॥
 এতেতে কুহরেয়ু গদগদনদদেগাদাবরীবারয়ো-
 র্মেঘালঙ্কৃতমৌলিনীলশিখরাঃ ক্ষৌণীভূতো দক্ষিণাঃ ।
 অন্যান্যপ্রতিঘাতসঙ্কুলচলং কল্লোলকোলাহলৈ-
 রুত্তালাস্ত ইমে গভীরপয়সঃ পুণ্যাঃ সরিঃসঙ্গমাঃ । (১)

ঘননিবিষ্ট, নীলপ্রধান কান্তি, অনতিপ্রোচ বৃক্ষ সমূহে শোভিত ; এবং ভয়শূন্য বিবিধ মৃগযুগে পরিপূর্ণ । স্বচ্ছতোয়া নির্ঝরিতী সকল বহু-
 শ্রোতে বহিতেছে, আনন্দিত পক্ষী সকল তত্রস্থ বেতসলতার উপর
 বসিতেছে, তাহাতে বেতসের কুসুম বৃন্তচ্যুত হইয়া সেই জলে পড়িয়া
 জলকে সুগন্ধি এবং সুশীতল করিতেছে ; শ্রোতঃ পরিপক্কলময়
 শ্যামজম্বুনাভে ঝলিত হওয়াতে শব্দিত হইতেছে । গিরিবিবরবাসী
 যুবা ভল্লুকদিগের ঘুৎকার শব্দ প্রতিধ্বনিত গভীর হইতেছে । এবং
 গজগণের দ্বারা ভগ্ন শল্লকী বৃক্ষের বিক্ষিপ্ত গ্রন্থি হইতে, শীতল কটু
 কথায় সুগন্ধ বাহির হইতেছে ।

(১) এই পর্বত ক্রৌঞ্চাবত । এখানে অব্যক্তনদী কুঞ্জকুটীরবাস
 পেচককুলের ঘুৎকার শব্দিত বায়ুযোগ ধ্বনিত বংশবিশেষের শুছে

তৃতীয়াক্ষ অতি মনোহর। সত্য বটে যে, এই উৎকৃষ্ট নাটকে ক্রিয়াপারম্পর্য্য বড় মনোহর নহে, এবং তৃতীয়াক্ষ সেই দোষে বিশেষ দুষ্ট। প্রথম, দ্বিতীয়, তৃতীয়, চতুর্থ, পঞ্চম অক্ষ যেরূপ বিস্তৃত, তদনুরূপ বহুল ক্রিয়াপরম্পরা নায়ক নায়িকা-গণ কর্তৃক সম্পন্ন হয় নাই। যিনি মাক্বেথ পাঠ করিয়াছেন, তিনি জানেন যে নাটকে বর্ণিত ক্রিয়া সকলের বাহুল্য, পারম্পর্য্য, এবং নীত্র সম্পাদন, কি প্রকার চিত্তকে মস্তমুগ্ধ করে। কার্য্যগত এই গুণ নাটকের একটি প্রধান গুণ। উত্তরচরিতে তাহার বিরলপ্রচার ; বিশেষতঃ প্রথম ও তৃতীয়াক্ষে। তথাপি ইহাতে কবি যে অপূর্ব কবিত্বপ্রকাশ করিয়াছেন, সেই গুণে আমরা সে সকল দোষ বিস্মৃত হই।

দ্বিতীয়াক্ষের বিকল্পক যেমন মধুর, তৃতীয়াক্ষের বিকল্পক ততোধিক। গোদাবরীসংমিলিতা, তমসা ও মুরলা নামী দুইটি নদী রূপ ধারণ করিয়া রামসীতা বিষয়িনী কথা কহিতেছে।

‘অদ্য দ্বাদশ বৎসর হইল, রামচন্দ্র সীতাকে বিসর্জন করিয়াছেন। প্রথম বিরহে তাঁহার যে গুরুতর শোক উপস্থিত হইয়াছিল, তাহা পূর্বে বর্ণিত হইয়াছে। কালসহকারে সে

ভীত হইয়া কাকেরা নিঃশব্দে আছে। এবং ইহাতে সর্পেরা, চঞ্চল ময়ূরগণের কেকারবে ভীত হইয়া পুরাতন বটবৃক্ষের স্বন্ধে লুকাইয়া আছে। আর এই সকল দক্ষিণ পর্ব্বত। পর্ব্বত কুহরে গোদাবরী ঝারিরাশি গগাদনিদাদ করিতেছে ; শিরোদেশ মেঘ মালায় অলঙ্কৃত হইয়া নীল শোভা ধারণ করিয়াছে ; আর এই গভীরজলশালিনী পবিত্রা নদীগর্ভের মঙ্গম পরম্পরের প্রতিঘাতসঙ্কুল চঞ্চল তরঙ্গকোলাহলে দুর্দ্বন্দ্ব হইয়া রহিয়াছে।

শোকের লাঘব জন্মিবার সম্ভাবনা ছিল। কিন্তু তাহা ঘটে নাই; সর্বসম্ভাপহর্তা কাল এই সম্ভাপের শমতা সাধিতে পারে নাই।

অনির্ভিন্নগভীরত্বাদন্তুর্গচ্ছনব্যথঃ ।

পুটপাকপ্রতীকাশো রামশ্চ করুণোরসঃ । (১)

এইরূপ মর্ষ্য মধ্যে রুদ্ধ সম্ভাপে দগ্ধ হইয়া রাম, পরিক্ষীণ শরীরে রাজকর্ম্মছুষ্ঠান করিতেন। রাজকর্ম্মে ব্যাপ্ত থাকিলে, সে কষ্টের তাদৃশ বাহ প্রকাশ পায় না; কিন্তু আজ পঞ্চবটীতে আসিয়া রামের ধৈর্য্যাবলম্বনের সে উপায়ও নাই। এ আবার সেই জনস্থান; পদে পদে সীতাসহবাসের চিহ্নপরিপূর্ণ। এই জনস্থানে কতকাল, কত সুখে, সীতার সহিত বাস করিয়াছিলেন, তাহা পদে পদে মনে পড়িতেছে। রামের সেই দ্বাদশ বৎসরের রুদ্ধ শোক প্রবাহ ছুটিয়াছে—সে প্রবাহবলে, এই গোদাবরী স্রোতঃস্থলিত শিলাচয়ের ন্যায় রামের হৃদয়পাষণ আজি কোথায় যাইবে, কে বলিতে পারে ?

জনস্থানবাহিনী করুণাদ্রাবিতা নদীগুলিন দেখিল যে আজি ঘড়বিপদ। তখন মুরলা কলকল করিয়া গোদাবরীকে বলিতে চলিল, “ভগবতি ! সাবধান থাকিও—আজ রামের বড় বিপদ। দেখিও রাম যদি মুর্ছা যান, তবে তোমার জলকণাপূর্ণ নীতল তরঙ্গের বাতাসে মৃদু মৃদু তাঁহার মুর্ছা ভঙ্গ করিও।” বৃষকুল-দেবতা ভাগীরথী এই শোকতপনাতপসম্ভাপ হইতে রামকে

(১) অবিচলিত গভীরত্ব হেতুক হৃদয় মধ্যে রুদ্ধ, এ জন্য গাঢ়ব্যথ রামের সম্ভাপ মুখবন্ধ পাক্র মধ্যে পাকের সম্ভাপের ন্যায় বাহিরে প্রকাশ পায় না। •

রক্ষা করিবার জন্য এক সর্বসম্ভাপসংহারিণী ছায়াকে জনস্থানে পাঠাইলেন। সেই ছায়ার স্নিগ্ধতায় অদ্যাপি ভারতবর্ষ মুগ্ধ রহিয়াছে। সেই ছায়া হইতে কবি এই তৃতীয়াক্ষের নাম রাখিয়াছিলেন “ছায়া।”—এই ছায়া, সেই বহুকালবিস্মৃতা, পাতাল প্রবিষ্টা, শীর্ণদেহমাত্রবিগ্নিষ্টা হতভাগিনী রামমোহিনীসীতার ছায়া।

সীতা লবকুশকে প্রসব করিলে পর, ভাগীরথী এবং পৃথিবী বালক দুইটিকে বাল্মীকির আশ্রমে রাখিয়া সীতাকে পাতালে লইয়া গিয়া রাখিয়াছিলেন। অদ্য কুশলবের জন্মতিথি—সীতাকে স্বহস্তাবচিত কুমুমাঞ্জলি দিয়া পতিকুলাদিপুরুষ সূর্য্যদেবের পূজা করিতে ভাগীরথী এই জনস্থানে পাঠাইলেন। এবং আপন দৈবশক্তিপ্রভাবে রঘুকুলবধুকে অদর্শনীয়া করিলেন। ছায়া-রূপিণী সীতা সকলকে দেখিতে পাইতেছিলেন। সীতাকে কেহ দেখিতে পাইতেছিল না।

সীতা তখন জানেন না যে, রাম জনস্থানে আসিয়াছেন। সীতাও আসিয়া জনস্থানে প্রবেশ করিলেন। তখন তাঁহার আকৃতি কিরূপ? তাঁহার মুখ “পরিপাণ্ডুর্ধ্বল কপোলসুন্দর”—কবরী বিলোল—শারদাতপসমস্তপ্ত কেতকী কুমুমাস্তর্গত পত্রের ন্যায়, বন্ধনবিচ্যুত কিসলয়ের মত, সীতা সেই অরণ্যে প্রবেশ করিলেন। জনস্থানে তাঁহার গভীর প্রেম! পূর্বসুখের স্থান দেখিয়া বিস্মৃতি জন্মিল—আবার সেই দিন মনে পড়িল। যখন সীতা রামসহবাসে এই বনে থাকিতেন, তখন জনস্থান বন-দেবতা বাসন্তীর সহিত তাঁহার সখী হইয়াছিল। তখন সীতা একটি করিশাবকে স্বহস্তে শল্লকীর পল্লবাগ্রভাগ ভোজন করা-

ইয়া পুত্রের গায় প্রতিপালন করিয়াছিলেন। এখন সেই করি-
 শাবকও ছিল। এইমাত্র সে বধুসঙ্গে জলপানে গিয়াছে। এক
 মন্ত যুথপাত আসিয়া অকস্মাৎ তৎপ্রতি আক্রমণ করিল। সীতা
 তাহা দেখেন নাই। কিন্তু অন্যত্রস্থিতা বাসন্তী দেখিতে পাইয়া-
 ছিলেন। বাসন্তী তখন উচ্চৈঃস্বরে ডাকিতে লাগিলেন, “সর্ব-
 নাশ হইল, সীতার পালিত করিকরভকে মারিয়া ফেলিল!”
 রব সীতার কর্ণে গেল। সেই জনস্থান, সেই পঞ্চবটী! সেই
 বাসন্তী! সেই করিকরভ! সীতার ভ্রান্তি জন্মিল। পুল্লীকৃত হস্তি-
 শাবকের বিপদে বিহ্বলচিত্ত হইয়া তিনি ডাকিলেন, “আর্য্য-
 পুত্র! আমার পুত্রকে বাঁচাও!” কি ভ্রম! আর্য্যপুত্র! কোথায়
 আর্য্যপুত্র? আজি বার বৎসর সে নাম নাই! অমনি সীতা
 মূর্ছিতা হইয়া পড়িলেন। তমসা তাঁহাকে আশ্বস্তা করিতে
 লাগিলেন। এ দিকে রামচন্দ্র লোপামুদ্রার আহ্বানানুসারে অগ-
 স্ত্যাশ্রমে যাইতেছিলেন। পঞ্চবটী বিচরণ করিবার মানসে সেই
 ধানে বিমান রাখিতে বলিলেন। রামের কণ্ঠস্বর মূর্ছিতা
 সীতার কাণে গেল। অমনি সীতার মূর্ছাভঙ্গ হইল—সীতা
 ভয়ে, আহ্লাদে, উঠিয়া বসিলেন! বলিলেন, “একি এ? জল-
 ভরা মেঘের অনিতগন্তীর মহাশব্দের মত কে কথা কহিল?
 আমার কর্ণবিবর যে ভরিয়া গেল! আজি কে আমা হেন মন্দ-
 ভাগিনীকে সহসা আহ্লাদিত করিল?” দেখিয়া তমসার চক্ষু
 জলে ভরিয়া গেল। তমসা বলিলেন, “কেন বাছা একটা
 অপরিষ্কৃত শব্দ শুনিয়া মেঘের ডাকে ময়ূরীর মত চমকিয়া
 উঠিলি?” সীতা বলিলেন, “কি বলিলে ভগবতি? অপরিষ্কৃত?
 আমি যে স্নরেই চিনেছি আমার সেই আর্য্যপুত্র কথা কহিতে-

ছেন।” তমসা তখন দেখিলেন, আর লুকান বৃথা—বলিলেন, “শুনিয়াছি মহারাজ রামচন্দ্র কোন শূদ্র তাপসের দণ্ড জন্য এই জনস্থানে আসিয়াছেন।” শুনিয়া সীতা কি বলিলেন? বার বৎসরের পর স্বামী নিকটে, নয়নের পুত্তলীর অধিক প্রিয়, হৃদয়ের শোণিতেরও অধিক প্রিয়, সেই স্বামী আজি বার বৎসরের পর নিকটে, শুনিয়া সীতা কি বলিলেন? শুনিয়া সীতা কিছুই অহ্লাদ প্রকাশ করিলেন না—“কই স্বামী—কোথায় সে প্রাণাধিক?” বলিয়া দেখিবার জন্ম তমসাকে উৎপীড়িতা করিলেন না, কেবল বলিলেন—

“দিষ্ঠিষ্ঠা অপরিহীনরাঅধমোক্খু সো রাত্মা”—“সৌভাগ্যক্রমে সে রাজার রাজধর্ম পালনে ক্রটি হইতেছে না।”

যে কোন ভাষায় যে কোন নাটকে যাহা কিছু আছে, এতদংশ সৌন্দর্য্যে তাহার তুল্য, সন্দেহ নাই। “দিষ্ঠিষ্ঠা অপরিহীনরাঅধমোক্খু সো রাত্মা।” এই রূপ বাক্য কেবল সেক্ষ-পীম্বরেই পাওয়া যায়। রাম আসিয়াছেন শুনিয়া সীতা অহ্লাদের কথা কিছুই বলিলেন না, কেবল বলিলেন, “সৌভাগ্যক্রমে সে রাজার রাজধর্ম পালনে ক্রটি হইতেছে না।” কিন্তু দূর হইতে রামের সেই বিরহক্লিষ্ট প্রভাতচন্দ্রমণ্ডলবৎ আকার দেখিয়া, “সখি, আমার ধর” বলিয়া তমসাকে ধরিয়া বসিয়া পড়িলেন। এ দিকে রাম পঞ্চবটী দেখিতে দেখিতে, সীতাবিরহ প্রদীপ্তানলে পুড়িতে পুড়িতে, “সীতে! সীতে!” বলিয়া ডাকিতে ডাকিতে, মুচ্ছিত হইয়া পড়িলেন। দেখিয়া সীতাও উচ্চৈঃস্বরে কাদিয়া উঠিয়া তমসার পদপ্রান্তে পতিত হইয়া ডাকিলেন, “ভগবতি তমসে! রক্ষা কর! রক্ষা কর! আমার স্বামীকে বাঁচাও!”

তমসা বলিলেন, “তুমিই বাঁচাও ? তোমায় স্পর্শে উনি বাঁচিতে পারেন !” শুনিয়া সীতা বলিলেন, “যা হউক তা হউক, আমি তাহাই করিব !” এই বলিয়া সীতা রামকে স্পর্শ করিলেন । (১) রাম চেতনা প্রাপ্ত হইলেন ।

পরে সীতার পূর্বকালের প্রিয়সখী, বনদেবতা বাসন্তী সীতার পুত্রীকৃত করিশাবকের সহায়াম্বেষণ করিতে করিতে সেইখানে উপস্থিত হইলেন । রামের সঙ্গে তাঁহার সাক্ষাৎ হওয়ায়, রাম করিশিশুর রক্ষার্থ গেলেন । সে হস্তিশিশু স্বয়ং শত্রুজয়

(১) “ যা হউক তা হউক ।” এই কথাই কত অর্থ গভীর ! বিদ্যাসাগর মহাশয় এই বাক্যের টীকা লিখিয়াছেন যে, “আমার পানি-স্পর্শে আর্ধ্যপুত্র বাঁচিবেন কি না, জানি না, কিন্তু ভগবতী বলিতেছেন বলিয়া আমি স্পর্শ করিব ।” ইহাতে এই বুদ্ধিতে হইতেছে যে পানি-স্পর্শ সফল হইবে কি না, এই সন্দেহেই সীতা বলিলেন, “যা হউক তা হউক !” কিন্তু আমাদের ক্ষুদ্র বুদ্ধিতে বোধ হয় যে সে সন্দেহে সীতা বলেন নাই যে, “যা হবার হউক !” সীতা ভাবিয়াছিলেন, “রামকে স্পর্শ করিবার আমার কি অধিকার ? রাম আমাকে ত্যাগ করিয়াছেন, তিনি আমাকে বিনাপরাধে বিসর্জন করিয়াছেন,—বিসর্জন করিবার সময়ে একবার আমাকে ডাকিয়াও বলেন নাই যে আমি তোমাকে ত্যাগ করিলাম—আজি বার বৎসর আমাকে ত্যাগ করিয়া সশব্দ রহিত করিয়াছেন, আজি আবার তাঁহার প্রিয়পত্নীর মত তাঁহার গাত্রস্পর্শ করিব কোন্ সাহসে ? কিন্তু তিনি ত মৃতপ্রায় ! যা হউক তা হউক, আমি তাঁহাকে স্পর্শ করিব ।” তাই ভাবিয়া সীতা স্পর্শে রাম চেতনাপ্রাপ্ত হইলে, সীতা বলিলেন, “ভাবদি তমসে ! ঐসরস্ক জইদাবং মং পেকৃবিস্মদি তদো অন্বভগ্নাদসগ্নিধাণেণ অহিঅদরং মম মহা-য়াত্রো কুবিস্মদি ।” তবু “মম মাহারাশো ।”

করিয়া করিণীর সহিত ক্রীড়া করিতে লাগিল। তদ্বর্ণনা অতি মধুর।

ষেনোদগচ্ছদ্বিসকিশলয়স্নিগ্ধ দস্তাকুরেণ

ব্যাকৃষ্টস্তে স্নুতনুলবলীপল্লবঃ কর্ণপূরাং ।

সোয়ং পুল্লস্তব মদমুচাং বারণানাং বিজেতা

যং কল্যাণং বয়সি তরুণে ভাজনং তস্য জাতঃ ।

সখি বাসন্তি পশ্য পশ্য কান্তানুরতিচাতুৰ্য্যমপি শিক্ষিত
বৎসেন।

লীলোংখাতমৃগালকাণ্ডকবলচ্ছেদেয়ু সম্পাদিতাঃ

পুষ্পং পুষ্করবাসিতস্য পয়সো গণ্ডুষসংক্রান্তয়ঃ ।

সেকঃ শীকরিণা করেন বিহিতং কামং বিরামে পুন-

ৰ্বৎস্নেহাদনরালনালনলিনী পত্রাতপত্রং ধৃতম্ । (১)

এদিকে পুল্লীকৃত করী দেখিয়া সীতার গর্ভজপুল্লদিগকে মনে পড়িল। কেবল স্বামিদর্শনে বঞ্চিতা নহেন,—পুল্লমুখ দর্শনেও বঞ্চিতা। সেই মাতৃমুখনির্গত পুল্লমুখস্মৃতিবাক্য উদ্ধৃত করিতেছি।

(১) যে নবোদিত মৃগাল পল্লবের ন্যায় কোমল দস্তদ্বারা তৌমার কর্ণদেশ হইতে ক্ষুদ্র ক্ষুদ্র লবণী পল্লব টানিয়া লইত, সেই তোমার পুল্ল মদমত্ত বারণগণকে জয় করিল, স্নুতরাং এখনই সে যুবাবয়সের কল্যাণভাজন হইয়াছে। * * সখি বাসন্তি দেখ, বাছা কেমন নিজ কান্তার মনোরঞ্জন নৈপুণ্যও শিখিয়াছে। খেলা করিতে করিতে মৃগাল কাণ্ড উৎপাটিত করিয়া তাহার ঐসের অংশে স্নুগন্ধি পল্লবস্বাসিত জলের গণ্ডুষ মিশাইয়া দিতেছে; এবং শুণ্ডের দ্বারা পর্যাপ্ত জলকণায় তাহাকে সিক্ত করিয়া, স্নেহে অবক্রদণ নলিনী পত্রের আতপত্র ধরিতেছে।

মমপুত্তকানঃ ইসিবিরলকোমলধঅলদসগুজ্জলকবোলং অনু-
বন্ধমুন্ধকাঅলিবিহসিদং গিবন্ধকাঅসিহুঅং অমলমুহপুওরী-
অজুঅলংগ পরিচুশ্বিদং অজ্জউত্তেণ । (১)

সেই গোদাবরীশীকরশীতল পঞ্চবটী বনে, রাম, বাসন্তীর
আস্থানে উপবেশন করিলেন । দূরে, গিরিগহ্বরগত গোদা-
বরীর বারিরাশির গদগদ নিনাদ শুনা যাইতেছে । সম্মুখে
পরস্পর প্রতিঘাতসকুল উত্তালতরঙ্গ সরিৎসঙ্গম দেখা যাই-
তেছে । দক্ষিণে শ্যামচ্ছবি অনন্ত কাননশ্রেণী চলিয়া গিয়াছে ।
চারিদিকে সীতার পূর্বসহবাসচিহ্ন সকল বিদ্যমান রহিয়াছে ।
তথায়, একটি কদলীবনমধ্যবর্তী শীলাতলে, পূর্বপ্রবাসকালে,
রাম সীতার সঙ্গে শয়ন করিতেন ; সেইখানে বসিয়া সীতা
হরিণশিশুগণকে তৃণ খাওয়াইতেন ; এখনও হরিণেরা সেই
প্রেমে সেইখানে ফিরিয়া বেড়াইতেছে । বাসন্তী সেইখানে
রামকে বসিতে বলিলেন ! রাম সেখানে না বসিয়া, অন্যত্র
উপবেশন করিলেন । সীতা, পূর্বে পঞ্চবটী বাসকালে একটি
ময়ূরশিশু প্রতিপালন করিয়াছিলেন । একটি কদম্ববৃক্ষ সীতা
স্বহস্তে রোপন করিয়া, স্বয়ং বর্দ্ধিত করিয়াছিলেন । রাম দেখি-
লেন, যে সেই কদম্ববৃক্ষে দুই একটি নবকুম্ভমোগদম হইয়াছে ।
তদুপরি আরোহণ করিয়া সীতাপালিত সেই ময়ূরটি নৃত্যাস্তে
ময়ূরী সঙ্গে রব করিতেছিল । বাসন্তী রামকে সেই ময়ূরটি

(১) আমার সেই পুস্তক দুটির অমলমুখপদ্মযুগল, বাহাতে কপোল-
দেশ ঈষদ্বিরল এবং কোমল ধবল দর্শনে উজ্জল, বাহাতে যুহুমধুর
হাসির অবাঞ্ছন্যনি অবিরল লাগিয়া রহিয়াছে, বাহাতে কাকপক্ষ নিবন্ধ
আছে, তাহা আর্ধ্যপুস্তক কর্তৃক পরিচূড়িত হইল না ।

দেখাইলেন । • দেখিয়া রামের মনে পড়িল, সীতা তাহাকে করতালি দিয়া নাচাইতেন, নাচাইবার সময়ে তালের সহিত সীতার চক্ষুও পল্লবমধ্যে ঘুরিত । এইরূপে বাসন্তী রামকে পূর্বস্মৃতিসীড়িত করিয়া,—সখীনির্বাসনজনিত রাগেই এইরূপ সীড়িত করিয়া, প্রথমে জিজ্ঞাসা করিলেন, “মহারাজ ! কুমার লক্ষ্মণ ভাল আছেন ত ?” কিন্তু সেকথা রামের কাণে গেল না—তিনি সীতাকরকমলবিকীর্ণ জলে পরিবর্দ্ধিত বৃক্ষ, সীতাকরকমলবিকীর্ণ নীবারে পুষ্ট পক্ষী, সীতাকরকমলবিকীর্ণ তৃণে প্রতিপালিত হরিণগণকেই দেখিতেছিলেন । বাসন্তী আবার জিজ্ঞাসা করিলেন, “মহারাজ ! কুমার লক্ষ্মণ কেমন আছেন ?” এবার রাম কথা শুনিতে পাইলেন, কিন্তু ভাবিলেন, বাসন্তী “মহারাজ !” বলিয়া সম্বোধন করিলেন কেন ? এ ত নিষ্প্রণয় সম্বোধন । আর কেবল কুমার লক্ষ্মণের কথাই জিজ্ঞাসিলেন, তবে বাসন্তী সীতাবিসর্জনবৃত্তান্ত জানেন । রাম প্রকাশ্যে কেবল বলিলেন, “কুমারের, কুশল, ” এই বলিয়া নীরবে রোদন করিতে লাগিলেন । বাসন্তী তখন মুক্তকণ্ঠা হইয়া কহিলেন, “দেব ! এত কঠিন হইলে কি প্রকারে ?

ত্বং জীবিতং ত্বমসি মে হৃদয়ং দ্বিতীয়ং

ত্বং কোমুদী নয়নোয়োরমৃতং ত্বমঙ্গ—

তুমি আমার জীবন, তুমি আমার-দ্বিতীয় হৃদয়, তুমি নয়নের কোমুদী, অঙ্গে তুমি আমার অমৃত,—এইরূপ শত শত প্রিয় সম্বোধনে যাহাকে ভুলাইতে তাহাকে—” বলিতে বলিতে সীতা-স্মৃতিমুগ্ধা বাসন্তী আর বলিতে পারিলেন না । অচেতন হইলেন ।

রাম তাঁহাকে আশস্তা করিলেন। চেতনা পাইয়া বাসন্তী কহিলেন, “আপনি কেমন করিয়া একাজ করিলেন ?”

রাম। লোকে বুঝে না বলিয়া।

বাসন্তী। কেন বুঝে না ?

রাম। তাহারাই জানে।

তখন বাসন্তী আর সহিতে পারিলেন না। বলিলেন, “নি ঠুর ! দেখিতেছি, কেবল যশঃ তোমার অত্যন্ত প্রিয়।”

এই কথোপকথনের সমুচিত প্রশংসা করা দুঃসাধ্য। সীতা-বিসর্জন জন্য বাসন্তী রামপ্রতি ক্রোধযুক্তা হইয়াছিলেন, তিনি মানসিক যন্ত্রণারূপ সেই অপরাধের দণ্ড প্রণীত করিলেন, সহজেই রামের শোকসাগর উছলিয়া উঠিল। রামের যে একমাত্র শোকোপশমের উপায় ছিল—আত্মপ্রসাদ,—তাহাও বিনষ্ট করিলেন। রাম জানিতেন যে তিনি প্রজারঞ্জনরূপ কুলধর্মের রক্ষার্থেই সীতাবিসর্জনরূপ মর্শ্চছেদী কার্য করিয়াছেন।—মর্শ্চছেদ হউক, ধর্ম রক্ষা হইয়াছে। বাসন্তী দেখিলেন যে সে ধর্মরক্ষা কেবল স্বার্থপরতার পৃথক্ একটি নামমাত্র। সে কুলধর্ম রক্ষার বাসনা কেবল রূপান্তরিত যশোলিপ্সা মাত্র। কেবল যশোলাভের স্বার্থপর বাসনার বশবর্তী হইয়া রাম এই কাজ করিয়াছেন। বাসন্তী আরও দেখিলেন যে, যে যশের আকাঙ্ক্ষায় তিনি এই নিষ্ঠুর কার্য করিয়াছিলেন, সে আকাঙ্ক্ষাও ফলবতী হয় নাই। তিনি এই প্রকার যশের লাভ লাভসায় পত্নীবধরূপ গুরুতর অপযশের ভাগী হইয়াছেন। বন মধ্যে সীতার কি হইল, তাহার স্থিরতা কি ? ইহার অপেক্ষা গুরুতর অপযশ আর কি হইতে পারে ?

তখন রামের শোকপ্রবাহ আবার অসম্বরণীয় বেগে ছুটিল । সীতার সেই জ্যোৎস্নাময়ী মৃদুমুগ্ধমৃগালকল্প দেহলতিকা কোন হিংস্র পশু কর্তৃক বিনষ্ট হইয়াছে, সন্দেহ নাই । এই ভাবিয়া রাম “সীতে ! সীতে !” বলিয়া সেই অরণ্যমধ্যে রোদন করিতে লাগিলেন । কখন বা “যে কলঙ্ককুংসাকারক পৌরজনের কথায় সীতা বিসর্জন করিয়াছিলেন, তাহাদিগের উদ্দেশে বলিতে লাগিলেন, “আমি অনেক সহ্য করিয়াছি, আমার প্রতি প্রসন্ন হও ।” বাসন্তী, ধৈর্য্যাবলম্বন করিতে বলিলেন । রাম বলিলেন, “সখি, আবার ধৈর্য্যের কথা কি বল ? আজি দ্বাদশ বৎসর সীতাশূণ্য জগৎ—সীতা নাম পর্য্যন্ত লুপ্ত হইয়াছে—তথাপি বাঁচিয়া আছি—আবার ধৈর্য্য কাহাকে বলে ?” রামের অত্যন্ত যত্নে দেখিয়া বাসন্তী তাঁহাকে জনস্থানের অন্ত্যান্ত প্রদেশ দেখিতে অনুরোধ করিলেন । রাম উঠিয়া পরিভ্রমণ করিতে লাগিলেন । কিন্তু বাসন্তীর মনে সখীবিসর্জন দুঃখ জ্বলিতেছিল—কিছুতেই ভুলিলেন না । বাসন্তী দেখাইলেন ;—

অশ্বিন্বেব লতাগৃহে তুমভবস্তম্মার্গদন্তেক্ষণঃ

সা হংসৈঃ কৃতকৌতুকা চিরমভূদগোদাবরী সৈকতে । ”

আয়াস্ত্যা পরিদুর্শ্ননায়িতমিব ত্বাং বীক্ষ্য বন্ধস্তয়া

কাতর্ধ্যাদরবিন্দকুটুলনিভোমুগ্ধঃপ্রণামাঞ্জলিঃ । (১)

আর রাম সহ্য করিতে পারিলেন না । ভ্রান্তি জন্মিতে লাগিল । যখন উচ্চৈঃস্বরে রাম ডাকিতে লাগিলেন, “চণ্ডি জানকি, এই যে চারি দিকে তোমাকে দেখিতেছি—কেন দয়া

(১) সীতা গোদাবরী সৈকতে হংস লইয়া কৌতুক করিতে করিতে বিলম্ব করিতেন; তখন তুমি এই লতাগৃহে থাকিয়া

কর না ? আমার বুক ফাটিতেছে ; দেহবন্ধ ছিঁড়িতেছে ; জগৎ শূন্য দেখিতেছি ; নিরন্তর অন্তর জ্বলিতেছে ; আমার বিকল অন্তরাত্মা অবসন্ন হইয়া অন্ধকারে ডুবিতেছে ; মোহ আমাকে চারি দিক্ হইতে আচ্ছন্ন করিতেছে ; আমি মন্দভাগ্য—এখন কি করিব ?” বলিতে বলিতে রাম মূর্ছিত হইলেন ।

ছায়ারূপিনী সীতা তমসার সঙ্গে আদ্যোপান্ত নিকটে ছিলেন । বাসন্তী রামকে পীড়িত করিতেছেন দেখিয়া, সীতা পুনঃ পুনঃ তাঁহাকে তিরস্কার করিতেছিলেন—কতবার রামের রোদন শুনিয়া আপনি মর্ম্মপীড়িত হইতেছিলেন, আবার সীতা রামচন্দ্রের দুঃখের কারণ হইলেন বলিয়া, কত কাতরোল্লি করিতেছিলেন । আবার রামকে মূর্ছিত দেখিয়া সীতা কাঁদিয়া উঠিলেন, “আর্য্যপুত্র ! তুমি যে সকল জীবলোকের মঙ্গলাধার ! তুমি এ মন্দভাগিনীকে মনে করিয়া বার বার সংশয়িতজীবন হইতেছ ? আমি যে মলেম ।” এই বলিয়া সীতাও মূর্ছিত প্রায় ! তমসা এবং বাসন্তী তাঁহাকে উঠাইলেন । সীতা সসঙ্কমে রামের ললাট স্পর্শ করিলেন । কি স্পর্শসুখ ! রাম যদি মৃৎ-পিণ্ড হইয়া থাকিতেন, তাহা হইলেও তাঁহার চেতনা হইত । আনন্দনিমিলিতলোচনে স্পর্শসুখ অনুভব করিতে লাগিলেন, তাঁহার শরীরধাতু অন্তরে বাহিরে অমৃতময় প্রলেপে যেন লিপ্ত হইল—জ্ঞান লাভ করিলেও আনন্দেতে আর এক প্রকার মোহ

তাঁহার পথ চাহিয়া রহিতে । সীতা আসিয়া তোমাকে বিশেষ হর্ষনায়মান দেখিয়া, তোমাকে প্রণাম করিবার জন্য পঙ্কলিকা তুল্য অঙ্গুলির দ্বারা কি সুন্দর অঞ্জলিবদ্ধ করিতেন ।

তাঁহাকে অভিভূত করিল। রাম বাসন্তীকে বলিলেন, “সখি বাসন্তি ! বুঝি অদৃষ্ট প্রসন্ন হইল !”

বাসন্তী । কিসে ?

রাম । আর কি সখি ! সীতাকে পাইয়াছি ।

বাসন্তী । কৈ তিনি ?

রাম । এই যে আমার সম্মুখেই রহিয়াছেন ।

বাসন্তী । মর্ষভেদী প্রলাপ বাক্যে আশ্রিত একে প্রিয়সখীর হৃৎখে জ্বলিতেছি, তাহাতে আবার এমন তর এ হতভাগিনীকে কেন জ্বলাইতেছেন ?

রাম বলিলেন, “সখি, প্রলাপ কই ? বিবাহকালে বৈবাহিক মঙ্গল সূত্রযুক্ত যে হাত আমি ধরিয়াছিলাম—আর যে হাতের অমৃতশীতল স্বেচ্ছালব্ধ সূক্ষ্মস্পর্শে চিনিতে পারিতেছি, এ ত সেই হাত ! সেই তুহিন সদৃশ, বর্ষাশীকরকতুল্য শীতল কোমল লবলী বৃক্ষের নবাকুর তুল্য হস্তই আমি পাইয়াছি !”

এই বলিয়া রাম তাঁহার ললাটস্থ অদৃশ্য সীতা-হস্ত গ্রহণ করিলেন । সীতা ইতিপূর্বেই রামের আনন্দমোহ দেখিয়া অপস্থত হইবেন বিবেচনা করিয়াছিলেন ; কিন্তু সেই চিরসম্ভাব-সৌম্যশীতল স্বামিস্পর্শে তিনিও মুগ্ধা হইলেন ; অতি যত্নে সেই রামললাটস্থিতহস্তকে ধরিয়া রাখিলেও সে হস্ত কাপিতে লাগিল, স্বামিতে লাগিল, এবং জড়বৎ হইয়া অবশ হইয়া আসিতে লাগিল ! যখন রাম, সীতার হস্তের চিরপরিচিত অমৃত-শীতল সূক্ষ্মস্পর্শের কথা বলিলেন, সীতা মনে মনে বলিলেন, “আর্য্যপুত্র আজিও তুমি সেই আর্য্যপুত্রই আছ !” শেষে যখন রাম সীতার করগ্রহণ করিলেন, তখন সীতা দেখিলেন, স্পর্শ

মোহে প্রমাদ ঘটিল। কিন্তু রাম সে হাত ধরিয়া রাখিতে পারিলেন না ; আনন্দে তাঁহার ইচ্ছিয় সকল অবশ হইয়া আসিয়াছিল, তিনি বাসন্তীকে বলিলেন, “সখি, তুমি একবার ধর।” সীতা সেই অবকাশে হাত ছাড়াইয়া লইলেন। লইয়া, স্পর্শসুখজনিত স্বেদরোমাঞ্চকম্পিতকলেবরা হইয়া পবনকম্পিত নবজলকণাসিক্ত স্ফুটকোরক কদম্বের শ্রায় দাঁড়াইয়া রহিলেন। মনে করিলেন, “কি লজ্জা, তমসা দেখিয়া কি মনে করিতেছেন। ভাবিতেছেন, এই ইহাকে ত্যাগ করিয়াছেন, আবার ইহার প্রতি এই অনুরাগ।”

রাম ক্রমে জানিতে পারিলেন, যে কই, কোথা সীতা— সীতা ত নাই। তখন রামের শোকপ্রবাহ দ্বিগুণ ছুটিল। রোদন করিয়া, ক্রমে শান্ত হইয়া বাসন্তীকে বলিলেন, “আর কতক্ষণ তোমাকে কাঁদাইব ? আমি এখন যাই।” শুনিয়া সীতা উদ্বেগের সহিত তমসাকে অবলম্বন করিয়া বলিতে লাগিলেন, “ভগবতি তমসে ! আৰ্য্যপুত্র যে চলিলেন ?” তমসা বলিলেন, “চল, আমরাও যাই।” সীতা বলিলেন, “ভগবতি ক্ষমা কর ! আমি ক্ষণকাল এই ছল্লভ জনকে দেখিয়া লই।” কিন্তু বলিতে বলিতে এক বজ্রতুল্য কঠিন কথা সীতার কানে গেল। রাম বাসন্তীর নিকট বলিতেছেন, “অশ্বমেধের জন্য আমার এক সহধর্মিণী আছে—” সহধর্মিণী ! সীতা কম্পিতকলেবরা হইয়া মনে মনে বলিলেন, “আৰ্য্যপুত্র ! কে সে ?” এই অবসরে রামও কথা সমাপ্ত করিলেন, “সে সীতার হিরণ্ময়ী প্রতিকৃতি।” শুনিয়া সীতার চক্ষের জল পড়িতে লাগিল ; বলিলেন, “আৰ্য্যপুত্র ! এখন তুমি তুমি হইলে। এতদিনে আমার পরিত্যাগ লজ্জাশল্য

বিমোচন করিলে !” রামবলিতেছেন, “তাহারই দ্বারা আমার বাম্পদিক্ চক্ষুর বিনোদন করি।” শুনিয়া সীতা বলিলেন, “তুমি বার এত আদর কর, সেই ধন্য। তোমার যে বিনোদন করে সেই ধন্য। সে জীবলোকের আশানিবন্ধন হইয়াছে।”

রাম চলিলেন। দেখিয়া সীতা করযোড়ে, “গমো গমো অপূর্বপুঞ্জবিদদংসনাগং অজ্জউত্তচরণকমলাগং” এই বলিয়া প্রণাম করিতে মুচ্ছিত হইয়া পড়িলেন। “তমসা তাঁহাকে আশ্বস্ত করিলেন। সীতা বলিলেন, “আমার এ মেঘান্তরে ক্ষণকাল জন্ম পূর্ণিমাচন্দ্র দেখা মাত্র।”

তৃতীয়াক্ষের সার মন্ত্র এই। এই অঙ্কের অনেক দোষ আছে। ইহা নাটকের পক্ষে নিতান্ত অনাবশ্যক। নাটকের যাহা কার্য্য, বিসর্জনাতে রাম সীতার পুনর্শিলন, তাহার সঙ্গে ইহার কোন সংশ্রব নাই। এই অঙ্ক পরিত্যক্ত হইলে নাটকের কার্য্যের কোন হানি হয় না। সচরাচর এরূপ একটি সুদীর্ঘ নাট্যকাঙ্ক নাটক মধ্যে সন্নিবেশিত হওয়া, বিশেষ রসভঙ্গের কারণ হয়। যাহা কিছু নাটকে প্রতিকৃত হইবে তাহা উপসংহতির উদ্যোজক হওয়া উচিত। এই অঙ্ক কোন অংশে তদ্রূপ নহে। বিশেষ, ইহাতে রামবিলাপের দৈর্ঘ্য এবং পৌনঃপুন্য অসহ্য। তাহাতে রচনাকৌশলের বিপর্য্যয় হইয়াছে। কিন্তু সকলেই মুক্তকণ্ঠে বলিবেন, যে অন্য অনেক নাটক একবারে বিলুপ্ত হয়, বরং তাহাও স্বীকর্তব্য, তথাপি উত্তরচরিতের এই তৃতীয়াক্ষ ত্যাগ করা যাইতে পারে না। কাব্যংশে ইহার তুল্য রচনা অতি দুর্লভ।

উরচরিত সমালোচন ক্রমে এত দীর্ঘায়ত হইয়া উঠিয়াছে,

যে আর ইহাতে অধিক স্থান নিয়োগ করা কর্তব্য নহে । অত-
এব অবশিষ্ট কয় অঙ্কের সমালোচনা অতি সংক্ষেপে করিব ।

এ দিকে বাল্মীকি প্রচার করিলেন যে তিনি এক অভিনব
নাটক রচনা করিয়াছেন । তদভিনয় দর্শন জন্য সকল লোককে
নিমন্ত্রিত করিলেন । তদর্শনার্থ বশিষ্ঠ, অরুন্ধতী, কৌশল্যা,
জনক প্রভৃতি বাল্মীকির আশ্রমে আসিয়া সমবেত হইলেন ।
তথায় লবের সুন্দর কান্তি এবং রামের সহিত সাদৃশ্য দেখিয়া
কৌশল্যা অত্যন্ত উৎসুক্যপূর্বক হইয়া, তাঁহার সহিত আলাপ
করিলেন । দুহিতৃবিয়োগে জনকের শোকক্লিষ্টদশা, কৌশল্যার
সহিত তাঁহার আলাপ, লবের সহিত কৌশল্যার আলাপ,
ইত্যাদি অতি মনোহর, কিন্তু সে সকল উদ্ধৃত করিবার আর
অবকাশ নাই ।

চন্দ্রকেতু, অশ্বমেধের অশ্বরক্ষক সৈন্য লইয়া, বাল্মীকির
আশ্রম সন্নিধানে উপনীত হইলেন । তাঁহার অবর্তমানে সৈন্য-
দিগের সহিত লবের বচসা হওয়ার লব অশ্ব হরণ করিলেন
এবং যুদ্ধে চন্দ্রকেতুর সৈন্যদিগকে পরাস্ত করিলেন । চন্দ্রকেতু
আসিয়া তাহাদিগের রক্ষায় প্রবৃত্ত হইলেন । চন্দ্রকেতু এবং
লব পরস্পরের প্রতি বিপক্ষতাচরণ কালে এত দূর উভয়ে উভ-
য়ের প্রতি সৌজন্য এবং সহ্যবহার করিলেন যে ইহা, নাটকের
এতদংশ পড়িয়া বোধ হয় যে, সভ্যতার চূড়াপদবাচ্য কোন ইউ-
রোপীয় জাতি কর্তৃক প্রণীত হইয়াছে । ভবভূতির সময়ে ভার-
তবর্ষায়েরা সামাজিক ব্যবহার সম্বন্ধে বিশেষ উৎকর্ষ লাভ করি-
য়াছিলেন, ইহা তাহার এক প্রমাণ ।

আকাঙ্ক্ষা যেরূপ নক্ষত্র ছড়ান, ভবভূতির রচনা মধ্যে সেই-

রূপ কবিত্বরত্ন ছড়ান আছে। চতুর্থ এবং পঞ্চম অঙ্ক হইতে এই সকল রত্ন আহরণ করিতে পারিলাম না, তথাপি পঞ্চম হইতে দুই একটি উদাহরণ না দিয়া থাকিতে পারা যায় না। যব চন্দ্রকেতুর সৈন্যের সহিত যুদ্ধ করিতেছিলেন, এমন সময়ে চন্দ্রকেতু তাঁহাকে যুদ্ধে আহ্বান করিতে তাহাদিগকে ত্যাগ করিয়া চন্দ্রকেতুর দিকে ধাবমান হইলেন, “স্বনয়িত্বুরবাদিতা-বলীনাংমবমর্দাদিব দৃশুসিংহশাবঃ।” (১) তিনি চন্দ্রকেতুর দিকে আসিতেছেন, পরাজিত সৈন্যগণ তখন তাঁহার পশ্চাৎ ধাবিত হইতেছে ;—

দর্পেণ কৌতুকবতা ময়ি বদ্ধলক্ষ্যঃ

পশ্চাদ্বলৈরনুসৃতোহয়মুদীর্ঘধ্বা

দেখা সমুদ্ধতমরুত্তরমস্য ধত্তে

মেঘস্য মাঘবতচাপধরস্য লক্ষ্মীম্ ॥ (২)

নিঃসহায় পাদচারী বালকের প্রতি বহুসেনা ধাবমান দেখিয়া চন্দ্রকেতু তাহাদিগকে নিবারণ করিলেন। দেখিয়া লব ভাবিলেন, “কথমনুকম্পতে মাম্ ?” ভারতবর্ষীয় কোন গ্রন্থে এরূপ বাক্য প্রযুক্ত আছে, একথা অনেক ইউরোপীয় সহজে বিশ্বাস করিবেন না।

(১) যেমন মেঘের শব্দ শুনিয়া, দৃষ্ট সিংহ-শিশুও হস্তি-বিনাশ হইতে নিবৃত্ত হয়, সেইরূপ।

(২) সর্কৌতুক দর্পে আমার প্রতি বদ্ধলক্ষ্য হইয়া ধনু উখিত করিয়া, সৈন্যের দ্বারা পশ্চাতে অনুসৃত হইয়া, ইনি, দুই দিগ্ হইতে, বায়ু সঞ্চালিত এবং ইন্দ্রধনু শোভিত মেঘের মত দেখা-ইতেছেন।

লব কর্তৃক জ্বলন্তকান্ত প্রয়োগ বর্ণনা অস্বাভাবিক, অতি-
প্রকৃত, এবং অস্পষ্ট হইলেও, আমরা তাহা উদ্ধৃত না করিয়া
থাকিতে পারিলাম না ;—

পাতালোদরকুঞ্জপুঞ্জিততমঃশ্যার্ট্মৈর্নভোজ্বলকৈ-
রুত্তপ্তক্ষুরদারকুটকপিলজ্যোতিজ্বলদীপ্তিভিঃ ।
কল্পাক্ষেপকঠোরভৈরবমরুদ্যৈস্তুরবস্তীর্ঘ্যতে
মীলমেঘতড়িৎকড়ারকুহরৈর্বিদ্যাদ্রিকুটৈরিব । (৩)

লবের সহিত রামের রূপসাদৃশ্য দেখিয়া, সুমন্ত্রের মনে এক
বার আশা জন্মিয়াই, সীতা নাই, এই কথা মনে পড়াতে সে
আশা তখনই নিবারিত হইল । ভাবিলেন, “লতায়ান্ পূর্ব-
লূনায়ান্ প্রসূনস্যাগমঃ কুতঃ !” বৃদ্ধ সুমন্ত্রের মুখে এই বাক্য
শুনিয়া, সহৃদয় পাঠকের রোমিও সম্বন্ধে বৃদ্ধ মণ্টাগুর মুখে
কীটদংশিত কুসুমকোরকের উপমা মনে পড়িবে ।

ষষ্ঠাঙ্কের বিষ্ণুস্তকটি বিশেষ মনোহর । বিদ্যারামিথুন, পপল-
মার্গে থাকিয়া লবচন্দ্রকেতুর যুদ্ধ দেখিতেছিলেন । যুদ্ধ তাহা-
দিগের কথোপকথনে বর্ণিত হইয়াছে । শ্রীযুক্ত ঈশ্বরচন্দ্র
বিদ্যাসাগর মহাশয় লিখিয়াছেন যে ভবভূতির কাব্যের “মধ্যে
মধ্যে সংস্কৃতে এবং প্রাকৃতে এমত দীর্ঘ সমাস ঘটিত রচনা
আছে, তাহাতে অর্থ বোধ ও রসগ্রহ সম্বন্ধে ব্যাঘাত ঘটিয়া

(৩) পাতালাভ্যন্তরবর্তী কুঞ্জমধ্যে রাশীকৃত অঙ্ককারের স্তায়
কৃকবর্ধ এবং উত্তপ্ত, প্রদীপ্ত পিতলের পিত্তলবৎ জ্যোতির্বিদ্যুৎ
জ্বলন্তকান্তগুলির দ্বারা আকাশমণ্ডল ব্রহ্মাণ্ড প্রলয়কালীন হুর্নিবার

উঠে । ভবভূতির অসাধারণ দোষ নির্বাচনকালে বিদ্যাসাগর মহাশয় এই কথা বলিয়াছেন । আমরা পূর্বে যাহা উত্তরচরিত হইতে উদ্ধৃত করিয়াছি, তন্মধ্যে এইরূপ দীর্ঘ সমাসের অনেক উদাহরণ পাওয়া যাইবে । এই বিকল্পক মধ্যে ঐরূপ দীর্ঘসমাসের বিশেষ আধিক্য । আমরা কয়েক টি উদ্ধৃত করিতেছি, যথা পুষ্পবৃষ্টি;—

“অবিরলললিতবিকচকনককমলকমনীয়স্তুতিঃ অমরতরু
তরুণ মণিমুকুলনিকরমকরন্দসুন্দরঃ পুষ্পানিপাতঃ ।”

পুনশ্চ, বাণসৃষ্ট অগ্নি ;—

“উচ্চগুবজ্রথণ্ডাবক্ষোৎপটুতরক্ষুলিঙ্গবিকৃতিঃ উত্তালতুন্দুল
লেলিহানজ্বালাসস্তারভৈরবো ভগবান্ উষর্কধুঃ ।”

পুনশ্চ, বাকুণাস্তসৃষ্ট মেঘ ;—

“অবিরলবিলোলধুম্মস্তবিজ্জুল্লাদাবিলাসমগ্নিদেহিং মন্তমোর
কুণ্ঠসামলেহিং জলহরেহিং ।”

এবং তৎকালে সৃষ্টির অবস্থা;—

“প্রবলবাতাবলিক্ফোভগস্তীরগুণগুণায়মানমেঘমেহুরাক্ককার-
নীরক্ষনিবন্ধম্ একবারবিশ্বগ্রসনবিকচবিকরালকালকণ্ঠকণ্ঠকন্দর-
বিবর্তমানমিব যুগান্তযোগনিদ্রানিরুদ্ধসর্ষদ্বারনারায়ণোদরনিবিষ্ট-
মিব ভূতজাতং প্রবেপতে ।”

ঐদৃশ দীর্ঘ সমাস যে রচনা-দোষ মধ্যে গণ্য, তাহা আমরা সীকার করি । যাহা কিছুতে অর্থ বোধের বিঘ্ন হয়, তাহাই দোষ । ঐদৃশ সমাসে অর্থ বোধের হানি, সুতরাং ইহা দোষ ।

উত্তরক বায়ুর দ্বারা বিক্ষিপ্ত এবং মেঘমিলিত বিদ্যাৎ কর্তৃক গিঙ্গল বর্ণ
এবং শুভাগুক্ত বিক্ষিপ্ত অগ্নির ব্যাপ্তবৎ দেখাইতেছে ।

নাটকে ইহা যে বিশেষ দোষ, তাহাও স্বীকার করি, কেন না ইহাতে নাটকের অভিনয়োপযোগিতার হানি হয়। তথাপি এই সমাসগুলি কবিত্ব পরিপূর্ণ, ইহা অবশ্য স্বীকার করিতে হইবে।

লব ও চন্দ্রকেতু যুদ্ধ করিতেছিলেন, এমন সময়ে রাম সেই স্থানে উপনীত হইলেন। তিনি উভয়কে যুদ্ধ হইতে নিরস্ত করিলেন। লব তাঁহাকে রাজা রামচন্দ্র বলিয়া জানিতে পারিয়া, ভক্তিভাবে প্রণাম ও নম্রভাবে তাঁহার সহিত আলাপ করিলেন। কুশও যুদ্ধ সম্বাদ শুনিয়া সে স্থানে উপস্থিত হইলেন, এবং লব কর্তৃক উপদিষ্ট হইয়া রামের সহিত সেইরূপ ব্যবহার করিলেন। রাম উভয়কে স্নেহ আলিঙ্গন এবং পিতৃযোগ্য প্রণয়সস্তাষণ করিতে লাগিলেন। পরে সকলে, বান্দীকির আশ্রমে, তৎপ্রণীত নাটকাভিনয় দেখিতে গেলেন।

তথায় রামানুজাক্রমে লক্ষ্মণ দ্রষ্টৃবর্গকে যথাস্থানে সন্নিবেশিত করিতে লাগিলেন। ব্রাহ্মণ, ক্ষত্রিয়, পৌরগণ, জনপদবাসী প্রজা, ও দেবাসুর এবং ইতর জীব, স্থাবর জঙ্গম সকলে ঋষিপ্রভাববলে সমাগত হইয়া, লক্ষ্মণকর্তৃক যথাস্থানে সন্নিবেশিত হইলেন। পরে অভিনয় আরম্ভ হইল। রাম ও লবকুশ দ্রষ্টৃবর্গ মধ্যে ছিলেন।

সীতা বিসর্জন বৃত্তান্তই এই অদ্ভুত নাটকের প্রথমাংশ। সীতা লক্ষ্মণকর্তৃক পরিত্যক্ত হইলে, তাঁহার কাতরতা, গঙ্গা-প্রবাহে দেহসমর্পণ, তন্মধ্যে যমলসন্তান প্রসব, গঙ্গা এবং পৃথিবী কর্তৃক তাঁহার ও শিশুদিগের রক্ষা, ও তৎসঙ্গে সীতার প্রস্থান ইত্যাদি অভিনীত হইল। দেখিয়া রাম মুচ্ছিত হইল।

লেন। তখন লক্ষ্মণ উঠেঃস্বরে বাগ্মীকিকে লক্ষ্য করিয়া বলিতে লাগিলেন, “ভগবন্ !” রক্ষা করুন ! আপনার কাব্যের কি মর্ম ?” নটদিগকে বলিলেন, “তোমরা অভিনয় বন্ধ কর।”

তখন সহসা দেবর্ষি কর্তৃক অন্তরীক্ষ ব্যাপ্ত হইল ! গঙ্গার বারিরাশি মথিত হইল। ভাগীরথী এবং পৃথিবীর সহিত জল মধ্য হইতে উঠিলেন—কে ? স্বয়ং সীতা। দেখিয়া লক্ষ্মণ বিস্মিত এবং আত্মাদিত হইয়া রামকে ডাকিলেন, “দেখুন ! দেখুন !” কিন্তু রাম তখনও অচেতন। তখন সীতা অরুক্ষতী-কর্তৃক আদিষ্টা হইয়া রামকে স্পর্শ করিলেন। বলিলেন “উঠ, আর্ধ্যপুত্র !”

রাম চেতনাপ্রাপ্ত হইলেন। পরে যাহা ঘটিল, বলা বাহুল্য। সেই সর্বলোক সমারোহ সমক্ষে সীতার সতীত্ব দেবগণকর্তৃক স্বীকৃত হইল। দেববাক্যে প্রজাগণ বুঝিল। সীতা লবকুশকেও পাইলেন। রামও তাঁহাদিগকে পুত্র বলিয়া চিনিলেন। পরে সপুত্রা ভার্য্যা গৃহে লইয়া গিয়া সুখে রাজ্য করিতে লাগিলেন।

নাটকের ভিতর এই নাটকখানি যিনি অভিনীত দেখিবেন বা পাঠ করিবেন, তিনিই যে অশ্রুপাত করিবেন, তাহিষয়ে সংশয় নাই। কিন্তু আমরা এতদংশ উদ্ধৃত করিলাম না। এই উপসংহার অপেক্ষা রামায়ণের উপসংহার অধিকতর মধুর এবং করুণ রসপূর্ণ। আমরা পাঠকের প্রীত্যর্থে তাহাই উদ্ধৃত করিতে বাসনা করি। বাগ্মীকি কর্তৃক সীতা অযোধ্যায় আনীত হইলেন। যে সূচনায় ঋষি সীতাকে আনয়ন করেন, তাহিষে বঙ্গীয় পাঠকমাত্রেই “সীতার বনবাস” পাঠ করিয়া অবগত আছেন।—সতীত্ব সন্দেহে শপথ করিলে সীতাকে গ্রহণ করিবেন,

রাম এই অভিপ্রায় প্রকাশ করিয়াছিলেন । এই কথা প্রচার হইলে পর, সীতা-শপথ দর্শনার্থে বহুলোকের সমাগম হইল ।

১০৯ সর্গ ।

তস্মাৎ রজত্যাং ব্যুষ্টায়াং যজ্ঞবাটং গতোনূপঃ ।
 ঋষীন্ সৰ্বান্ মহাতেজাঃ শকাপয়তি রাঘবঃ ॥
 বশিষ্ঠো বামদেবশ্চ জাবালিরথ কাশ্যপঃ ।
 বিশ্বামিত্রোদীর্ঘতপা দুর্কাসাশ্চ মহাতপাঃ ॥
 পুলস্ত্যাপি তথা শক্তিভাগবশ্চৈব বামনঃ ।
 মার্কণ্ডেয়শ্চ দীর্ঘায়ুর্মোকাল্যশ্চ মহাযশাঃ ॥
 গর্গশ্চ চ্যবনশ্চৈব শতানন্দশ্চ ধর্মবিৎ ।
 ভরদ্বাজশ্চ তেজস্বী অগ্নিপুত্রশ্চ সুপ্রভঃ
 নারদঃ পর্বতশ্চৈব গোতমশ্চ মহাযশাঃ ।
 এতেচাত্তেচ বহবো মুনয়ঃ সংশিতব্রতাঃ ॥
 কৌতূহলসমাবিষ্টাঃ সৰ্ব্বেব সমাগতাঃ ।
 রাক্ষসাশ্চ মহাবীৰ্যা বানরাশ্চ মহাবলাঃ ॥
 সৰ্ব্বেব সমাজগ্মু স্মহাত্মানঃ কুতূহলাং ।
 ক্ষত্রিয়া যেচ শূদ্রাশ্চ বৈশ্যাশ্চৈব সহস্রশঃ ॥
 নানাদেশাগতাশ্চৈব ব্রাহ্মণাঃ সংশিতব্রতাঃ ।
 সীতাশপথ বীক্ষার্থং সৰ্ব্বেব সমাগতাঃ ॥
 তদ্যু সমাগতং সৰ্বমশ্চাত্তমিবাচলং ।
 শ্রুত্বা মুনিবরস্তুর্গং সসীতঃ সমুপাগমং ॥
 তমৃষিং পৃষ্ঠতঃ সীতা অধগচ্ছদবাঙ্গুখী ।
 কৃতান্তলিক্ৰীম্পাকুলা কৃত্বা রামং মনোগতং ॥

তাংদৃষ্ট্বা শ্রুতিযায়াতীং ব্রহ্মণামনুগামিনীং ।
 বাল্মীকেঃ পৃষ্ঠতঃসীতাং সাধুবাদোমহানভূং ॥
 উতোহলহলাশকঃ সর্বেষামেবমাবভৌ ।
 দুঃখজন্মবিশালেন শোকেনাকুলিতাঙ্গনাং ॥
 সাধুরামেতি কেচিস্তু সাধুসীতেতি চাপরে ।
 উভাবেবচতত্রান্ত্রে প্রেক্ষকাঃ সংপ্রচুক্রুশুঃ ॥
 ততোমধ্যে জনৌষশ্চ প্রবিশু মুনিপুঙ্গবঃ ।
 সীতাসহায়ো বাল্মীকিরিতিহোবাচ রাঘবং ॥
 ইয়ং দাশরথে সীতা সূত্রতা ধর্মচারিণী ।
 অপবাদাং পরিত্যক্তা মমাশ্রমসমীপতঃ ॥
 লোকাপবাদভীতশ্চ তব রাম মহাব্রত ।
 প্রত্যয়ং দাশুতে সীতা তামনুজ্জাতুমর্হসি ॥
 ইমৌতু জানকীপুল্লাবুভৌচ যমজাতকৌ ।
 সূতো তবৈব দুর্দ্ধরৌ সত্যমেতদব্রবীমি তে ॥
 প্রচেতসোহং দশমঃ পুল্লোরাঘবনন্দন ।
 নস্মরাম্যনুতং বাক্যমিমৌতু তব পুল্লকৌ ॥
 বহুবর্ষ সহস্রাণি তপশ্চর্য্যা ময়া কৃত্য ।
 নোপান্ধীয়াং ফলন্তুশ্চাদুষ্টেয়ং যদি মৈথিলী ॥
 মনসা কৰ্ম্মণা বাচা ভূতপূর্বং নকিঞ্চিষং ।
 তশ্চাহং ফলমশ্বামি অপাপা মৈথিলী যদি ॥
 অহং পঞ্চসু ভূতেষু মনঃ ষষ্ঠেষু রাঘব ।
 বিচিন্ত্য সীতাশুদ্ধেতি জগ্রাহ বননিব্বরে ॥
 ইয়ং শুদ্ধসমাচার্য্য অপাপা পতিদেবতা ।
 লোকাপবাদভীতশ্চ প্রত্যয়ন্তব দাশুতি ॥

তন্মাদিয়ং নরবরাশ্চ শুদ্ধভাবা ।
 দিব্যেনদৃষ্টির্বিষয়েণ ময়া প্রদৃষ্টা ॥
 লোকাপবাদকলুষীকৃতচেতসা যৎ ।
 ত্যক্তা ত্বয়া প্রিয়তমা বিদিতাপি শুদ্ধা ॥

১১০ সর্গ ।

বান্দীকেনৈকমুক্তস্ত রাঘবঃ প্রত্যভাষত ।
 প্রাঞ্জলির্জগতো মধ্যে দৃষ্টা তাং দেববর্নিনীং ॥
 এবমেতন্মহাভাগ যথা বদসি ধর্ম্মবিৎ ।
 প্রত্যয়স্ত মমব্রহ্মংস্তববাক্যৈরকল্পমৈঃ ॥
 প্রত্যয়শ্চ পুরাদত্তো বৈদেহ্য সুরসন্নিধৌ ।
 শপথশ্চ কৃতস্তত্র তেন বেশ্য প্রবেশিতা ॥
 লোকাপবাদোবলবান্ যেন ত্যক্তাহি মৈথিলী ।
 সেয়ং লোকতয়াহব্রহ্মরূপাপেত্যভিজানতা ॥
 পরিত্যক্তা ময়া সীতা তন্তবান্ ক্ষমমর্হতি ।
 জ্ঞানামিচেমৌপুত্রৌ মে যমজাতৌকুশীলবৌ ॥
 শুদ্ধায়াং জগতোমধ্যে বৈদেহ্যাং প্রীতিরস্তুমে ।
 অভিপ্রায়ন্ত বিজ্ঞায় রামশ্চ সুরসন্তমাঃ ॥
 সীতায়্যাঃ শপথে তস্মিন্ সর্ষ্বেব সমাগতাঃ ।
 পিতামহং পুরঙ্কত্য সর্ষ্বেব সমাগতাঃ ॥
 আদিত্যা বসবো রুদ্রা বিশ্বেদেবা মরুদগাণাঃ ।
 সাধ্যাশ্চ দেবাঃ সর্ষ্বে তে সর্ষ্বেচ পরমর্ষয়ঃ ॥
 নাগাঃ সুপর্ণাঃ সিদ্ধাশ্চ তে সর্ষ্বে ছষ্টমানসাঃ ।
 দৃষ্ট্বা দেবানুষীংশ্চৈব রাঘবঃ পুনরব্রবীৎ ।

প্রত্যয়োগে মুনিশ্রেষ্ঠ ঋষিবাক্যৈরকল্পযৈঃ ।
 শুদ্ধায়াং জগতোমধ্যে বৈদেহ্যাং প্রীতিরঙ্গমে ॥
 সীতা শপথ সংভ্রান্তাঃ সর্বত্র সমাগতাঃ ।
 ততো বায়ুঃ শুভঃ পুণ্যো দিব্যগন্ধো মনোরমঃ ॥
 তং জনৌষং সুরশ্রেষ্ঠো হ্লাদয়ামাস সর্বতঃ ।
 তদদ্রুতমিবাচিন্ত্যং নিরৈক্ষন্ত সমাহিতাঃ ।
 মানবাঃ সর্বরাষ্ট্রেভ্যঃ পূর্বং কৃতযুগে বণা ॥
 সর্বান্ সমাগতান্ দৃষ্ট্বা সীতা কাষায়বাসিনী ।
 অব্রবীৎ প্রাঞ্জলি বাক্যমধোদৃষ্টিরবাধুখী ॥
 যথাহং রাঘবাদন্ত্যং মনসাপি নচিন্তয়ে ।
 তথা মে মাধবীদেবী বিবরং দাতুমর্হতি ॥
 মনসা কশ্মণা বাচা যথা রামং সমর্চয়ে ।
 তথা মে মাধবীদেবী বিবরং দাতুমর্হতি ॥
 যথৈতং সত্যমুক্তং মে বেদ্বি রামাং পরং নচ ।
 তথা মে মাধবী দেবী বিবরং দাতুমর্হতি ॥
 তথা শপন্ত্যাং বৈদেহ্যাং প্রাদুরাসীতদদ্রুতং ।
 ভূতলাদুখিতং দিব্যং সিংহাসনমনুত্তমং ॥
 ধ্রিয়মানং শিরোভিস্ত নাগৈরমিতবিক্রমৈঃ ।
 দিব্যং দিব্যেন বপুষা দিব্যরত্ন বিভূষিতৈঃ ॥
 তস্মিংশ্চ ধরণীদেবী বাহুভ্যাং গৃহ মৈথিলীং ॥
 স্বাগতে নাভিনন্দ্যে নামাসনে চোপবেশয়ং ॥
 তামাসনগতাং দৃষ্ট্বা প্রবিশন্তীং রসাতলং ।
 পুষ্পবৃষ্টিরবিচ্ছিন্না দিব্যা সীতামবাকিরং ॥
 সাধুকারণ্চ সুমহান্দেবানাং সহসোখিতঃ ।

সারুসাধিতিবৈসীতে বশ্যাস্তে শীলমীদৃশং ॥
 এবং বহুবিধাচোহিত্তুরীক্ষগতাঃ সুরাঃ ।
 ব্যাজহুর্হুমনসো দৃষ্ট্বা সীতা প্রবেশনং ॥
 ষড়্ভাটগতাশ্চাপি মুনয়ঃ সূর্য্যএবতে ।
 রাজানশ্চ নরব্যাত্ৰা বিস্ময়ান্নোপরেমিরে ॥
 অন্তুরীক্ষেচ ভূমোচ সর্বে শ্বাবর জঙ্গমাঃ ।
 দানবাশ্চ অহাকায়্যাঃ পাতালে পন্নগাধিপাঃ ॥
 কেচিদ্দিনেভুঃসংহৃষ্টাঃ কেচিক্যানপরায়ণাঃ ।
 কেচিদ্ভ্রামং নিরীক্ষন্তে কেচিং সীতামচেতসঃ ॥
 সীতা প্রবেশনং দৃষ্ট্বা তেষামাসীৎ সমাগমঃ ।
 তন্মুহূর্ত্তমিবাত্যর্থং সমং সম্মোহিতংজগৎ ॥ (১)

(১) সেই রজনী অতিবাহিত হইলে, মহাতেজা রাজা রামচন্দ্র ষড়্ভল গমন পূর্ব্বক ঋষি সকলকে আহ্বান করাইলেন । অনন্তর বশিষ্ঠ, বামদেব, কশ্যপ বংশোদ্ভব জাবালি, দীর্ঘতপা বিষ্ণামিত্র, মহাতপা হর্কাসা, পুলস্ত্যা, শক্তি, ভার্গব, বামন, দীর্ঘায়ু মার্কণ্ড, মহাযশা যৌকাল্য, গর্গ, চ্যবন, বর্ষস্ক শতানন্দ, তেজস্বী ভরদ্বাজ, অগ্নিপুত্র সুপ্রভ, নারদ, পর্কত, ও মহাযশা গোতম, এবং অন্যান্য মংগিতব্রত মুনিগণ কোতুহলাক্রান্ত হইয়া সকলেই সমাগত হইলেন । মহাবীৰ্য্য ব্রাহ্মসগণ ও মহাবল বানরগণ, মহাত্মা ক্ষত্রিয়গণ, এবং মহত্স মহত্স বৈশ্য ও শূদ্রগণ এবং নানা দেশাগত ব্রতধারী ব্রাহ্মণ সকল কুতুহল বশতঃ সীতাশপথ দর্শন জন্য সকলেই সমাগত হইলেন ।

মহর্ষি বাল্মীকি, তৎকালে সমাগত জনমণ্ডলী কোতুকদর্শনার্থ পর্কতবৎ দৃষ্টিগভাবে দণ্ডায়মান, ইহা শ্রবণ করিয়া সীতাসহিত শীঘ্র আগমন করিলেন । সীতাও কৃতাজ্জলি, বাস্পাকুল নয়না এবং অধোমুখী হইয়া মনোমধ্যে

আমরা উত্তরচরিত নাটকের প্রকৃত সমালোচন করি নাই । পাঠকের সহিত আনুপূর্বিক নাটক পাঠ করিয়া যেখানে যেখানে ভাল লাগিয়াছে, তাহাই দেখাইয়া দিয়াছি । গ্রন্থের প্রত্যেক অংশ পৃথক পৃথক করিয়া পাঠককে দেখাইয়াছি ।

রামকে চিত্তা করিতে করিতে সেই ঋষির পক্ষাৎ পক্ষাৎ গমন করিতে লাগিলেন । ব্রহ্মের অনুগামিনী ঋতির ন্যায় বাল্মীকির পক্ষাচ্ছিনী সেই সীতাকে দেখিবামাত্র সেই স্থলে অতি মহৎ সাধুবাদ হইতে লাগিল । তৎপরে দুঃখজ্জ অতিমহৎ শোক হেতু ব্যাধিতান্তঃকরণ জন সকলের বিপুল হলহলা শব্দ উথিত হইল । দর্শকবৃন্দমধ্যে কতকগুলি সাধু রাম, কতক-গুলি সাধু জানকী ও কতকগুলি উভয়ই সাধু, এই প্রকার কহিতে লাগিল ।

তদনন্তর মুনিশ্রেষ্ঠ বাল্মীকি সীতা সহিত জনবৃন্দমধ্যে প্রবিষ্ট হইয়া রামকে এইরূপ বলিতে লাগিলেন । হে দাশরথি ! ধর্ম্চারিণী, সুব্রতা, এই সীতা লোকাপবাদ হেতু আমার আশ্রম সমীপে পরিত্যক্তা হইয়া-
ছিলেন । হে মহাব্রত রাম ! ইনি এক্ষণে লোকাপবাদভীত তোমার নিকট প্রত্যয় প্রদান করিবেন ; তুমি অনুজ্ঞা কর । এই দুর্দ্ধম যমল জানকীপুত্র তোমারই পুত্র, ইহা আমি তোমাকে সত্য বলিতেছি । হে ব্রাহ্মবনন্দন ! আমি প্রচেতার দশম পুত্র, আমি মিথ্যা বাক্য স্বরণও করি না ; ইহারা তোমারই পুত্র । আমি বহু সহস্র বর্ষ তপস্যা করিয়াছি ; যদিপি এই জানকী দুষ্চারিণী হইলে তাহা হইলে আমি যেন তাহার ফল প্রাপ্ত না হই । কায়মনে এবং কৰ্ম্মদ্বারা আমি পূর্বে কখনই পাপাচরণ করি নাই ; যদিপি জানকী নিষ্পাপা হইলে তবে আমি যেন তাহার ফলভোগ করিতে পারি । হে ব্রাহ্ম ! আমি পঞ্চভূত ও ষষ্ঠ স্থানীয় মনেতে সীতাকে বিশুদ্ধ বিবেচনা করিয়াই বননিষ্কারে গ্রহণ করিয়াছিলাম । এই অপাপা পতিপরায়ণা দুষ্চারিণী, লোকাপবাদভীত

এরূপে গ্রন্থের প্রকৃত দোষগুণের ব্যাখ্যা হয় না। এক এক ধানি প্রস্তর পৃথক পৃথক করিয়া দেখিলে তাজমহলের গৌরব বুঝিতে পারা যায় না। একটি একটি বৃক্ষ পৃথক পৃথক করিয়া দেখিলে উদ্যানের শোভা অনুভূত করা যায় না।

তোমার নিকট প্রত্যয় প্রদান করিবেন। হে রাজনন্দন! যে হেতু তুমি তোমার এই প্রিয়তমকে বিশুদ্ধা জানিয়াও লোকাপবাদ ভয়ে পরিত্যাগ করিয়াছিলে, তজ্জন্যই দিব্যজ্ঞানে বিশুদ্ধা জানিয়াও এই শপথার্থ আদেশ করিয়াছি।

রাম বাল্মীকি কর্তৃক এইরূপ কথিত হইয়া এবং সেই দেববর্ধিনী জানকীকে দেখিয়া, কৃতাজলি পূর্বক জগৎস্থ জনগণের সমীপে এইরূপ বলিতে লাগিলেন। হে ধর্মজ্ঞ! হে মহাভাগ! আপনি যাহা বলিতেছেন তাহাই সত্য। হে ব্রহ্মন্! আপনার পবিত্র বাক্যেই আমার প্রত্যয় হইয়াছে, এবং বৈদেহীও লক্ষ্মণের পূর্বকালে দেবগণ সমীপে প্রত্যয় প্রদান ও শপথ করিয়াছেন তজ্জন্যই আমি ইহাকে গৃহে প্রেরিত করাইয়াছিলাম। হে ব্রহ্মন্! এই জানকীকে আমি পবিত্রা জানিয়াও শুদ্ধ লোকাপবাদ ভয়ে ত্যাগ করিয়াছি। আর যখন কুশীলব আমারই পুত্র, আমি তাহা জানি; কিন্তু আপনি আমাকে ক্ষমা করিবেন। আমি যেকারণে জানকীকে ত্যাগ করিয়াছি সেই লোকাপবাদ আমার পক্ষে সর্বাপেক্ষা বলবান্। জগৎস্থ পবিত্রা জানকীতে আমার প্রীতি থাকুক।

অনন্তর সীতা-শপথ বিষয়ে রামের অভিপ্রায় জানিয়া দেবগণ ব্রহ্মাকে পুরোবর্তী করিয়া সেই স্থলে সমাগত হইলেন এবং আদিত্যগণ বসুগণ ক্রতুগণ বিশ্বদেবগণ বায়ুগণ সকল সাধ্যগণ দেবগণ সকল পরমর্ষিগণ নাগগণ পক্ষিগণ সকলেই স্তম্ভাভঃকরণ হইয়া সে স্থলে আগমন করিলেন। রাম সমাগত সেই সকল দেবগণ ঋষিগণকে দেখিয়া পুনর্বার বাল্মীকিকে সম্বোধন করিয়া বলিতে লাগিলেন।

এক একটি অঙ্গ প্রত্যঙ্গ বর্ণনা করিয়া মনুষ্যমূর্তির অনির্ক-
নীয় শোভা বর্ণন করা যায় না। কোটি কলস জলের
আলোচনায় সাগরমাহাত্ম্য অনুভূত করা যায় না। সেইরূপ
কাব্যগ্রন্থের। এস্থান ভাল রচনা, এই স্থান মন্দ রচনা, এইরূপ

হে যুনিশ্রেষ্ঠ! পবিত্র ঋষিবাক্যে আমার প্রত্যয় আছে। জগতে
বিশুদ্ধশালিনী সীতার প্রতি আমার প্রীতি থাকুক; কিন্তু সীতাশপথ
দর্শনজন্য কোতূহলাক্রান্ত হইয়া সকলে সমাগত হইয়াছেন।

তখন দিব্য গন্ধবিশিষ্ট মনোহর এবং সর্সপাপপুণ্য-সাক্ষী পবিত্র
বায়ু প্রবাহিত হইয়া সেই জনবৃন্দকে আহ্বাদিত করিল। পূর্বকালে
সত্যযুগের ন্যায় সেই আশ্চর্য্য অচিন্তনীয় ব্যাপার, সকল রাষ্ট্র হইতে
সমাগত জনমণ্ডলী সমাহিত হইয়া দেখিতে লাগিল। কাষায়-বস্ত্র-
পরিধানা সীতা সকলকে সমাগত দেখিয়া অধোমুখী, অধোদৃষ্টি এবং
কৃতান্তলী হইয়া এইরূপ কহিতে লাগিলেন। যদি আমি মনেতেও
রাজ্য ভিন্ন অন্য চিন্তা না করিয়া থাকি, তবে পৃথিবীদেবী আমাকে
বিবর প্রদান করুন। যদি আমি কায়মনোবাক্যে রামার্চন করিয়া থাকি
তবে পৃথিবীদেবী আমাকে বিবর প্রদান করুন। “আমি রাজ্য ভিন্ন জানি
না,” আমার এই বাক্য যদি সত্য হয় তবে পৃথিবীদেবী আমাকে বিবর
প্রদান করুন।

বৈদেহী এইরূপ শপথ করিলে, তখন অমিতবিক্রম, দিব্য রত্নালঙ্কৃত
নাগগণ কর্তৃক মস্তকে বাহিত, দিব্যকান্তি, দিব্য সিংহাসন রসাতল
হইতে সহসা আবির্ভূত হইল এবং সেই স্থলে পৃথিবীদেবী দুই বাহুদ্বারা
সীতাকে গ্রহণ করিয়া এবং স্বাগত প্রশ্নে অভিনন্দন করিয়া সেই উত্তমা-
মানে উপবেশন করাইলেন।

সিংহাসনান্বিতা সেই সীতাকে রসাতলে প্রবেশ করিতে দেখিয়া তত্পরি
স্বর্গ হইতে পুষ্পবৃষ্টি হইতে লাগিল এবং দেবগণের অতি বিপুল সাধুবাদ

তাহার সৰ্বাংশের পর্য্যালোচনা করিলে প্রকৃত গুণাগুণ বুঝিতে পারা যায় না। যেমন অট্টালিকার সৌন্দর্য্য বুঝিতে গেলে সমুদয় অট্টালিকাটি এককালে দেখিতে হইবে, সাগরগৌরব অনুভূত করিতে হইলে, তাহার অনন্তবিস্তার এক কালে চক্ষে গ্রহণ করিতে হইবে, কাব্য নাটক সমালোচনও সেইরূপ। মহাভারত এবং রামায়ণের অনেকাংশ এমন অপকৃষ্ট, যে তাহা কেহই পড়িতে পারে না। যে আণুবীক্ষণিক সমালোচনার প্রবৃত্ত হইবে, সে কখনই এই দুই ইতিহাসের বিশেষ প্রশংসা করিবে না কিন্তু মোটের উপর দেখিতে গেলে বলিতে হইবে, যে এই দুই ইতিহাসের অপেক্ষা শ্রেষ্ঠ কাব্য পৃথিবীতে আর নাই।

সুতরাং উত্তরচরিত সম্বন্ধে মোটের উপর দুই চারিটা কথা না বলিলে নয়। অধিক বলিবার স্থান নাই।

হঠাৎ উখিত হইল। সীতার রসাতল প্রবেশ দেখিয়া অন্তরীক্ষগত দেব-গণ ছষ্টান্তঃকরণ হইয়া, “সীতা সাধু সীতা সাধু ষাঁহার এইরূপ চরিত্র” ইত্যাদি নানা প্রকার বাক্য কহিতে লাগিলেন। যজ্ঞস্থলগত সেই সকল মুনিগণ ও মনুষ্যশ্রেষ্ঠ রাজগণ এই অদ্ভুত ঘটনাহেতু বিস্ময় হইতে বিরত হইতে পারিলেন না। তৎকালে আকাশে, ভূতলে স্বাবর জন্ম পদার্থ, ও মহাকাশ দানবগণ এবং পাতালে নাগগণ সকলেই ছষ্টান্তঃকরণ হইয়া-ছিলেন। তাহারা ছষ্টমনে শব্দ করিতে লাগিলেন; কাহার বা ব্যানহ হইলেন, কাহারো বা রামকে দেখিতে লাগিলেন এবং কেহ কেহ বা নিঃসংজ্ঞ হইয়া সীতাকে অবলোকন করিতে লাগিলেন। এইরূপে সমাগত সেই সকল ঋষি প্রভৃতির সীতার রসাতল প্রবেশ দেখিয়া এই প্রকার সমাগম হইয়াছিল এবং সেই মুহূর্ত্তে সমুদার জগৎ সমকালেই মোহিত হইয়াছিল।

কবির প্রধান গুণ, সৃষ্টিক্ষমতা । যে কবি সৃষ্টিক্ষম নহেন, তাহার রচনায় অন্য অনেক গুণ থাকিলেও বিশেষ প্রশংসা নাই । কালিদাসের ঋতুসংহার, এবং টমসনের তদ্বিষয়ক কাব্যে, উৎকৃষ্ট বাহ্য প্রকৃতির বর্ণনা আছে । উভয় গ্রন্থই আদ্যোপান্ত সুমধুর, প্রসাদগুণবিশিষ্ট, এবং স্বভাবানুকারী । তথাপি এই দুই কাব্য প্রধান কাব্য বলিয়া গণ্য হইতে পারে না—কেন না তদুভয় মধ্যে সৃষ্টিচাতুর্য কিছুই নাই ।

সৃষ্টিক্ষমতা মাত্রই প্রশংসনীয় নহে । অনেক ইংরাজি অধ্যায়িকালেখকের রচনা মধ্যে নূতন সৃষ্টি অনেক আছে । তথাপি ঐ সকলকে অপকৃষ্ট গ্রন্থ মধ্যে গণনা করিতে হয় । কেন না সেই সকল সৃষ্টি স্বভাবানুকারণী এবং সৌন্দর্য্যবিশিষ্টা নহে । অতএব কবির সৃষ্টি স্বভাবানুকারণী এবং সৌন্দর্য্যবিশিষ্ট না হইলে, কোন প্রশংসা নাই ।

সৌন্দর্য্য এবং স্বভাবানুকারণিতা, এই দুয়ের একটি গুণ থাকিলেই, কবির সৃষ্টির কিছু প্রশংসা হইল বটে, কিন্তু উভয় গুণ না থাকিলে কবিকে প্রধান পদে অভিষিক্ত করা যায় না । আরব্য উপন্যাস বলিয়া যে বিখ্যাত আরব্য গ্রন্থের প্রচার হইয়াছে, তল্লেখকের সৃষ্টির মনোহারিত্ব আছে, সন্দেহ নাই । কিন্তু তাহাতে স্বভাবানুকারণিতা না থাকায় “আলেফ লয়লা” পৃথিবীর অতুৎকৃষ্ট কাব্যগ্রন্থ মধ্যে গণ্য নহে ।

কেবল স্বভাবানুকারণী সৃষ্টিরও বিশেষ প্রশংসা নাই । যেমন জগতে দেখিয়া থাকি, কবির রচনা মধ্যে তাহারই অবিকল প্রতিকৃতি দেখিলে কবির চিত্রনৈপুণ্যে প্রশংসা করিতে হয়, কিন্তু তাহাতে চিত্রনৈপুণ্যেরই প্রশংসা, সৃষ্টিচাতুর্য্যের প্রশংসা

কি ? আর তাহাতে কি উপকার হইল ? যাহা বাহিরে দেখি-
তেছি, তাহাই এত্রে দেখিলাম ; তাহাতে আমার লাভ হইল
কি ? যথার্থ প্রতিকৃতি দেখিয়া আমোদ আছে বটে—কেবল
স্বভাব-সঙ্গত গুণবিশিষ্টা সৃষ্টিতে সেই আমোদ মাত্র জন্মিয়া
থাকে । কিন্তু আমোদ ভিন্ন অন্য লাভ যে কাব্যে নাই, সে
কাব্য সামান্য বলিয়া গণিতে হয় ।

অনেকে এই কথা বিশ্বয়কর বলিয়া বোধ করিবেন । কি এ
দেশে, কি সুসভ্য ইউরোপীয় জাতি মধ্যে, অনেক পাঠকেরই
এইরূপ সংস্কার যে, ক্ষণিক চিত্তরঞ্জন ভিন্ন কাব্যের অন্য উদ্দেশ্য
নাই । বস্তুতঃ অধিকাংশ কাব্যে (বিশেষতঃ গদ্য কাব্যে বা
আধুনিক নবেলে) এই চিত্তরঞ্জন প্রবৃত্তিই লক্ষিত হয়—
তাহাতে চিত্তরঞ্জন ভিন্ন গ্রন্থকারের অন্য উদ্দেশ্য থাকে না ;
এবং তাহাতে চিত্তরঞ্জনোপযোগিতা ভিন্ন আর কিছু থাকেও
না । কিন্তু সে সকলকে উৎকৃষ্ট কাব্য বলিয়া গণা ঘাইতে
পারে না ।

যদি চিত্তরঞ্জনই কাব্যের উদ্দেশ্য হইল, তবে বেছামের
তর্কে দোষ কি ? * কাব্যেও চিত্তরঞ্জন হয়, শতরঞ্চ
খেলায়ও চিত্তরঞ্জন । হয় বরং অনেকেরই ঐবান্হো অপেক্ষা
একবাজি শতরঞ্চ খেলায় অধিক আমোদ হয় । তবে তাহা-
দের পক্ষে কাব্য হইতে শতরঞ্চ উৎকৃষ্ট বস্তু ? এবং স্কট্ কালি-
দাসাদি অপেক্ষা একজন পাকা খেলোয়ার বড় লোক ? অনেকে
বলিবেন যে, কাব্যপ্রদত্ত আনন্দ বিশুদ্ধ আনন্দ—সেই জন্য

* বেছাম বলেন, আমোদ সমান হইলে কাব্যের এবং 'পুস্পিব'
খেলায় একই দর ।

কাব্যের ও কবির প্রাধান্য । শতরকের আমোদ অবিশুদ্ধ
কিসে ?

এরূপ তর্ক যদি অযথার্থ না হয়, তবে চিত্তরঞ্জন ভিন্ন
কাব্যের মুখ্য উদ্দেশ্য আর কিছু অবশ্য আছেই আছে ।
সেটি কি ?

অনেকে উত্তর দিবেন, “নীতিশিক্ষা ।” যদি তাহা সত্য
হয়, তবে, “হিতোপদেশ” রঘুবংশ হইতে উৎকৃষ্ট কাব্য ।
কেন না বোধ হয়, হিতোপদেশে রঘুবংশ হইতে নীতি-বাহুল্য
আছে । সেই হিসাবে কথামালা হইতে শকুন্তলা কাব্যংশে
অপকৃষ্ট ।

কেহই এ সকল কথা স্বীকার করিবেন না । যদি তাহা না
করিলেন, তবে কাব্যের মুখ্য উদ্দেশ্য কি ? কি জন্য শতরক
খেলা ফেলিয়া শকুন্তলা পড়িব ?

কাব্যের উদ্দেশ্য নীতিজ্ঞান নহে—কিন্তু নীতিজ্ঞানের যে
উদ্দেশ্য, কাব্যেরও সেই উদ্দেশ্য । কাব্যের গৌণ উদ্দেশ্য
মনুষ্যের চিত্তোৎকর্ষ সাধন—চিত্তশুদ্ধি জনন । কবিরা জগতের
শিক্ষাদাতা — কিন্তু নীতিব্যাখ্যার দ্বারা তাঁহারা শিক্ষা
দেন না । কথাগুলোও নীতিশিক্ষা দেন না । তাঁহারা সৌন্দ-
র্যের চরমোৎকর্ষ স্বজনের দ্বারা জগতের চিত্তশুদ্ধি বিধান
করেন । এই সৌন্দর্যের চরমোৎকর্ষের সৃষ্টি কাব্যের মুখ্য
উদ্দেশ্য । প্রথমোক্তটি গৌণ উদ্দেশ্য, শেষোক্তটি মুখ্য উদ্দেশ্য ।

কথাটা পরিষ্কার হইল না । যদিও উত্তরচরিত সমালোচন
পক্ষে এ কথা আর অধিক পরিষ্কার করিবার প্রয়োজন নাই, তথাপি
প্রস্তাবের গৌরবানুরোধে আমরা তাহাতে প্রবৃত্ত হইলাম ।

চোর চুরি করে । রাজা তাহাকে বলিলেন, “তুমি চুরি করিও না ; আমি তাহা হইলে তোমাকে অবরুদ্ধ করিব ।” চোর ভয়ে প্রকাশ্য চুরি হইতে নিবৃত্ত হইল, কিন্তু তাহার চিত্তশুদ্ধি জন্মিল না । সে যখনই বুঝিবে, চুরি করিলে রাজা জানিতে পারিবেন না, তখনই চুরি করিবে ।

তাহাকে ধর্মোপদেশক বলিলেন, “তুমি চুরি করিও না— চুরি ঈশ্বরাজ্ঞাবিরুদ্ধ ।” চোর বলিল, “তাহা হইতে পারে, কিন্তু ঈশ্বর যখন আমার আহারের অপ্রতুল করিয়াছেন, তখন আমি চুরি করিয়াই খাইব ।” ধর্মোপদেশক বলিলেন, “তুমি চুরি করিলে নরকে যাইবে ।” চোর বলিল, “তদ্বিষয়ে প্রমাণাভাব ।”

নীতিবেত্তা কহিতেছেন, “তুমি চুরি করিও না, কেননা চুরিতে সকল লোকের অনিষ্ট, যাহাতে সকল লোকের অনিষ্ট, তাহা কাহারও কর্তব্য নহে ।” চোর বলিবে, “যদি সকল লোক আমার জন্য ভাবিত, আমি তাহা হইলে সকলের জন্য ভাবিতে পারিতাম । লোকে-আমায় খেতে দিক্, আমি চুরি করিব না । কিন্তু যেখানে লোকে আমায় কিছু দেয় না, সেখানে তাহাদের অনিষ্ট হয় হউক, আমি চুরি করিব ।”

কবি চোরকে কিছু বলিলেন না, চুরি করিতে নিষেধ করিলেন না । কিন্তু তিনি এক সর্বজনমনোহর পবিত্র চরিত্র স্বজন করিলেন । সর্বজনমনোহর, তাহাতে চোরেরও মন মুগ্ধ হইবে । মনুষ্যের স্বভাব, যে যাহাতে মুগ্ধ হয়, পুনঃ পুনঃ চিত্ত প্রীত হইয়া তদালোচনা করে । তাহাতে আকাজ্ঞা জন্মে—কেননা লাভাকাজ্ঞার নামই অনুরাগ । এইরূপে পবিত্রতার

প্রতি চোরের অনুরাগ জন্মে । সুতরাং চুরি প্রভৃতি অপবিত্র কার্যে সে বীতরাগ হয় ।

“আত্মপরায়ণতা মন্দ—তুমি আত্মপরায়ণ হইও না ।” এই নৈতিক উক্তি রামায়ণ নহে । কথাচ্ছলে এই নীতি প্রতিপন্ন করিবার জন্য রামায়ণের প্রণয়ন হয় নাই । কিন্তু রামায়ণ হইতে ভারতবর্ষের আত্মপরায়ণতা দোষ যতদূর পরিহার হই-
য়াছে, ততদূর, কোন নীতিবেত্তা, ধর্মবেত্তা, সমাজকর্তা, বা রাজা বা রাজকর্মচারীকর্তৃক হয় নাই । “সুবেবেচক পাঠকের
এতক্ষণ বোধ হইয়া থাকিবেক, যে উদ্দেশ্য এবং সফলতা
উভয় বিবেচনা করিলে, রাজা, রাজনীতিবেত্তা, ব্যব-
স্থাপক, সমাজতত্ত্ববেত্তা, ধর্মোপদেষ্টা, নীতিবেত্তা, দার্শনিক,
বৈজ্ঞানিক সর্বাপেক্ষাই কবির শ্রেষ্ঠত্ব । কবিত্ব পক্ষে যেরূপ
মানসিক ক্ষমতা আবশ্যিক, তাহা বিবেচনা করিলেও কবির
সেইরূপ প্রধান্য । কবিরা জগতের শ্রেষ্ঠ শিক্ষাদাতা,
এবং উপকারকর্তা, এবং সর্বাপেক্ষা অধিক মানসিকশক্তি-
সম্পন্ন ।

কি প্রকারে কাব্যকারেরা এই মহৎ কার্য সিদ্ধ করেন ?
যাহা সকলের চিত্তকে আকৃষ্ট করিবে, তাহার সৃষ্টির দ্বারা ।
সকলের চিত্তকে আকৃষ্ট করে, সে কি ? সৌন্দর্য্য ; অতএব
সৌন্দর্য্য সৃষ্টিই কাব্যের মুখ্য উদ্দেশ্য । সৌন্দর্য্য অর্থে কেবল
বাহ্য প্রকৃতির বা শারীরিক সৌন্দর্য্য নহে । সকল প্রকারের
সৌন্দর্য্য বুদ্ধিতে হইবেক । যাহা স্বভাবানুকারী নহে, তাহাতে
কুসংস্কারাবিষ্ট লোক ভিন্ন কাহারও মন মুগ্ধ হয় না । এ জন্ত
স্বভাবানুকারিতা সৌন্দর্য্যের একটি গুণ মাত্র—স্বভাবানু-

কারিতা ছাড়া সৌন্দর্য্য জন্মে না। তবে যে আমরা স্বভাবানুকৃ-
কারিতা এবং সৌন্দর্য্য দুইটি পৃথক' গুণ বলিয়া নির্দেশ
করিয়াছি, তাহার কারণ, সৌন্দর্য্যের অনেক অর্থ প্রচলিত
আছে।

আর একটি কথা বুঝাইলেই হয়। এই জগৎ ত সৌন্দর্য্যময়
—তাহার প্রতিকৃতি মাত্রই সৌন্দর্য্যময় হইবে। তবে কেন
আমরা উপরে বলিয়াছি যে, যাহা প্রকৃতির প্রতিকৃতি মাত্র সে
সৃষ্টিতে কবির তাদৃশ গৌরব নাই? তাহার কারণ, সে কেবল
প্রতিকৃতি—অনুলিপি মাত্র— তাহাকে “সৃষ্টি” বলা যায় না।
যাহা সতের প্রতিকৃতি মাত্র নহে—তাহাই সৃষ্টি। যাহা স্বভাবা-
নুকরী, অথচ স্বভাবাতিরিক্ত, তাহাই কবির প্রশংসনীয় সৃষ্টি।
তাহাতেই চিত্ত বিশেষরূপে আকৃষ্ট হয়। যাহা প্রকৃত,
তাহাতে তাদৃশ চিত্ত আকৃষ্ট হয় না। কেন না, তাহা অসম্পূর্ণ,
দোষ সংস্পৃষ্ট, পুরাতন, এবং অনেক সময়ে অস্পষ্ট। কবির
সৃষ্টি তাঁহার স্বেচ্ছাধীন—সুতরাং সম্পূর্ণ, দোষশূন্য, নবীন,
এবং স্পষ্ট হইতে পারে।

এইরূপ যে সৌন্দর্য্যসৃষ্টি কবির সর্কপ্রধান গুণ—সেই
অভিনব, স্বভাবানুকরী, স্বভাবাতিরিক্ত সৌন্দর্য্য-সৃষ্টি-গুণে,
ভারতবর্ষীয় কবিদিগের মধ্যে বান্দীকি এবং মহাভারতকার
প্রধান। এক এক কাব্যে ঐদৃশ সৃষ্টিবৈচিত্র্য প্রায় জগতে
হুল'ভ।

এ সম্বন্ধে ভবভূতির স্থান কোথায়? তাহা তাঁহার তিন
খানি নাটক পর্য্যালোচিত না করিলে অবধারিত করা যায় না।
তাহা আমাদের উদ্দেশ্য নহে। কেবল উত্তরচরিত দেখিয়া

তাঁহাকে অতি উচ্চাসন দেওয়া যায় না। উত্তরচরিতে ভবভূতি অনেক দূর পর্য্যন্ত বাণীকির অনুবর্তী হইতে বাধ্য হইয়াছেন, সুতরাং তাঁহার সৃষ্টিমধ্যে নবীনত্বের অভাব, এবং সৃষ্টিচাতুর্যের প্রচার করিবার পথও পান নাই। চরিত্র স্বজন সম্বন্ধে ইহা বলা ঘাইতে পারে, যে রাম ও সীতা ভিন্ন কোন নায়ক নায়িকার প্রাধান্য নাই। সীতা, রামায়ণের সীতার প্রতিকৃতি মাত্র। রামের চরিত্র, রামায়ণের রামের চরিত্রের ঔৎকৃষ্ট প্রতিকৃতিও নহে—ভবভূতির হস্তে সে মহচ্চিত্র যে বিকৃত হইয়া গিয়াছে, তাহা পূর্বেই প্রতিপন্ন করা গিয়াছে। সীতাও তাঁহার কাছে, অপেক্ষাকৃত পরসাময়িক স্ত্রীলোকের চরিত্র কতকদূর পাইয়াছেন।

তাই বলিয়া এমত বলা যায় না যে, উত্তরচরিতে চরিত্র-সৃষ্টি-চাতুর্য কিছুই লক্ষিত হয় না। বাসন্তী ভবভূতির অভিনব সৃষ্টি বটে, এবং এ চরিত্র অত্যন্ত মনোহর। আমরা বাসন্তীর চরিত্রের সবিশেষ পরিচয় দিয়াছি, সুতরাং তৎসম্বন্ধে আর বিস্তারের আবশ্যক নাই। এই পরদুঃখকাতরহৃদয়া, স্নেহময়ী, বনচারিণী যে অবধি প্রথম দেখা দিলেন, সেই অবধিই তাঁহার প্রতি পাঠকের প্রীতি সঞ্চার হইতে থাকিল।

তন্নিম্ন চন্দ্রকেতু ও লবের চিত্রও প্রশংসনীয়। প্রাচীন কবিদিগের ন্যায় ভবভূতিও জড়পদার্থকে রূপবান্ করণে বিলক্ষণ সূচতুর। তমসা, মুরলা, গঙ্গা, এবং পৃথিবী এই নাটকে মানবীরূপিণী। সেই রূপগুলিন যে মনোহর হইয়াছে, তাহা পূর্বেই বলিয়াছি।

কবির সৃষ্টি—চরিত্র, রূপ, স্থান, অবস্থা, কার্যাদিতে পরিণত

হয়। ইহার মধ্যে কোন একটির সৃষ্টি কবির উদ্দেশ্য হওয়া উচিত নহে। সকলের সংযোগে সৌন্দর্যের সৃষ্টিই তাঁহার মুখ্য উদ্দেশ্য। চরিত্র, রূপ, স্থান, অবস্থা, কার্য, এ সকলের সম-
বায়ে বাহা দাঁড়াইল, তাহা যদি সুন্দর হইল, তবেই কবি
সিদ্ধকাম হইলেন।

ভবভূতির চরিত্রস্বজনের ক্ষমতার পরিচয় দিয়াছি। অন্যান্য
বিষয়ে তাঁহার স্বজনকৌশলের পরিচয় ছায়া নামে উত্তরচরিতের
তৃতীয়াক্ষ। আমাদিগের পরিশ্রম যদি নিষ্ফল না হইয়া থাকে,
তবে পাঠক সেই ছায়ার মোহিনীশক্তি অনুভূত করিয়াছেন।
ঐদৃশ রমণীয়া সৃষ্টি অতি দুর্লভ।

সৃষ্টি-কৌশল কবির প্রধান গুণ। কবির আর একটি বিশেষ
গুণ রসোক্তাবন। রসোক্তাবন কাহাকে বলে, আমরা বুঝাইতে
বাসনা করি, কিন্তু রস শব্দটি ব্যবহার করিয়াই আমরা সে পথে
কাটা দিয়াছি। এ দেশীয় প্রাচীন আলঙ্কারিকদিগের ব্যবহৃত
শব্দগুলি একালে পরিহার্য। ব্যবহার করিলেই বিপদ ঘটে।
আমরা সাধ্যানুসারে তাহা বর্জন করিয়াছি, কিন্তু এই রস শব্দটি
ব্যবহার করিয়া বিপদ ঘটিল। নয়টি বৈ রস নয়, কিন্তু মনুষ্য-
চিত্তবৃত্তি অসংখ্য। রতি, শোক, ক্রোধ, স্থায়িত্ব ; কিন্তু হর্ষ,
অমর্ষ প্রভৃতি ব্যতিচারী ভাব। স্নেহ, প্রণয়, দয়া ইহাদের
কোথাও স্থান নাই ;—না স্থায়ী, না ব্যতিচারী—কিন্তু একটি
কাব্যানুপযোগী কদর্য মানসিক বৃত্তি আদিরসের আকারস্বরূপ
স্থায়ী ভাবে প্রথমে স্থান পাইয়াছে। স্নেহ, প্রণয়, দয়াদিপরি-
জ্ঞাপক রস নাই ; কিন্তু শান্তি একটি রস। সুতরাং এবিধ
পারিত্যয়িক শব্দ লইয়া সমালোচনার কার্য সম্পন্ন হয় না।

আমরা যাহা বলিতে চাই, তাহা অন্য কথায় বুঝাইতেছি—
আলঙ্কারিকদিগকে প্রণাম করি ।

মনুষ্যের কার্যের মূল তাহাদিগের চিন্তাবৃত্তি । সেই সকল
চিন্তাবৃত্তি অবস্থানুসারে অত্যন্ত বেগবতী হয় । সেই বেগের সমু-
চিত বর্ণনদ্বারা সৌন্দর্যের স্বজন, কাব্যের উদ্দেশ্য । অস্বাদে-
শীয় আলঙ্কারিকেরা সেই বেগবতী মনোবৃত্তিগণকে “স্থায়ী ভাব”
নাম দিয়া এ শব্দের একরূপ পরিভাষা করিয়াছেন যে, প্রকৃত
কথা বুঝা ভার । ইংরাজী আলঙ্কারিকেরা তাহাকে (Passions)
বলেন । আমরা তাহার কাব্যগত প্রতিকৃতিকে রসোদ্ভাবন
বলিলাম ।

রসোদ্ভাবনে ভবভূতির ক্ষমতা অপরিমিত । যখন যে রস
উদ্ভাবনের ইচ্ছা করিয়াছেন, তখনই তাহার চরম দেখাইয়াছেন ।
তাঁহার লেখনী-মুখে স্নেহ উছলিতে থাকে—শোক দাহিতে
থাকে, দস্ত ফুলিতে থাকে । ভবভূতির মোহিনীশক্তি প্রভাবে
আমরা দেখিতে পাই যে, রামের শরীর ভাঙ্গিতেছে ; মর্ম্ম
ছিঁড়িতেছে ; মস্তক ঘুরিতেছে ; চেতনা লুপ্ত হইতেছে—
দেখিতে পাই, সীতা কখন বিষয়স্তিমিতা ; কখন আনন্দোখিতা ;
কখন প্রেমাভিভূতা ; কখন অভিমানকুণ্ঠিতা ; কখন আত্মাব-
মাননা সঙ্কচিতা ; কখন অনুতাপবিবশা ; কখন মহাশোকে
ব্যাকুলা । কবি কখন যাহা দেখাইয়াছেন, একেবারে নারক
নারিকার স্বদয় বেন বাহির করিয়া দেখাইয়াছেন । যখন সীতা
বলিলেন, “অম্মহে—জলতরিদমেহ খণিদগস্তীর মংসলো
কুদোণু এসো ভারদী নিগ্‌যোসো ! ভরিজ্জমাণকগবিবরং মং বি
মন্দভাইনিং কতি উম্মাবেদি !” তখন বোধ হইল, জগৎসংসার

সীতার প্রেমে পরিপূর্ণ হইল। ফলে রসোদ্ভাবনী শক্তিতে ভবভূতি পৃথিবীর প্রধান কবিদিগের সহিত তুলনীয়। একটি মাত্র কথা বলিয়া মানবমনোর্বৃত্তির সমুদ্রবৎ সীমাশূন্যতা চিত্রিত করা, মহাকবির লক্ষণ। ভবভূতির রচনা সেই লক্ষণাক্রান্ত। পরিতাপের বিষয় এই যে, সে শক্তি থাকিতেও ভবভূতি রাম-বিলাপের এত বাহুল্য করিয়াছেন। ইহাতে তাহার বশের লাঘব হইয়াছে।

আমাদিগের ইচ্ছা ছিল যে, এই রামবিলাপের সহিত, আর কয় খানি প্রসিদ্ধ নাটকের কয়েকটি স্থান তুলিত করিয়া ভারতম্য দেখাই। কিন্তু স্থানাভাবে পারিলাম না। সহৃদয় পাঠক, শকুন্তলার জন্য দুঃস্বপ্নের বিলাপ, দেস্দিমোনার জন্য ওথেলোর বিলাপ, এবং ইউরিপিদিসের নাটকে আল্কেস্তিসের জন্য আদমিতসের বিলাপ, এই রামবিলাপের সঙ্গে তুলনা করিয়া দেখিবেন।

বাহু প্রকৃতির শোভার প্রতি প্রগাঢ় অনুরাগ ভবভূতির আর একটি গুণ। সংসারে যেখানে যাহা সুদৃশ্য, সুগন্ধ, বা সুখকর ভবভূতি অনবরত তাহার সন্ধানে ফিরেন। মালাকার যেমন পুষ্পোদ্যান হইতে সুন্দর সুন্দর কুসুমগুলি তুলিয়া সভামগুণ রঞ্জিত করে, ভবভূতি সেইরূপ সুন্দর বস্তু অবকীর্ণ করিয়া এই নাটক খানি শোভিত করিয়াছেন। যেখানে সুদৃশ্য বৃক্ষ, প্রফুল্ল-কুসুম, সুশীতল সুবাসিত বারি,—যেখানে নীল মেঘ, উত্তঙ্গ পর্বত, মৃদুনির্নাদিনী নির্ঝরিনী, শ্যামল কানন, তরঙ্গসঙ্কল। নদী—যেখানে সুন্দর বিহঙ্গ, ক্রীড়াশীল করিশাবক, সরলস্ৰভাব কুরঙ্গ—সেই খানে কবি দাঁড়াইয়া একবার তাহার সৌন্দর্য

দেখাইয়াছেন। কবিদিগের মধ্যে এই গুণটি সেকপীয়র ও কালিদাসের বিশেষ লক্ষণীয়। ভবভূতিরও সেই গুণ বিশেষ প্রকাশমান।

ভবভূতির ভাষা অতিচমৎকারিণী। তাঁহার রচনা সমাসবহুলতা ও দুর্বোধ্যতা দোষে কলঙ্কিতা বলিয়া বিদ্যাসাগর মহাশয় কর্তৃক নিন্দিত হইয়াছে। সে নিন্দা সমূলক হইলে ও সাধারণতঃ যে ভবভূতির ব্যবহৃত সংস্কৃত ও প্রাকৃত অতিমনোহর, তদ্বিষয়ে সংশয় নাই। উইলসন বলিয়াছেন যে, কালদাস ও ভবভূতির ভাষার ন্যায় মহতী ভাষা কোন দেশের লেখকেই দৃষ্ট হয় না।

উত্তরচরিতের যে সকল দোষ, তাহা আমরা যথাস্থানে বিবৃত করিয়াছি—পুনরুল্লেখের আবশ্যিক নাই। আমরা এই নাটকের সমালোচনা সমাপন করিলাম। অন্যান্য দোষের মধ্যে দৈর্ঘ্য দোষে এই সমালোচন বিশেষ দূষিত হইয়াছে। এজন্য আমরা কুণ্ঠিত নহি। যে দেশে তিন ছত্রে সচরাচর গ্রন্থসমালোচনা সমাপ্ত করা প্রথা, সে দেশে একখানি প্রাচীন গ্রন্থের সমালোচন দীর্ঘ হইলে দোষটি মার্জ্জনাভীত হইবে না। যদি ইহার দ্বারা একজন পাঠকেরও কাব্যানুরাগ বর্দ্ধিত হয়, বা তাঁহার কাব্যরসগ্রাহিণী শক্তির কিঞ্চিন্মাত্র সহায়তা হয়, তাহা হইলেই এই দীর্ঘ প্রবন্ধ আমরা সফল বিবেচনা করিব।

গািতিকাব্য ।*



কাব্য কাহাকে বলে, তাহা অনেকে বুঝাইবার জন্য যত্ন করিয়াছেন, কিন্তু কাহারও যত্ন সফল হইয়াছে কি না সন্দেহ । ইহা স্বীকার করিতে হইবে, যে দুই ব্যক্তি কখন এক প্রকার অর্থ করেন নাই । কিন্তু কাব্যের যথার্থ লক্ষণ সম্বন্ধে, মতভেদ থাকিলেও কাব্য একই পদার্থ সন্দেহ নাই । সেই পদার্থ কি, তাহা কেহ বুঝাইতে পারুন বা না পারুন, কাব্যপ্রিয় ব্যক্তি মাত্রেই এক প্রকার অনুভব করিতে পারেন ।

কাব্যের লক্ষণ যাহাই হউক না কেন, আমাদের বিবেচনায় অনেকগুলিন গ্রন্থ, যাহার প্রতি সচরাচর কাব্য নাম প্রযুক্ত হয় না, তাহাও কাব্য । মহাভারত, রামায়ণ ইতিহাস বলিয়া খ্যাত হইলেও তাহা কাব্য ; শ্রীমদ্ভাগবত পুরাণ বলিয়া খ্যাত হইলেও তাহা অংশবিশেষে কাব্য; স্কটের উপন্যাসগুলিকে আমরা উৎকৃষ্ট কাব্য বলিয়া স্বীকার করি ; নাটককে আমরা কাব্য মধ্যে গণ্য করি তাহা বলা বাহুল্য ।

ভারতবর্ষীয় এবং পাশ্চাত্য অলঙ্কারিকেরা কাব্যকে নানা শ্রেণীতে বিভক্ত করিয়াছেন । তাহার মধ্যে অনেকগুলিন

* অবকাশরঞ্জিনী । কলিকাতা ।

বিভাগ অনর্থক বলিয়া বোধ হয়। তাঁহাদিগের কথিত তিনটি শ্রেণী গ্রহণ করিলেই যথেষ্ট হয়, যথা, ১ম দৃশ্যকাব্য; অর্থাৎ নাটকাদি; ২য়, আখ্যানকাব্য অথবা মহাকাব্য; রঘুবংশের ন্যায় বংশাবলীর উপাখ্যান, রামায়ণের ন্যায় ব্যক্তিবিশেষের চরিত, শিশুপালবধের ন্যায় ঘটনা-বিশেষের বিবরণ, সকলই ইহার অন্তর্গত; বাসবদত্তা, কাদম্বরী প্রভৃতি গদ্য কাব্য ইহার অন্তর্গত, এবং আধুনিক উপন্যাস সকল এই শ্রেণীভুক্ত। ৩য়, খণ্ডকাব্য। যে কোন কাব্য প্রথম ও দ্বিতীয় শ্রেণীর অন্তর্গত নহে, তাহাকেই আমরা খণ্ড কাব্য বলিলাম।

দেখা যাইতেছে যে এই ত্রিবিধ কাব্যের রূপগত বিলক্ষণ বৈষম্য আছে। কিন্তু রূপগত বৈষম্য প্রকৃত বৈষম্য নহে। দৃশ্যকাব্য সচরাচর কথোপকথনেই রচিত হয়, এবং রঙ্গাঙ্গনে অভিনীত হইতে পারে, কিন্তু যাহাই কথোপকথনে গ্রন্থিত, এবং অভিনয়োপযোগী তাহাই যে নাটক বা তচ্ছ্রেণীস্থ এমত নহে। এদেশের লোকের সাধারণতঃ উপরোক্ত ভ্রান্তিমূলক সংস্কার আছে। এই জন্য নিত্য দেখা যায়, যে কথোপকথনে গ্রন্থিত অসংখ্য পুস্তক নাটক বলিয়া প্রচারিত, পঠিত, এবং অভিনীত হইতেছে। বাস্তবিক তাহার মধ্যে অনেকগুলিই নাটক নহে। পাশ্চাত্য ভাষায় অনেকগুলি উৎকৃষ্ট কাব্য আছে, যাহা নাটকের ন্যায় কথোপকথনে গ্রন্থিত, কিন্তু বস্তুতঃ নাটক নহে। “Comus,” “Manfred” “Faust,” ইহার উদাহরণ। অনেকে শকুন্তলা, ও উত্তর রামচরিতকেও নাটক বলিয়া স্বীকার করেন না। তাঁহারা বলেন, ইংরাজি ও গ্রীক ভাষা ভিন্ন কোন ভাষায় প্রকৃত নাটক নাই। পক্ষান্তরে গেটে বলিয়াছেন

যে প্রকৃত নাটকের পক্ষে, কথোপকথনে গ্রন্থন, বা অভিনয়ের উপযোগিতা নিতান্ত আবশ্যিক নহে। আমাদের বিবেচনায় “Bride of Lammermoor” কে নাটক বলিলে অন্তায় হয় না। ইহাতে বুঝা যাইতেছে, যে আখ্যান কাব্যও নাটকাকারে প্রণীত হইতে পারে ; অথবা গীত পরম্পরায় সন্নিবেশিত হইয়া গীতিকাব্যের রূপ ধারণ করিতে পারে। বাঙ্গালা ভাষায় শেষোক্ত বিষয়ের উদাহরণের অভাব নাই। পক্ষান্তরে, দেখা গিয়াছে অনেক খণ্ডকাব্য মহাকাব্যের আকারে রচিত হইয়াছে। যদি কোন একটি সামান্য উপাখ্যানের সূত্রে গ্রন্থিত কাব্যমালাকে আখ্যান কাব্য বা মহাকাব্য নাম দেওয়া বিধেয় হয়, তবে “Excursion” এবং “Childe Harold” কে ঐ নাম দিতে হয়। কিন্তু আমাদের বিবেচনায় ঐ দুই কাব্য খণ্ডকাব্যের সংগ্রহ মাত্র।

খণ্ডকাব্য মধ্যে আমরা অনেক প্রকার কাব্যের স্থান করিয়াছি। তন্মধ্যে এক প্রকার কাব্য প্রাধান্য লাভ করিয়া ইউরোপে গীতিকাব্য (Lyric) নামে খ্যাত হইয়াছে। অদ্য সেই শ্রেণীর কাব্যের কথায় আমাদের প্রয়োজন।

ইউরোপে কোন বস্তু একটি পৃথক্ নাম প্রাপ্ত হইয়াছে বলিয়া, আমাদের দেশেও যে একটি পৃথক্ নাম দিতে হইবে এমত নহে। যেখানে বস্তুগত কোন পার্থক্য নাই, সেখানে নামের পার্থক্য অনর্থক এবং অনিষ্টজনক। কিন্তু যেখানে বস্তুগুলি পৃথক্, সেখানে নামও পৃথক্ হওয়া আবশ্যিক। যদি এমত কোন বস্তু থাকে যে তাহার জন্য গীতিকাব্য নামটি গ্রহণ করা আবশ্যিক, তবে অবশ্য ইউরোপের নিকট আমাদের কাছ হইতে হইবে।

গীত মনুষ্যের এক প্রকার স্বভাবজাত । মনের ভাব কেবল কথায় ব্যক্ত হইতে পারে, কিন্তু কণ্ঠভঙ্গীতে তাহা স্পষ্টীকৃত হয় । “আঃ” এই শব্দ কণ্ঠভঙ্গীর গুণে দুঃখবোধক হইতে পারে, বিরক্তিবাদক হইতে পারে, এবং ব্যঙ্গোক্তিও হইতে পারে । “তোমাকে না দেখিয়া আমি মরিলাম !” ইহা শুধু বলিলে, দুঃখ বুঝাইতে পারে, কিন্তু উপযুক্ত স্বরভঙ্গীর সহিত বলিলে দুঃখ শতগুণ অধিক বুঝাইবে । এই স্বরবৈচিত্রের পরিণামই সঙ্গীত । সুতরাং মনের বেগ প্রকাশের জন্য আগ্রহাতিশয্য প্রযুক্ত, মনুষ্য সঙ্গীতপ্রিয়, এবং তৎসাধনে স্বভাবতঃ যত্নশীল ।

কিন্তু অর্থযুক্ত বাক্য ভিন্ন চিত্তভাব ব্যক্ত হয় না, অতএব সঙ্গীতের সঙ্গে বাক্যের সংযোগ আবশ্যিক । সেই সংযোগোৎপন্ন পদকে গীত বলা যায় ।

গীতের জন্য বাক্যবিশ্রাস করিলে দেখা যায়, যে কোন নিয়মাধীন বাক্যবিশ্রাস করিলেই গীতের পারিপাট্য হয় । সেই সকল নিয়মগুলির পরিজ্ঞানেই ছন্দের সৃষ্টি ।

গীতের পারিপাট্য জন্য আবশ্যিক দুইটি, স্বরচাতুর্য্য এবং শব্দ-
-~~সুন্দর~~ । এই দুইটি পৃথক্ পৃথক্ দুইটি ক্ষমতার উপর নির্ভর করে । দুইটি ক্ষমতাই একজনের সচরাচর ঘটে না । যিনি সুকবি, তিনিই সুগায়ক, ইহা অতি বিরল ।

কাজে কাজেই, একজন গীত রচনা করেন, আর একজন গান করেন । এইরূপে গীতহইতে গীতি কাব্যের পার্থক্য জন্মে । গীত হওয়াই গীতিকাব্যের আদিম উদ্দেশ্য; কিন্তু যখন দেখা গেল যে গীত না হইলেও কেবল ছন্দোবিশিষ্ট রচনাই

আনন্দদায়ক, এবং সম্পূর্ণ চিত্ত ভাবব্যঞ্জক, তখন গীতেদ্বৈদ্য দূরে রহিল ; অগেয়ে গীতিকাব্য রচিত হইতে লাগিল ।

অতএব গীতের যে উদ্দেশ্য, যে কাব্যের সেই উদ্দেশ্য তাহাই গীতিকাব্য । বক্তার ভাবোচ্ছাসের পরিষ্কটতামাত্র যাহার উদ্দেশ্য, সেই কাব্যই গীতিকাব্য ।

বিদ্যাপতি চণ্ডীদাস প্রভৃতি বৈষ্ণব কবিদিগের রচনা, ভারতচন্দ্রের রসমঞ্জরী, মাইকেল মধুসূদন দত্তের ব্রজা-
ক্ষনা কাব্য, হেম বাবুর কবিতাবলী, ইহাই বাঙ্গালা ভাষার উৎকৃষ্ট গীতিকাব্য * । অবকাশরঞ্জিনী আর একখানি উৎকৃষ্ট গীতিকাব্য ।

যখন হৃদয়, কোন বিশেষ ভাবে আচ্ছন্ন হয়,—স্নেহ কি শোক, কি ভয়, কি যাহাই হউক, তাহার সমুদায়ংশ কখন ব্যক্ত হয় না । কতকটা ব্যক্ত হয়, কতকটা ব্যক্ত হয় না । যাহা ব্যক্ত হয় তাহা ক্রিয়ার দ্বারা বা কথা দ্বারা । সেই ক্রিয়া এবং কথা নাটককারের সামগ্রী । যেটুকু অব্যক্ত থাকে, সেই টুকু গীতিকাব্যপ্রণেতার সামগ্রী । যে টুকু সচবাচর অদৃষ্ট, অদর্শনীয়, এবং অন্তের অননুমোদের অথচ ভাবাপন্ন ব্যক্তির রুদ্ধ হৃদয়মধ্যে উচ্ছ্বসিত, তাহা তাঁহাকে ব্যক্ত করিতে হইবে । কাব্যের বিশেষ গুণ এই যে কবির উভয়বিধ অধিকার থাকে ; ব্যক্তব্য এবং অব্যক্তব্য উভয়ই তাঁহার আয়ত্ত । মহাকাব্য নাটক

*- যখন এই প্রবন্ধ লিখিত হয় তখন রবীন্দ্র বাবুর কাব্য সকল প্রকাশিত হয় নাই ।

এবং গীতকাব্যে এই একটি প্রধান প্রভেদ বলিয়া বোধ হয় । অনেক নাটককর্তা তাহা বুঝেন না, সুতরাং তাহাদিগের নায়ক নায়িকার চরিত্র অপ্রাকৃত এবং বাগাড়ম্বর বিশিষ্ট হইয়া উঠে । সত্য বটে, যে গীতিকাব্যলেখককেও বাক্যের দ্বারাই রসোত্তাবন করিতে হইবে ; নাটককারেরও সেই বাক্য সহায় । কিন্তু যে বাক্য ব্যক্তব্য, নাটককার কেবল তাহাই বলাইতে পারেন । যাহা অব্যক্তব্য তাহাতে, গীতিকাব্যকারের অধিকার ।

উদাহরণ ভিন্ন ইহা অনেকে বুঝিতে পারিবেন না । কিন্তু এ বিষয়ের একটি উত্তম উদাহরণ উত্তর চরিত সমালোচনায় উদ্ধৃত হইয়াছে । সীতাবিসর্জন কালে ও তৎপরে রামের ব্যবহারে যে ভারতম্য ভবভূতির নাটকে এবং বাণ্মীকির রামায়ণে দেখা যায়, তাহার আলোচনা করিলে এই কথা স্ফুটমান হইবে । রামের চিত্তে যখন যে ভাব উদয় হইতেছে, ভবভূতি তৎক্ষণাৎ তাহা লেখনী মুখে ধৃত করিয়া লিপিবদ্ধ করিয়াছেন ; ব্যক্তব্য এবং অব্যক্তব্য উভয়ই তিনি স্বকৃত নাটক মধ্যগত করিয়াছেন । ইহাতে নাটকোচিত কার্য না করিয়া গীতিকাব্যকারের অধিকারে প্রবেশ করিয়াছেন । বাণ্মীকি তাহা না করিয়া কেবল রামের কার্যগুলিই বর্ণিত করিয়াছেন, এবং তত্ত্বং কার্য সম্পাদনার্থ যতখানি ভাবব্যক্তি আবশ্যিক, তাহাই ব্যক্ত করিয়াছেন । ভবভূতিকৃত ঐ রাম-বিলাপের সঙ্গে ডেসডিমোনা বধের পর ওথেলোর বিলাপের বিশেষ করিয়া তুলনা করিলেও এ কথা বুঝা যাইবে । সেক্ষ-পীয়র এমত কোন কথাই তৎকালে ওথেলোর মুখে ব্যক্ত করেন

নাই, যাহা তৎকালীন কার্যার্থ, বা অঙ্গের কথার উত্তরে ব্যক্ত করা প্রয়োজন হইতেছে না। ব্যক্তব্যের অতিরেকে তিনি এক রেখাও যান নাই। তিনি ভবভূতির স্থায় নাটকের হৃদয়ানু-সন্ধান করিয়া, ভিতর হইতে এক একটি ভাব টানিয়া আনিয়া, একে একে গণনা করিয়া, সারি দিয়া সাজান নাই। অথচ কে না বলিবে যে রামের মুখে যে দুঃখ ভবভূতি ব্যক্ত করিয়াছেন, তাহার সহস্র শৃংগ দুঃখ সেক্ষপীয়র ওথেলোর মুখে ব্যক্ত করাইয়াছেন।

সহজেই অনুমেয় যে যাহা ব্যক্তব্য তাহা পর সম্বন্ধীয়, বা কোন কার্যোদ্দিষ্ট, যাহা অব্যক্তব্য তাহা আত্মচিত্ত সম্বন্ধীয়; উক্তি মাত্র তাহার উদ্দেশ্য। এরূপ কথা যে নাটকে একেবারে সন্নিবেশিত হইতে পারে না এমত নহে বরং অনেক সময়ে হওয়া আবশ্যিক। কিন্তু ইহা কখন নাটকের উদ্দেশ্য হইতে পারে না, নাটকের যাহা উদ্দেশ্য তাহার আনুষঙ্গিকতা বশতঃ প্রয়োজন মত কদাচিৎ সন্নিবেশিত হয়।

প্রকৃত এবং অতিপ্রকৃত ।



কাব্যরসের সামগ্রী মনুষ্যের হৃদয় । যাহা মনুষ্যহৃদয়ের অংশ, অথবা যাহা তাহার সঞ্চালক, তদ্ব্যতীত আর কিছুই কাব্যোপযোগী নহে । কিন্তু কখনও কখনও মহাকবিরা, যাহা অতিমানুষ, তাহারও বর্ণনায় প্রবৃত্ত হইয়াছেন । তন্মধ্যে অধিকাংশই মনুষ্যচরিত্রচিত্রের আনুষঙ্গিক মাত্র । মহাভারত, ইলিয়দ, প্রভৃতি প্রাচীন কাব্য সকল, এই প্রকার পার্থিব নায়ক নায়িকার চিত্রানুষঙ্গিক দেবচরিত্র বর্ণনায় পরিপূর্ণ । দেবচরিত্র বর্ণনায় রসহানির বিশেষ কারণ এই যে যাহা মনুষ্য চরিত্রানুকরী নহে, তাহার সঙ্গে মনুষ্য লেখক বা মনুষ্য পাঠকের সহৃদয়তা জন্মিতে পারে না । যদি আমরা কোথাও পড়ি যে কোন মনুষ্য যমুনার এক বহুজলবিশিষ্ট হ্রদমধ্যে নিমগ্ন হইয়া অজগর সর্প কর্তৃক জলমধ্যে আক্রান্ত হইয়াছে, তবে আমাদের মনে ভয়সঞ্চার হয় ; আমাদের জানা আছে যে এমন বিপদাপন্ন মনুষ্যের মৃত্যুরই সম্ভাবনা ; অতএব তাহার মৃত্যুর আশঙ্কায় আমরা ভীত ও দুঃখিত হই ; কবির অভিপ্রেত রস অবতারণিত হয়, তাহার যত্নের সফলতা হয় । কিন্তু যদি আমরা পূর্ব হইতে জানিয়া থাকি, যে নিমগ্ন মনুষ্য বস্তুতঃ মনুষ্য নহে, দেবপ্রকৃত, জল বা সর্পের শক্তির অধীন নহে, ইচ্ছাময় এবং সর্বশক্তিমান,

তখন আর আমাদের ভয় বা কুতূহল থাকে না ; কেন না আমরা আগেই জানি যে এই অজের, অবিনশ্বর পুরুষ এখনই কালিয় দমন করিয়া জল হইতে পুনরুত্থান করিবেন।

এমত অবস্থাতেও যে পূর্বকবিগণ দৈব বা অতিমানুষ চরিত্র সৃষ্ট করিয়া লোকরঞ্জে সক্ষম হইয়াছেন, তাহার একটি বিশেষ কারণ আছে। তাঁহারা দেবচরিত্রকে মনুষ্য চরিত্রানুকৃত করিয়া বর্ণনা করিয়াছেন ; সুতরাং সে সকলের সঙ্গে পাঠক বা শ্রোতার সহৃদয়তার অভাব হয় না। মনুষ্যাগণ যে সকল রাগদ্বেষাদির বশীভূত ; মনুষ্য যে সকল সুখের অভিলাষী, দুঃখের অপ্রিয় ; মনুষ্য যে সকল আশায় লুক্ক, সৌন্দর্য্যে মুগ্ধ, অনুতাপে তপ্ত, এই মনুষ্যপ্রকৃত দেবতারাও তাই। শ্রীকৃষ্ণ, জগদীশ্বরের আংশিক বা সম্পূর্ণ অবতারস্বরূপ কল্পিত হইলেও মনুষ্যের গায় মানবধর্ম্মাবলম্বী। মানবচরিত্রগত এমন একটি উৎকৃষ্ট মনোবৃত্তি নাই, যে তাহা ভাগবতকারকৃত শ্রীকৃষ্ণ চরিত্রে অঙ্কিত হয় নাই। এই মানুষিক চরিত্রের উপর অতিমানুষ বল এবং বুদ্ধির সংযোগে চিত্রের কেবল মনোহারিত্ব বৃদ্ধি হইয়াছে ; কেন না কবি মানুষিক বলবুদ্ধিসৌন্দর্য্যের চরমোৎকর্ষ সৃজন করিয়াছেন। কাব্যে অতিপ্রকৃতির সংস্থানের উদ্দেশ্য এবং উপকার এই ; এবং তাহার নিয়ম এই যে, যাহা প্রকৃত তাহা যে সকল নিয়মের অধীন, কবির সৃষ্ট অতিপ্রকৃতও সেই সকল নিয়মের অধীন হওয়া উচিত।

সংস্কৃতে এমন এক খানি এবং ইংরাজিতে এক খানি মহাকাব্য আছে যে দৈব এবং অতিপ্রকৃত চরিত্র তাহার আনুষঙ্গিক বিষয় নহে, মূলবিষয়। আমরা কুমারসম্ভব এবং Paradise Lost

নামক কাব্যের কথা বুলিতেছি। মিল্টনের নায়ক দেবপ্রকৃত ঈশ্বরবিদ্রোহী সয়তান, এবং তাঁহার অনুচরবর্গ। জগদীশ্বরের সহিত তাহাদিগের বিবাদ, জগদীশ্বর এবং তাঁহার অনুচরের সহিত তাহাদিগের যুদ্ধ। মিল্টন কোন পক্ষকেই সম্যক্ প্রকারে মানবপ্রকৃতিবিশিষ্ট করেন নাই। সুতরাং তিনি কাব্যরসের অভ্যুৎকৃষ্ট অবতারণায় কৃতকার্য হইয়াও, লোক-মনোরঞ্জে তাদৃশ কৃতকার্য হইয়া নাই। Paradise Lost অভ্যুৎকৃষ্ট মহাকাব্য হইলেও, প্রায় কেহ তাহা আনুপূর্বিক পাঠ করেন না। আনুপূর্বিক পাঠ কর্তৃক হইয়া উঠে। মিল্টনের গায় প্রথম শ্রেণীর কবির রচনা না হইয়া যদি ইহা মধ্যম শ্রেণীর কোন কবির রচনা হইত, তবে বোধ হয়, কেহই পড়িত না। ইহার কারণ মনুষ্য চরিত্রের অননুকায়ী দৈবচরিত্রে মনুষ্যের সহৃদয়তা হয় না। এই কাব্যে যেখানে আদম ও ইবের কথা আছে, সেইখানেই অধিকতর সুখদায়ক। কিন্তু ইহারা এ কাব্যের প্রকৃত নায়ক নায়িকা নহে—তাহাদের উল্লেখ আনুষঙ্গিক মাত্র। আদম ও ইব প্রকৃত মনুষ্যপ্রকৃত ; তাহারা প্রথম মনুষ্য, পার্থিব সুখ দুঃখের অনধীন, নিষ্পাপ ; যে সকল শিক্ষার গুণে মনুষ্য মনুষ্য, সে সকল শিক্ষা পায় নাই। অতএব এই কাব্যে প্রকৃত মনুষ্য চরিত্র বর্ণিত হয় নাই ।

কুমারসন্তবে একটিও মনুষ্য নাই। যিনি প্রধান নায়ক, তিনি স্বয়ং পরমেশ্বর। নায়িকা পরমেশ্বরী। তন্তিন্ন পর্বত, পর্বতমহিষী, ঋষি, ব্রহ্মা, ইন্দ্র, কাম, রতি ইত্যাদি দেব দেবী। বাস্তবিক এই কাব্যের তাৎপর্য অতি গূঢ়। মংসারে দুই সম্প্র-

দায়ের লোক সর্বদা পরস্পরের সহিত বিবাদ করে দেখা যায় । এক, ইন্দ্রিয়পরবশ, ঐহিক সুখমাত্রাভিলাষী, পারত্রিক চিন্তা-বিরত ; দ্বিতীয়, বিষয়বিরত সাংসারিক সুখমাত্রের বিদ্বেষী, ঐশ্বর-চিন্তামগ্ন । এক সম্প্রদায়, কেবল শারীরিক সুখ সার করেন ; আর এক সম্প্রদায় শারীরিক সুখের অনুচিত বিদ্বেষ করেন । বস্তুতঃ উভয় সম্প্রদায়ই ভ্রান্ত । যাঁহারা ঐশ্বরবাদী, ঐশ্বরপ্রদত্ত ইন্দ্রিয় অমঙ্গলকর, বা অশ্রদ্ধের মনে করা তাঁহাদের অকর্তব্য । শারীরিক ভোগাতিশয্যই দূষ্য ; নচেৎ পরিমিত শারীরিক সুখ সংসারের নিয়ম, সংসাররক্ষার কারণ, ঐশ্বরাদিষ্ট, এবং ধর্মের পূর্ণতাজনক । এই শারীরিক এবং পারত্রিকের পরিণয় গীত করাই, কুমারসম্ভব কাব্যের উদ্দেশ্য । পার্থিব পর্বতোৎপত্তা উমা শরীররূপিণী, তপস্চারী মহাদেব পারত্রিক শান্তির প্রতিমা । শান্তির প্রাপণাকাজ্জ্বল্য উমা প্রথমে মদনের সাহায্য গ্রহণ করিয়াছিলেন, কিন্তু নিষ্ফল হইলেন । ইন্দ্রিয়সেবার দ্বারা শান্তি প্রাপ্ত হওয়া যায় না । পরিশেষে আপন চিত্ত বিগুঢ় করিয়া, ইন্দ্রিয়সক্তি সমলতা চিত্ত হইতে দূর করিয়া, যখন শান্তির প্রতি মনোভিনিবেশ করিলেন, তখনই তাঁহাকে প্রাপ্ত হইলেন । সাংসারিক সুখের জন্ম আবশ্যিক চিত্ত শুদ্ধি ; চিত্তশুদ্ধি থাকিলে ঐহিক ও পারত্রিক পরস্পর বিরোধী নহে ; পরস্পরে পরস্পরের সহায় ।

• এইরূপে কবি, মনোবৃত্তি প্রভৃতি লইয়া নায়ক নায়িকা স্ঠন করিয়া, লোকপ্ৰীত্যর্থ লৌকিক দেবতাদিগের নামে তাহা পরিচিত করিয়াছেন । কিন্তু দেবচিত্র প্রণয়নে তিনি মিল্টন্ অপেক্ষা অধিক কৌশল প্রকাশ করিয়াছেন । কবিত্ব ধরিতে

গেলো, Paradise Lost •হইতে কুমারসম্ভব অনেক উচ্চ।
 আত্মাদিগের বিবেচনার কুমারসম্ভবের তৃতীয় সর্গের কবিত্বের
 ন্যায় কবিত্ব, কোন ভাষার কোন মহাকাব্যে আছে, কি না
 সন্দেহ। কিন্তু কবিত্বের কথা ছাড়িয়া দিয়া, কেবল কৌশ-
 লের কথা ধরিতে গেলে স্মিটন্ অপেক্ষা কালিদাসকে অধিক
 প্রশংসা করিতে হয়। Paradise Lost পাঠে শ্রম বোধ
 হয়; কুমারসম্ভব আদ্যোপান্ত পুনঃ পুনঃ পাঠ করিয়াও
 পরিতৃপ্তি জন্মে না। ইহার কারণ এই যে কালিদাস কয়ে-
 কটি দেবচরিত্র মনুষ্যচরিত্রানুকৃত করিয়া অশেষ মাধুর্য্যবিশিষ্ট
 করিয়াছেন। উমা স্বয়ং আদ্যোপান্ত মানুষী, কোথাও তাঁহার
 দেবত্ব লক্ষিত হয় না। তাঁহার মাতা মেনা, মানুষী মাতার
 গায়। “পদং সহেত ভ্রমরশ্চ পেলবং” ইত্যাদি কবিতার্কের
 সন্ধে মণ্টীগুর উচ্চারিত “Like the bud bit by an en-
 vious worm” &c. ইতি উপমার তুলনা করুন। দেখিবেন,
 উমার মাতা এবং রোমিওর পিতা একই প্রকৃতি—হাড়ে হাড়ে
 মানব। মেনা পাষণরানী, কিন্তু কুলবতী মানবীদিগের গায়,
 তাঁহার হৃদয় কুসুম সুকুমার।

বিদ্যাপতি ও জয়দেব ।



বাঙ্গালা সাহিত্যের আর যে দুঃখই থাকুক, উৎকৃষ্ট গীতিকাব্যের অভাব নাই। বরং অন্যান্য ভাষার অপেক্ষা বাঙ্গালায় এই জাতীয় কবিতার আধিক্য। অন্যান্য কবির কথা না ধরিলেও, একা বৈষ্ণব কবিগণই ইহার সমুদ্র বিশেষ। বাঙ্গালার প্রাচীন কবি—জয়দেব—গীতিকাব্যের প্রণেতা। পরবর্তী বৈষ্ণব কবিদিগের মধ্যে বিদ্যাপতি, গোবিন্দদাস, এবং চণ্ডীদাসই প্রসিদ্ধ, কিন্তু আরও কতকগুলি এই সম্প্রদায়ের গীতিকাব্যপ্রণেতা আছেন; তাঁহাদের মধ্যে অন্যান্য চারি পাঁচজন উৎকৃষ্ট কবি বলিয়া গণ্য হইতে পারেন। ভারতচন্দ্রের রসমঞ্জরীকে এই শ্রেণীর কাব্য বলিতে হয়। রামপ্রসাদ সেন, আর একজন প্রসিদ্ধ গীতি-কবি। তৎপরে কতকগুলি “কবিওয়ালার” প্রাদুর্ভাব হয়, তন্মধ্যে কাহারও কাহারও গীত অতি সুন্দর। রাম বসু, হরু ঠাকুর, নিতাই দাসের এক একটি গীত এমত সুন্দর আছে, যে ভারতচন্দ্রের রচনার মধ্যে ততুল্য কিছুই নাই। কিন্তু কবিওয়ালাদিগের অধিকাংশ রচনা, অশ্রদ্ধেয় ও অশ্রাব্য সন্দেহ নাই।

সকলই নিয়মের ফল। সাহিত্যও নিয়মের ফল। বিশেষ বিশেষ কারণ হইতে, বিশেষ বিশেষ নিয়মানুসারে, বিশেষ

বিশেষ ফলোৎপত্তি হয় । জল উপরিস্থ বায়ু এবং নিম্নস্থ পৃথিবীর অবস্থানুসারে, কতকগুলি অলংঘ্য নিয়মের অধীন হইয়া, কোথাও বাষ্প, কোথাও বৃষ্টিবিন্দু, কোথাও শিশির, কোথাও হিমকণা বা বরফ, কোথাও কুজ্বাটিকা রূপে পরিণত হয় । তেমনি সাহিত্যও দেশভেদে, দেশের অবস্থা ভেদে, অসংখ্য নিয়মের বশবর্তী হইয়া রূপান্তরিত হয় । সেই সকল নিয়ম অত্যন্ত জটিল, দুর্জয়ের, সন্দেহ নাই ; এ পর্য্যন্ত কেহ তাহার সবিশেষ তত্ত্ব নিরূপণ করিতে পারেন নাই । কোমং বিজ্ঞান সম্বন্ধে যে রূপ তত্ত্ব আবিষ্কৃত করিয়াছেন, সাহিত্য সম্বন্ধে কেহ তদ্রূপ করিতে পারেন নাই । তবে ইহা বলা যাইতে পারে, যে সাহিত্য দেশের অবস্থা এবং জাতীয় চরিত্রের প্রতিবিন্দু মাত্র । যে সকল নিয়মানুসারে দেশভেদে, রাজবিপ্লবের প্রকারভেদ, সমাজবিপ্লবের প্রকার ভেদ, ধর্মবিপ্লবের প্রকারভেদ ঘটে, সাহিত্যের প্রকার ভেদ সেই সকল কারণেই ঘটে । কোন কোন ইউরোপীয় গ্রন্থকার সাহিত্যের সঙ্গে সমাজের আভ্যন্তরিক সম্বন্ধ বুঝাইতে চেষ্টা করিয়াছেন । বকুল্ ভিন্ন কেহ বিশেষ রূপে পরিশ্রম করেন নাই, এবং হিতবাদ মতপ্রিয় বকুর সঙ্গে কাব্য সাহিত্যের সম্বন্ধ কিছু অল্প । মনুষ্যচরিত্র হইতে ধর্ম এবং নীতি মুছিয়া দিয়া, তিনি সমাজতত্ত্বের আলোচনায় প্রবৃত্ত । বিদেশ সম্বন্ধে যাহা হউক, ভারতবর্ষ সম্বন্ধে এ তত্ত্ব কেহ কখন উত্থাপন করিয়াছিলেন এমত আমাদের স্মরণ হয় না । সংস্কৃত সাহিত্য সম্বন্ধে মক্ষমুলরের গ্রন্থ বহুমূল্য বটে, কিন্তু প্রকৃত সাহিত্যের সঙ্গে সে গ্রন্থের সামান্য সম্বন্ধ । ভারতবর্ষীয় সাহিত্যের প্রকৃত গতি কি ? তাহা জানি না,

কিন্তু তাহার গোটাকত মূল মূল চিহ্ন পাওয়া যায়। প্রথম ভার-
তীয় আৰ্য্যগণ অনাৰ্য্য আদিমবাসীদিগের সহিত বিবাদে ব্যস্ত ;
তখন ভারতবর্ষীয়েরা অনাৰ্য্যকুল প্রমথনকারী, ভীতিশূন্য, দিগন্ত-
বিচারী, বিজয়ী বীর জাতি। সেই জাতীয় চরিত্রের ফল রামায়ণ।
তার পর ভারতবর্ষের অনাৰ্য্য শত্রু সকল ক্রমে বিজিত, এবং
দূরপ্রস্থিত ; ভারতবর্ষ আৰ্য্যগণের করস্থ, আয়ত্ত, ভোগ্য এবং
মহা সমৃদ্ধিশালী। তখন আৰ্য্যগণ বাহু শত্রুর ভয় হইতে
নিশ্চিন্ত, আত্যন্তরিক সমৃদ্ধি সম্পাদনে সচেষ্ট, হস্তগত অনন্ত
রত্নপ্রসবিনী ভারতভূমি অংশীকরণে ব্যস্ত। যাহা সকলে জয়
করিয়াছে, তাহা কে ভোগ করিবে? এই প্রশ্নের ফল আত্যন্ত-
রিক বিবাদ। তখন আৰ্য্য পৌরুষ চরমে দাঁড়াইয়াছে—অন্ত
শত্রুর অভাবে সেই পৌরুষ পরম্পরের দমনার্থ প্রকাশিত হই-
য়াছে। এই সময়ের কাব্য মহাভারত। বল যাহার, ভারত
তাহার হইল। বহু কালের রক্তবৃষ্টি শমিত হইল। স্থির হইয়া,
উন্নত প্রকৃতি আৰ্য্যকুল শান্তিস্থখে মন দিলেন। দেশের ধন-
বৃদ্ধি, শ্রীবৃদ্ধি, ও সভ্যতা বৃদ্ধি হইতে লাগিল। রোমক হইতে
যবদ্বীপ ও চৈনিক পর্য্যন্ত ভারতবর্ষের বাণিজ্য ছুটিতে লাগিল ;
প্রতি নদীকূলে অনন্তসৌধমালাশোভিত মহানগরী সকল মস্তক
উত্তোলন করিতে লাগিল। ভারতবর্ষীয়েরা সুখী হইলেন।
সুখী এবং কৃতী। এই সুখ ও কৃতিত্বের ফল, ভক্তিশাস্ত্র
ও দর্শন শাস্ত্র, এ অবস্থা কাব্যে তাদৃশ পরিস্ফুট হয় নাই।
কিন্তু লক্ষ্মী বা সরস্বতী কোথাও চিরস্থায়িনী নহেন ; উভয়েই
চঞ্চলা। ভারতবর্ষ ধর্ম শৃঙ্খলে একরূপ নিবদ্ধ হইয়াছিল, যে
সাহিত্যরস-গ্রাহিনী শক্তিও তাহার বশীভূত হইল। প্রকৃতা-

প্রকৃত বোধ বিলুপ্ত হইল। সাহিত্যও ধর্ম্মানুকারী হইল। কেবল তাহাই নহে, বিচারশক্তি ধর্ম্ম মোহে বিকৃত হইয়াছিল—প্রকৃত ত্যাগ করিয়া অপ্রকৃত কামনা করিতে লাগিল। ধর্ম্মই তৃষ্ণা, ধর্ম্মই আলোচনা, ধর্ম্মই সাহিত্যের বিষয়। এই ধর্ম্মমোহের ফল পুরাণ শিক্ত যেমন এক দিকে ধর্ম্মের শ্রোতঃ বহিতে লাগিল, তেমনি আর এক দিকে বিলাসিতার শ্রোতঃ বহিতে লাগিল। তাহার ফল কালিদাসাদির কাব্য নাটকাদি।

ভারতবর্ষায়েরা শেষে আসিয়া একটি এমন প্রদেশ অধিকার করিয়া বসতি স্থাপন করিয়াছিলেন, যে তথাকার জল বায়ুর গুণে তাঁহাদিগের স্বাভাবিক তেজ লুপ্ত হইতে লাগিল। তথাকার তাপ অসহ, বায়ু জল বাষ্পপূর্ণ, ভূমি নিম্না এবং উর্ধ্বা, এবং তাহার উৎপাদ্য অসার, তেজোহানিকারক ধাতু। সেখানে আসিয়া আর্ধ্যতেজ অন্তর্হিত হইতে লাগিল, আর্ধ্য প্রকৃতি কোমলতাময়ী, আলস্যের বশবর্তিনী, এবং গৃহ সুখাভিলাষিনী হইতে লাগিল। সকলেই বুঝিতে পারিতেছেন, যে আমরা বাঙ্গালার পরিচয় দিতেছি। এই উচ্চাভিলাষশূন্য, অলস, নিশ্চেষ্ট, গৃহসুখপরায়ণ চরিত্রের অনুকরণে এক বিচিত্র গীতিকাব্য সৃষ্ট হইল। সেই গীতিকাব্যও উচ্চাভিলাষশূন্য, অলস, ভোগাসক্ত, গৃহসুখপরায়ণ। সে কাব্যপ্রণালী অতিশয় কোমলতা পূর্ণ, অতি সুমধুর, দম্পতী প্রণয়ের শেষ পরিচয়। অন্য সকল প্রকারের সাহিত্যকে পশ্চাতে ফেলিয়া, এই জাতি-চরিত্রানুকারী গীতিকাব্য সাত আট শত বৎসর পর্য্যন্ত বঙ্গদেশে জাতীয় সাহিত্যের পদে দাঁড়াইয়াছে। এই জন্ত গীতিকাব্যের এত বাহুল্য।

বঙ্গীয় গীতিকাব্য লেখকদিগকে দুই দলে বিভক্ত করা যাইতে পারে। একদল, প্রাকৃতিক শোভার মধ্যে মনুষ্যকে স্থাপিত করিয়া তৎপ্রতি দৃষ্টি করেন; আর একদল, বাহ্য প্রকৃতিকে দূরে রাখিয়া কেবল মনুষ্য হৃদয়কেই দৃষ্টি করেন। একদল মানব-হৃদয়ের সন্ধানে প্রবৃত্ত হইয়া বাহ্যপ্রকৃতিকে দীপ করিয়া তদালোকে অশেষ বস্তুকে দীপ্ত এবং প্রস্ফুট করেন; আর এক দল, আপনাদিগের প্রতিভাতেই সকল উজ্জ্বল করেন, অথবা মনুষ্য চরিত্র খনিতে যে রত্ন মিলে, তাহার দীপ্তির জন্য অন্য দীপের আবশ্যক নাই, বিবেচনা করেন। প্রথম শ্রেণীর প্রধান জয়দেব, দ্বিতীয় শ্রেণীর মুখপাত্র বিদ্যাপতিকে ধরিয়া লওয়া যাইক। জয়দেবদিগের কবিতায়, সতত মাধবী যামিনী, মলয়সমীর, ললিতলতা, কুবলয়দল শ্রেণী, স্ফুটিত কুমুম, শরচ্চন্দ্র, মধুকরবৃন্দ, কোকিলকুঞ্জিত কুঞ্জ, নবজলধর, এবং তৎসঙ্গে, কামিনীর মুখমণ্ডল, জ্র বগ্নী, বাহুলতা, বিস্মোষ্ঠ, সরসীরহলোচন, অলসনিমেষ, এই সকলের চিত্র, বাতো-মথিত তটিনীতরঙ্গবৎ সতত চাকচিক্য সম্পাদন করিতেছে। বাস্তবিক এই শ্রেণীর কবিদের কবিতায় বাহ্য প্রকৃতির প্রাধান্য। বিদ্যাপতি যে শ্রেণীর কবি, তাঁহাদিগের কাব্যে বাহ্য প্রকৃতির সম্বন্ধ নাই এমত নহে—বাহ্য প্রকৃতির সঙ্গে মানব হৃদয়ের নিত্য সম্বন্ধ সূতরাং কাব্যেরও নিত্য সম্বন্ধ; কিন্তু তাঁহাদিগের কাব্যে বাহ্য প্রকৃতির অপেক্ষাকৃত অস্পষ্টতা লক্ষিত হয়, তৎপরিবর্তে মনুষ্য হৃদয়ের গূঢ় তলচারী ভাব সকল প্রধান স্থান গ্রহণ করে। জয়দেবাদিতে বহিঃপ্রকৃতির প্রাধান্য, বিদ্যাপতি প্রভৃতিতে অন্তঃপ্রকৃতির স্বাজ্য। জয়দেব,

বিদ্যাপতি উভয়েই রাধাকৃষ্ণের প্রণয় কথা গীত করেন । কিন্তু জয়দেব যে প্রণয়-গীত করিয়াছেন, তাহা বহিরিল্পেয়ের অনু-গামী । বিদ্যাপতি প্রভৃতির কবিতা, বিশেষতঃ চণ্ডীদাসাদির কবিতা বহিরিল্পেয়ের অতীত । তাহার কারণ কেবল এই বাহ্য প্রকৃতির শক্তি । স্থূল প্রকৃতির সঙ্গে স্থূল শরীরেরই নিকট সম্বন্ধ, তাহার আধিক্যে কবিতা একটু ইন্দ্রিয়ানুসারিণী হইয়া পড়ে । বিদ্যাপতির দল মনুষ্য হৃদয়কে বহিঃপ্রকৃতিছাড়া করিয়া, কেবল তৎপ্রতি দৃষ্টি করেন, সুতরাং তাঁহার কবিতা, ইন্দ্রিয়ের সংস্রব-শূন্য, বিলাস শূন্য, পবিত্র হইয়া উঠে । জয়দেবের গীত, রাধা-কৃষ্ণের বিলাস পূর্ণ ; বিদ্যাপতির গীত রাধাকৃষ্ণের প্রণয় পূর্ণ । জয়দেব ভোগ ; বিদ্যাপতি আকাজ্ঞা ও স্মৃতি । জয়দেব সুখ, বিদ্যাপতি দুঃখ । জয়দেব বসন্ত, বিদ্যাপতি বর্ষা । জয়দেবের কবিতা, উৎফুল্লকমলজালশোভিত, বিহঙ্গমাকুল, স্বচ্ছ বারিবিশিষ্ট সুন্দর সরোবর; বিদ্যাপতির কবিতা দূরগামিনী বেগবতী তরঙ্গ-সঙ্কুল নদী । জয়দেবের কবিতা স্বর্ণহার, বিদ্যাপতির কবিতা রুদ্রাক্ষমালা । জয়দেবের গান, মুরজবীণাসঙ্গিনী স্ত্রীকণ্ঠগীতি; বিদ্যাপতির গান, সায়াহু সমীরণের নিশ্বাস ।

আমরা জয়দেব ও বিদ্যাপতির সম্বন্ধে যাহা বলিয়াছি তাঁহাদিগকে এক এক ভিন্নশ্রেণীর গীতিকবির আদর্শরূপ বিবেচনা করিয়া তাহা বলিয়াছি । যাহা জয়দেব সম্বন্ধে বলিয়াছি, তাহা ভারতচন্দ্র সম্বন্ধে বর্তে, যাহা বিদ্যাপতি সম্বন্ধে বলিয়াছি, তাহা গোবিন্দদাস, চণ্ডীদাস প্রভৃতি বৈষ্ণব কবিদিগের সম্বন্ধে বেশী খাটে, বিদ্যাপতি সম্বন্ধে তত খাটে না ।

স্বাধুনিক বাঙ্গালি গীতিকাব্য লেখকগণকে একটি তৃতীয়

শ্রেণীভুক্ত করা যাইতে পারে। তাঁহারা আধুনিক ইংরাজি গীতিকবিদিগের অনুগামী। আধুনিক ইংরাজি কবি ও আধুনিক বাঙ্গালি কবিগণ সত্যতা বুদ্ধির কারণে স্বতন্ত্র একটি পথে চলিয়াছেন। পূর্ব কবিগণ, কেবল আপনাকে চিনিতেন, আপনার নিকটবর্তী যাহা তাহা চিনিতেন। যাহা আভ্যন্তরিক, বা নিকটস্থ, তাহার পুঙ্খানুপুঙ্খ সন্ধান জানিতেন, তাহার অনুকরণীয় চিত্র সকল রাখিয়া গিয়াছেন। এক্ষণকার কবিগণ জ্ঞানী—বৈজ্ঞানিক, ইতিহাসবেত্তা, আধ্যাত্মিকতত্ত্ববিৎ। নানা দেশ, নানা কাল, নানা বস্তু তাঁহাদিগের চিত্তমধ্যে স্থান পাইয়াছে। তাঁহাদিগের বুদ্ধি বহুবিষয়িণী বলিয়া তাঁহাদিগের কবিতা বহুবিষয়িণী হইয়াছে। তাঁহাদিগের বুদ্ধি দূরসম্বন্ধ-গ্রাহিণী বলিয়া তাঁহাদিগের কবিতাও দূরসম্বন্ধ প্রকাশিকা হইয়াছে। কিন্তু এই বিস্তৃতিগুণ হেতু প্রগাঢ়তা গুণের লাঘব হইয়াছে। বিদ্যাপতি প্রভৃতির কবিতার বিষয় সঙ্কীর্ণ, কিন্তু কবিত্ব প্রগাঢ় ; মধুসূদন বা হেমচন্দ্রের কবিতার বিষয় বিস্তৃত, কিন্তু কবিত্ব তাদৃশ প্রগাঢ় নহে। জ্ঞানবুদ্ধির সঙ্গে সঙ্গে কবিত্বশক্তির হ্রাস হয় বলিয়া যে প্রবাদ আছে, ইহা তাহার একটি কারণ। যে জল সঙ্কীর্ণ কূপে গভীর ; তাহা তড়াগে ছড়াইলে আর গভীর থাকে না।

কাব্যে অন্তঃপ্রকৃতি ও বহিঃপ্রকৃতির মধ্যে যথার্থ সম্বন্ধ এই যে, উভয়ে উভয়ের প্রতিবিম্ব নিপতিত হয়। অর্থাৎ বহিঃপ্রকৃতির গুণে হৃদয়ের ভাবান্তর ঘটে, এবং মনের অবস্থা বিশেষে বাহ্য দৃশ্য সুখকর বা দুঃখকর বোধ হয়—উভয়ে উভয়ের ছায়া পড়ে। যখন বহিঃপ্রকৃতি বর্ণনীয়, তাহা অন্তঃপ্রকৃতির সেই

ছায়া সহিত চিত্রিত করাই কাব্যের উদ্দেশ্য । যখন অন্তঃপ্রকৃতি বর্ণনীয়, তখন বহিঃপ্রকৃতির ছায়া সমেত বর্ণনা তাহার উদ্দেশ্য । যিনি ইহা পারেন, তিনিই সুরবি । ইহার ব্যতিক্রমে এক দিকে ইন্দ্রিয়পরতা, অপর দিকে আধ্যাত্মিকতা দোষ জন্মে । এ স্থলে শারীরিক ভোগসক্তিকেই ইন্দ্রিয়পরতা বলিতেছি না, চক্ষুরাদি ইন্দ্রিয়ের বিষয়ে আনুরক্তিকে ইন্দ্রিয়পরতা বলিতেছি । ইন্দ্রিয়পরতা দোষের উদাহরণ, জয়দেব ৭ আধ্যাত্মিকতার উদাহরণ, Wordsworth.

আর্যজাতির সূক্ষ্ম শিল্প । ❀



একদল মনুষ্য বলেন, যে এ সংসারে সুখ নাই, বনে চল, ভোগাভোগ সমাপ্ত করিয়া মুক্তি বা নির্বাণ লাভ কর। আর একদল বলেন, সংসার সুখময়, বঞ্চকের বঞ্চনা অগ্রাহ্য করিয়া, ষাও, দাও, ঘুমাও। যাঁহারা, সুখাভিলাষী তাঁহাদিগের মধ্যে নামা মত। কেহ বলেন ধনে সুখ, কেহ বলেন মনে সুখ; কেহ বলেন ধর্ম্মে, কেহ বলেন অধর্ম্মে; কাহার সুখ কার্য্যে, কাহারও সুখ জ্ঞানে। কিন্তু প্রায় এমন মনুষ্য দেখা যায় না, যে সৌন্দর্য্যে সুখী নহে। তুমি সুন্দরী স্ত্রীর কামনা কর; সুন্দরী কন্যার মুগ দেখিয়া প্রীত হও; সুন্দর শিশুর প্রতি চাহিয়া বিমুগ্ন হও, সুন্দরী পুত্রবধূর জন্য দেশ মাথায় কর। সুন্দর ফুলগুলি বাছিয়া শয্যায় রাখ, ঘর্ম্মাক্ত ললাটে যে অর্থ উপার্জন করিয়াছ, সুন্দর গৃহ নির্মাণ করিয়া, সুন্দর উপকরণে সাজাইতে, তাহা ব্যয়িত করিয়া ঋণী হও; আপনি সুন্দর সাজিবে বলিয়া, সর্ব্বস্ব পণ করিয়া, সুন্দর সজ্জা খুঁজিয়া বেড়াও—যটী বাটী পিত্তল কাঁসাও যাহাতে সুন্দর হয়, তাহার যত্ন কর। সুন্দর দেখিয়া পাখী পোষ, সুন্দর বৃক্ষে সুন্দর উদ্যান

* সূক্ষ্ম শিল্পের উৎপত্তি ও আর্যজাতির শিল্পচাতুরী, ত্রীশ্রীশ্রী-
চরণ ত্রীশ্রীশ্রী প্রণীত। কলিকাতা। ১৯৩০।

প্রচনা কর, সুন্দর মুখে সুন্দর হাসি দেখিবার জন্য, সুন্দর কাঞ্চন
রত্নে সুন্দরীকে সাজাও । সকলেই অহরহ সৌন্দর্য্যতৃষায়
পীড়িত, কিন্তু কেহ কখন এ কথা মনে করে না বলিয়াই এত
বিস্তারে বলিতেছি ।

এই সৌন্দর্য্য তৃষা যেরূপ বলবতী, সেইরূপ প্রশংসনীয়
এবং পরিপোষণীয় । মনুষ্যের যত প্রকার সুখ আছে তন্মধ্যে
এই সুখ সর্ব্বসুখাপেক্ষা উৎকৃষ্ট, কেন না, প্রথমতঃ ইহা পবিত্র,
নির্ম্মল, পাপ সংস্পর্শশূন্য ; সৌন্দর্য্যের উপভোগ কেবল মান-
সিক সুখ, ইন্দ্রিয়ের সঙ্গে ইহার সংস্পর্শ নাই । সত্য বটে,
সুন্দর বস্তু, অনেক সময়ে ইন্দ্রিয়তৃপ্তির সহিত সম্বন্ধবিশিষ্ট ;
কিন্তু সৌন্দর্য্য জনিত সুখ ইন্দ্রিয়তৃপ্তি হইতে ভিন্ন । ব্রহ্মচরিত্ত
সুধর্ষ জলপাত্রে জলপানে তোমার যেরূপ তৃষা নিবারণ হইবে,
কুপঠন মৃৎপাত্রেও তৃষা নিবারণ সেইরূপ হইবে ; স্বর্ণপাত্রে
জলপান করায় যে টুকু অতিরিক্ত সুখ, তাহা সৌন্দর্য্যজনিত
মানসিক সুখ । আপনার স্বর্ণপাত্রে জল খাইলে অহঙ্কারজনিত
সুখ তাহার সঙ্গে মিশে বটে, কিন্তু পরের স্বর্ণপাত্রে জলপান
করিয়া তৃষা নিবারণাতিরিক্ত যে সুখ, তাহা সৌন্দর্য্যজনিত
মাত্র বলিয়া স্বীকার করিতে হইবে । দ্বিতীয়তঃ, তীব্রতায় এই
সুখ সর্ব্বসুখাপেক্ষা গুরুতর ; ষাঁহার নৈসর্গিক শোভাদর্শন-
প্রিয় বা কাব্যমোদী, তাঁহার ইহার অনেক উদাহরণ মনে
করিতে পারিবেন ; সৌন্দর্য্যের উপভোগজনিত সুখ, অনেক
সময়ে তীব্রতায় অসহ্য হইয়া উঠে । তৃতীয়তঃ, অন্যান্য সুখ,
পৌনঃপুণ্ডে অধীতিকর হইয়া উঠে, সৌন্দর্য্যজনিত সুখ, চির
নূতন, এবং চিরপ্রীতিকর ।

অতএব যাহারা মনুষ্যজাতির এই সুখবর্দ্ধন করেন, তাহারা মনুষ্যজাতির উপকারকদিগের মধ্যে সর্বোচ্চ পদ প্রাপ্তির যোগ্য। যে ভিখারী, খঞ্জনী বাজাইয়া নেড়ার নীত গাইয়া মুষ্টিভিক্ষা লইয়া যায়, তাহাকে কেহ মনুষ্যজাতির মহোপকারী বলিয়া স্বীকার করিবে না বটে, কিন্তু যে বাঙ্গালী, চিরকালের জন্য কোটি কোটি মনুষ্যের অক্ষয়সুখ এবং চিন্তাংকর্ষের উপায় বিধান করিয়াছেন, তিনি যশের মন্দিরে নিউটন, হার্বি, ওয়াট্ বা জেনরের অপেক্ষা নিম্ন স্থান পাইবার যোগ্য নহেন। অনেকে লোকি, মেকুলে প্রভৃতি অসারগ্রাহী লেখকদিগের অনুবর্ত্তী হইয়া কবির অপেক্ষা পাছুকাকারকে উপকারী বলিয়া উচ্চাসনে বসান; এই গণ্ডমূর্খ দলের মধ্যে আধুনিক অর্দ্ধ-শিক্ষিত কতকগুলি বাঙ্গালি বাবু অগ্রগণ্য। পক্ষান্তরে ইংলণ্ডের রাজপুরুষ-চুড়ামণি গ্লাডষ্টোন, স্কটলণ্ডজাত মনুষ্যদিগের মধ্যে হিউম্, আদম স্মিথ, হণ্টর, কল্‌হিল থাকিতে ওয়ণ্টর স্কটকে সর্বোপরি স্থান দিয়াছেন।

যেমন মনুষ্যের অন্ত্রাণ্ড অভাব পূরণার্থ এক একটি শিল্প বিদ্যা আছে, সৌন্দর্য্যস্বাক্ষর পূরণার্থও বিদ্যা আছে। সৌন্দর্য্য স্বজনের বিবিধ উপায় আছে। উপায় ভেদে, সেই বিদ্যা পৃথক পৃথক রূপ ধারণ করিয়াছে।

আমরা যে সকল সুন্দর বস্তু দেখিয়া থাকি, তন্মধ্যে কতক-গুলির, কেবল বর্ণ মাত্র আছে—আর কিছু নাই; যথা আকাশ।

আর কতকগুলির বর্ণ ভিন্ন, আকারও আছে যথা; পুষ্প।

কতকগুলির, বর্ণ ও আকার ভিন্ন, গতিও আছে; যথা উরগ।

কতকগুলির বর্ণ, আকার, গতি ভিন্ন, রব আছে ; যথা কোকিল ।

মনুষ্যের বর্ণ, আকার, গতি, ও রব ব্যতীত অর্থযুক্ত বাক্য আছে ।

অতএব সৌন্দর্য্য স্বজনের জন্ত, এই কয়টি সামগ্রী, বর্ণ, আকার, গতি, রব, ও অর্থযুক্ত বাক্য ।

যে সৌন্দর্য্যজননী বিদ্যার বর্ণ মাত্র অবলম্বন, তাহাকে চিত্র বিদ্যা কহে ।

যে বিদ্যার অবলম্বন আকার, তাহা দ্বিবিধ । জড়ের আকৃতিসৌন্দর্য্য যে বিদ্যার উদ্দেশ্য, তাহার নাম স্থাপত্য । চেতন বা উদ্ভিদের সৌন্দর্য্য যে বিদ্যার উদ্দেশ্য, তাহার নাম ভাস্কর্য্য ।

যে সৌন্দর্য্যজনিকা বিদ্যার সিদ্ধি গতির দ্বারা, তাহার নাম নৃত্য ।

রব যাহার অবলম্বন, সে বিদ্যার নাম সঙ্গীত ।

বাক্য যাহার অবলম্বন, তাহার নাম কাব্য ।

কাব্য, সঙ্গীত, নৃত্য, ভাস্কর্য্য, স্থাপত্য এবং চিত্র, এই ছয়টি সৌন্দর্য্যজনিকা বিদ্যা । ইউরোপে এই সকল বিদ্যার যে জাতিবাচক নাম প্রচলিত আছে, তাহার অনুবাদ করিয়া “সুন্দরশিল্প” নাম দেওয়া হইয়াছে ।

সৌন্দর্য্য প্রসূতি এই ছয়টি বিদ্যায় মনুষ্য জীবন ভূষিত ও সুখময় করে । ভাগ্যহীন বাঙ্গালির কপালে এ সুখ নাই । সুন্দর শিল্পের সঙ্গে তাহার বড় বিরোধ । তাহাতে বাঙ্গালির বড় অনাদর বড় ঘৃণা । বাঙ্গালি সুখী হইতে জানে না ।

স্বীকার করি, সকল দোষ টুকু বাঙ্গালির নিজের নহে। কতকটা বাঙ্গালির সামাজিক রীতির দোষ ;—পূর্বপুরুষের ভদ্রাসন পরিত্যাগ করা হইবে না, তাতেই অসংখ্য সন্তান সন্ততি লইয়া গর্ভমধ্যে পিপীলিকার গায়, পিল্ পিল্ করিতে হইবে—সুতরাং স্থানাভাববশতঃ পরিক্রতি এবং সৌন্দর্যসাধন সম্ভবে না। কতকটা, বাঙ্গালির দারিদ্র জগৎ। সৌন্দর্য্য অর্থ-সাধ্য—অনেকের জুংসার চলে না। তাহার উপর সামাজিক রীত্যনুসারে, আগে পৌরস্ত্রীগণের অলঙ্কার, দোলদুর্গোৎসবের ব্যয়, পিতৃশ্রাদ্ধ, মাতৃশ্রাদ্ধ, পুত্র কন্যার বিবাহ দিতে, অবস্থার অতিরিক্ত ব্যয় করিতে হইবে—সে সকল ব্যয় সম্পন্ন করিয়া, শূকরশালা তুল্য কদর্য্য স্থানে বাস করিতে হইবে, ইহাই সামাজিক রীতি। ইচ্ছা করিলেও, সমাজশৃঙ্খলে বদ্ধ বাঙ্গালি, সে রীতির বিপরীতাচরণ করিতে পারেন না। কতকটা হিন্দুধর্মের দোষ ; যে ধর্ম্মানুসারে, উংকুণ্ড মর্ম্মরপ্রস্তুত হর্ম্ম্যও গোময় লেপনে পরিক্রত করিতে হইবে, তাহার প্রসাদে সূক্ষ্ম শিল্পের দুর্দশারই সম্ভাবনা।

এ সকল স্বীকার করিলেও, দোষক্ষালন হয় না। যে ফিরিস্তি কেরাণীগিরি করিয়া শত মুদ্রার, কোন মতে দিনপাত করে, তাহার সঙ্গে বৎসরে বিংশতি সহস্র মুদ্রার অধিকারী গ্রাম্য ভূস্বামীর গৃহপারিপাট্য বিষয়ে তুলনা কর। দেখিবে, এ প্রভেদটি অনেকটাই স্বাভাবিক। দুই চারি জন ধন্যুচ্য বাবু, ইংরেজদিগের অনুকরণ করিয়া, ইংরেজের গায় গৃহাদির পারিপাট্য বিধান করিয়া থাকেন এবং ভাস্কর্য্য, ও চিত্রাদির দ্বারা গৃহ সজ্জিত করিয়া থাকেন। বাঙ্গালি নকলনবিশ ভাল,

নকলে শৈথিল্য নাই । কিন্তু তাঁহাদিগের ভাস্কর্য্য এবং চিত্র সংগ্রহ দেখিলেই বোধ হয় যে অনুকরণ-স্পৃহাতেই ঐ সকল সংগ্রহ ঘটিয়াছে—নচেৎ সৌন্দর্য্যে তাঁহাদিগের আন্তরিক অনু-
 রাগ নাই । এখানে ভাল মন্দের বিচার নাই, মহার্ঘ্য হইলেই হইল ; সন্নিবেশের পারিপাট্য নাই, সংখ্যায় অধিক হইলেই হইল । ভাস্কর্য্য চিত্র দূরে থাকুক, কাব্য সম্বন্ধেও বাঙ্গালির উত্তমাধম বিচারশক্তি দেখা যায় না । এ বিষয়ে সুশিক্ষিত অশিক্ষিত সমান—প্রভেদ অতি অল্প । নৃত্য গীত—সে সকল বুঝি বাঙ্গালা হইতে উঠিয়া গেল । সৌন্দর্য্যবিচার শক্তি, সৌন্দর্য্য রসাস্বাদন সুখ, বুঝি বিধাতা বাঙ্গালির কপালে লিখেন নাই ।



দ্রোপদী ।

কি প্রাচীন, কি আধুনিক হিন্দুকাব্য সকলের নায়িকাগণের চরিত্র এক ছাঁচে ঢালা দেখা যায়। পতিপরায়ণা, কোমল-প্রকৃতিসম্পন্ন, লজ্জাশীলা, সহিষ্ণুতা গুণের বিশেষ অধিকারিণী—ইনিই আৰ্য্যসাহিত্যের আদর্শস্থলাভিষিক্তা। এই গঠনে বৃদ্ধ বাঙ্গালীকি বিশ্বমনোমোহিনী জনকহুহিতাকে গড়িয়াছিলেন। সেই অবধি আৰ্য্য নায়িকা সেই আদর্শে গঠিত হইতেছে। শকুন্তলা, দময়ন্তী, রত্নাবলী প্রভৃতি প্রসিদ্ধ নায়িকাগণ—সীতার অনুকরণ মাত্র। অন্য কোন প্রকৃতির নায়িকা যে আৰ্য্যসাহিত্যে দেখা যায় না, এমত কথা বলিতেছি না—কিন্তু সীতানুবর্তিনী নায়িকা-ই বাহুল্য। আজিও, যিনি সস্তা ছাপাখানা পাইয়া নবেল নাটকাদিতে বিদ্যা প্রকাশ করিতে চাহেন, তিনিই সীতা গড়িতে বসেন।

ইহার কারণও দুঃখের নহে। প্রথমতঃ সীতার চরিত্রটি বড় মধুর, দ্বিতীয়তঃ এই প্রকার স্ত্রীচরিত্রই আৰ্য্যজাতির নিকট বিশেষ প্রশংসিত, এবং তৃতীয়তঃ আৰ্য্যস্ত্রীগণের এই জাতীয় উৎকর্ষই সচরাচর আয়ত্ত।

একা দ্রোপদী সীতার ছায়াও স্পর্শ করেন নাই। এখানে, মহাভারতকার অপূর্ব নূতন সৃষ্টি প্রকাশিত করিয়াছেন। সীতার সহস্র অনুকরণ হইয়াছে কিন্তু দ্রোপদীর অনুকরণ হইল না।

সীতা সতী, পঞ্চপাণ্ডিকা দ্রৌপদীকেও মহাভারতকার সতী বলিয়াই পরিচিতা করিয়াছেন, কেন না, কবির অভিপ্রায় এই যে পাত এক হোক, পাঁচ হোক, পতিমাত্র ভজনাই সতীত্ব। উভয়েই পত্নী ও রাজ্ঞীর কণ্ঠব্যাহুষ্ঠানে অক্ষুণ্ণমতি, ধর্মনিষ্ঠা এবং গুরুজনের বাধ্য। • কিন্তু এই পর্য্যন্ত সা হুশ্য। সীতা রাজ্ঞী হইয়াও প্রধানতঃ কুল বধূ, দ্রৌপদী কুলবধূ হইয়াও প্রধানতঃ প্রচণ্ড তেজস্বিনী রাজ্ঞী। সীতার স্ত্রীজাতির কোমল গুণ-গুলিন পরিস্ফুট, দ্রৌপদীতে স্ত্রীজাতির কাঠিন গুণ সকল প্রদীপ্ত। সীতা রামের যোগ্য জায়া, দ্রৌপদী ভীমসেনেরই সুযোগ্য বীরেন্দ্রাণী। সীতাকে হরণ করিতে রাবণের কোন কষ্ট হয় নাই, কিন্তু রক্ষোবাহু লঙ্কেশ যদি দ্রৌপদীহরণে আসিতেন, তবে বোধ হয়, হয় কীচকের শ্রায় প্রাণ হারাইতেন, নয় জয়দ্রথের ন্যায়, দ্রৌপদীর বাহুবলে ভূমে গড়াগড়ি দিতেন।

দ্রৌপদী চরিত্রের রীতিমত বিশ্লেষণ ছরুহ ; কেন না মহাভারত অনন্ত সাগর তুল্য, তাহার অজস্র তরঙ্গাভিঘাতে একটি নায়িকা বা নায়কের চরিত্র তৃণবৎ কোথায় যায়, তাহা পর্য্যবেক্ষণ কে করিতে পারে। তথাপি দুই একটা স্থানে বিশ্লেষণে যত্ন করিতেছি।

দ্রৌপদীর স্বয়ম্বর। দ্রুপদরাজার পণ, যে, যে সেই দুর্বে-
ধনীয় লক্ষ্য বিধিবে, সেই দ্রৌপদীর পাণিগ্রহণ করিবে। • কণ্ঠা
সভাতলে আনীতা। পৃথিবীর রাজগণ, বীরগণ, ঋষিগণ
সমবেত। এই মহাসভার প্রচণ্ড প্রতাপে কুমারী কুমুম শুকা-
ইয়া উঠে ; সেই বিশোষমাণা কুমারী লাভার্থ, “দুর্বেয়াধন,

জরাসন্ধ, শিশুপাল প্রভৃতি ভুবনপ্রথিত মহাবীর সকল লক্ষ্য
বিধিতে যত্ন করিতেছেন। একে একে সকলেই বিক্রমে অক্ষয়
হইয়া ফিরিয়া আসিতেছেন। হায়! দ্রৌপদীর বিবাহ
হয় না।

• অন্যান্য রাজগণ মধ্যে সর্বশ্রেষ্ঠ অঙ্গাধিপতি কর্ণ লক্ষ্য
বিধিতে উঠিলেন। ক্ষুদ্র কাব্যকার এখানে কি করিতেন বলা
যায় না—কেন না এটি বিষয় সঙ্কট। কাব্যের প্রয়োজন,
পাণ্ডবের সঙ্গে দ্রৌপদীর বিবাহ দেওয়াইতে হইবে। কর্ণ
লক্ষ্য বিধিলে তাহা হয় না। ক্ষুদ্র কবি বোধ হয়, কর্ণ-
কেও লক্ষ্য বিক্রমে অশক্ত বলিয়া পরিচিত করিতেন।
কিন্তু মহাভারতের মহাকবি জাজল্যমান দেখিতে পাই-
তেছেন, যে কর্ণের বীর্য, তাঁহার প্রধান নায়ক অর্জুনের
বীর্যের মানদণ্ড। কর্ণ প্রতিদ্বন্দ্বী এবং অর্জুনহস্তে পরাভূত
বলিয়াই অর্জুনের গৌরবের এত আধিক্য; কর্ণকে অশ্রের
সঙ্গে ক্ষুদ্রবীর্য করিলে অর্জুনের গৌরব কোথা থাকে? এরূপ
সঙ্কট, ক্ষুদ্র কবিকে বুঝাইয়া দিলে তিনি অবশ্য স্থির
করিবেন, যে তবে অত হাঙ্গামায় কাজ নাই—কর্ণকে না
তুলিলেই ভাল হয়। কাব্যের যে সর্বান্ধসম্পন্নতার ক্ষতি
হয় তাহা তিনি বুঝিবেন না—সকল রাজাই যেখানে
সর্বান্ধসুন্দরী লোভে লক্ষ্য বিধিতে উঠিতেছেন, সেখানে মহা-
বল পরাক্রান্ত কর্ণই যে কেন একা উঠিবেন না, এ প্রশ্নের
কোন উত্তর নাই।

মহাকবি আশ্চর্য্য কোশলময়, এবং তীক্ষ্ণ চৃষ্টিশালী।
তিনি অবলীলাক্রমে কর্ণকে লক্ষ্যবিক্রমে উখিত করিলেন,

কর্ণের বীর্যের গৌরব অক্ষুণ্ণ রাখিলেন, এবং সেই অবসরে, সেই উপলক্ষে, সেই একই উপায়ে, আর একটি গুরুতর উদ্দেশ্য সুসিদ্ধ করিলেন। দ্রৌপদীর চরিত্র পাঠকের নিকটে প্রকটিত করিলেন। যে দিন জয়দ্রথ দ্রৌপদী কর্তৃক ভূতলশায়ী হইবে, যে দিন দুর্ঘ্যোধনের সভাতলে দ্যুতজিতা অপমানিতা মহিষী স্বামী হইতেও স্বাতন্ত্র্য অবলম্বনে উন্মুখিনী হইবেন, সে দিন দ্রৌপদীর যে চরিত্র প্রকাশ পাইবে, অদ্য সেই চরিত্রের পরিচয় দিলেন। একটি ক্ষুদ্র কথায় এই সকল উদ্দেশ্য সফল হইল। বলিয়াছি, সেই প্রচণ্ড প্রতাপসম্বিতা মহাসভার কুমারী কুন্তুম শুকাইয়া উঠে। কিন্তু দ্রৌপদী কুমারী, সেই বিষম সভাতলে রাজমণ্ডলী, বীরমণ্ডলী, ঋষিমণ্ডলীমধ্যে, দ্রুপদরাজ তুল্য পিতার ধৃষ্টদ্যুম্নতুল্য ভ্রাতার অপেক্ষা না করিয়া, কর্ণকে বিহ্বলমোদ্যত দেখিয়া বলিলেন, “আমি সূতপুত্রকে বরণ করিব না।” এই কথা শ্রবণমাত্র কর্ণ সামর্ষহাস্তে সূর্য্যসন্দর্শনপূর্ব্বক শরাসন পরিত্যাগ করিলেন।

এই কথায় যতটা চরিত্র পরিস্ফুট হইল শত পৃষ্ঠা লিখিয়াও ততটা প্রকাশ করা দুঃসাধ্য। এস্থলে কোন বিস্তারিত বর্ণনার প্রয়োজন হইল না—দ্রৌপদীকে ভেজস্বিনী বা গর্ভিতা বলিয়া ব্যাখ্যাত করিবার আবশ্যকতা হইল না। অথচ রাজহিতার দুর্দ্মনীয় গর্ভ নিঃসঙ্কোচে বিস্ফারিত হইল।

ইহার পর দ্যুতক্রৌড়ায়, বিজিতা দ্রৌপদীর চরিত্র অবলোকন কর। মহাগর্ভিত, ভেজস্বী, এবং বলধারী ভীমার্জুন দ্যুতমুখে বিসর্জিত হইয়াও, কোন কথা কহেন নাই, শত্রুর দাসত্ব নিঃ-

শব্দে স্বীকার করিলেন। এস্থলে তাঁহাদিগের অনুগামিনী দাসীর কি করা কর্তব্য? স্বামিকর্তৃক দ্যুতমুখে সমর্পিত হইয়া স্বামিগণের গ্ৰায় দাসীত্ব স্বীকার করাই আর্থ্যনারীর স্বভাব-সিদ্ধ। দ্রৌপদী কি করিলেন? তিনি প্রাতিকামীর মুখে দ্যুতবার্তা এবং দুর্ঘ্যোধনের সভায় তাঁহার আহ্বান শুনিয়া বলিলেন,

“ হে সূতনন্দন! তুমি সভায় গমন করিয়া যুধিষ্ঠিরকে জিজ্ঞাসা কর, তিনি অগ্রে আমাকে কি আপনাকে দ্যুতমুখে বিসর্জন করিয়াছেন। হে সূতাশ্রজ! তুমি যুধিষ্ঠিরের নিকট এই বৃত্তান্ত জানিয়া এখানে আগমন পূর্বক আমাকে লইয়া যাইও। ধর্ম্মরাজ কিরূপে পরাজিত হইয়াছেন, জানিয়া আমি তথায় গমন করিব।” দ্রৌপদীর অভিপ্রায়, দাসত্ব স্বীকার করিবেন না।

দ্রৌপদীর চরিত্রে দুইটি লক্ষণ বিশেষ সুস্পষ্ট—এক ধর্ম্মা-চরণ, দ্বিতীয় দর্প। দর্প, ধর্ম্মের কিছু বিরোধী, কিন্তু এই দুইটি লক্ষণের একাধারে সমাবেশ অপ্রকৃত নহে। মহাভারত-কার এই দুই লক্ষণ অনেক নায়কে একত্রে সমাবেশ করিয়াছেন; ভীমসেনে, অর্জুনে, অশ্বখামায়, এবং সচরাচর ক্ষত্রিয়চরিত্রে এতদুভয়কে মিশ্রিত করিয়াছেন। ভীমসেনে দর্প পূর্ণমাত্রায়, এবং অর্জুনে ও অশ্বখামায় অর্ধ মাত্রায়, দেখা যায়। দর্প শব্দে এখানে আত্মপ্রাণপ্রিয়তা নির্দেশ করিতেছি না; মানসিক তেজস্বিতাই আমাদের নির্দেশ। এই তেজস্বিতা দ্রৌপদীতেও পূর্ণমাত্রায় ছিল। অর্জুনে এবং অতিমনুষ্যে ইহা আত্ম-শক্তি নিশ্চয়তার পরিণত হইয়াছিল; ভীমসেনে ইহা বল-

রক্তির কারণ হইয়াছিল ; দ্রৌপদীতে ইহা ধর্ম্মরক্তির কারণ হইয়াছে ।

সভাতলে দ্রৌপদীর দর্প ও তেজস্বিতা আরও বর্দ্ধিত হইল । তিনি দুঃশাসনকে বলিলেন, “ যদি ইন্দ্রাদি দেবগণও তোমার সহায় হন, তথাপি রাজপুত্রেরা তোকে কখনই ক্ষমা করিবেন না ।” স্বামিকুলকে উপলক্ষ করিয়া সর্বসমীপে মুক্তকণ্ঠে বলিলেন, “ ভরতবংশীয়গণের ধর্ম্মে ধিক্ !” ক্ষত্রধর্ম্মজ্ঞগণের চরিত্র একেবারেই নষ্ট হইয়া গিয়াছে ।” ভীষ্মাদি গুরুজনকে মুখের উপর তিরস্কার করিয়া বলিলেন, “ বুঝিলাম দ্রোণ, ভীষ্ম, ও মহাত্মা বিদুরের কিছুমাত্র স্বত্ব নাই ।” কিন্তু অবলার তেজ কতক্ষণ থাকে ! মহাভারতের কবি, মনুষ্যচরিত্র সাগরের তল-পর্ধ্যস্ত নখদর্পণবৎ দেখিতে পাইতেন । যখন কর্ণ দ্রৌপদীকে বেণুা বলিল, দুঃশাসন তাঁহার পরিধেয় আকর্ষণ করিতে গেল, তখন আর দর্প রহিল না—ভয়াধিক্যে হৃদয় দ্রবীভূত হইল । তখন দ্রৌপদী ডাকিতে লাগিলেন, “ হা নাথ ! হা রমানাথ ! হা ব্রজনাথ ! হা দুঃখনাশ ! আমি কোরবসাগরে নিমগ্ন হইয়াছি—আমাকে উদ্ধার কর !” এস্থলে কবিত্বের চরমোৎকর্ষ ।

দ্রৌপদী স্ত্রীজাতি বলিয়া তাঁহার হৃদয়ে দর্প প্রবল, কিন্তু তাঁহার ধর্ম্মজ্ঞানও অসামান্য—যখন তিনি দর্পিতা রাজমহিষী হইয়া না দাঁড়ান, তখন জনমণ্ডলে তাদৃশী ধর্ম্মানুরাগিনী আছে বোধ হয় না । এই প্রবল ধর্ম্মানুরাগই, প্রবলতর দর্পের মান-দণ্ডের স্বরূপ । এই অসামান্য ধর্ম্মানুরাগ, এবং তেজস্বিতার সহিত সেই ধর্ম্মানুরাগের রমণীয় সামঞ্জস্য, ধৃতরাষ্ট্রের নিকট

তাঁহার বরণগ্রহণ কালে অতি সুন্দররূপে পরিষ্কৃত হইয়াছে ।
সে স্থানটি এত সুন্দর, যে যিনি তাহা শতবার পাঠ করিয়াছেন,
তিনি তাহা আর একবার পাঠ করিলেও অসুখী হইবেন না ।
এজন্য সেই স্থানটি আমরা উদ্ধৃত করিলাম ।

“ হিতৈষী রাজা ধৃতরাষ্ট্র দুর্ঘ্যোধনকে এইরূপ তিরস্কার
করিয়া সাঙ্ঘনাবাক্যে দ্রৌপদীকে কহিলেন, হে ক্রপদতনয়ে !
তুমি আমার নিকট স্বীয় অভিলষিত বর প্রার্থনা কর, তুমি
আমার সমুদায় বধুগণ অপেক্ষা শ্রেষ্ঠ ।

“দ্রৌপদী কহিলেন, হে ভরতকুলপ্রদীপ ! যদি প্রসন্ন হইয়া
থাকেন, তবে এই বর প্রদান করুন যে, সর্বধর্মযুক্ত শ্রীমান্
যুধিষ্ঠির দাসত্ব হইতে মুক্ত হউন । আপনার পুত্রগণ যেন ঐ
মনস্বীকে পুনরায় দাস না বলে, আর আমার পুত্র প্রতিবিদ্য
যেন দাসপুত্র না হয়, কেন না প্রতিবিদ্য রাজপুত্র, বিশেষতঃ
ভূপতিগণকর্তৃক লালিত, উহার দাসপুত্রতা হওয়া নিতান্ত
অবিধেয় । ধৃতরাষ্ট্র কহিলেন, হে কল্যাণি ! আমি তোমার অভি-
লাষানুরূপ এই বর প্রদান করিলাম ; এক্ষণে তোমাকে আর
এক বর প্রদান করিতে ইচ্ছা করি ; তুমি একমাত্র বরের
উপযুক্ত নহ ।

“দ্রৌপদী কহিলেন, হে মহারাজ ! সরথ সশরাসন ভীম,
ধনঞ্জয়, নকুল ও সহদেবের দাসত্ব মোচন হউক । ধৃতরাষ্ট্র
কহিলেন হে নন্দিনি ! আমি তোমার প্রার্থনানুরূপ বর প্রদান
করিলাম ; এক্ষণে তৃতীয় বর প্রার্থনা কর । এই দুই বর দান
দ্বারা তোমার বথার্থ সংকার করা হয় নাই, তুমি ধর্মচারিণী,
আমার সমুদায় পুত্রবধুগণ অপেক্ষা শ্রেষ্ঠ ।

“দ্রৌপদী কহিলেন, হে ভগবন্ ! লোভ ধর্মনাশের হেতু, অতএব আমি আর বর প্রার্থনা করি না । আমি তৃতীয় বর লইবার উপযুক্ত নহি ; যেহেতু, বৈশ্বের এক বর, ক্ষত্রিয়পত্নীর দুই বর, রাজার তিন বর ও ব্রাহ্মণের শত বর লওয়া কর্তব্য । এক্ষণে আমার পতিগণ হাস্যরূপ দারুণ পাপপক্ষে নিমগ্ন হইয়া পুনরায় উদ্ধৃত হইলেন, উহারা পুণ্য কর্মানুষ্ঠান দ্বারা শ্রেয়োলাভ করিতে পারিবেন ।”

এইরূপ ধর্ম ও গর্বের সুসামঞ্জসই দ্রৌপদীচরিত্রের রমণীয়তার প্রধান উপকরণ । যখন জয়দ্রথ তাঁহাকে হরণ মানসে কাম্যকবনে একাকিনী প্রাপ্ত হইলেন, তখন প্রথমে দ্রৌপদী তাঁহাকে ধর্মাচারসঙ্গত অতিথিসমুচিত সৌজন্যে পরিতৃপ্ত করিতে বিলম্বণ যত্ন করেন ; পরে জয়দ্রথ আপনার ছুরতিসন্ধি ব্যক্ত করায়, ব্যাতীর ন্যায় গর্জন করিয়া আপনার তেজোরশি প্রকাশ করেন । তাঁহার সেই তেজোগর্ভ বচন পরম্পরা পাঠে মন আনন্দসাগরে ভাসিতে থাকে । জয়দ্রথ তাহাতে নিরস্ত না হইয়া তাঁহাকে বলপূর্বক আকর্ষণ করিতে গিয়া তাহার সমুচিত প্রতিফল প্রাপ্ত হইলেন ; যিনি ভীমার্জুনের পত্নী, এবং ধৃষ্টদ্যুম্নের ভগিনী তাঁহার বাহুবলে ছিন্নমূল পাদপের ন্যায় মহাবীর সিদ্ধ-সৌবীরাধিপতি ভূতলে পাতিত হইলেন ।

পরিশেষে জয়দ্রথ পুনর্বীর বল প্রকাশ করিয়া তাঁহাকে রথে তুলেন ; তখন দ্রৌপদী যে আচরণ করিলেন, তাহা নিতান্ত তেজস্বিনী বীরনারীর কার্য । তিনি বৃথা বিলাপ ও চীৎকার কিছুই করিলেন না ; অন্ত্যস্ত স্ত্রীলোকের স্থায় একবারও অনবধান এবং বিলম্বকারী স্বামিগণের উদ্দেশে ভৎসনা করিলেন

না ; কেবল কুলপুরোহিত ধোম্যের চরণে প্রণিপাত পূর্বক জয়-
দ্রথের রথে আরোহণ করিলেন । পরে যখন জয়দ্রথ দৃশ্যমান
পাণ্ডুদিগের পরিচয় জিজ্ঞাসা করিতে লাগিলেন, তখন তিনি
জয়দ্রথের রথস্থা হইয়াও যেরূপ গর্বিত বচনে ও নিঃশঙ্কচিত্তে
অবলীলাক্রমে স্বামীদিগের পরিচয় দিতে লাগিলেন, তাহা পুনঃ
পুনঃ পাঠের যোগ্য ।

দ্রৌপদী ।

(দ্বিতীয় প্রস্তাব ।)

দশ বঁংসর হইল, বঙ্গদর্শনে আমি দ্রৌপদী চরিত্র সমালোচনা করিয়াছিলাম। অগ্ৰাণ্ড আৰ্য্যনারী-চরিত্র হইতে দ্রৌপদী-চরিত্রের যে গুরুতর প্রভেদ, তাহা যথাসাধ্য দেখান গিয়াছিল। কিন্তু দ্রৌপদীর চরিত্রের মধ্যগ্রহি যে তত্ত্ব, তাহার কোন কথা সে সময়ে বলা হয় নাই। বলিবার সময় তখন উপস্থিত হয় নাই। এখন বোধ হয় সে কথাটা বলা যাইতে পারে।

সে তত্ত্বটার বহির্বিকাশ বড় দীপ্তিমান্—এক নারীর পঞ্চ-স্বামী অথচ তাঁহাকে কুলটা বলিয়া বিবেচনা করিবার কোন উপায় দেখা যায় না। এমন অসামঞ্জস্যের সামঞ্জস্য কোথা হইতে হইল ?

আমাদিগের ইউরোপীয় শিক্ষকেরা ইহার বড় সোজা উত্তর দিয়া থাকেন। ভারতবর্ষায়েরা বর্ষের জাতি—তাহাদিগের মধ্যে স্ত্রীলোকের বহুবিবাহ পদ্ধতি পূর্বকালে প্রচলিত ছিল, সেই কারণে পঞ্চপাণ্ডবের একই পত্নী। ইউরোপীয় আচার্য্যবর্গের আর কোন সাধ্য থাকুক আর না থাকুক এ দেশ সম্বন্ধে সোজা কথা গুলা বলিতে বড় মজুবুত।

ইউরোপীয়েরা এদেশীয় প্রাচীন গ্রন্থ সকল কিরূপ বুঝেন, তদ্বিষয়ে আমাকে সম্প্রতি কিছু অনুসন্ধান করিতে হইয়াছিল।

আমার এই বিশ্বাস হইয়াছে, যে সংস্কৃত সাহিত্য বিষয়ে তাঁহারা যাহা লিখিয়াছেন, তাঁহাদের কৃত, বেদ স্মৃতি দর্শন পুরাণ ইতিহাস কাব্য প্রভৃতির অনুবাদ, টীকা, সমালোচন পাঠ করার অপেক্ষা গুরুতর মহাপাতক সাহিত্যজগতে আর কিছুই হইতে পারে না ; আর মুর্থতা উপস্থিত করিবার এমন সহজ উপায়ও আর কিছুই নাই । এখনও অনেক বাঙ্গালী তাহা পাঠ করেন, তাঁহাদিগকে সতর্ক করিবার জন্ত এ কথাটা কতক অপ্রাসঙ্গিক হইলেও আমি লিখিতে বাধ্য হইলাম ।

সংস্কৃত গ্রন্থের সংখ্যা নাই বলিলেও হয় । যত অনু-সন্ধান হইতেছে, তত নূতন নূতন গ্রন্থ আবিষ্কৃত হইতেছে । সংস্কৃত গ্রন্থগুলির তুলনায়, অন্ততঃ আকারে, ইউরোপীয় গ্রন্থ-গুলিকে গ্রন্থ বলিতে ইচ্ছা করে না । যেমন হস্তীর তুলনায় টেরিয়র, যেমন বটবৃক্ষের তুলনায় উইলো কি সাইপ্রেস, যেমন গঙ্গা সিন্ধু গোদাবরীর তুলনায় গ্রীক কবিদিগের প্রিয় পার্শ্বতী নিকরিণী, মহাভারত বা রামায়ণের তুলনায় একখানি ইউরো-পীয় কাব্য সেইরূপ গ্রন্থ । বেদের সংহিতা, ব্রাহ্মণ, আরণ্যক, উপনিষদ, গৃহসূত্র, শ্রোত সূত্র, ধর্মসূত্র, দর্শন, এই সকলের ভাষ্য, তার টীকা, তার ভাষ্য, পুরাণ, ইতিহাস, স্মৃতি, কাব্য, অলঙ্কার, ব্যাকরণ, গণিত, জ্যোতিষ, অভিধান, ইত্যাদি নানাবিধ সংস্কৃত গ্রন্থে আজিও ভারতবর্ষ সমাচ্ছন্ন রহিয়াছে । এই লিপি-বদ্ধ অনুত্তরণীয় প্রাচীন তত্ত্বসমূহ মধ্যে কোথাও বুনাঙ্করে এমন কথা নাই, যে প্রাচীন আর্ষদিগের মধ্যে স্ত্রীলোকের বহুবিবাহ ছিল । তথাপি পাশ্চাত্য পণ্ডিতেরা একা দ্রৌপদীর পঞ্চস্বামীর কথা শুনিয়া সিদ্ধান্ত করিলেন, যে প্রাচীন ভারতবর্ষীয়দিগের

মধ্যে স্ত্রীলোকদিগের বহুবিবাহ প্রচলিত ছিল। এই জাতীয় একজন পণ্ডিত (Fergusson সাহেব) ভগ্ন অটালিকার প্রাচীরে গোটাকত বিবস্ত্রা স্ত্রীমূর্তি দেখিয়া সিদ্ধান্ত করিয়াছেন, যে প্রাচীন ভারতবর্ষে স্ত্রীলোকেরা কাপড় পরিত না—সীতা, সাবিত্রী, দ্রৌপদী, দময়ন্তী প্রভৃতি শবুর ভাসুরের সম্মুখে নগ্নাবস্থায় বিচরণ করিত! তাই বলিতেছিলাম—এই সকল পণ্ডিতদিগের রচনা পাঠ করার অপেক্ষা মহাপাতক সাহিত্য-সংসারে দুর্লভ।

দ্রৌপদীর পঞ্চস্বামী হইবার মূল তাৎপর্য কি, এ কথা মীমাংসা করিবার আগে বিচার করিতে হয়, যে এ কথাটা আদৌ ঐতিহাসিক, না কেবল কবিকল্পনা মাত্র? সত্য সত্যই দ্রৌপদীর পঞ্চস্বামী ছিল, না কবি এইরূপ সাজাইয়াছেন? মহাভারতের যে ঐতিহাসিক ভিত্তি আছে, তাহা প্রবন্ধান্তরে আমি স্বীকার করিয়াছি ও বুঝাইয়াছি। কিন্তু মহাভারতের ঐতিহাসিক ভিত্তি আছে বলিয়াই যে উহার সকল কথাই ঐতিহাসিক ইহা সিদ্ধ হয় না। যাহা স্পষ্টতঃ প্রক্ষিপ্ত, তাহা ঐতিহাসিক নহে—এ কথা ত স্বতঃসিদ্ধ। কিন্তু দ্রৌপদী চরিত্র প্রক্ষিপ্ত বলা যায় না—দ্রৌপদীকে লইয়াই মৌলিক মহাভারত! তা হউক—কিন্তু মৌলিক মহাভারতে যত কথা আছে সকলই যে ঐতিহাসিক এবং সত্য, ইহা বলাও দুঃসাহসের কাজ। যে সময়ে কবিই ইতিহাসবেত্তা, ইতিহাসবেত্তাও কবি, সে সময়ে কাব্যেও ইতিহাস বিমিশ্রণ বড় সহজ। সত্য কথাকে কবি স্বকপোলকল্পিত ব্যাপারে রঞ্জিত করা বিচিত্র নহে। দ্রৌপদী যুধিষ্ঠিরের মহিষী ছিলেন, ইহা না হয় ঐতিহাসিক বলিয়া

স্বীকার করা গেল—তিনি যে পঞ্চপাণ্ডবের মহিষী ইহাও ত্রি
ঐতিহাসিক সত্য বলিয়া স্বীকার করিতে হইবে ।

এই দ্রৌপদীর বহুবিবাহ ভিন্ন ভারতবর্ষীয় গ্রন্থ সমুদ্র মধ্যে
ভারতবর্ষীয় আৰ্য্যদিগের মধ্যে স্ত্রীগণের বহুবিবাহের কোন
নিদর্শন পাওয়া যায় না । বিধবা হইলে স্ত্রীলোক অন্য বিবাহ
করিত এমন প্রমাণ পাওয়া যায় । কিন্তু এক কালে কেহ একা-
ধিক পতির ভার্য্যা ছিল এমন প্রমাণ পাওয়া যায় না । কখন
দেখা গিয়াছে যে কোন মনুষ্যের প্রতি হস্তে ছয়টি
করিয়া দুই হস্তে দ্বাদশ আঙ্গুলি আছে ; কখন দেখা
গিয়াছে যে কোন মনুষ্য চক্ষুহীন হইয়া জন্ম গ্রহণ
করে । এমন একটি দৃষ্টান্ত দেখিয়া সিদ্ধান্ত করা যায় না,
যে মনুষ্যজাতির হাতের আঙ্গুল বারটি, অথবা মনুষ্য অন্ধ
হইয়া জন্মে । তেমনি কেবলি দ্রৌপদীর বহুবিবাহ দেখিয়া
সিদ্ধান্ত করা যায় না, যে পূর্বে আৰ্য্যনারীগণ-মধ্যে বহুবিবাহ
প্রথা প্রচলিত ছিল । আর মহাভারতেই প্রকাশ, যে এরূপ
প্রথা ছিল না, কেন না দ্রৌপদী সম্বন্ধে এমন অলৌকিক ব্যাপার
কেন ঘটিল, তাহার কৈফিয়ৎ দিবার জন্য মহাভারতকার পূর্ব-
জন্মখচিত্ত নানাবিধ অসম্ভব উপন্যাস রচনা করিতে বাধ্য
হইয়াছেন ।

এখন, যাহা সমাজ মধ্যে একেবারে কোথাও ছিল না, যাহা
তাদৃশ সমাজে অত্যন্ত লোক-নিন্দার কারণ স্বরূপ হইত সন্দেহ
নাই, তাহা পাণ্ডবদিগের ন্যায় লোকবিখ্যাত রাজবংশে ঘটি-
বার সম্ভাবনা ছিল না । তবে কবি এমন একটা কথা, তত্ত্ব-
বিশেষকে পরিস্ফুট করিবার জন্য গড়িয়া লওয়া বিচিত্র নহে ।

গড়া কথার মত অনেকটা লক্ষণ আছে । দ্রৌপদীর পঞ্চস্বামীর ঔরসে পঞ্চপুত্র ছিল । কাহারও ঔরসে দুইটি কি তিনটি হইল না । কাহারও ঔরসে কন্যা হইল না । কাহারও ঔরসে নিষ্কল গেল না । সেই পাঁচটি পুত্রের মধ্যে কেহ রাজ্যাধিকারী হইল না । কেহই বাঁচিয়া রহিল না । সকলেই এক সময়ে অশ্বখামার হস্তে নিধন পাইল । কাহারও কোন কার্যকারিতা নাই । সকলেই কুরুক্ষেত্রের যুদ্ধে এক একবার আসিয়া একত্রে দল বাঁধিয়া যুদ্ধ করিয়া চলিয়া যায় । আর কিছুই করে না । পক্ষান্তরে অভিমন্যু, ঘটোৎকচ, বক্রবাহন, কেমন জীবন্ত ।

জিজ্ঞাসা হইতে পারে, যদি দ্রৌপদীর পঞ্চবিবাহ গড়া কথাই হইল, যদি দ্রৌপদী একা যুধিষ্ঠিরের ভার্য্যা ছিলেন, তবে কি আর চারি পাণ্ডব অবিবাহিত ছিলেন ? ইহার উত্তর কঠিন বটে ।

ভীম ও অর্জুনের অশ্রু বিবাহ ছিল, ইহা আমরা জানি কিন্তু নকুল সহদেবের অশ্রু বিবাহ ছিল এমন কথা মহাভারতে পাই না । পাই না বলিয়াই যে সিদ্ধান্ত করিতে হইবে, যে তাঁহাদের অশ্রু বিবাহ ছিল না, এমন নহে । মহাভারত প্রধানতঃ প্রথম তিন পাণ্ডবের অর্থাৎ যুধিষ্ঠির ও ভীমার্জুনের জীবনী ; অশ্রু দুই পাণ্ডব তাঁহাদের ছায়া মাত্র—কেবল তাঁহাদের সঙ্গে থাকিয়া কাজ করে । তাহাদের অশ্রু বিবাহ থাকিলে সেটা প্রয়োজনীয় কথা নহে বলিয়া মহাভারতকার ছাড়িয়াও বাইতে পারেন । কথাটা তাদৃশ মারাত্মক নহে । দ্রৌপদীর পঞ্চস্বামী হওয়ার পক্ষে আমরা উপরে যে আপত্তি দেখাইয়াছি তাহা অপেক্ষাকৃত অনেক গুরুতর ।

এখন, যদি দ্রৌপদীর পঞ্চবিবাহ কবিরই কল্পনা বিবেচনা করা যায়, তবে কবি কি অতিপ্রায়ে এমন বিস্ময়কর কল্পনার অনুবর্তী হইলেন? বিশেষ কোন গুঢ় অতিপ্রায় না থাকিলে এমন কুটিল পথে যাইবেন কেন। তাহার অতিপ্রায় কি? পাঠক যদি ইংরেজদিগের মত বলেন "Tut! clear case of polyandry!" তবে সব ফুরাইল। আর তা যদি না বলেন, তবে ইহার নিগূঢ় ভিত্তি অনুসন্ধান করিতে হইবে।

সেই তত্ত্ব অনুসন্ধান করিবার আগে কোন বিজ্ঞ ও প্রকৃৎসাদ লোকের একটি উক্তি আমি উদ্ধৃত করিব। কথাটা প্রচারে প্রকাশিত "কৃষ্ণচরিত্রকে" লক্ষ্য করিয়া উক্ত হইয়াছে—

"শ্রীকৃষ্ণ মর্ত্য শরীর ধারণ পূর্বক ইহলোকে বিচরণ করিয়াছিলেন, এ কথা আমরাও স্বীকার করি। কিন্তু মহাভারত-প্রণয়নের পূর্বকাল হইতেও যে, শ্রীকৃষ্ণে একটি অতিমানুষ ঐশী শক্তির আবির্ভাব লোকের বিশ্বাসিত হইয়াছিল, তাহাও প্রামাণিক বলিয়া বোধ হয়। সুতরাং প্রথম হইতেই মহাভারত গ্রন্থেও যে সেই বোধের একটি অপূর্ব প্রতিবিন্দু পড়িবে, তাহা আশ্চর্যের বিষয় নহে; বস্তুতঃ তাহাই সম্ভবপর। তবে আমাদের বোধ হয়, মহাভারতরচয়িতা কর্মকাণ্ড বেদব্যাখ্যা প্রভৃতি তাহার বহুবিধ উদ্দেশ্যের মধ্যে অর্জুন এবং ভদ্রাকে আদর্শ নর-নারী করিয়া বর্ণন করিয়াছেন, এবং ঈশ্বরে অচল ভক্তি এবং তজ্জাত ঈশ্বরের নেতৃত্বে প্রতীতিই যে আদর্শ পুরুষের প্রকৃত বল তাহাও প্রদর্শনার্থ নরোত্তম শ্রীকৃষ্ণে একটি বিশেষ ঐশী শক্তিকে মূর্তিমতী করিয়া দেখাইবার প্রয়াস পাই-

স্বাচ্ছেন। সে ঐশী শক্তিটি কোন পার্থিব পাত্রে কোন দেশের কোন কবি কর্তৃকই কখন ধৃত হয় নাই। আদি কবি বাণ্মৌকিও তাহা ধরিবার চেষ্টা করেন নাই—মহাভারতকার সেই কাজে অধ্যবসায় করিয়াছিলেন, এবং তাহা যত দূর সম্পন্ন হইতে পারে, তত দূর সম্পন্ন করিয়াছিলেন বলিয়াই, মহাভারত গ্রন্থ খানি পঞ্চম বেদ বলিয়া গণ্য হইয়াছে। ঐ ঐশী শক্তির নাম ‘নির্লিপ্ততা’। ত্রীকৃষ্ণ মনুষ্যরূপী ‘নির্লেপ’।” *

এই “নির্লেপ,” বৈরাগ্য নহে অথবা সাধারণে যাহাকে “বৈরাগ্য” বলে, তাহা নহে। আমি ইহার মর্ম্ম যতদূর বুঝি, গীতা হইতে একটি শ্লোক উদ্ধৃত করিয়া তাহা বুঝাই-
তেছি।

রাগ-দ্বষবিমুক্তৈস্ত বিযয়ানিল্পি যৈশ্চরন্ ।

আত্মবশৈর্বিধেয়াত্মা প্রসাদমধিগচ্ছতি ॥

আসক্তি বিদ্বেষ রহিত এবং আত্মার বশীভূত ইন্দ্রিয় সকলের দ্বারা (ইন্দ্রিয়ের) বিষয় সকল উপভোগ করিয়া সংযতাত্মা পুরুষ শান্তি প্রাপ্ত হইবেন।

অতএব নির্লিপ্তের পক্ষে ইন্দ্রিয় বিষয়ের উপভোগ বর্জন নিষ্প্রয়োজন। এবং বর্জনে সংলেপই বুঝায়। বর্জনের প্রয়োজন আছে, ইহাতেই বুঝায় যে ইন্দ্রিয়ে এখন আত্মা লিপ্ত আছে—বর্জনে ভিন্ন বিচ্ছেদ এখনও অসাধ্য। কিন্তু যিনি ইন্দ্রিয় বিষয়ের উপভোগী থাকিয়াও তাহাতে অনুরাগশূন্য,

* এডুকেশন গেজেট, ১৮ বৈশাখ ১২৩১।

যিনি সেই সকল ইন্দ্রিয়কে বিজিত করিয়া অনুষ্ঠেয় কর্ম সম্পাদনার্থ বিষয়ের উপভোগ করেন, তিনিই নির্লিপ্ত । তাঁহার আশ্রয় সত্ত্বে ভোগ্য বিষয় আর সংশ্লিষ্ট নহে । তিনি পাপ ও হুঃখের অতীত ।

এইরূপ “নির্লেপ” বা “অনাসক্ত” পরিস্কৃত করিবার জন্য হিন্দুশাস্ত্রকারেরা একটা কৌশল অবলম্বন করিয়া থাকেন— নির্লিপ্ত বা অনাসক্তকে অধিকমাত্রায় ইন্দ্রিয়ভোগ্য বিষয়ের দ্বারা পরিবেষ্টিত করেন । এই জন্য মহাভারতের পরবর্তী পুরাণকারেরা শ্রীকৃষ্ণকে অসংখ্য বরাদ্দনামধ্যবর্তী করিয়াছেন । এই জন্য তান্ত্রিকদিগের সাধন প্রণালীতে এত বেশী ইন্দ্রিয়ভোগ্য বস্তুর আবির্ভাব । যে এই সকল মধ্যে যথেষ্ট বিচরণ করিয়া তাহাতে অনাসক্ত রহিল, সেই নির্লিপ্ত । দ্রৌপদীর বহু স্বামীও এই জন্য । দ্রৌপদী স্ত্রীজাতির অনাসক্ত ধর্মের মূর্তি-স্বরূপিণী । তৎস্বরূপে তাঁহাকে স্থাপন করাই কবির উদ্দেশ্য । তাই গণিকার ন্যায় পঞ্চ পুরুষের সংসর্গযুক্ত হইয়াও দ্রৌপদী সাধ্বী, পতিব্রতের পরাকাষ্ঠা । পঞ্চপতি দ্রৌপদীর নিকট এক পতি মাত্র, উপাসনার এক বস্তু, এবং ধর্মাচরণের একমাত্র অভিন্ন উপলক্ষ্য । যেমন প্রকৃত ধর্মাশ্রয় নিকট বহু দেবতাও এক ঈশ্বর মাত্র—ঈশ্বরই জ্ঞানীর নিকট এক মাত্র অভিন্ন উপাস্য, তেমনি পঞ্চস্বামী অনাসক্তযুক্তা দ্রৌপদীর নিকট এক মাত্র ধর্মাচরণের স্থল । তাঁহার পক্ষাপক্ষ, ভেদাভেদ, ইতর-বিশেষ নাই ; তিনি গৃহধর্মের নিষ্কাম, নিশ্চল, নির্লিপ্ত হইয়া অনুষ্ঠেয় কর্মে প্রবৃত্ত । ইহাই দ্রৌপদী চরিত্রে অসামঞ্জস্যের সামঞ্জস্য । তবে ঈদৃশ ধর্ম অতিদুঃসাধনীয় ।

মহাভারতকার মহাপ্রাণানিক গর্বে সেটুকুও বুঝাইয়াছেন।
তথায় কথিত হইয়াছে যে দ্রৌপদীর অর্জুনের দিগে কিঞ্চিৎ
পক্ষপাত ছিল বলিয়া তিনি সেই পাপফলে সশরীরে স্বর্গারোহণ
করিতে পারিলেন না—সর্বাগ্রেই পথিমধ্যে পতিতা
হইলেন।

বোধ হয়, এখন বুঝিতে পারা যায়, যে দ্রৌপদীর পাঁচ
স্বামীর ঔরসে কেবল এক একটি পুত্র কেন? হিন্দু শাস্ত্রানুসারে
পুত্রোৎপাদন ধর্ম; গৃহীর তাহাতে বিরতি অধর্ম। পুত্র উৎপন্ন
হইলে বিবাহ সফল হইল; না হইলে, ধর্ম অসম্পূর্ণ রহিল।
কিন্তু ধর্মের যে প্রয়োজন, এক পুত্রেই তাহা সিদ্ধ হয়। একা-
ধিক পুত্রের উৎপাদন ধর্মার্থে নিষ্প্রয়োজনীয়—কেবল ইন্দ্রিয়-
তৃপ্তির ফল মাত্র। কিন্তু দ্রৌপদী ইন্দ্রিয়স্থখে নিলিপ্ত; ধর্মের
প্রয়োজন সিদ্ধ হইলে, স্বামিগণের সঙ্গে তাহার ঐন্দ্রিয়িক সম্বন্ধ
বিচ্ছিন্ন হইল। স্বামীর ধর্মার্থে দ্রৌপদী সকল স্বামীর ঔরসে
এক এক পুত্র গর্ভে ধারণ করিলেন; তৎপরে নির্লেপবশতঃ
আর সন্তান গর্ভে ধারণ করিলেন না। কবির কল্পনার এই
তাৎপর্য।

এই সকল কথা তাৎপর্য বোধ করি কেহই এমন বুঝিবেন
না যে, যে স্ত্রীলোক অনাসক্ত ধর্ম গ্রহণ করিবে, সেই পাঁচ ছয়টি
মনুষ্যকে স্বামিতে বরণ করিবে—তাহা নহিলে ধর্মের সাধন
হইবে না। তাৎপর্য এই মাত্র যে, যাহার চিত্তশুদ্ধি হইয়াছে
মহাপাতকে পড়িলেও পাপ তাহাকে স্পর্শ করিতে পারে না।
দ্রৌপদীর অদৃষ্টে যাহা ঘটয়াছিল স্ত্রীলোকের পক্ষে তেমন মহা-
পাপ আর কিছুই নাই। কিন্তু দ্রৌপদীর চিত্তশুদ্ধি জন্মিয়া

ছিল বলিয়া, তিনি সেই মহাপাপকেও ধর্ম্মে পরিণত
করিয়াছিলেন ।

আমি প্রথম প্রবন্ধে দেখিয়াছি, যে দ্রোপদী ধর্ম্মবলে
অত্যন্ত দৃপ্তা ; সে দর্প কখন কখন ধর্ম্মকেও অতিক্রম করে ।
সেই দর্পের সঙ্গে এই ইন্দ্রিয়জয়ের কোন অসামঞ্জস্য নাই ।
তবে তাঁহার নিকাম ধর্ম্ম সর্ব্বাঙ্গীন সম্পূর্ণতা প্রাপ্ত হইয়াছিল
কি না, সে স্বতন্ত্র কথা ।

অনুকরণ ।*

জগদীশ্বর কৃপায়, উনবিংশ শতাব্দীতে. আধুনিক বাঙ্গালি নামে এক অদ্বিতীয় জন্তু এই জগতে দেখা গিয়াছে । পশুতত্ত্ববিৎ পণ্ডিতেরা পরীক্ষা দ্বারা স্থির করিয়াছেন, যে এই জন্তু বাহ্যতঃ মনুষ্য-লক্ষণাক্রান্ত ; হস্তে পদে পাঁচ পাঁচ অঙ্গুলি, লাম্বুল নাই, এবং অস্থি ও মস্তিষ্ক, “বাইমেনা” জাতির সদৃশ বটে । তবে অন্তঃস্বভাব সম্বন্ধে, সেরূপ নিশ্চয়তা এখনও হয় নাই । কেহ কেহ বলেন, ইহারা অন্তঃসম্বন্ধেও মনুষ্য বটে, কেহ কেহ বলেন, ইহারা বাহিরে মনুষ্য, এবং অন্তরে পশু । এই তত্ত্বের মীমাংসা জন্য, শ্রীযুক্ত বাবু রাজনারায়ণ বসু ১৭৯৪ শকের চৈত্র মাসে বক্তৃতা করেন । এক্ষণে তাহা মুদ্রিত করিয়াছেন । তিনি এ বক্তৃতায় পশুপক্ষই সমর্থন করিয়াছেন ।

আমরা কোন্ মতাবলম্বী ? আমরাও বাঙ্গালির পশুতত্ত্ববাদী । আমরা ইংরেজী সম্বাদপত্র হইতে এ পশুতত্ত্ব অভ্যাস করিয়াছি । কোন কোন তাম্রশাশ্রু ঋষির মত এই যে যেমন বিধাতা ত্রিলোকের সুন্দরীগণের সৌন্দর্য তিল তিল সংগ্রহ করিয়া তিলোত্তমার স্বজন করিয়াছিলেন ; সেইরূপ পশুবৃত্তির

* সেকাল আর একাগ । শ্রীরাজনারায়ণ বসু প্রণীত ।

তিল তিল করিয়া সংগ্রহ পূর্বক এই অশ্লীল নব্য বাঙ্গালিচরিত্র
 স্বজন করিয়াছেন। শৃগাল হইতে শঠতা, কুকুর হইতে তোষা-
 মোদ ও অভিক্ষানুরাগ, মেঘ হইতে ভীকতা, বানর হইতে অনু-
 করণপন্থতা, এবং গর্দভ হইতে গর্জন,—এই সকল একত্র
 করিয়া, দিগ্‌মণ্ডল উজ্জ্বলকারী, ভারতবর্ষের ভরসার বিষয়ীভূত,
 এবং ভট্ট মক্ষমুলরের আদরের স্থল, নব্য বাঙ্গালিকে সমাজ-
 কাশে উদ্ভিত করিয়াছেন। যেমন সুন্দরীমণ্ডলে তিলোত্তমা,
 গ্রন্থমধ্যে রিচাডসঙ্গ সিলেকুমঙ্গ, যেমন পোষাকের মধ্যে ফকি-
 রের জামা, মদ্যের মধ্যে পঞ্চ, খাদ্যের মধ্যে খিচুড়ি, তেমনি এই
 মহাত্মাদিগের মতে মনুষ্যের মধ্যে নব্যবাঙ্গালি। যেমন ক্ষীরোদ
 সমুদ্র মন্থন করিলে চন্দ্র উঠিয়া জগৎ আলো করিয়াছিল—
 তেমনি পশুচরিত্র সাগর মন্থন করিয়া, এই আনন্দনীয় বাবু চাঁদ
 উঠিয়া ভারতবর্ষ আলো করিতেছেন। রাজনারায়ণ বাবুর শ্রায় যে
 সকল অমৃতলুদ্ধ লোক রাত্ হইয়া এই কলঙ্কশূণ্ড চাঁদকে গ্রাস
 করিতে যান, আমরা তাঁহাদের নিন্দা করি। বিশেষতঃ রাজ-
 নারায়ণ বাবুকে বলি, যে আপনিই এই গ্রন্থমধ্যে গোমাংস-
 ভোজন নিষেধ করিয়াছেন, তবে বাঙ্গালির মুণ্ড খাইতে বসিয়া-
 ছেন কেন?—গোরু হইতে বাঙ্গালি কিসে অপকৃষ্ট? গোরুও
 যেমন উপকারী, নব্য বাঙ্গালিও সেইরূপ। ইহারা সম্বাদ-
 পত্র রূপ, ভাণ্ড ভাণ্ড সুস্বাদু দুগ্ধ দিতেছে; চাকরি লাঙ্গল
 কাঁধে লইয়া, জীবনক্ষেত্র কর্ষণ পূর্বক ইংরেজ চাষার ফশলের
 যোগাড় করিয়া দিতেছে; বিদ্যার ছালা পিঠে করিয়া কালেজ
 হইতে ছাপাখানায় আনিয়া কেলিয়া, চিনির বলদের নাম
 রাখিতেছে; সমাজ সংস্কারের গাড়িতে বিলাতি মাল বোঝাই

দিয়া, রসের বাজারে ঢোলাই করিতেছে ; এবং দেশহিতের
খানিগাছে স্বার্থশর্ষণ পেষণ করিয়া, যশের তেল বাহির
করিতেছে । এত গুণের গোরুকে কি বধ করিতে আছে ?

কিন্তু যিনি বাঙ্গালির যত নিন্দা করুন, বাঙ্গালি তত নিন্দনীয়
নহে । রাজনারায়ণ বাবুও বাঙ্গালির যত নিন্দা করিয়াছেন,
বাঙ্গালি তত নিন্দনীয় নহে । অনেক স্বদেশবৎসল যে অভি-
প্রায়ে লাঙ্গালির নিন্দা করেন, রাজনারায়ণ বাবুও সেই অভি-
প্রায়ে বাঙ্গালির নিন্দা করিয়াছেন—বাঙ্গালির হিতার্থ । সে
কালে আর এ কালে নিরপেক্ষ ভাবে তুলনা তাহার উদ্দেশ্য
নহে—একালের দোষনিষ্কাশনই তাহার উদ্দেশ্য । একালের
গুণগুলির প্রতি তিনি বিশেষ দৃষ্টিক্ষেপ করেন নাই—করাও
নিষ্প্রয়োজন, কেন না আমরা আপনাদিগের গুণের প্রতি পল-
কের জন্য সন্দেহযুক্ত নহি ।

নব্য বাঙ্গালির অনেক দোষ । কিন্তু সকল দোষের মধ্যে,
অনুকরণানুরাগ সর্ববাদিসম্মত । কি ইংরেজ কি বাঙ্গালি সক-
লেই ইহার জন্ত বাঙ্গালি জাতিকে অহরহ তিরস্কৃত করিতেছেন ।
তদ্বিষয়ে রাজনারায়ণ বাবু যাহা বলিয়াছেন, তাহা উদ্ধৃত করি-
বার আবশ্যকতা নাই—সে সকল কথা আজকালি সকলেরই
মুখে নিতে পাওয়া যায় ।

আমরা সে সকল কথা স্বীকার করি, এবং ইহাও স্বীকার
করি, যে রাজনারায়ণ বাবু যাহা বলিয়াছেন, তাহার অনেক-
খানিই সঙ্গত । কিন্তু অনুকরণসম্বন্ধে দুই একটি সাধারণ ভ্রম
হয় ।

অনুকরণ মাত্র কি দৃশ্য ? তাহা কদাচ হইতে পারে না ।

অনুকরণ ভিন্ন প্রথম শিক্ষার উপায় কিছুই নাই। যেমন শিশু বয়ঃপ্রাপ্তের বাক্যানুকরণ করিয়া কথা কহিতে শিখে, যেমন সে বয়ঃপ্রাপ্তের কার্য সকল দেখিয়া কার্য করিতে শিখে, অসভ্য এবং অশিক্ষিত জাতি সেইরূপ সভ্য এবং শিক্ষিত-জাতির অনুকরণ করিয়া সকল বিষয়ে শিক্ষা প্রাপ্ত হয়। অতএব বাঙ্গালি যে ইংরেজের অনুকরণ করিবে, ইহা সঙ্গত ও যুক্তিসিদ্ধ। সত্যবটে, আদিম সভ্যজাতি বিনানুকরণে স্বতঃশিক্ষিত এবং সভ্য হইয়াছিল; প্রাচীন ভারতীয় ও মিসরীয় সভ্যতা কাহারও অনুকরণলব্ধ নহে। কিন্তু যে আধুনিক ইউরোপীয় সভ্যতা সৰ্ব্বজাতীয় সভ্যতার মধ্যে শ্রেষ্ঠ, তাহা কিসের ফল? তাহাও রোম ও যুনানী সভ্যতার অনুকরণের ফল। রোমক সভ্যতাও যুনানী সভ্যতার অনুকরণ-ফল। যে পরিমাণে বাঙ্গালি, ইংরেজের অনুকরণ করিতেছে, পুরাতত্ত্ব জানেন যে ইউরোপীয়েরা প্রথমাবস্থাতে তদপেক্ষা অল্প পরিমাণে যুনানীয়েদের বিশেষতঃ রোমকীয়েদের অনুকরণ করেন নাই। প্রথমাবস্থাতে অনুকরণ করিয়াছিলেন বলিয়াই এখন এ উচ্চসোপানে দাঁড়াইয়াছেন। শৈশবে পরের হাতে ধরিয়া যে জলে নামিতে না শিখিয়াছে, সে কখনই নাতার দিতে শিখে নাই; কেন না ইহ জন্মে তাহার জলে নামাই হইল না। শিক্ষকের লিখিত আদর্শ দেখিয়া যে প্রথমে লিখিতে না শিখিয়াছে, যে কখনই লিখিতে শিখেন নাই। বাঙ্গালি যে ইংরেজের অনুকরণ করিতেছে, ইহাই বাঙ্গালির ভরসা।

তবে লোকের বিশ্বাস এই, যে অনুকরণের ফলে কখন প্রথম শ্রেণীর উৎকর্ষ প্রাপ্তি হয় না। কিসে জানিলে ?

প্রথম, সাহিত্য সম্বন্ধে দেখ। পৃথিবীর কতকগুলি প্রথম শ্রেণীর কাব্য, কেবল অনুকরণ মাত্র। ডাইডেন এবং বোয়ালোর অনুকারী পোপ, পোপের অনুকারী জনসন। এইরূপ ক্ষুদ্র ক্ষুদ্র লেখকদিগের দৃষ্টান্ত দেখাইয়া আমরা এ কথা সম্ভ্রামণ করিতে চাহি না। বর্জিলের মহাকাব্য, হোমরের প্রসিদ্ধ মহাকাব্যের অনুকরণ। সমুদয় রোমকসাহিত্য, যুনানীয় সাহিত্যের অনুকরণ। যে রোমকসাহিত্য বর্তমান ইউরোপায় সত্যতার ভিত্তি, তাহা অনুকরণ মাত্র। কিন্তু বিদেশীয় উদাহরণ দূরে থাকুক। আমাদের দেশে দুইখানি মহাকাব্য আছে—তাহাকে মহাকাব্য বলে না, গৌরবার্থ ইতিহাস বলে—তাহা পৃথিবীর সকল কাব্যের শ্রেষ্ঠ। গুণে উভয়ে প্রায় তুল্য; অল্প তারতম্য। একখানি আর একখানির অনুকরণ।

মহাভারত যে রামায়ণের পরকালে প্রণীত, তাহা হইলর সাহেব ভিন্ন বোধ হয় আর কেহই সহজ অবস্থায় অস্বীকার করিবেন না। অন্যান্য অনুকৃত এবং অনুকরণের নায়ক সকলে ষতটা প্রভেদ দেখা যায়, রামে ও যুধিষ্ঠিরে তাহার অপেক্ষা অধিক প্রভেদ নহে। রামায়ণের অমিতবলধারী বীর, জিতে-দ্রিয়, ভ্রাতৃবৎসল, লক্ষণ মহাভারতে অর্জুনে পরিণত হইয়াছেন, এবং ভরত শত্রুঘ্ন নকুল সহদেব হইয়াছেন। ভীম, নূতন সৃষ্টি; তবে কুস্তকর্ণের একটু ছায়ায় দাঁড়াইয়াছেন। রামায়ণে রাবণ, মহাভারতে দুর্ঘেয়াধন; রামায়ণে বিভী-

যশ মহাভারতে বিহুর ; অভিমন্যু, ইন্দ্রজিতের অস্থি-
মজ্জা লইয়া গঠিত হইয়াছে। এদিকে রাম ভ্রাতা ও
পত্নী সহিত বনবাসী ; যুধিষ্ঠির ও ভ্রাতা ও পত্নী সহিত বন-
বাসী। উভয়েই রাজ্যচ্যুত। একজনের পত্নী অপহৃত, আর
একজনের পত্নী সভামধ্যে অপমানিতা ; উভয় মহাকাব্যের
সারভূত সমরানলে সেই অগ্নি জ্বলন্ত ; একে স্পষ্টতঃ, অপরে
অস্পষ্টতঃ। উভয় কাব্যের উপন্যাস ভাগ এই যে যুবরাজ
রাজ্যচ্যুত হইয়া, ভ্রাতা ও পত্নী সহ বনবাসী, পরে সমরে
প্রবৃত্ত, পরে সমরবিজয়ী হইয়া পুনর্বার স্বরাজ্যে স্থাপিত।
ক্ষুদ্র ক্ষুদ্র ঘটনাতেই সেই সাদৃশ্য আছে ; কুশীলবের পাল
মণিপুরে বক্রবাহন কর্তৃক অভিনীত হইয়াছে ; মিথিলায়
ধনুর্ভঙ্গ, পাঞ্চালে মংস্যবিক্রমে পরিণত হইয়াছে ; দশরথ-
কৃত পাপে এবং পাণ্ডুকৃত পাপে বিলক্ষণ ঐক্য আছে।
মহাভারতকে রামায়ণের অনুকরণ বলিতে ইচ্ছা না হয়, না
বলুন ; কিন্তু অনুকরণীয়ে এবং অনুকৃতে ইহার অপেক্ষা
ঘনিষ্ঠ সম্বন্ধ অতি বিরল। কিন্তু মহাভারত অনুকরণ
হইয়াও কাব্যমধ্যে পৃথিবীতে অগ্ৰত অতুল—একা রামায়ণই
তাহার তুলনীয়। অতএব অনুকরণ মাত্র হয় নহে।

পরে, সমাজ সম্বন্ধে দেখ। যখন রোমকেরা যুনানীয়
সভ্যতার পরিচয় পাইলেন, তখন তাহারা কায়মনোবাক্যে
যুনানীয়দিগের অনুকরণে প্রবৃত্ত হইলেন। তাহার ফল,
কিকিরোর বাণিতা, তাসিতসের ইতিবৃত্তগ্রন্থ, বর্জিলের
মহাকাব্য, প্লতম ও টেবেসের নাটক, হরেস ও ওবিদের
গীতিকাব্য, পেপিনিয়নের ব্যবস্থা, সেনেকার ধর্মনীতি, আন্ত-

নৈনদিগের রাজধর্ম, লুকালসের ভোগাসক্তি, জনসাধারণের ঐশ্বর্য, এবং সম্রাটগণের স্থাপত্য কীর্তি। আধুনিক ইউরোপীয়দিগের কথা পূর্বেই উল্লিখিত হইয়াছে; ইতালীয়, ফরাসি-সাহিত্য, গ্রীক ও রোমীয় সাহিত্যের অনুকরণ; ইউরোপীয় ব্যবস্থা শাস্ত্র, রোমকব্যবস্থা-শাস্ত্রের অনুকরণ; ইউরোপীয় শাসন প্রণালী, রোমকীয়ের অনুকরণ। কোথাও সেই ইম্পিরেটর, কোথাও সেই সেনেট, কোথাও সেই প্লেবের শ্রেণী; কোথাও ফোরম, কোথাও সেই মিউনিসিপিয়ম্। আধুনিক ইউরোপীয় স্থাপত্য ও চিত্রবিদ্যাও যুনানী ও রোমক মূল্যবিশিষ্ট। এই সকলই প্রথমে অনুকরণ মাত্রই ছিল; এক্ষণে অনুকরণাবস্থা পরিত্যাগ করিয়া পৃথগ্ভাবাপন্ন ও উন্নত হইয়াছে। প্রতিভা থাকিলেই এরূপ ঘটে, প্রথম অনুকরণ মাত্র হয়; পরে অভ্যাসে উৎকর্ষ প্রাপ্ত হওয়া যায়। যে শিশু প্রথম লিখিতে শিখে, তাহাকে প্রথমে গুরুর হস্তাক্ষরের অনুকরণ করিতে হয়—পরিণামে তাহার হস্তাক্ষর স্বতন্ত্র হয়, এবং প্রতিভা থাকিলে সে গুরুর অপেক্ষা ভাল লিখিয়াও থাকে।

তবে প্রতিভাশূণ্যের অনুকরণ বড় কদর্য্য হয় বটে। যাহার যে বিষয়ে নৈসর্গিক শক্তি নাই, যে চিরকালই অনুকারী থাকে, তাহার স্বাতন্ত্র্য কখন দেখা যায় না। ইউরোপীয় নাটক ইহার বিশিষ্ট উদাহরণ। ইউরোপীয় জাতি মাত্রেরই নাটক আদৌ যুনানী নাটকের অনুকরণ। কিন্তু প্রতিভার গুণে স্পেনীয় এবং ইংলণ্ডীয় নাটক শীঘ্রই স্বাতন্ত্র্য লাভ করিল—এবং ইংলণ্ড এ বিষয়ে গ্রীসের সমকক্ষ হইল। এদিকে

এতদ্বিষয়ে স্বাভাবিক শক্তিশূন্য রোমীয়, ইতালীয়, ফরাসি এবং জার্মানীয়গণ, অনুকারীই রহিলেন। অনেকেই বলেন, যে শেষোক্ত জাতি সকলের নাটকের অপেক্ষাকৃত অনুৎকর্ষ তাহা-দিগের অনুচিকীর্ষার ফল। এটি ভ্রম। ইহা নৈসর্গিক ক্রম-তার অপ্রতুলেরই ফল। অনুচিকীর্ষাও সেই অপ্রতুলের ফল। অনুচিকীর্ষাও কার্য্য, কারণ নহে।

অনুকরণ যে গাণি বলিয়া আজি কালি পরিচিত হইয়াছে, তাহার কারণ প্রতিভাশূন্য ব্যক্তির অনুকরণে প্রবৃত্তি। অক্ষম ব্যক্তির কৃত অনুকরণ অপেক্ষা ঘণাকর আর কিছুই নাই; একে মন্দ তাহাতে অনুকরণ। নচেৎ অনুকরণ মাত্র ঘণ্য নহে; এবং বাঙ্গালির বর্তমান অবস্থায় তাহা দোষের নহে। বরং এরূপ অনুকরণই স্বভাবসিদ্ধ। ইহাতে যে বাঙ্গালির স্বভাবের কিছু বিশেষ দোষ আছে এমন বোধ করিবার কারণ নির্দেশ করা কঠিন। ইহা মানুষের স্বভাবসিদ্ধ দোষ বা গুণ। যখন উৎকৃষ্টে এবং অপকৃষ্টে একত্রিত হয়, তখন অপকৃষ্ট স্বভাবতই উৎকৃষ্টের সমান হইতে চাহে। সমান হইবার উপায় কি? উপায়, উৎকৃষ্ট বেরূপ করে, সেইরূপ কর, সেইরূপ হইবে। তাহাকেই অনুকরণ বলে। বাঙ্গালি দেখে, ইং-রেজ, সভ্যতায়, শিক্ষায়, বলে, ঐশ্বর্য্যে, সুখে, সর্ব্বাংশে বাঙ্গালি হইতে শ্রেষ্ঠ। বাঙ্গালি কেন না ইংরেজের মত হইতে চাহিবে? কিন্তু কি প্রকারে সেইরূপ হইবে? বাঙ্গালি মনে করে, ইংরেজ যাহা যাহা করে, সেইরূপ সেইরূপ করিলে, ইংরেজের মত সভ্য, শিক্ষিত, সম্পন্ন, সুখী হইব। অন্য যে কোন জাতি হউক না কেন, ঐ অবস্থাপন্ন হইলে ঐ রূপ করিত। বাঙ্গালির

স্বভাবের দোষে এ অনুকরণপ্রবৃত্তি নহে । অস্তিতঃ বাঙ্গালির তিনটি প্রধান জাতি—ব্রাহ্মণ, বৈদ্য, কায়স্থ, আৰ্য্যবংশমস্তৃত ; আৰ্য্যশোণিত তাহাদের শরীরে অদ্যাপি বহিতেছে ; বাঙ্গালি কখনই বানরের গায় কেবল অনুকরণের জন্তই অনুকরণপ্রিয় হইতে পারে না । এ অনুকরণ স্বাভাবিক, এবং পরিণামে মঙ্গলপ্রদ হইতে পারে । যাহারা আমাদিগের কৃত ইংরেজর আহার ও পরিচ্ছদের অনুকরণ দেখিয়া রাগ করেন তাঁহারা ইং-রেজকৃত ফরাসীদিগের আহার পরিচ্ছদের অনুকরণ দেখিয়া কি বলিবেন ? এ বিষয়ে বাঙ্গালির অপেক্ষা ইংরেজেরা অল্পাংশে অনুকারী ? আমরা অনুকরণ করি, জাতীয় প্রভুর ;—ইংরেজেরা অনুকরণ করেন—কাহার ?

ইহা আমরা অবশ্য স্মীকার করি, যে বাঙ্গালি যে পরিমাণে অনুকরণে প্রবৃত্ত, ততটা বাঞ্ছনীয় না হইতে পারে । বাঙ্গালির মধ্যে প্রতিভাশূন্য অনুকারীরই বাহুল্য ; এবং তাঁহাদিগকে প্রায় গুণভাগের অনুকরণে প্রবৃত্ত না হইয়া দোষভাগের অনুকরণেই প্রবৃত্ত দেখা যায় । এইটি মহা দুঃখ । বাঙ্গালি গুণের অনুকরণে তত পটু নহে ; দোষের অনুকরণে ভূমণ্ডলে অদ্বিতীয় । এই জন্তই আমরা বাঙ্গালির অনুকরণপ্রবৃত্তিকে গালি পাড়ি, এবং এই জন্তই রাজনারায়ণ বাবু যাহা যাহা বলিয়াছেন, তাহার অনেক গুলিকে যথার্থ বলিয়া স্মীকার করিতেছি ।

যেখানে অনুকারী প্রতিভাশালী সেখানেও অনুকরণের দুইটি মহৎ দোষ আছে । একটি বৈচিত্রের বিহীন । এ সংসারে একটি প্রধান সুখ, বৈচিত্র ঘটতি । জগতীতলস্থ সৰ্ব পদার্থ যদি এক বর্ণের হইত তবে জগৎ কি এত সুখদৃশ্য হইত ? সকল

শব্দ যদি এক প্রকার হইত—মনে কর কোকিলের স্বরের শ্রাব্য
রব ভিন্ন পৃথিবীতে অন্য কোন প্রকার শব্দ না থাকিত, তবে কি সে
শব্দ সকলের কর্ণজ্বালাকর হইত না? আমরা সেরূপ স্বভাব
পাইলে, না হইতে পারিত। কিন্তু এক্ষণে আমরা যে প্রকৃতি
নইয়া পৃথিবীতে জন্মগ্রহণ করিয়াছি, তাহাতে বৈচিত্রেই সুখ।
অনুকরণে এই সুখের ধ্বংস হয়। মাকবেথ উৎকৃষ্ট নাটক,
কিন্তু পৃথিবীর সকল নাটক মাকবেথের অনুকরণে লিখিত
হইলে, নাটকে আর কি সুখ থাকিত? সকল মহাকাব্য রঘু-
বংশের আদর্শে লিখিত হইলে, কে আর কাব্য পড়িত?

দ্বিতীয়, সকল বিষয়েই যতপৌনঃপুণ্ডে উৎকর্ষের সম্ভাবনা।
কিন্তু পরবর্তী কার্য পূর্ববর্তী কার্যের অনুকরণ মাত্র হইলে,
চেহঁটা কোন প্রকার নতন পথে যায় না; সুতরাং কার্যের
উন্নতি ঘটে না। তখন ধারাবাহিকতা প্রাপ্ত হইতে হয়। ইহা
কি শিল্প সাহিত্য বিজ্ঞান, কি সামাজিক কার্য, কি মানসিক
অভ্যাস, সকল সম্বন্ধেই সত্য।

মনুষ্যের শারীরিক ও মানসিক বৃত্তি সকলেরই সামকালিক
যথোচিত ক্ষুর্তি এবং উন্নতি মনুষ্যদেহ ধারণের প্রধান
উদ্দেশ্য। তবে যাহাতে কতকগুলির অধিকতর পরিপূষ্টি, এবং
কতকগুলির প্রতি ভাচ্ছল্য জন্মে, তাহা মনুষ্যের অনিষ্টকর।
মনুষ্য অনেক, এবং একজন মনুষ্যের সুখও বহুবিধ। তন্মধ্যে
সাধনের জন্য বহুবিধ ভিন্ন ভিন্ন প্রকারের কার্যের আবশ্যিকতা।
ভিন্ন ভিন্ন প্রকারের কার্য ভিন্ন ভিন্ন প্রকৃতির লোকের দ্বারা
ভিন্ন সম্পন্ন হইতে পারে না। এক শ্রেণীর চরিত্রের লোকের
দ্বারা, বহু প্রকারের কার্য সাধিত হইতে পারে না। অতএব

সংসারে চরিত্রবৈচিত্র, কার্যবৈচিত্র, এবং প্রবৃত্তির বৈচিত্র প্রয়োজন। তদ্ব্যতীত সমাজের সকল বিষয়ে মঙ্গল নাই। অনুকরণপ্রবৃত্তিতে ইহাই ঘটে, যে অনুকারীর চরিত্র, তাহার প্রবৃত্তি, এবং তাহার কার্য, অনুকরণীয়ের গায় হয়, পথান্তরে গমন করিতে পারে না। যখন সমাজস্থ সকলেই বা অধিকাংশ লোক, বা কার্যক্রম শ্রেষ্ঠ ব্যক্তিগণ, একই আদর্শের অনুকারী হইলেন, তখন এই বৈচিত্রহানি অতি গুরুতর হইয়া উঠে। মনুষ্য-চরিত্রের সর্বস্বাক্ষীন স্ফূর্তি ঘটে না; সর্বপ্রকারের মনোবৃত্তি সকলের মধ্যে, যথোচিত সামঞ্জস্য থাকে না, সর্বপ্রকারের কার্য সম্পাদিত হয় না, মনুষ্যের কপালে সকল প্রকার সুখ ঘটে না—মনুষ্যত্ব অসম্পূর্ণ থাকে, সমাজ অসম্পূর্ণ থাকে, মনুষ্যজীবন অসম্পূর্ণ থাকে।

আমরা যে কয়টি কথা বলিয়াছি. তাহাতে নিম্নলিখিত তত্ত্ব সকলের উপলব্ধি হইতে পারে—

১। সামাজিক সভ্যতার আদি দুই প্রকার; কোন কোন সমাজ স্বতঃ সভ্য হয়, কোন কোন সমাজ অন্ত্র হইতে শিক্ষা লাভ করে। প্রথমোক্ত সভ্যতালাভ বহুকাল-সাপেক্ষ; দ্বিতীয়োক্ত আশু সম্পন্ন হয়।

২। যখন কোন অপেক্ষাকৃত অসভ্য জাতি, সভ্যতর জাতির সংস্পর্শ লাভ করে, তখন দ্বিতীয় পথে সভ্যতা অতি দ্রুতগতিতে আসিতে থাকে। সেস্থলে সামাজিক গতি এইরূপ হয়, যে অপেক্ষাকৃত অসভ্য সমাজ সভ্যতর সমাজের সর্বস্বাক্ষীন অনুকরণে প্রবৃত্ত হয়। ইহাই স্বাভাবিক নিয়ম।

৩। অতএব বঙ্গীয় সমাজের, দৃশ্যমান অনুকরণপ্রবৃত্তি অস্বাভাবিক বা বাঙ্গালির চরিত্রদোষজনিত নহে ।

৪। অনুকরণ মাত্রই অনিষ্টকারী নহে, কখন কখন তাহাতে গুরুতর সুফলও জন্মে ; প্রথমাবস্থায় অনুকরণ পরে স্বাভাব্য আপনাই আসে। বঙ্গীয় সমাজের অবস্থা বিবেচনা করিলে, এই অনুকরণপ্রবৃত্তি যে ভাল নহে, এমত নিশ্চয় বলা যাইতে পারে না। ইহাতে ভরসার স্থলও আছে।

৫। তবে অনুকরণে গুরুতর কুফলও আছে। উপযুক্ত কাল উত্তীর্ণ হইলেও অনুকরণপ্রবৃত্তি বলবতী থাকিলে অথবা অনুকরণের যথার্থ সময়েই অনুকরণপ্রবৃত্তি অব্যবহিত-রূপে স্কৃতি পাইলে, সর্বনাশ উপস্থিত হইবে।



শকুন্তলা, মিরন্দা এবং দেস্‌দিমোনা ।

প্রথম, শকুন্তলা ও মিরন্দা ।

উভয়েই ঋষিকন্যা ; প্রম্পেরো ও বিখ্যামিত্র উভয়েই রাজর্ষি । উভয়েই ঋষিকন্যা বলিয়া, অমানুষিক সাহায্যপ্রাপ্ত । মিরন্দা এরিয়ল-রক্ষিতা, শকুন্তলা অপ্সরোরক্ষিতা ।

উভয়েই ঋষি-পালিতা । দুইটিই বনলতা—দুইটিরই সৌন্দর্যে উদ্যানলতা পরাভূতা । শকুন্তলাকে দেখিয়া, রাজাবরোধবাসিনীগণের মনোভূত রূপলাবণ্য দুঃস্বপ্নের স্মরণ পথে আসিল ;

শুকান্তদুর্লভমিদংবপুরাশ্রমবাসিনো যদি জনস্ত ।

দূরীকৃতাঃ খলু গুণৈরুদ্যানলতা বনলতাভিঃ ॥ .

ফর্দিনন্দও মিরন্দাকে দেখিয়া সেইরূপ ভাবিলেন,

Full many a lady

I have eyed with best regard,—and many a time
The harmony of their tongues hath into bondage
Brought my too diligent ear : for several virtues
Have I like several women ;

—but you, O you

So perfect and so peerless, are created
Of every creature's best !

উভয়েই অরণ্যমধ্যে প্রতিপালিতা; সরলতার যে কিছু মোহমন্ত্র আছে, উভয়েই তাহাতে সিদ্ধ। কিন্তু মনুষ্যালয়ে বাস করিয়া, সুন্দর, সরল, বিশুদ্ধ রমণীপ্রকৃতি, বিকৃতি প্রাপ্ত হয়—কে আমায় ভাল বাসিবে, কে আমায় সুন্দর বলিবে, কেমন করিয়া পুরুষ জয় করিব, এই সকল কামনায়, নানা বিলাস বিভ্রমাদিতে, মেঘবিলুপ্ত চন্দ্রমাবৎ, তাহার মাধুর্য কালিমাপ্রাপ্ত হয়। শকুন্তলা এবং মিরন্দার এই কালিমা নাই, কেননা তাঁহারা লোকালয়ে প্রতিপালিতা নহেন। শকুন্তলা বস্ত্র পরিধান করিয়া ক্ষুদ্র কলসী হস্তে আলবালে জলসিঞ্চন করিয়া, দিনপাত করিয়াছেন—সিঞ্চিত জলকণাবিধৌত নব মল্লিকার মত নিজেও শুভ্র, নিষ্কলঙ্ক, অক্ষুণ্ণ, দিগন্তসুগন্ধবিকীর্ণকারিণী। তাঁহার ভগিনীশ্বেহ, নব মল্লিকার উপর; ভাতৃশ্বেহ, সহকারের উপর; পুত্রশ্বেহ, মাতৃহীন হরিণশিশুর উপর; পতিগৃহ গমন কালে ইহাদিগের কাছে বিদায় হইতে গিয়া, শকুন্তলা অশ্রু-মুখী, কাতরা, বিবশা। শকুন্তলার কথোপকথন ইহাদিগের সঙ্গে; কোন বৃক্ষের সঙ্গে ব্যঙ্গ, কোন বৃক্ষকে আদর, কোন লতার পরিণয় সম্পাদন করিয়া শকুন্তলা সুখী। কিন্তু শকুন্তলা সরলা হইলেও অশিক্ষিতা নহেন। তাঁহার শিক্ষার চিহ্ন, তাঁহার লজ্জা। লজ্জা তাঁহার চরিত্রে বড় প্রবলা; তিনি কথায় কথায় হৃদয়স্তের সম্মুখে লজ্জাবনতমুখী হইয়া থাকেন—লজ্জার অনুরোধে আপনার হৃদ্যগত প্রণয় সখীদের সম্মুখেও সহজে ব্যক্ত করিতে পারেন না। মিরন্দার সেরূপ নহে। মিরন্দা এত সরলা যে, তাহার

লজ্জাও নাই। কোথা হইতে লজ্জা হইবে? তাহার জনক ভিন্ন অন্য পুরুষকে কখন দেখেই নাই। প্রথম ফর্দিনন্দকে দেখিয়া মিরন্দা বুঝিতেই পারিল না যে, কি এ ?

Lord ! How it looks about ! Believe me Sir,
It carries a brave form ;—but 'tis a spirit,

সমাজপ্রদত্ত যে সকল সংস্কার, শকুন্তলার তাহা সকলই আছে, মিরন্দার তাহা কিছুই নাই। পিতার সম্মুখে ফর্দিনন্দের রূপের প্রশংসায় কিছুমাত্র সন্দেহ নাই—অন্তে যেমন কোন চিত্রাদির প্রশংসা করে, এ তেমনি প্রশংসা ;

I might call him
A thing divine, for nothing natural
I ever saw so noble.

অথচ স্বভাবদত্ত স্ত্রীচরিত্রের যে পবিত্রতা, বাহা লজ্জার মধ্যে লজ্জা, তাহা মিরন্দায় অভাব নাই, এজন্ত শকুন্তলার সরলতা অপেক্ষা মিরন্দার সরলতার নবীনত্ব এবং মাধুর্য্য অধিক। যখন পিতাকে ফর্দিনন্দের পীড়নে প্ররক্ত দেখিয়া মিরন্দা বলিতেছে,

O dear father
Make not rash a trial of him, for
He's gentle, and not fearful.

• যখন পিতৃমুখে ফর্দিনন্দের রূপের নিন্দা শুনিয়া মিরন্দা বলিল,

My affections
Are then most humble ; I have no ambitions
To see a goodlier man.

তখন আমরা বুঝিতে পারি যে, মিরন্দা সংস্কারবিহীনা, কিন্তু মিরন্দা পরদুঃখকাতরা, মিরন্দা রেহশালিনী ; মিরন্দার লজ্জা নাই । কিন্তু লজ্জার সারভাগ যে পবিত্রতা, তাহা আছে ।

যখন রাজপুত্রের সঙ্গে মিরন্দার সাক্ষাৎ হইল, তখন তাঁহার হৃদয় প্রণয়সংস্পর্শশূন্য ছিল ; কেন না শৈশবের পর পিতা ও কালিবন ভিন্ন আর কোন পুরুষকে তিনি কখন দেখেন নাই । শকুন্তলাও যখন রাজাকে দেখেন, তখন তিনিও শূন্য হৃদয়, ঋষিগণ ভিন্ন পুরুষ দেখেন নাই । উভয়েই তপোবন-মধ্যে—এক স্থানে কণের তপোবন—অপর স্থানে প্রম্পেরোর তপোবন—অনুরূপ নায়ককে দেখিবামাত্র প্রণয়শালিনী হইলেন । কিন্তু কবিদিগের আশ্চর্য্য কৌশল দেখ ; তাঁহারা পরামর্শ করিয়া শকুন্তলা ও মিরন্দা-চরিত্র প্রণয়ণে প্রবৃত্ত হইলেন নাই, অথচ একজনে দুইটি চিত্র প্রণীত করিলে যেরূপ হইত, ঠিক সেইরূপ হইয়াছে । যদি একজনে দুইটি চরিত্র প্রণয়ন করিতেন, তাহা হইলে কবি শকুন্তলার প্রণয়লক্ষণে ও মিরন্দার প্রণয়লক্ষণে কি প্রভেদ রাখিতেন ? তিনি বুঝিতেন যে, শকুন্তলা, সমাজপ্রদত্ত সংস্কারসম্পন্ন, লজ্জাশীলা, অতএব তাহার প্রণয় মুখে অব্যক্ত থাকিবে কেবল লক্ষণেই ব্যক্ত হইবে ; কিন্তু মিরন্দা সংস্কারশূন্যা, লৌকিক লজ্জা কি তাহা জানে না, অতএব তাহার প্রণয়লক্ষণ বাক্যে অপেক্ষাকৃত পরিস্ফুট হইবে । পৃথক্ পৃথক্ কবিপ্রণীত চিত্রবয়ে ঠিক তাহাই ঘটিয়াছে । দুঃখভুক্তকে দেখিয়াই শকুন্তলা প্রণয়াসক্তা ; কিন্তু দুঃখভুক্তের কথা দূরে থাক, সখীহৃদয় যত দিন তাঁহাকে দেখিয়া, সকল কথা অনুভবে বুঝিয়া পীড়াপীড়ি করিয়া

কথা বাহির করিয়া না লইল, ততদিন তাহাদের সম্মুখেও শকু-
স্তলা এই নূতন বিকারের একটি কথাও বলেন নাই, কেবল
লক্ষণেই সে ভাব ব্যক্ত—

স্নিগ্ধং বীক্ষিতমন্যতোপি নয়নে যৎ প্রেরয়ন্ত্যা তয়া,
যাতং যচ্চ নিতম্বয়ো গুরুতয়া মন্দং বিলাসাদিব ।
মাগা ইত্যপকৃদ্ধয়া যদপি তং সাস্বয় মুক্তা সখী,
সর্বং তং কিল মংপরায়ণমহো! কামঃ স্ততাং পশ্যতি ॥

শকুস্তলা দুঃস্বপ্নকে ছাড়িয়া যাইতে গেলে গাছে তাঁহার
বল্লল বাঁধিয়া যায়, পদে কুশাকুর বিঁধে। কিন্তু মিরন্দার সে
সকলের প্রয়োজন নাই—মিরন্দা সে সকল জানে না; প্রথম
সন্দর্শন কালে মিরন্দা অসঙ্কচিত চিত্তে পিতৃসমক্ষে আপন প্রণয়
ব্যক্ত করিলেন,

This

Is the third man I e'er saw ; the first
That e'er I sighed for.

এবং পিতাকে ফর্দিনন্দের পীড়নে উদ্যত দেখিয়া, ফর্দি-
নন্দকে আপনার প্রিয়জন বলিয়া, পিতার দয়ার উজ্জেকের বহু
করিলেন। প্রথম অবসরেই ফর্দিনন্দকে আত্মসমর্পণ করি-
লেন।

দুঃস্বপ্নের সঙ্গে শকুস্তলার প্রথম প্রণয়সম্ভাষণ, এক প্রকার
লুকাচুরি খেলা। “সখি, রাজাকে ধরিয়া রাখিস্ কেন?”—
“তবে, আমি উঠিয়া যাই”—“আমি এই গাছের আড়া
লুকাই”—শকুস্তলার এ সকল “বাহানা” আছে; মিরন্দা
সকল নাই। এ সকল লজ্জাশীলা কুলবালার বিহিত

মিরন্দা লজ্জাশীলা কুলবালা নহে—মিরন্দা বনের পাখী—
প্রভাতারুণোদয়ে গাইয়া উঠিতে তাহার লজ্জা করে না ;
বৃক্ষের ফুল—সন্ধ্যার বাতাস পাইলে মুখ ফুটাইয়া কুটিয়া উঠিতে
তাহার লজ্জা করে না । নায়ককে পাইয়াই, মিরন্দার বলিতে
লজ্জা করে না যে—

By my modesty,
The jewel in my dower—I would not wish
Any companion in the world but you ;
Nor can imagination from a shape
Besides yourself, to like of.

পুনশ্চ :—

Hence bashful cunning !
— And prompt me, plain and holy innocence.
I am your wife, if you will marry me.
— If not, I die your maid ; to be your fellow
You may deny me, but I will be your servant
Whether you will or no.

আমাদিগের ইচ্ছা ছিল, যে মিরন্দা ফর্দিনন্দের এই প্রথম
প্রণয়লাপ, সমুদায় উদ্ধৃত করি, কিন্তু নিশ্চয়োজন । সকলেরই
ধরে সেক্ষপীয়র আছে, সকলেই মূলগ্রন্থ খুলিয়া পড়িতে পারি-
বেন । দেখিবেন উদ্যানমধ্যে রোমিও জুলিয়েটের যে প্রণয়-
সম্ভাষণ জগতে বিখ্যাত, এবং পূর্বতন কালেজের ছাত্রমাত্রের
কর্তৃস্থ, ইহা কোন অংশে তদপেক্ষা ন্যূনকল্প নহে । যে ভাবে
জুলিয়েট বলিয়াছিলেন, যে “আমার দান সাগরতুল্য অসীম,
আমার ভালবাসা সেই সাগরতুল্য গভীর,” মিরন্দাও এই স্থলে

সেই মহান্ চিত্তভাবে পরিপূত। ইহার অনুরূপ অবস্থায়, লভামগুপতলে, দুঃস্বপ্ন শকুন্তলার যে আলাপ,—বে আলাপে শকুন্তলা চিরবন্ধ হৃদয়কোরক প্রথম অভিমত সূর্যসমীপে ফুটাইয়া হাসিল—সে আলাপে তত গৌরব নাই—মানবচরিত্রের কুলপ্রান্তপর্ধ্যন্তপ্রঘাতী সেরূপ টল টল চঞ্চল বীচিমালা তাহার হৃদয়মধ্যে লক্ষিত হয় না। যাহা বলিয়াছি, তাই—কেবল, ছি ছি, কেবল যাই যাই, কেবল লুকাচুরি—একটু একটু চাতুরী আছে—যথা “অন্ধপথে সুমরিঅ এদম্ম হখন্তংসিণো মিণাল বলঅম্ম কদে পড়িণিবুত্তম্মি।” ইত্যাদি। একটু অগ্রগামিণীত্ব আছে, যথা দুঃস্বপ্নের মুখে—

“ননু কমলস্য মধুকরঃ সন্তুষ্যতি গন্ধমাত্রেন।” এই কথা শুনিয়া শকুন্তলার জিজ্ঞাসা, “অসন্তোসে উণ কিং করেদি?”—এই সকল ছাড়া আর বড় কিছুই নাই। ইহা কবির দোষ নহে—বরং কবির গুণ। দুঃস্বপ্নের চরিত্র-গৌরবে ক্ষুদ্রা শকুন্তলা এখানে ঢাকা পড়িয়া গিয়াছে। ফর্দিনন্দ বা রোমিও ক্ষুদ্র ব্যক্তি, নায়িকার প্রায় সমবয়স্ক, প্রায় সমযোগ্য অকৃত-কীর্তি—অপ্রথিতবশাঃ কিন্তু সমাগরা পৃথিবীপতি মহেন্দ্রসথ দুঃস্বপ্নের কাছে শকুন্তলা কে? দুঃস্বপ্ন মহাবৃক্ষের বৃহচ্ছায়া এখানে শকুন্তলা কলিকাকে ঢাকিয়া ফেলিয়াছে—সে ভাল করিয়া মুখ খুলিয়া ফুটিতে পারিতেছে না। এ প্রণয় সস্তা-ষৎ নহে—রাজক্রীড়া, পৃথিবীপতি কুঞ্জবনে বসিয়া সাধ করিয়া প্রেম করা রূপ খেলা খেলিতে বসিয়াছেন; মন্তমাতঙ্গের ন্যায় শকুন্তলা-নলিনীকোরককে শুণ্ডে ভুলিয়া, বনক্রীড়ার সাধ মিটাইতেছেন, নলিনী তাতে ফুটিবে কি?

যিনি এ কথাগুলি স্মরণ না রাখিবেন তিনি শকুন্তলা চরিত্র বুঝিতে পারিবেন না ; যে জল-নিসেকে মিরন্দা ও জুলিয়েট ফুটিল, সে জলনিসেকে শকুন্তলা ফুটিল না ; প্রণয়ামতী শকুন্তলায় বালিকার চাকল্য, বালিকার ভয়, বালিকার লজ্জা দেখিলাম ; কিন্তু রমণীর গাশ্ঠীর্ঘ্য ; রমণীর স্নেহ কই ? ইহার কারণ কেহ কেহ বলিবেন, লোকাচারের ভিন্নতা ; দেশভেদ । বস্তুতঃ তাহা নহে । দেশী কুলবধু বলিয়া শকুন্তলা লজ্জায় ভাঙ্গিয়া পড়িল,—আর মিরন্দা বা জুলিয়েট বেহারা বিলাতী মেয়ে বলিয়া মনের গ্রন্থি খুলিয়া দিল, এমত নহে । ক্ষুদ্রাশয় সমালোচকেরাই সুকান না যে, দেশভেদে বা কালভেদে কেবল বাহ্যভেদ হয় মাত্র ; মনুষ্যহৃদয় সকল দেশেই সকল কালেই ভিতরে মনুষ্যহৃদয়ই থাকে । বরং বলিতে গেলে—তিন জনের মধ্যে শকুন্তলাকেই বেহারা বলিতে হয়—“অসন্তোমে উণ কিং করেদি ?” তাহার প্রমাণ । যে শকুন্তলা, ইহার কয় মাস পরে, পৌরবের সভাতলে দাঁড়াইয়া দুঃস্বপ্নকে তিরস্কার করিয়া বলিয়াছিল—“অনার্য্য ! আপন হৃদয়ের অনুমানে সকলকে দেখ ?”—সে শকুন্তলা যে, লভ্যমণ্ডপে বালিকাই রহিল, তাহার কারণ, কুলকন্যানুলভ লজ্জা নহে । তাহার কারণ—দুঃস্বপ্নের চরিত্রের বিস্তার । যখন শকুন্তলা সভাতলে পরিত্যক্তা, তখন শকুন্তলা পত্নী, রাজমহিষী, মাতৃপদে আরোহণোদ্যতা, স্মৃতরাং তখন শকুন্তলা রমণী ; এখানে তপোবনে,—তপস্বিকন্যা, রাজপ্রসাদের অনুচিত অভিলাষিণী,—এখানে শকুন্তলা কে ? করিশুণ্ডে পদ্ম-মাত্র । শকুন্তলার কবি যে টেম্পেষ্টের কবি হইতে হীনপ্রভ নহেন, ইহাই দেখাইবার জন্য এস্থলে আয়াস স্বীকার করিলাম ।

দ্বিতীয়, শকুন্তলা ও দেস্‌দিমোনা ।

শকুন্তলার সঙ্গে মিরন্দার তুলনা করা খেল—কিন্তু ইহাও দেখান গিয়াছে, যে শকুন্তলা ঠিক মিরন্দা নহে । কিন্তু মিরন্দার সহিত তুলনা করিলে শকুন্তলা-চরিত্রের একভাগ বুঝা যায় । শকুন্তলা-চরিত্রের আর এক ভাগ বুঝিতে বাকি আছে । দেস্‌দিমোনার সঙ্গে তুলনা করিয়া সে ভাগ বুঝাইব ইচ্ছা আছে ।

শকুন্তলা এবং দেস্‌দিমোনা, দুই জনে পরস্পর তুলনীয়, এবং অতুলনীয় । তুলনীয় কেননা, উভয়েই গুরুজনের অনুমতির অপেক্ষা না করিয়া আত্মসমর্পণ করিয়াছিলেন । গোতমী শকুন্তলা সম্বন্ধে দুঃখভুক্তে যাহা বলিয়াছেন, ওথেলোকে লক্ষ্য করিয়া দেস্‌দিমোনা সম্বন্ধে তাহা বলা যাইতে পারে—

শাবেক্‌খিদো গুরুঅণো ইমিএ ৭ তুএবি পুচ্ছিদো বহু ।

এককং এক চরিত্র কিংভগতু একং একস্ম ॥

তুলনীয়, কেননা উভয়েই বীরপুরুষ দেখিয়া আত্মসমর্পণ করিয়াছেন—উভয়েরই “দুরারোহিণী আশালতা” মহামহীকহ অবলম্বন করিয়া উঠিয়াছিল । কিন্তু বীরমস্ত্রের যে মোহ, তাহা দেস্‌দিমোনার ষাটশ পরিষ্কট, শকুন্তলার তাটশ নহে । ওথেলো কৃষ্ণকায়, সূতরাং সুপুরুষ বলিয়া ইতালীয় বালার কাছে বিচার্য্য নহে, কিন্তু রূপের মোহ হইতে বীর্যের মোহ নারীহৃদয়ের উপর বলবস্তর । যে মহাকবি, পঞ্চপতিকা দোপদীকে অর্জুনে অধিকতম অনুরক্তা করিয়া, তাঁহার শরীরে সর্গারোহণ পথরোধ করিয়াছিলেন, তিনি এঁ তত্ত্ব জানি

তেন, এবং যিনি দেস্দিমোনার সৃষ্টি করিয়াছেন তিনি ইহার গুণতত্ত্ব প্রকাশ করিয়াছেন ।

তুলনীয়া, কেননা দুই নায়িকারই “দুরারোহিনী আশালতা” পরিশেষে ভগ্না হইয়াছিল—উভয়েই স্বামী কর্তৃক বিসর্জিত হইয়াছিলেন । সংসার অনাদর, অত্যাচার-পরিপূর্ণ । কিন্তু ইহাই অনেক সময়ে ঘটে যে, সংসারে যে আদরের ষোগ্য, সেই বিশেষ প্রকারে অনাদর অত্যাচারে প্রসীড়িত হয় । ইহা মনুষ্যের পক্ষে নিতান্ত অশুভ নহে, কেননা মনুষ্যপ্রকৃতিতে যে সকল উচ্চাশ্রয় মনোবৃত্তি আছে, এই সকল অবস্থাতেই তাহা সম্যক্ প্রকারে স্ফূর্তিপ্রাপ্ত হয় । ইহা মনুষ্যালোকে সুশিক্ষার বীজ—কাব্যের প্রধান উপকরণ । দেস্দিমোনার অদৃষ্টদোষে বা গুণে সে সকল মনোবৃত্তি স্ফূর্তিপ্রাপ্ত হইবার অবস্থা তাহার ঘটিয়াছিল । শকুন্তলারও তাহাই ঘটিয়াছিল । অতএব দুই চরিত্র যে পরস্পর তুলনীয় হইবে, ইহার সকল আয়োজন আছে ।

এবং দুইজনে তুলনীয়া, কেন না উভয়েই পরম স্নেহশালিনী—উভয়েই সতী । স্নেহশালিনী, এবং সতী ত যে সে । আজ কাল রাম, শ্যাম, নিধু, বিধু, যাদু, মাধু যে সকল নাটক উপন্যাস নবন্যাস প্রেতন্যাস লিখিতেছেন, তাহার নায়িকা-মাত্রেরই স্নেহশালিনী সতী । কিন্তু এই সকল সতীদিগের কাছে একটা পোষা বিড়াল আসিলে, তাঁহারা স্বামীকে তুলিয়া যান, আর পতিচিন্তামগ্না শকুন্তলা দুর্ভাসার ভয়ঙ্কর “অয়মহ স্তোঃ” শ্রুতিতে পান নাই ! সকলেই সতী, কিন্তু জগৎসংসারে অসতী নাই বলিয়া, স্ত্রীলোকে অসতী হইতেই পারে না বলিয়া দেস্দি-

মোনার যে দৃঢ় বিশ্বাস, তাহার মর্শ্বের ভিতর কে প্রবেশ করিবে ? যদি স্বামীর প্রতি অবিচলিত ভক্তি ; প্রহারে, অত্যাচারে, বিসর্জনে, কলঙ্কেও যে ভক্তি অবিচলিত, তাহাই যদি সতীত্ব হয়, তবে শকুন্তলা অপেক্ষা দেস্দিমোনা গরীয়সী। স্বামী কর্তৃক পরিত্যক্তা হইলে শকুন্তলা দলিতফণা সর্পের ন্যায় মস্তক উন্নত করিয়া স্বামীকে ভংসনা করিয়াছিলেন। যখন রাজা শকুন্তলাকে অশিক্ষা সত্ত্বেও চাতুর্য্য পট্ট বলিয়া উপহাস করিলেন, তখন শকুন্তলা ক্রোধে, দন্তে, পূর্বের বিনীত, লজ্জিত, দুঃখিত ভাব পরিত্যাগ করিয়া কহিলেন, “অনার্য্য, আপনার হৃদয়ের ভাবে সকলকে দেখ ?” যখন তদুত্তরে রাজা, রাজার মত, বলিলেন, “ভদ্রে ! হৃঙ্গন্তের চরিত্র সবাই জানে,” তখন শকুন্তলা ঘোর ব্যঙ্গ বলিলেন,

তুঙ্কে জ্জিব পমাণং জাণধ ধম্মখিদিঞ্চ লোঅম্ম ।

লজ্জাবিণিজ্জিদাও জাণত্তি এ কিল্পি মহিলাও ॥

এ রাগ অভিমান, এ ব্যঙ্গ দেস্দিমোনার নাই। যখন ওথেলো দেস্দিমোনাকে সর্বসমক্ষে প্রহার করিয়া দূরীভূত করিলেন, তখন দেস্দিমোনা কেবল বলিলেন, “আমি দাঁড়াইয়া আপনাকে আর বিরক্ত করিব না।” বলিয়া যাইতেছিলেন, আবার ডাকিতেই “প্রভু !” বলিয়া নিকটে আসিলেন। যখন ওথেলো অকৃতাপরাধে তাঁহাকে কুলটা বলিয়া অপমানের একশেষ করিয়াছিলেন, তখনও দেস্দিমোনা “আমি নিরপরাধিনী, ঈশ্বর জানেন,” ঈদৃশ উক্তি ভিন্ন আর কিছুই বলেন নাই। তাহার পরেও, পতিহে বঞ্চিত হইয়া, পৃথিবী শূন্য দেখিয়া, ইরাগোকে ডাকিয়া বলিয়াছেন,

Alas, Iago !

What shall I do to win my lord again ?

Good friend, go to him ; for, by this light of heaven

I know not how I lost him ; here I kneel ;

ইত্যাদি । যখন ওথেলো ভীষণ রাক্ষসের স্ত্রীর নিশীথ-শয্যাশারিনী সুপ্তা সুন্দরীর সম্মুখে, “বধ করিব !” বলিয়া দাঁড়াইলেন, তখনও রাগ নাই—অভিমান নাই—অবিনয় বা অশ্রদ্ধ নাই—দেস্‌দিমোনা কেবল বলিলেন, “তবে, ঈশ্বর আমার রক্ষা করুন ।” যখন দেস্‌দিমোনা, মরণ ভয়ে নিতান্ত ভীতা হইয়া, এক দিনের জন্য, এক রাত্রির জন্য, এক মুহূর্ত্ত-জন্য জীবন তিফা চাহিলেন, মুঢ় তাহাও শুনিла না, তখনও রাগ নাই, অভিমান নাই, অবিনয় নাই, অশ্রদ্ধ নাই । মৃত্যু-কালেও, যখন ইমিলিয়া আসিয়া তাঁহাকে মুমূর্ষু দেখিয়া জিজ্ঞাসা করিল, “এ কার্য্য কে করিল ?” তখনও দেস্‌দিমোনা বলিলেন, “কেহ না, আমি নিজে । চলিলাম ! আমার প্রভুকে আমার প্রণাম জানাইও । আমি চলিলাম ।” তখনও দেস্‌দিমোনা লোকের কাছে প্রকাশ করিল না যে, আমার স্বামী আমাকে বিনাপরাধে বধ করিয়াছে ।

তাই বলিতেছিলাম যে শকুন্তলা দেস্‌দিমোনার সঙ্গে তুলনীয় এবং তুলনীয়ও নহে । তুলনীয় নহে, কেননা ভিন্ন ভিন্ন জাতীয় বস্তুতে তুলনা হয় না । সেক্ষপীয়রের এই নাটক সাগরবৎ, কালিদাসের নাকট নন্দনকানন তুল্য । কাননে সাগরে তুলনা হয় না । বাহা সুন্দর, বাহা সুদৃশ্য, বাহা সুগন্ধ, বাহা সুরস, বাহা মনোহর, বাহা সুখকর, তাহাই এই নন্দন

কাননে অপৰ্ঘ্যাপ্ত, সুপাকৃত, রাশি রাশি, অপরিমেয় । আর যাহা
 দ্বীপ, দুস্তর, চঞ্চল, ভামনাদী, তাহাই এই সাগরে । সাগরবৎ
 সেক্ষপীয়রের এই অনুপম নাটক, হৃদরোখিত বিলোল ভরঙ্গ-
 মালায় সংস্কৃত ; হুরন্ত রাগ বেষ সৈধ্যাদি বাত্যায়ে সস্তাড়িত ;
 ইহার প্রবল বেগ, হুরন্ত কোলাহল, বিলোল উন্মিলীলা,—
 আবার ইহার মধুরনীলিমা, ইহার অনন্ত আলোকচূর্ণ প্রক্ষেপ,
 ইহার জ্যোতিঃ, ইহার ছায়া, ইহার রত্নরাজি, ইহার মৃদু গীতি
 —সাহিত্যসংসারে দুর্লভ ।

তাই বলি, দেস্দিমোনা শকুন্তলার তুলনীয় নহে । ভিন্ন
 জাতীয়ে ভিন্ন জাতীয়ে তুলনীয় নহে । ভিন্ন জাতীয় কেন
 বলিতেছি তাহার কারণ আছে ।

ভারতবর্ষে যাহাকে নাটক বলে, ইউরোপে ঠিক তাহাকেই
 নাটক বলে না । উভয় দেশীয় নাটক দৃশ্যকাব্য বটে, কিন্তু
 ইউরোপীয় সমালোচকেরা নাটকার্থে আর একটু অধিক বুঝেন ।
 তাঁহারা বলেন যে, এমন অনেক কাব্য আছে—যাহা দৃশ্য-
 কাব্যের আকারে প্রণীত, অথচ প্রকৃত নাটক নহে । নাটক
 নহে বলিয়া যে এ সকলকে নিকৃষ্ট কাব্য বলা যাইবে এমত
 নহে—তন্মধ্যে অনেকগুলি অতুৎকৃষ্ট কাব্য, যথা গেটে প্রণীত
 ফষ্ট এবং বাইরণ প্রণীত মানফে ড—কিন্তু উৎকৃষ্ট হউক নিকৃষ্ট
 হউক—ঐ সকল কাব্য, নাটক নহে । সেক্ষপীয়রের টেম্পেস্ত
 এবং কালিদাসকৃত শকুন্তলা, সেই শ্রেণীর কাব্য, নাটকাকারে
 অতুৎকৃষ্ট উপাখ্যান কাব্য ; কিন্তু নাটক নহে । নাটক নহে
 বলিলে এতদুভয়ের নিন্দা হইল না, কেননা এরূপ উপা-
 খ্যান কাব্য পৃথিবীতে অতি বিরল—অহুল্য বলিলে হয় ।

আমরা ভারতবর্ষে উভয়কেই নাটক বলিতে পারি, কেননা ভারতীয় আলঙ্কারিকদিগের মতে নাটকের যে সকল লক্ষণ তাহা সকলই এই দুই কাব্যে আছে । কিন্তু ইউরোপীয় সমালোচকদিগের মতে নাটকের যে সকল লক্ষণ, এই দুই নাটকে তাহা নাই । ওথেলো নাটকে তাহা প্রচুর পরিমাণে আছে । ওথেলো নাটক—শকুন্তলা এ হিসাবে উপাখ্যান কাব্য । ইহার ফল এই ঘটিয়াছে যে দেশদিমোনা চরিত্র যত পরিষ্কৃষ্ট হইয়াছে—মিরন্দা বা শকুন্তলা তেমন হয় নাই । দেশদিমোনা সজীব, শকুন্তলা ও মিরন্দা ধ্যানপ্রাপ্য । দেশদিমোনার বাক্যেই তাহার কাতর, বিকৃত কণ্ঠস্বর আমরা শুনিতে পাই, চক্ষুর জল ফোঁটা ফোঁটা গণ্ড বহিয়া বক্ষে পড়িতেছে দেখিতে পাই—ভুলগজানু সূন্দরীর স্পন্দিততার লোচনের উজ্জ্বল দৃষ্টি আমাদের হৃদয়মধ্যে প্রবেশ করে । শকুন্তলার আলোহিত চক্ষুরাদি আমরা দুঃস্বপ্নের মুখে না শুনিতে বুঝিতে পারি না—যথা

ন তির্ঘ্যগবলোকিতং, ভবতি চক্ষু রালোহিতং,
বচোপি পক্রমাক্ররং নচ পদেষু সংগচ্ছতে ।
হিমার্ভুইব বেপতে সকল ইব বিশ্বাধরঃ
প্রকামবিনতে ক্রবৌ যুগপদেব তেদংগতে ।

শকুন্তলার দুঃখের বিস্তার দেখিতে পাই না, গতি দেখিতে পাই না, বেগ দেখিতে পাই না ; সে সকল দেশদিমোনার অত্যন্ত পরিষ্কৃষ্ট । শকুন্তলা চিত্রকরের চিত্র ; দেশদিমোনা ভাস্করের গঠিত সজীবপ্রায় গঠন । দেশদিমোনার হৃদয় আমা-

দিগের সম্মুখে সম্পূর্ণ উন্মুক্ত এবং সম্পূর্ণ বিস্তারিত ; শকু-
স্তলার হৃদয় কেবল ইঙ্গিতে ব্যক্ত ।

সুতরাং দেস্‌দিমোনার আলেখ্য অধিকতর প্রোঙ্কুল
বলিয়া দেস্‌দিমোনার কাছে শকুস্তলা দাঁড়াইতে পারে না ।
নতুবা ভিতরে দুই এক । শকুস্তলা অর্ধেক মিরন্দা, অর্ধেক
দেস্‌দিমোনা । পরিণীতা শকুস্তলা* দেস্‌দিমোনার অনুরূপিণী,
অপরিণীতা শকুস্তলা মিরন্দার অনুরূপিণী ।*

—

বান্ধালির বাহুবল ।

বান্ধালির এক্ষণে উন্নতির আকাঙ্ক্ষা অত্যন্ত প্রবল হইয়াছে । বান্ধালি সৰ্বদা উন্নতির জন্য ব্যস্ত । অনেকে তদ্বিষয়ে বিশেষ গুরুতর আশা করেন না । কেননা বান্ধালির বাহুবল নাই । বাহুবল ভিন্ন উন্নতি নাই, ইহা তাঁহাদিগের বিশ্বাস ।

বান্ধালির বাহুবল নাই, ইহা সত্য কথা । কখন হইবে কি না, এ কথাই মীমাংসা প্রবন্ধান্তরে করা গিয়াছে । থাক বা না থাক, ইহা জানা আছে যে মৌর্যবংশীয় ও গুপ্ত বংশীয় সম্রাটেরা হিমাচল হইতে নৰ্মদা পর্যন্ত একচ্ছত্রে শাসিত করিয়াছিলেন ; জানা আছে দিগ্বিজয়ী গ্রীক জাতি শতক্রম অতিক্রম করিতে সক্ষম হয় নাই ; জানা আছে সেই বীরেরা, আসিরার মধ্যে ভারতবাসীরই বীরত্বের প্রশংসা করিয়াছিলেন ; জানা আছে যে তাঁহারা চন্দ্রগুপ্ত দ্বারা ভারতভূমি হইতে উন্মূলিত হইয়াছিলেন ; জানা আছে হৰ্ষবর্ধনের পশ্চাৎ পশ্চাৎ বহুশত করপ্রদ রাজা অনুসরণ করিতেন ; জানা আছে, দিগ্বিজয়ী আরবেরা তিনশত বৎসরে পশ্চিম ভারতবর্ষ অধিকার করিতে পারে নাই । এইরূপ আরও অনেক কথা জানা গিয়াছে । পশ্চিম ভারতবর্ষীয়দিগের বীর্যবতারি অনেক চিহ্ন অদ্যাপি ভারতভূমে আছে ।

বান্ধালির পূর্ববীরত্ব, পূর্ব গৌরবের কি জানা আছে ? কেবল ইহাই জানি, যে যখন পশ্চিম ভারতে বেদ সৃষ্ট ও অধীত হইতেছিল, উপনিষদ সকল প্রণীত হইতেছিল, অষোধ্যার ন্যায় সর্কসম্পদশালিনী নগরী সকল স্থাপিতা এবং অলঙ্কৃত হইতেছিল—বান্ধালা তখন অনার্য্য ভূমি, আৰ্য্য-গণের বাসের অযোগ্য বলিয়া পরিত্যক্ত । (১) । কেবল ইহাই জানি যে যখন উত্তর ভারতে, সমস্ত আৰ্য্য বীরগণ একত্রিত হইয়া কুরুক্ষেত্রজিত রাজ্যখণ্ড সকল বিভাগ করিতেছিলেন, যখন পশ্চিমে মগাদি, অমর, অক্ষয় ধর্ম্মশাস্ত্র সকল প্রণীত হইতেছিল, তখন বঙ্গদেশে পৌণ্ড্র প্রভৃতি অনার্য্যজাতির বাস । প্রাচীন কাল দূরে থাকুক, যখন মধ্যকালে চৈনিক পরিত্রাজক হোয়েম্‌ সাঙ বঙ্গদেশপর্য্যটনে আসেন, তখন দেখিয়াছিলেন, যে এই প্রদেশ গৌরবশূন্য ক্ষুদ্র ক্ষুদ্র রাজ্যে বিভক্ত । বঙ্গদেশের পূর্বগৌরব কোথায় ?

তবে, ইহার পরে শুনা যায়, যে পালবংশীয় ও সেনবংশীয় রাজগণ, বৃহৎ রাজ্য স্থাপন করিয়াছিলেন, এবং গোড়নগরী বড় সমৃদ্ধিশালিনী হইয়াছিল । কিন্তু এমন কোন চিহ্ন পাওয়া যায় না যে তাঁহারা এই বাহুবলশূন্য বান্ধালিজাতি এবং তাঁহাদিগের প্রতিবাসী তদ্রূপ দুর্বল অনার্য্যজাতিগণ ভিন্ন অন্য কাহাকে আপন অধিকারভুক্ত করিয়াছিলেন । এই মত প্রমাণ আছে বটে, যে মুসল্লের পর্য্যন্ত তাঁহাদিগের অধিকারভুক্ত ছিল । অন্যত্র তাঁহাদিগের অধিকার বিস্তার সম্বন্ধে তিনটি মাত্র কথা আছে, তিনটিই অমূলক ।

(১) বঙ্গদর্শনের দ্বিতীয় বর্ষে ‘বঙ্গে ব্রাহ্মণাধিকার’ দেখ ।

প্রথম । কিম্বদন্তী আছে, যে দিল্লীতে বল্লালসেনের অধিকার ছিল । এ কথা একখানি দেশী গ্রন্থে লিখিত থাকিলেও নিতান্ত অমূলক, এবং জেনেরল কনিঙহাম সাহেব তাহার অমূলকতা প্রতিপন্ন করিয়াছেন । বঙ্গেশ্বর বল্লাল সেনের অধিকার দিল্লী পর্য্যন্ত বিস্তৃত হইলে, এরূপ বৃহৎ ব্যাপার ঘটিত, যে অবশ্য একখানি সামান্য গ্রন্থে উল্লেখ ভিন্ন তাহার অন্য প্রমাণ কিছু পুঁাওয়া যাইত । বঙ্গ হইতে দিল্লীর মধ্যে যে বহুবিস্তৃত প্রদেশ, তথায় বঙ্গপ্রভুত্বের কোন কিম্বদন্তী, কোন উল্লেখ, কোন চিহ্ন অবশ্য থাকিত । কিছু নাই ।

দ্বিতীয় । ১৭৯৪ সালে গোড়েশ্বর মহীপালরাজের একখানি শাসন কাশীতে পাওয়া গিয়াছিল । তাহা হইতে কেহ কেহ অনুমান করেন কাশীপ্রদেশ মহীপালের রাজ্যভুক্ত ছিল । এক্ষণে সে মত পরিত্যক্ত হইতেছে (২) ।

তৃতীয় । লক্ষণ সেনের দুই একখানি তাম্রশাসনে তাঁহাকে প্রায় সর্বদেশজেতা বলিয়া বর্ণনা করা আছে । পড়িলেই বুঝা যায়, যে সে সকল কথা চাটুকর কবির কল্পনা মাত্র ।

অতএব পূর্বকালে বাঙ্গালিরা যে বাহুবলশালী ছিলেন, এমত কোন প্রমাণ নাই । পূর্বকালে ভারতবর্ষস্থ অন্যান্য জাতি যে বাহুবলশালী ছিলেন, এমত প্রমাণ অনেক আছে, কিন্তু বাঙ্গালিদিগের বাহুবলের কোন প্রমাণ নাই । হোয়েস্থ সাহেব সমতট রাজ্যবাসীদিগের যে বর্ণনা করিয়া গিয়াছেন

(২) See Introduction to Sherring's Sacred City of the Hindus, by F. E. Hall, p xxxv. Note 2.

তাহা পড়িয়া বোধ হয় পূর্বে বাঙ্গালিরা এইরূপ ধৰ্ম্মাকৃত, দুৰ্বল-গঠন ছিল ।

বাঙ্গালিদিগের বাহুবল কখন ছিল না, কিন্তু কখন হইবে কি ?

বৈজ্ঞানিক ভবিষ্যৎ উক্তির নিয়ম এই যে যেৰূপ যে অবস্থায় হইয়াছে, সেই অবস্থায় সেইরূপ আবার হইবে । যে যে কারণে বাঙ্গালি চিরকাল দুৰ্বল, সেই সেই কারণ যত দিন বর্তমান থাকিবে, ততদিন বাঙ্গালিরা বাহুবলশূন্য থাকিবে । সে সকল কারণ কি ?

আধুনিক বৈজ্ঞানিক ও দার্শনিকদিগের মতে, সকলই বাহ্য প্রাকৃতিক ফল । বাঙ্গালির দুৰ্বলতাও বাহ্য প্রকৃতির ফল । ভূমি, জলবায়ু এবং দেশাচারের ফলে বাঙ্গালিরা দুৰ্বল, ইহাই প্রচলিত মত । সেই সকল মতগুলির, সংক্ষেপতঃ উল্লেখ করিতেছি ।

কেহ কেহ বলেন, এদেশের ভূমি অত্যন্ত উর্বরা—অল্প পরিশ্রমেই শস্যোৎপাদন হইতে পারে । সুতরাং বাঙ্গালিকে অধিক পরিশ্রম করিতে হয় না । পরিশ্রম অধিক না করিলে শরীরে বলাধান হয় না । বঙ্গভূমির উর্বরতা বঙ্গবাসীর দুৰ্বলতার কারণ ।

তাঁহারা আরও বলেন যে ভূমি উর্বরা হইলে আহারের জন্য মৃগয়া পশুহননাদির আবশ্যকতা হয় না । পশুহনন ব্যবসায়, বল, সাহস ও পরিশ্রমের কার্য, মানুষকে সৰ্বদা পরিশ্রমে গ্নিরত রাখে, এবং তাহাতে ঐ সকল গুণ অভ্যস্ত এবং ক্ষুণ্ণীভূত হয় ।

দেখা যাইতেছে যে বঙ্গদেশ ভিন্ন আরও উর্বরদেশ আছে। ইউরোপ ও আমেরিকার অনেক অংশ বঙ্গদেশ অপেক্ষায় উর্বরতায় ন্যূন নহে। যে সকল দেশের লোক দুর্বল নহে।

অনেকে বলেন, জলবায়ুর দোষে বাঙ্গালিরা দুর্বল। যে দেশের বায়ু আর্দ্র অথচ তাপযুক্ত, সে দেশের লোক দুর্বল। কেন হয়, তাহা শারীরতত্ত্ববিদেরা ভাল করিয়া বুঝান নাই। বায়ুর আর্দ্রতা সম্বন্ধে নিম্নলিখিত টীকা পাঠ করিলেই সংশয় দূর হইতে পারে। (৩) আর যাহারা আরব প্রভৃতি জাতির বীৰ্য জানেন তাহারা তাপকে দৌর্বল্যের কারণ বলিয়া স্বীকার করিবেন না।

(৩) The high humidity of the atmosphere in Bengal, and more especially in its eastern districts, has become proverbial: and if the term be used in reference to the quantity of vapour in the air as measured by its tension, the popular belief is justified by observations. But if used in the more usual sense of relative humidity, that is, as referring to the percentage of vapour in the air in proportion to that which would saturate it, the average annual humidity of a large part of Bengal is sensibly lower than that of England.

The quantity of vapour in the air of Calcutta, relative to the dry air, is on the average of the year, about twice as great as in that of London; but the relative humidity of the former equals that of the latter only in the three first months of the rains, which are among the driest months of an European climate.—Bengal Administration Report, 1872-73, Statistical Summary.—page 5-6.

অনেকে মোটামুটি বলেন যে জলমিক্ত তাপযুক্ত বায়ু অত্যন্ত অস্বাস্থ্যকর, তন্নিবন্ধন বাঙ্গালিরা নিত্য রুগ্ন, এবং তাহাই বাঙ্গালির দুর্বলতার কারণ ।

অনেকে বলেন, অন্নই অনর্থের মূল । এদেশের ভূমির প্রধান উৎপাদ্য চাউল, এবং এ দেশের লোকের খাদ্য ভাত । ভাত অতি অসার খাদ্য, তাহাতেই বাঙ্গালির শরীর গঠে না । এজন্য “ভেতো বাঙ্গালি” বলিয়া বাঙ্গালির কলঙ্ক হইয়াছে ।

শারীরতত্ত্ববিদেরা বলেন, যে খাদ্যের রাসায়নিক বিশ্লেষণ সম্পাদন করিলে দেখা যায়, যে তাহাতে ষ্টার্চ, গ্লুটেন প্রভৃতি কয়েকটি সামগ্রী আছে । গ্লুটেন নাইট্রোজেন-প্রধান সামগ্রী । তাহাতেই শরীরের পুষ্টি । মাংসপেশী প্রভৃতির পুষ্টির জন্য এই সামগ্রীর বিশেষ প্রয়োজন । ভাতে, ইহা অতি অল্প পরিমাণে থাকে । মাংসে বা গমে ইহা অধিক পরিমাণে থাকে । এই জন্য মাংসভোজী এবং গোধুম-ভোজীদিগের শরীর অধিক বলবান্—“ভেতো” জাতির শরীর দুর্বল । ময়দায় গ্লুটেন, শতভাগে দশভাগ থাকে ; (৪) মাংসে (Fibrin বা Musculine) ১৯ ভাগ ; (৫) এবং ভাতে ৭ কি ৮ ভাগ মাত্র থাকে (৬) । সুতরাং বাঙ্গালি-দুর্বল হইবে বৈ কি ?

(৪) Johnstone's *Chemistry of Common Life* Vol. 1, p 100.

(৫) Ibid p. 125.

(৬) Ibid 101.

কেহ কেহ বলেন, বাল্যবিবাহই বাঙ্গালির পরমশত্রু—
বাল্যবিবাহের কারণেই বাঙ্গালির শরীর দুর্বল। যে সস্তা-
নের মাতা পিতা অপ্রাপ্তবয়ঃ, তাহাদের শরীর ও বল
চিরকাল অসম্পূর্ণ থাকিবে, এবং যাহারা অল্পবয়স হইতে
ইন্দ্রিয়শূণ্ণে নিরত, তাহারা বলবান্ হইবার সম্ভাবনা কি ?

বাঙ্গালি মনুষ্যেরই কি, বাঙ্গালি পশুরই কি, দুর্বলতা
যে জলবায়ু বা মৃত্তিকার গুণ, তাহা সহজেই বুঝা যায়। কিন্তু
জলের, বা বায়ুর বা মৃত্তিকার কোন দোষের এই কুফল,
তাহা কোন পণ্ডিতে অবধারিত করেন নাই।

কিন্তু এই দুর্বলতার যে সকল কারণ নির্দিষ্ট হইয়াছে
বা উল্লিখিত হইল, তাহাতে এমত ভরসা করা যায় না, যে
অল্পকালে সে দুর্বলতা দূর হইবে। তবে, ইহাও বলা
যাইতে পারে, যে এমত কোন নিশ্চয়তা নাই, যে কোন
কালে, এ সকল কারণ অপনীত হইতে পারে না। বাল্য-
বিবাহই যদি এ দুর্বলতার কারণ হয়, তবে এমন ভরসা
করা যাইতে পারে যে সামাজিক রীতির পরিবর্তনে এ
কুপ্রথা সমাজ হইতে দূর হইবে ; এবং বাঙ্গালির শরীরে
বলসঞ্চার হইবে। যদি চাল এ অনিষ্টের কারণ হয়, তবে
এমন ভরসা করা যাইতে পারে যে গোধূমাদির চাস এ
দেশে বৃদ্ধি করাইলে, বাঙ্গালি ময়দা খাইয়া বলিষ্ঠ হইবে।
এমন কি কালে জল বায়ুরও পরিবর্তন হইতে পারে।
এক্ষণে মনুষ্যবাসের অযোগ্য যে সুন্দরবন তাহা এককালে
বহুজনাকীর্ণ ছিল, এমত প্রমাণ আছে। ভূতত্ত্ববিদেরা
বলেন, যে ইউরোপীয় অনেক প্রদেশ, ঐক্ষণকার অপেক্ষা

উষ্ণতর ছিল, এবং তথায় সিংহ হস্তী প্রভৃতি উষ্ণদেশ-বাসী জীবের আবাস ছিল। আবার এককালে সেই সকল প্রদেশ হিমশিলায় নিমগ্ন ছিল। সে সকল যুগান্তরের কথা—সহস্র সহস্র যুগে সে সকল পরিবর্তন ঘটিতে পারে। কিন্তু ঐতিহাসিক কালের মধ্যেও জলবায়ু শীততাপের পরিবর্তনের অনেক প্রমাণ পাওয়া যায়। পূর্বকালে রোমনগরীর নিম্নে টৈবর নদের মধ্যে বরফ জমিয়া বাইত। এবং এক সময়ে ক্রমাগত চল্লিশদিন তাহাতে বরফ জমিয়া ছিল। কৃষ্ণসাগরে (Euxine Sea) অবিদ নামক কবির জীবনকালে, প্রতি বৎসর শীত ঋতুতে বরফ জমিয়া বাইত। এবং রীণ এবং রণ নামক নদীদ্বয়ের উপরে তৎসময়ে বরফ একপ গাঢ় জমিত, যে তাহার উপর দিয়া বোঝাই গাড়ি চলিত। এক্ষণে রোমে বা কৃষ্ণসাগরে, বা উক্ত নদীদ্বয়ে বরফের নাম মাত্র নাই। কেহ কেহ বলেন, কৃষিকার্যের আধিক্যে, বন কাটা, মৃত্তিকা ভগ্ন করায়, এবং ঝিল বিল শুষ্ক করার এ সকল পরিবর্তন ঘটিয়াছে। যদি কৃষিকার্যের আধিক্যে শীতপ্রদেশ উষ্ণ হয়, তবে উষ্ণপ্রদেশ শীতল হইবার কারণ কি? গ্রীনলণ্ড এককালে একরূপ তাপযুক্ত প্রদেশ ছিল, যে ইহাতে উদ্ভিদের বিশেষ আধিক্য এবং শোভা ছিল, এবং সেই জন্য উহার নাম গ্রীনলণ্ড হইয়াছিল। এক্ষণে সেই গ্রীনলণ্ড সর্বদা এবং সর্বত্র হিমশিলায় মগ্নিত ! এই দ্বীপের পূর্ব উপকূলে, বহুসংখ্যক ঐশ্বর্যশালী উপনিবেশ ছিল,—এক্ষণে সে উপকূলে কেবল বরফের রাশি, এবং সেই সকল উপনিবেশের চিহ্ন মাত্র নাই।

লাব্রাডর, এক্ষণে শৈত্যাদিক্যের জন্য বিখ্যাত—কিন্তু যখন, সহস্র খ্রীষ্টাব্দে নর্মানেরা তথায় গমন করেন, তখন ইহারও শীতের অন্নতা দেখিয়া তাঁহারা প্রীত হইয়াছিলেন, এবং ইহাতে দ্রাক্ষা জন্মিত বলিয়া ইহার দ্রাক্ষাভূমি নাম দিয়াছেন। (৮)

এ সকল পরিবর্তনের অতি দূর সম্ভাবনা। না ঘট-
বারই সম্ভাবনা। বাঙ্গালির শারীরিক বল চিরকাল এইরূপ
থাকিবে ইহা এক প্রকার সিদ্ধ, কেন না দুর্বলতার
নিবার্য কারণ কিছু দেখা যায় না।

তবে কি বাঙ্গালির ভরসা নাই ? এ প্রশ্নে আমাদের
দুইটি উত্তর আছে।

প্রথম উত্তর। শারীরিক বলই অদ্যাপি পৃথিবী শাসন
করিতেছে বটে। কিন্তু শারীরিক বল পশুর গুণ ; মানুষ
অদ্যাপি অনেকাংশে পশুপ্রকৃতিসম্পন্ন, এজন্য শারীরিক
বলের আঙ্কিও এতটা প্রাচুর্য। শারীরিক বল উন্নতি
নহে। উন্নতির উপায় মাত্র। এ জাতে বাহুবল তিন্ন
কি উন্নতির উপায় নাই ?

বাহুবলকে উন্নতির উপায়ও বলিতে পারি না। বাহু-
বলে কাহারও উন্নতি হয় না। যে তাতার, ইউরোপ,
আসিয়া জয় করিয়াছিল, সে কখন উন্নতাবস্থায় পদাৰ্পণ
করিল না। তবে বাহুবল উন্নতির পক্ষে এই জন্য আব-
শ্যক যে, যে সকল কারণে উন্নতির হানি হয়, সে সকল
উপদ্রব হইতে আত্মরক্ষা করা চাই। সেই জন্য বাহুবলের

প্রয়োজন। কিন্তু যেখানে সে প্রয়োজন নাই, সেখানে বাহুবল ব্যতীতও উন্নতি ঘটে।

দ্বিতীয় উত্তরে, আমরা যাহা বলিতেছি বাঙ্গালার সর্বত্র, সর্ব নগরে, সর্ব গ্রামে সকল বাঙ্গালির হৃদয়ে তাহা লিখিত হওয়া উচিত। বাঙ্গালি শারীরিক বলে দুর্বল—তাহাদের বাহুবল হইবার সম্ভাবনা নাই—তবে কি বাঙ্গালির ভরসা নাই? এ প্রশ্নে আমাদের উত্তর এই যে, শারীরিক বল বাহুবল নহে।

মনুষ্যের শারীরিক বল, অতি দুচ্ছ। তথাপি হস্তাঙ্গ প্রভৃতি মনুষ্যের বাহুবলে শাসিত হইতেছে। মনুষ্যে মনুষ্যে তুলনা করিয়া দেখ। যে সকল পার্শ্বত্য বন্যজাতি হিমালয়ের পশ্চিমভাগে বাস করে, পৃথিবীতে তাহাদের গায় শারীরিক বলে বলবান্ কে? এক এক জন মেওয়াওয়ালার চপেটাঘাতে, অনেক সেলর গোরাকে ঘূর্ণ্যমান হইয়া আঙ্গুর পেষ্টার আশা পরিত্যাগ করিতে দেখা গিয়াছে। তবে গোরা সমুদ্র পার হইয়া আসিয়া, ভারত অধিকার করিল—কাবুলির সঙ্গে ভারতের কেবল ফলবিক্রয়ের সম্বন্ধ রহিল, কেন? অনেক ভারতীয় জাতি হইতে, ইংরেজেরা শারীরিক বলে লঘু। শারীরিক বলে, শীকেরা ইংরেজ-অপেক্ষা বলিষ্ঠ। তথাপি শীক ইংরেজের পদানত। শারীরিক বল, বাহুবল নহে।

উদ্যম, ঐক্য, সাহস, এবং অধ্যবসায় এই চারিটি একত্রিত, করিয়া শারীরিক বল ব্যবহার, করার যে ফল তাহাই বাহুবল। যে জাতির উদ্যম, ঐক্য, সাহস, এবং

অধ্যবসায় আছে, তাহাদের শারীরিক বল যেমন হউক না কেন, তাহাদের বাহুবল আছে। এই চারিটি বাঙ্গালির কোন কালে নাই, এজন্য বাঙ্গালির বাহুবল নাই।

কিন্তু সামাজিক গতির বলে, এ চারিটি বাঙ্গালি চরিত্রে সমবেত হওয়ার অসম্ভাবনা কিছুই নাই।

বেগবৎ অভিলাষ হৃদয়মধ্যে থাকিলে উদ্যম জন্মে। অভিলাষ মাত্রেরই, কখন উদ্যম জন্মে না। যখন অভিলাষ এরূপ বেগ লাভ করে, যে তাহার অপূর্ণাবস্থা বিশেষ ক্লেশকর হয়, তখন অভিলষিতের প্রাপ্তির জন্য উদ্যম জন্মে। অভিলাষের অপূর্তি জন্য যে ক্লেশ, তাহার এমন প্রবলতা চাহি যে, নিশ্চেষ্টতা এবং আলস্যের যে সুখ, তাহা তদভাবে সুখ বলিয়া বোধ না হয়। এরূপ বেগযুক্ত কোন অভিলাষ বাঙ্গালির হৃদয়ে স্থান পাইলে, উদ্যম জন্মিবে। ঐতিহাসিক কালমধ্যে এরূপ কোন বেগযুক্ত অভিলাষ বাঙ্গালির হৃদয়ে কখন স্থান পায় নাই।

• যখন বাঙ্গালির হৃদয়ে সেই এক অভিলাষ জাগরিত হইতে থাকিবে, যখন বাঙ্গালি মাত্রেরই হৃদয়ে সেই অভিলাষের বেগ এরূপ গুরুতর হইবে, যে সকল বাঙ্গালিই তজ্জন্য আলস্য সুখ তুচ্ছ বোধ করিবে, তখন উদ্যমের সঙ্গে ঐক্য মিলিত হইবে।

• সাহসের জন্য আর একটু চাই। চাই যে সেই জাতীয় সুখের অভিলাষ, আরও প্রবলতর হইবে। এত প্রবল হইবে যে তজ্জন্য প্রাণ বিসর্জনও শ্রেয়ঃ বোধ হইবে। তখন সাহস হইবে।

যদি এই বেগবৎ অভিলাষ, কিছুকাল স্থায়ী হয়, তবে অধ্যবসায় জন্মিবে ।

অতএব যদি কখন (১) বাঙ্গালির কোন জাতীয় সুখের অভিলাষ প্রবল হয়, (২) যদি বাঙ্গালি মাত্রেই হৃদয়ে সেই অভিলাষ প্রবল হয়, (৩) যদি সেই প্রবলতা এরূপ হয় যে তদর্থে লোকে প্রাণপণ করিতে প্রস্তুত হয়, (৪) যদি সেই অভিলাষের বল স্থায়ী হয়, তবে 'বাঙ্গালির অবশ্য বাহুবল হইবে ।

বাঙ্গালির এরূপ মানসিক অবস্থা যে কখন ঘটিবে না, এ কথা বলিতে পারা যায় না । যে কোন সময়ে ঘটিতে পারে ।

ভালবাসার অত্যাচার ।

লোকের বিশ্বাস আছে, যে কেবল শত্রু, অথবা স্নেহ
দয়া দাক্ষিণ্যশূন্য ব্যক্তিই আমাদের উপর অত্যাচার করিয়া
থাকে। কিন্তু তদপেক্ষা গুরুতর অত্যাচারী যে আর এক
শ্রেণীর লোক আছে, তাহা সকল সময়ে আমাদের মনে
পড়ে না। যে ভালবাসে সেই অত্যাচার করে। ভাল-
বাসিলেই, অত্যাচার করিবার অধিকার প্রাপ্ত হওয়া যায়।
আমি যদি তোমাকে ভালবাসি, তবে তোমাকে আমার
মতাবলম্বী হইতে হইবে, আমার কথা শুনিতে হইবে ;
আমার অনুরোধ রাখিতে হইবে। তোমার ইষ্ট হউক,
অনিষ্ট হউক, আমার মতাবলম্বী হইতে হইবে। অবশ্য
ইহা স্বীকার করিতে হয়, যে যে ভালবাসে সে, যে
কার্যে তোমার অমঙ্গল, জানিয়া শুনিয়া তাহাতে তোমাকে
অনুরোধ করিবে না। কিন্তু কোন্ কার্য মঙ্গলজনক,
কোন্ কার্য অমঙ্গলজনক, তাহার মীমাংসা কঠিন ;
অনেক সময়েই দুই জনের মত এক হয় না। এমত
অবস্থায় যিনি কার্যকর্তা, এবং তাহার ফলভোগী, তাহার
সম্পূর্ণ অধিকার আছে, যে তিনি আত্মমতানুসারেই কার্য
করেন ; এবং তাঁহার মতের বিপরীত কার্য করাইতে
রাজা ভিন্ন কেহই অধিকারী নহেন।' রাজাই কেবল

অধিকারী, এই জন্ম, যে তিনি সমাজের হিতাহিতবেত্তা স্বরূপ প্রতিষ্ঠিত হইয়াছেন; কেবল তাঁহারই সদসং বিবেচনা অভ্রান্ত বলিয়া তাঁহাকে আমাদের প্রবৃত্তি দমনের অধিকার দিয়াছি; যে অধিকার তাঁহাকে দিয়াছি, সে অধিকার অনুসারে তিনি কার্য্য করাতে কাহারও প্রতি অত্যাচার হয় না। এবং সকল সময়ে এবং সকল বিষয়ে, আমাদের প্রবৃত্তি দমন করিবার তাঁহারও অধিকার নাই; যে কার্য্যে অণ্ডের অনিষ্ট ঘটবে বিবেচনা করেন, তৎ-প্রতি প্রবৃত্তির নিবারণেই তাঁহার অধিকার; যাহাতে আমার কেবল আপনারই অনিষ্ট ঘটবে বিবেচনা করেন, সে প্রবৃত্তি নিবারণে তিনি অধিকারী নহেন।* যাহাতে কেবল আমার নিজের অনিষ্ট, তাহা হইতে বিরত হইবার পরামর্শ দিবার জন্ম মনুষ্য মাত্রেই অধিকারী; রাজাও পরামর্শ দিতে পারেন, এবং যে আমাকে ভালবাসে, সেও পারে। কিন্তু পরামর্শ ভিন্ন আমাকে তদ্বিপরীত পথে বাধ্য করিতে কেহই অধিকারী নহেন। সমাজস্থ সকলেরই অধিকার আছে, যে সকল কার্য্যই, পরের অনিষ্ট না করিয়া আপনাপন প্রবৃত্তি মত সম্পাদন করে। পরের অনিষ্ট ঘটিলেই ইহা স্বৈচ্ছাচারিতা; পরের অনিষ্ট না ঘটিলেই

* যদি রাজার এমন অধিকার আছে, স্বীকার করা যায়, তবে স্বীকার করিতে হয়, যে যে আপনার চিকিৎসা করিবে না, বা যে অল্প বয়সে বা বৃদ্ধ বয়সে বিবাহ করিবে রাজা তাঁহার দণ্ড করিতে অধিকারী। আর রাজার যদি এরূপ অধিকার, স্বীকার করা না যায় তবে চড়ক বন্ধ, মতীদাহ বন্ধ প্রভৃতি আইনের সমর্থন করা যায় না।

ইহা স্বানুবর্তিতা। যে এই স্বানুবর্তিতার বিঘ্ন করে, যে পরের অনিষ্ট না ঘটবার স্থানেও আমার মতের বিরুদ্ধে আপন মত প্রবল করিয়া তদনুসারে কার্য করায়, সেই অত্যাচারী। রাজা ও সমাজ ও প্রণয়ী, এই তিন জনে একরূপ অত্যাচার করিয়া থাকেন।

রাজার অত্যাচার নিবারণের উপায় বহুকাল উদ্ভূত হইয়াছে। সমাজের এই অত্যাচার নিবারণ জন্ত কোন কোন পূর্ব পণ্ডিত ধৃতান্ত হইয়াছেন, এবং তদ্বিষয়ে জন ষ্টুয়ার্ট মিলের যত্ন ও বিচারদক্ষতা, তাঁহার মহাত্ম্যের পরিচয় দিবে। কিন্তু ভালবাসার অত্যাচার নিবারণের জন্ত যে কেহ কখন যত্নশীল হইয়াছেন, এমত আমাদিগের স্মরণ হয় না। কবিগণ সর্বতত্ত্বদর্শী এবং অনন্ত জ্ঞান-বিশিষ্ট, তাঁহাদের কাছে কিছুই বাদ পড়ে না। কৈকেয়ীর অত্যাচারে দশরথকৃত রামের নির্বাসনে, দ্যুতাসক্ত যুধিষ্ঠির কর্তৃক ভ্রাতৃগণের নির্বাসনে, এবং অন্যান্য শত শত স্থানে কবিগণ এই মহতী নীতি প্রতিপাদিতা করিয়াছেন। কিন্তু কবিরা নীতিবেত্তা নহেন; নীতি-বেত্তারা এবিষয়ে প্রকাশে হস্তক্ষেপ করেন নাই। যিনিই লৌকিক ব্যাপার সকল মনোভিনিবেশ পূর্বক পর্যবেক্ষণ করিবেন, তিনিই এ তত্ত্বের সমালোচনা যে বিশেষ প্রয়োজনীয়, তদ্বিষয়ে নিঃসংশয় হইবেন। কেননা এ অত্যাচারে প্রবৃত্ত অত্যাচারী অনেক। পিতা, মাতা, ভ্রাতা, ভগিনী, পুত্র, কন্যা, ভাৰ্য্যা, স্বামী, আত্মীয়, কুটুম্ব, সুহৃৎ, ভৃত্য, কেই ভালবাসে, সেই একটু অত্যাচার করে, এবং

অনিষ্ট করে। তুমি সুলক্ষণাধিতা, সঙ্গশ্রদ্ধা, সচ্চরিত্রা কন্যা দেখিয়া, তাহার পাণিগ্রহণ করিবে বাসনা করিয়াছ, এমন সময়ে, তোমার পিতা আসিয়া বলিলেন, অমুক বিষয়া-পন্ন লোক, তাহার কন্যার সঙ্গেই তোমার বিবাহ দিব। তুমি যদি বয়ঃপ্রাপ্ত হইয়া থাক, তবে তুমি এ বিষয়ে পিতার আজ্ঞাপালনে বাধ্য নহ, কিন্তু পিতৃপ্রেমে বশীভূত হইয়া, সেই কালকূটরুপিণী ধনিকন্যা বিবাহ করিতে হইল। মনে কর, কেহ দারিদ্র্যপীড়িত, দৈবানুকম্পায় উত্তম পদস্থ হইয়া দূরদেশে যাইয়া, দারিদ্র্য মোচনের উদ্যোগ করিতেছে এমন সময়ে মাতা, তাহাকে দূরদেশে রাখিতে পারিবেন না বলিয়া কাঁদিয়া পড়িলেন, তাহাকে যাইতে দিলেন না, সে মাতৃপ্রেমে বদ্ধ হইয়া নিরস্ত হইল, মাতার ভালবাসার অত্যাচারে সে আপনাকে চিরদারিদ্র্যে সমর্পণ করিল। কৃতী সহোদরের উপার্জিত অর্থ, অকর্ম্মা অপদার্থ সহোদর নষ্ট করে, এটী নিতান্তই ভালবাসার অত্যাচার, এবং হিন্দুসমাজে সর্বদাই প্রত্যক্ষগোচর হইয়া থাকে। ভার্য্যার ভালবাসার অত্যাচারের কোন উদাহরণ নববঙ্গবাসীদিগের কাছে প্রযুক্ত করা আবশ্যিক কি? আর স্বামীর অত্যাচার সম্বন্ধে, ধর্ম্মতঃ এটুকু বলা কর্তব্য, যে কতকগুলি ভালবাসার অত্যাচার বটে, কিন্তু অনেক গুলিই বাহবলের অত্যাচার।

যাহা হউক, মনুষ্যজীবন, ভালবাসার অত্যাচারে পরি-পূর্ণ। চিরকাল মনুষ্য অত্যাচারপীড়িত। প্রথমাবস্থায় বাহবলের অত্যাচার; অসত্যজাতিদিগের মধ্যে যেই বলিষ্ঠ

সেই পরপীড়ন করে। কালে এই অত্যাচার, রাজার অত্যাচার এবং অর্থের অত্যাচারে পরিণত হয় ; কোন সমাজে কখন একেবারে লুপ্ত হয় নাই। দ্বিতীয়াবস্থায়, ধর্মের অত্যাচার ; তৃতীয়াবস্থায়, সামাজিক অত্যাচার ; এবং সকল অবস্থাতেই ভালবাসার অত্যাচার। এই চতুর্বিধ পীড়নের মধ্যে, প্রণয়ের পীড়ন কাহারও পীড়ন অপেক্ষা হীনবল বা অনানিষ্টকারী নহে। বরং ইহা বলা যাইতে পারে, যে রাজা, সমাজ বা ধর্মবেত্তা কেহই প্রণয়ীর অপেক্ষা বলবান্ নহেন, বা কেহ তেমন সদা সর্বক্ষণ সকল কাজে আসিয়াই হস্তক্ষেপণ করেন না—সুতরাং প্রণয়ের পীড়ন যে সর্বাপেক্ষা অনিষ্টকারী ইহা বলা যাইতে পারে। আর অন্য অত্যাচারকারীকে নিবারণ করা যায়, অন্য অত্যাচারের সীমা আছে। কেন না অন্যান্য অত্যাচারকারীর বিরোধী হওয়া যায়। প্রজা, প্রজাপীড়ক রাজাকে রাজচ্যুত করে ; কখনও মন্তকচ্যুত করে। লোকপীড়ক সমাজকে পরিত্যাগ করা যায়। কিন্তু ধর্মের পীড়নে এবং স্নেহের পীড়নে নিষ্কান্ত নাই—কেন না ইহাদিগের বিরোধী হইতে প্রবৃত্তিই জন্মে না। হরিদাস বাবাজি পাটার বাটি দেখিলে কখন কখন লাল ফেলিয়া থাকেন বটে, কিন্তু কখন গোস্বামীর সম্মুখে মাংসভোজনের ঔচিত্য বিচার করিতে ইচ্ছা করেন না—কেন না, জানেন, যে ইহলোকে যতই কষ্ট পান না কেন, বাবাজি পরলোকে গোলোক প্রাপ্ত হইবেন।

মহুষ্য যে সকল অত্যাচারের অধীন, সে সকলের ভিত্তিমূল মহুষ্যের প্রয়োজনে। জড়পদার্থকে আয়ত্ত না

করিতে পারিলে মনুষ্যজীবন নির্বাহ হয় না, এজন্য বাহুবলের প্রয়োজন। এবং সেই জগুই বাহুবলের অত্যাচারও আছে। বাহুবলের ফল বৃদ্ধি করিবার জগু, সমাজের প্রয়োজন; এবং সমাজের অত্যাচারও সঙ্গে সঙ্গে। যেমন পরস্পরে সমাজবন্ধনে বন্ধ না হইলে, মনুষ্যজীবনের উদ্দেশ্য সুসম্পন্ন হয় না, তেমনি পরস্পরে আন্তরিক বন্ধনে বন্ধ না হইলে, মনুষ্যজীবনের সুনির্বাহ হয় না। অতএব সমাজের যেরূপ প্রয়োজন, প্রণয়েরও তদ্রূপ বা ততোধিক প্রয়োজন। এবং বাহুবলের বা সমাজের অত্যাচার আছে বলিয়াই যেমন বাহুবল বা সমাজ মনুষ্যের ত্যাজ্য বা অনাদরণীয় হইতে পারে না, প্রণয়ের অত্যাচার আছে বলিয়াই তাহাও ত্যাজ্য বা অনাদরণীয় হইতে পারে না। অপিচ যেমন বাহুবল বা সমাজবলকে অত্যাচারী দেখিয়া তাহাকে পরিত্যক্ত বা অনাদৃত না করিয়া, মনুষ্য, ধর্মের দ্বারা তাহার শমতার চেষ্টা পাইয়াছে, প্রণয়ের অত্যাচারও সেইরূপ ধর্মের দ্বারা শমিত করিতে যত্ন করা কর্তব্য। ধর্মেরও অত্যাচার আছে বটে, এবং ধর্মের অত্যাচার শমতার জগু যদি আরও কোন শক্তি প্রযুক্ত হয়, তাহারও অত্যাচার ঘটিবে, কেননা অত্যাচার শক্তির স্বভাবসিদ্ধ। যদি ধর্মের অত্যাচার শমতার সক্ষম কোন শক্তি থাকে, তবে জ্ঞান সেই শক্তি। নিকট জ্ঞানেরও অত্যাচার আছে। তাহার উদাহরণ, হিতবাদ এবং প্রত্যক্ষবাদ। এতদুভয়ের বেগে মনুষ্যহৃদয়সাগরে অনঙ্গ ভাগ চড়া পড়িয়া যাইতেছে। বোধ হয় জ্ঞান

ব্যতীত জ্ঞানের অত্যাচার শাসনের জন্ত অস্ত্র কোন শক্তি, যে মনুষ্যকর্তৃক ব্যবহৃত হইবে, এক্ষণে এমন বিবেচনা হয় না।

সেইরূপ ইহাও বলা যাইতে পারে, যে প্রণয়ের দ্বারাই প্রণয়ের অত্যাচার শমিত হওয়াই সম্ভব। এ কথা যথার্থ, স্বীকার করি। স্নেহ যদি স্বার্থপরতাশূন্য হয়, তবে তাহা ঘটিতে পারে। কিন্তু সাধারণ মনুষ্যের প্রকৃতি এইরূপ, যে স্বার্থপরতাশূন্য স্নেহ দুর্লভ। এই কথা প্রকৃত তাৎপর্য গ্রহণ না করিয়া, অনেকেই মনে মনে ইহার প্রতিবাদ করিতে পারেন। তাঁহারা বলিতে পারেন যে, যে মাতা স্নেহবশতঃ পুত্রকে অর্থাশেষণে যাইতে দিল না—সে কি স্বার্থপর? বরং যদি স্বার্থপর হইত, তাহা হইলে পুত্রকে অর্থাশেষণে দূরদেশে যাইতে নিষেধ করিত না, কেন না পুত্র অর্থোপার্জন করিলে কোন্ না মাতা তাহার ভাগিনী হইবেন?—অতএব ঐরূপ দর্শন মাত্র আকাজক্ষী স্নেহকে অনেকেই অস্বার্থপর স্নেহ মনে করেন। বাস্তবিক সে কথা সত্য নহে—এ স্নেহ অস্বার্থপর নহে। যাহারা ইহা অস্বার্থপর মনে করেন, তাঁহারা অর্থপরতাকে স্বার্থপরতা মনে করেন; যে ধনের কামনা করে না তাহাকে স্বার্থপরতাশূন্য মনে করেন। ধনলাভ ভিন্ন পৃথিবীতে যে অশ্রান্ত সুখ আছে, এবং তন্মধ্যে কোন কোন সুখের আকাজক্ষা ধনাকাজক্ষা হইতে অধিকতর বেগবতী, তাহা তাঁহারা বুঝিতে পারেন না। যে মাতা অর্থের মায়া পরিত্যাগ করিয়া পুত্র-সুখদর্শনসুখের বাসনায় পুত্রকে দারিদ্র্যে সমর্পণ করিল;

সেও আত্মসুখ খুঁজিল। সে অর্থজনিত সুখ চায় না, কিন্তু পুত্রসন্দর্শনজনিত সুখ চায়। সে সুখ মাতার, পুত্রের নহে; মাতৃদর্শনজনিত পুত্রের যদি সুখ থাকে, থাক;—সে স্বতন্ত্র, পুত্রের প্রযুক্তিদায়ক, মাতার নহে। মাতা এখানে আপনার একটি সুখ খুঁজিল—নিত্য পুত্রমুখদর্শন; তাহার অভিলাষিণী হইয়া পুত্রকে দারিদ্র্যহুঃখে হুঃখী করিতে চাহিল; এখানে মাতা স্বার্থপর, কেন না আপনার সুখের অভিপ্রায়ে অগ্ৰে হুঃখী করিল।

মনুষ্যের স্নেহ অধিকাংশই এইরূপ প্রণয়ী প্রণয়ভাজন উভয়েরই চিত্তসুখকর, কিন্তু স্বার্থপর, পশুবৃত্ত। কেবল, প্রণয়ী অগ্ৰ সুখাপেক্ষা প্রণয়সুখের অভিলাষী, এইজগৎ লোকে এইরূপ স্নেহকে অস্বার্থপর বলে। কিন্তু স্নেহের যে সুখ, সে স্নেহযুক্তের; স্নেহযুক্ত আপন সুখের আকাজক্ষী বলিয়া, সাধারণ মনুষ্যস্নেহকে স্বার্থপর বৃত্তি বলিতে হইবে।

কিন্তু স্বার্থসাধন জগৎ, স্নেহ মনুষ্যহৃদয়ে স্থাপিত নহে। মানুষের স্বভাবগুলি বৃত্তি আছে, বোধ হয়, সর্বাঙ্গের এইটি পবিত্র ও মঙ্গলকর। মনুষ্যের চরিত্র এ পর্য্যন্ত তাদৃশ উৎকর্ষ লাভ করে নাই বলিয়াই মনুষ্যস্নেহ অদ্যাপি পশুবৎ। পশুবৎ, কেন না, পশুদিগেরও বৎসস্নেহ, দাম্পত্য-প্রণয় এবং নাৎসল্য দাম্পত্য ব্যতীত, পরস্পর অন্তবিধ প্রণয় আছে। প্রথমটি মানুষের অপেক্ষা অল্প পরিমাণে আছে।

স্নেহের স্বার্থ স্বরূপই অস্বার্থপরতা। যে মাতা পুত্রের

সুখের কামনায়, পুত্রমুখ দর্শন কামনা পরিত্যাগ করিলেন, তিনিই যথার্থ স্নেহবতী। যে, প্রণয়ী, প্রণয়ের পাত্রের মঙ্গলার্থ আপনার প্রণয়জনিত সুখভোগও ত্যাগ করিতে পারিল, সেই প্রণয়ী।

যত দিন না সাধারণ মানুষের প্রেম, এইরূপ বিশুদ্ধতা প্রাপ্ত হইবে, ততদিন মানুষের ভালবাসা হইতে স্বার্থপরতা কলঙ্ক যুচিবে না। এবং স্নেহের যথার্থ ক্ষুধি ঘটিবে না। যেখানে ভালবাসা এইরূপ বিশুদ্ধি প্রাপ্ত হইবে, বা যাহার হৃদয়ে হইয়াছে, সেইখানে ভালবাসার দ্বারায় ভালবাসার অত্যাচার নিবারণ হইতে পারে, এবং হইয়াও থাকে। এরূপ বিশুদ্ধ প্রণয়বিশিষ্ট মানুষ দুর্লভ নহে। কিন্তু এ প্রবন্ধে তাহাদিগের কথা বলিতেছি না—তাহারা অত্যাচারীও নহেন। অন্তত, ধর্মের শাসনে প্রণয় শাসিত করাই ভালবাসার অত্যাচার নিবারণের একমাত্র উপায়। সে ধর্ম কি ?

• ধর্মের যিনি যে ব্যাখ্যা করুন না, ধর্ম এক। দুইটি মাত্র মূলসূত্রে সমস্ত মানুষের নীতিশাস্ত্র কথিত হইতে পারে। তাহার মধ্যে একটি আত্মসম্বন্ধীয়, দ্বিতীয়টি পরসম্বন্ধীয়। যাহা আত্মসম্বন্ধীয়, তাহাকে আত্মসংস্কারনীতির মূল বলা যাইতে পারে,—এবং আত্মচিন্তের ক্ষুধি এবং নির্মলতা রক্ষাই তাহার উদ্দেশ্য। দ্বিতীয়টি, পরসম্বন্ধীয়, বলিয়াই তাহাকে যথার্থ ধর্মনীতির মূল বলা যাইতে পারে। “পরের অনিষ্ট করিও না; সাধ্যানুসারে, পরের মঙ্গল করিও।” এই মহতী উক্তি জগতীয় তাবন্ধর্ম-

শাস্ত্রের একমাত্র মূল, এবং একমাত্র পরিণাম। অন্য যে কোন নৈতিক উক্তি বল না কেন, তাহার আদি ও চরম ইহাতেই বিলীন হইবে। আত্মসংস্কারনীতির সকল তত্ত্বের সহিত, এই মহানীতিতত্ত্বের ঐক্য আছে। এবং পরহিতনীতি এবং আত্মসংস্কারনীতি একই তত্ত্বের ভিন্ন ভিন্ন ব্যাখ্যা মাত্র। পরহিতরতি এবং পরের অহিতে বিরতি, ইহাই সমগ্র নীতিশাস্ত্রের সার উপদেশ।

অতএব এই ধর্মনীতির মূল সূত্রাবলম্বন করিলেই, ভালবাসার অত্যাচার নিবারণ হইবে। যখন স্নেহশালী ব্যক্তি স্নেহের পাত্রের কোন কার্যে হস্তক্ষেপ করিতে উদ্যত হইলেন, তখন, তাঁহার মনে দৃঢ়সঙ্কল্প করা উচিত, যে আমি কেবল আপন সুখের জন্য, হস্তক্ষেপ করিব না ; আপনার ভাবিয়া, যাহার প্রতি স্নেহ করি, তাহার কোন প্রকার অনিষ্ট করিব না। আমার ষতটুকু কষ্ট সহ করিতে হয়, করিব ; তথাপি তাহার কোন প্রকার অহিতে তাহাকে প্রবৃত্ত করিব না।

এ কথা শুনিতে অতি ক্ষুদ্র, এবং পুরাতন জনশ্রুতির পুনরুক্তি বলিয়া বোধ হইতে পারে, কিন্তু ইহার প্রয়োগ সকল সময়ে তত সহজ বোধ হইবে না। উদাহরণ স্বরূপ, দশরথকৃত রামনির্বাসন, মীমাংসার্থ গ্রহণ করিব ; তদ্বারা এই সামান্য নিয়মের প্রয়োগের কঠিনতা অনেকের হৃদয়-ঙ্গম হইতে পারিবে। এস্থলে কৈকেয়ী এবং দশরথ উভয়েই ভালবাসার অত্যাচারে প্রবৃত্ত ; কৈকেয়ী দশরথের উপরে ; দশরথ রামের উপরে। ইহার মধ্যে কৈকেয়ীর

কার্য স্বার্থপর এবং নৃশংস বলিয়া চিরপরিচিত । কৈকে-
রীর কার্য স্বার্থপর ও নৃশংস বটে, তবে তৎপ্রতি যতটা
কটুক্তি হইয়া আসিতেছে ততটা বিহিত কি না বলা যায়
না । কৈকেয়ী আপনার কোন ইচ্ছা কামনা করে নাই ;
আপনার পুত্রের শুভ কামনা করিয়াছিল । সত্য বটে
পুত্রের মঙ্গলেই মাতার মঙ্গল ; কিন্তু যে বঙ্গীয় পিতা
মাতা, স্বীয় জাতিপাতের ভয়ে পুত্রকে শিক্ষার্থ ইংলণ্ডে
ঘাইতে দেন না, কৈকেয়ীর কার্য তদপেক্ষা যে শতগুণে
অস্বার্থপর, তদ্বিষয়ে সংশয় নাই ।

সে কথা যাউক, কৈকেয়ীর দোষ গুণ বিচারে আমরা
প্রবৃত্ত নহি । দশরথ, সত্যপালনার্থ রামকে বনপ্রেরণ
করিয়া ভারতকে রাজ্যাভিষিক্ত করিলেন । তাহাতে তাঁহার
নিজের প্রাণবিয়োগ হইল । তিনি সত্যপালনার্থ আত্মপ্রাণ
বিয়োগ এবং প্রাণাধিক পুত্রের বিরহ স্বীকার করিলেন,
ইহাতে ভারতবর্ষীয় সাহিত্যেতিহাস তাঁহার বশঃ কীর্তনে
পূরিপূর্ণ । কিন্তু উৎকৃষ্ট ধর্মনীতির বিচারে ইহাই প্রতি-
পন্ন হয়, যে দশরথ পুত্রকে স্বাধিকারচ্যুত এবং নির্বাসিত
করিয়া, সত্যপালন করায়, ঘোরতর অধর্ম করিয়াছিলেন ।

জিজ্ঞাসা করি, সত্যমাত্র কি পালনীয় ? যদি সতী
কুলবতী, কুচরিত্র পুরুষের কাছে ধর্মত্যাগে প্রতিশ্রুতা হয়,
তবে সে সত্য কি পালনীয় ? যদি কেহ, দস্যুর প্ররোচনায়
সুহৃদকে বিনাদোষে বধ করিতে সত্য করে, তবে সে সত্য কি
পালনীয় ? যে কেহ ঘোরতর মহাপাতক করিতে সত্য
করে, তাহার সত্য কি পালনীয় ?

যেখানে সত্য লঙ্ঘনাপেক্ষা সত্য রক্ষায় অধিক অনিষ্ট, সেখানে সত্য রাখিবে, না সত্য ভঙ্গ করিবে? অনেকে বলিবেন, সেখানেও সত্য পালনীয়, কেন না, সত্য নিত্যধর্ম, অবস্থাভেদে তাহা পুণ্যত্ব পাপত্ব প্রাপ্ত হয় না। যদি পাপ পুণ্যের এমন নিয়ম কর, যে যখন যাহা কর্ম-কর্তার বিবেচনার ইষ্টকারক তাহাই কর্তব্য; যাহা তাঁহার তাৎকালিক বিবেচনার অনিষ্টকারক তাহা অকর্তব্য, তবে পুণ্য পাপের প্রভেদ থাকে না—লোকে পুণ্য বলিয়া ঘোরতর মহাপাতকে প্রবৃত্ত হইতে পারে। আমরা এ তত্ত্বের মীমাংসা এ স্থলে করিব না—কেন না হিতবাদীরা ইহার এক প্রকার মীমাংসা করিয়া রাখিয়াছেন। মূল কথা উত্তর দিব।

যখন এরূপ মীমাংসার গোলযোগ হইবে, তখন ধর্ম-নীতির যে মূল সূত্র সংস্থাপিত হইয়াছে, তাহার দ্বারা পরীক্ষা কর।

সত্য কি সর্বত্র পালনীয়? এ কথা মীমাংসা করিবার আগে জিজ্ঞাস্য, সত্য পালনীয় কেন? সত্য পালনের একটি মূল ধর্মনীতিতে, একটি মূল আত্ম-সংস্কারনীতিতে। আমরা আত্ম সংস্কার নীতিকে ধর্মনীতির অংশ বলিয়া পরিগণিত করিতে অস্বীকার করিয়াছি; ধর্মনীতির মূলই দেখিব। বিশেষ উভয়ের ফল একই। ধর্মনীতির মূল সূত্র, পরের অনিষ্ট বাহাতে হয়, তাহা অকর্তব্য। সত্য-ভঙ্গে পরের অনিষ্ট হয়, এজন্য সত্য পালনীয়। কিন্তু যখন এমন ঘটে, যে সত্য পালনে পরের গুরুতর অনিষ্ট,

সত্য ভঙ্গে ততদূর নহে, তখন সত্য পালনীয় নহে। দশরথের সত্যপালনে রামের গুরুতর অনিষ্ট ; সত্য ভঙ্গে কৈকেয়ীর তাদৃশ কোন অনিষ্ট নাই। দৃষ্টান্তজনিত জন-সমাজের যে অনিষ্ট, তাহা রামের স্বাধিকারচ্যুতিতেই গুরু-তর। উহা দস্যুতার রূপান্তর। অতএব এমত স্থলে দশরথ সত্যপালন করিয়াই মহাপাপ করিয়াছিলেন।

এখানে দশরথ, স্বার্থপরতাশূন্য নহেন। সত্য ভঙ্গে জগতে তাঁহার কলঙ্ক ঘোষিত হইবে, এই ভয়েই তিনি রামকে অধিকারচ্যুত এবং বহিষ্কৃত করিলেন; অতএব যশোরক্ষা রূপ স্বার্থের বশীভূত হইয়া রামের অনিষ্ট করিলেন। সত্য বটে, তিনি আপনার প্রাণহানিও স্বীকার করিয়াছিলেন ; কিন্তু তাঁহার কাছে প্রাণাপেক্ষা যশ প্রিয়, অতএব আপনার ইষ্টই খুঁজিয়াছিলেন। এজন্য তিনি স্বার্থপর। স্বার্থপরতা দোষযুক্ত যে অনিষ্ট তাহা ঘোরতর পাপ।

অস্বার্থপর প্রেম, এবং ধর্ম, ইহাদের একই গতি, একই চরম। উভয়ের সাধ্য অন্যের মঙ্গল। বস্তুতঃ প্রেম, এবং ধর্ম একই পদার্থ। সর্ব সংসার প্রেমের বিষয়ীভূত হইলেই ধর্ম নাম প্রাপ্ত হয়। এবং ধর্ম যত দিন না সর্বজনীন প্রেম স্বরূপ হয়, ততদিন সম্পূর্ণতা প্রাপ্ত হয় না। কিন্তু মনুষ্যগণ, কার্যতঃ স্নেহকে ধর্ম হইতে পৃথগ্-ভূত রাখিয়াছে, এজন্য ভালবাসার অত্যাচার নিবারণ জন্য ধর্মের দ্বারা স্নেহের শাসন আবশ্যিক।

জ্ঞান ।

ভারতবর্ষে দর্শন কাহাকে বলে ? ইহার উত্তর দিতে গেলে প্রথমে বুঝিতে হইবে, যে ইউরোপে যে অর্থে “ফিলসফি” শব্দ ব্যবহৃত হয়, দর্শন, ঐ অর্থে ব্যবহৃত হয় না। বাস্তবিক ফিলসফি শব্দের অর্থের স্থিরতা নাই, —কখন ইহার অর্থ অধ্যাত্ত্ব, কখন ইহার অর্থ প্রাকৃতিক-বিজ্ঞান, কখন ইহার অর্থ ধর্মনীতি, কখন ইহার অর্থ বিচারবিদ্যা। ইহার একটিও দর্শনের ব্যাখ্যার অনুরূপ নহে। ফিলসফির উদ্দেশ্য, জ্ঞান বিশেষ; তদতিরিক্ত অন্য উদ্দেশ্য নাই। দর্শনেরও উদ্দেশ্য জ্ঞান বটে, কিন্তু সে জ্ঞানেরও উদ্দেশ্য আছে। সেই উদ্দেশ্য, নিঃশ্রেয়স, মুক্তি, নির্মাণ বা তত্ত্ব নামান্তর বিশিষ্ট পারলৌকিক অবস্থা। ইউরোপীয় ফিলসফিতে জ্ঞানই সাধনীয়; দর্শনে জ্ঞান সাধন মাত্র। ইহা ভিন্ন আর একটি গুরুতর প্রভেদ আছে। ফিলসফির উদ্দেশ্য, জ্ঞানবিশেষ, —কখন অধ্যাত্ত্বিক, কখন ভৌতিক, কখন নৈতিক বা সামাজিক জ্ঞান। কিন্তু সর্বত্র পদার্থ মাত্রেরই জ্ঞান দর্শনের উদ্দেশ্য। ফলতঃ সকল প্রকার জ্ঞানই দর্শনের অন্তর্গত।

সংসার দুঃখময়। প্রাকৃতিক বল, সর্বদা মনুষ্য সুখের প্রতিদ্বন্দ্বী। তুমি যাহা কিছু সুখভোগ কর, সে বাহ্য প্রকৃতির সঙ্গে যুদ্ধ করিয়া লাভ কর। মনুষ্যজীবন, প্রকৃ-

তির সঙ্গে দীর্ঘ সময় মাত্র—যখন তুমি সমরজয়ী হইলে তখনই কিঞ্চিৎ সুখলাভ করিলে। কিন্তু মনুষ্যবল হইতে প্রাকৃতিক বল অনেক গুণে গুরুতর। অতএব মনুষ্যের জয় কদাচিৎ—প্রকৃতির জয়ই প্রতিনিয়ত ঘটয়া থাকে। তবে জীবন যন্ত্রণাময়। আর্ধ্য মতে ইহার আবার পৌনঃপুন্য আছে। ইহজন্মে, অনন্তদুঃখ কোনরূপে কাটাইয়া প্রাকৃতিক রণে শেষে পরাস্ত হইয়া, যদি জীব দেহত্যাগ করিল—তথাপি ক্ষমা নাই—আবার জন্মগ্রহণ করিতে হইবে, আবার সেই অনন্ত দুঃখভোগ করিতে হইবে—আবার মরিতে হইবে,—আবার জন্মিতে হইবে,—আবার দুঃখ। এই অনন্ত দুঃখের কি নিবৃত্তি নাই? মনুষ্যের নিস্তার নাই?

ইহার দুই উত্তর আছে। এক উত্তর ইউরোপীয়, আর এক উত্তর ভারতবর্ষীয়। ইউরোপীয়েরা বলেন, প্রকৃতি জেয়; যাহাতে প্রকৃতিকে জয় করিতে পার সেই চেষ্টা দেখ। এই জীবন রণে প্রকৃতিকে পরাস্ত করিবার জন্য আয়ুধ সংগ্রহ কর। সেই আয়ুধ, প্রকৃতিকে জিজ্ঞাসা করিলে তিনি নিজেই বলিয়া দিবেন। প্রাকৃতিক তত্ত্ব অধ্যয়ন কর—প্রকৃতির গুপ্ত তত্ত্ব সকল অবগত হইয়া, তাহারই বলে তাহাকে বিজিত করিয়া, মনুষ্যজীবন সুখময় কর। এই উত্তরের ফল—ইউরোপীয় বিজ্ঞান শাস্ত্র।

ভারতবর্ষীয় উত্তর এই, যে প্রকৃতি অজেয়—যতদিন প্রকৃতির সঙ্গে সন্মুক্ত থাকিবে ততদিন দুঃখ থাকিবে। অতএব প্রকৃতির সঙ্গে সন্মুক্ত বিচ্ছেদই দুঃখ নিবারণের এক-

মাত্র উপায়। সেই সম্বন্ধবিচ্ছেদ কেবল জ্ঞানের দ্বারাই হইতে পারে। এই উত্তরের ফল ভারতবর্ষীয় দর্শন।

সেই জ্ঞান কি? আকাশকুসুম বলিলেও একটি জ্ঞান হয়— কেন না আকাশ কি তাহা আমরা জানি, এবং কুসুম কি তাহাও জানি, মনের শক্তির দ্বারা উভয়ের সংযোগ করিতে পারি। কিন্তু সে জ্ঞান, দর্শনের উদ্দেশ্য নহে। তাহা ভ্রমজ্ঞান। যথার্থ জ্ঞানই দর্শনের উদ্দেশ্য। এই যথার্থ জ্ঞানকে প্রমাজ্ঞান বা প্রমা প্রতীতি বলে। সেই যথার্থ জ্ঞান কি ?

যাহা জানি, তাহাই জ্ঞান। যাহা জানি তাহা কি প্রকারে জানিয়াছি ?

কতকগুলি বিষয় ইন্দ্রিয়ের সাক্ষাৎ সংযোগে জানিতে পারি। ঐ গৃহ, এই বৃক্ষ, ঐ নদী, এই পর্বত, আমার সম্মুখে রহিয়াছে ; তাহা আমি চক্ষে দেখিতে পাইতেছি, এজন্য জানি যে ঐ গৃহ, এই বৃক্ষ, ঐ নদী, এই পর্বত আছে। অতএব জ্ঞাতব্য পদার্থের সঙ্গে চক্ষুরিন্দ্রিয়ের সংযোগে আমাদের এই জ্ঞান লব্ধ হইল। (১) ইহাকে চাক্ষুষ প্রত্যক্ষ বলে। এইরূপ, গৃহমধ্যে থাকিয়া শুনিতে পাইলাম, মেঘ গর্জিতেছে, পক্ষী ডাকিতেছে ; এখানে মেঘের ডাক, পক্ষীর রব আমরা কর্ণের দ্বারা প্রত্যক্ষ

(১) গৃহ, পর্বতাদি দূরে রহিয়াছে—আমাদের চক্ষে সংলগ্ন নহে, তবে ইন্দ্রিয়ের সংযোগ হইল কি প্রকারে? দৃষ্ট পদার্থ বিক্রিণ শক্তির দ্বারা। ঐ রশ্মি আমাদের নয়নাভ্যন্তরে প্রবেশ করিলে দৃষ্টি হয়।

করিলাম । ইহা শ্রাবণ প্রত্যক্ষ । এইরূপ চাক্ষুষ, শ্রাবণ, স্পর্শ, স্বাচ, এবং রাসন, পঞ্চেন্দ্রিয়ের সাধ্য পাঁচ প্রত্যক্ষ । মনও একটি ইন্দ্রিয় বলিয়া আৰ্য্য দার্শনিকেরা গণিয়া থাকেন, অতএব তাঁহারা মানস প্রত্যক্ষের কথা বলেন । মন বহিরিন্দ্রিয় নহে । অন্তরিন্দ্রিয়ের সঙ্গে বহির্বিষয়ের সাক্ষাৎসংযোগ অসম্ভব । অতএব মানস প্রত্যক্ষে বহির্বিষয় অবগত হওয়া যায় না ; কিন্তু অন্তর্জ্ঞান, মানস প্রত্যক্ষের দ্বারাই হইবে ।

যে পদার্থ প্রত্যক্ষ হয়, তাহা বিষয়ে আমাদিগের জ্ঞান জন্মে, এবং তদ্ব্যতিরিক্ত বিষয়ের জ্ঞানও সৃষ্টিত হয় । আমি রুদ্ধদ্বার গৃহমধ্যে শয়ন করিয়া আছি, এমত সময়ে মেঘের ধ্বনি শুনিলাম, ইহাতে শ্রাবণ প্রত্যক্ষ হইল । কিন্তু সে প্রত্যক্ষ ধ্বনির, মেঘের নহে । মেঘ এখানে আমাদের প্রত্যক্ষের বিষয় নহে । অথচ আমরা জানিতে পারিলাম যে আকাশে মেঘ আছে । ধ্বনির প্রত্যক্ষে মেঘের অস্তিত্ব জ্ঞান হইল কোথা হইতে ? আমরা পূর্বে পূর্বে দেখিয়াছি, আকাশে মেঘ ব্যতীত কখন এরূপ ধ্বনি হয় নাই । এমন কখনও ঘটে নাই যে মেঘ নাই, অথচ এরূপ ধ্বনি শুনা গিয়াছে । অতএব রুদ্ধদ্বার গৃহ মধ্যে থাকিয়াও আমরা বিনা প্রত্যক্ষে জানিলাম যে আকাশে মেঘ হইয়াছে । ইহাকে অনুমিতি বলে । মেঘধ্বনি, আমরা প্রত্যক্ষে জানিয়াছি, কিন্তু মেঘ অনুমিতির দ্বারা ।

মনে কর, ঐ রুদ্ধদ্বার গৃহ অন্ধকার, এবং ভূমি সেখানে একাকী আছি । এমত কালে তোমার দেহের

সহিত মনুষ্যশরীরের স্পর্শ অনুভূত করিলে । তুমি তখন কিছু না দেখিয়া, কোন শব্দও না শুনিয়া জানিতে পারিলে যে গৃহ মধ্যে মনুষ্য আসিয়াছে । সেই স্পর্শজ্ঞান, তাঁচ প্রত্যক্ষ ; কিন্তু গৃহমধ্যে মনুষ্য-জ্ঞান অনুমিতি । ঐ অন্ধকার গৃহে তুমি যদি যুথিকা পুষ্পের গন্ধ পাও, তবে তুমি বুঝিবে, যে গৃহে পুষ্পাদি আছে ; এখানে গন্ধই প্রত্যক্ষের বিষয় ; পুষ্প অনুমিতির বিষয় ।

মনুষ্য অল্প বিষয়ই স্বয়ং প্রত্যক্ষ করিতে পারে । অধিকাংশ জ্ঞানই অনুমিতির উপর নির্ভর করে । অনুমিতি সংসার চালাইতেছে । আমাদের অনুমানশক্তি না থাকিলে আমরা প্রায় কোন কার্যই করিতে পারিতাম না । বিজ্ঞান, দর্শনাদি, অনুমানের উপরেই নির্মিত ।

কিন্তু যেমন কোন মনুষ্যই সকল বিষয় স্বয়ং প্রত্যক্ষ করিতে পারেন না, তেমনি কোন ব্যক্তি সকল তত্ত্ব স্বয়ং অনুমান করিয়া সিদ্ধ করিতে পারেন না । এমন অনেক বিষয় আছে, যে তাহা অনুমান করিয়া জানিতে গেলে যে পরিশ্রম আবশ্যিক, তাহা একজন মনুষ্যের জীবনকালের মধ্যে সাধ্য নহে । এমন অনেক বিষয় আছে যে তাহা অনুমানের দ্বারা সিদ্ধ করার জন্য যে বিদ্যা, বা যে জ্ঞান, বা যে বুদ্ধি, বা যে অধ্যবসায় প্রয়োজনীয় তাহা অধিকাংশ লোকেরই নাই । অতএব এমন অনেক নিতান্ত প্রয়োজনীয় বিষয় আছে, যে তাহা অনেকে স্বয়ং প্রত্যক্ষ বা অনুমানের দ্বারা জ্ঞাত হইতে পারেন না । এমন স্থলে আমরা কি করিয়া থাকি ? যে স্বয়ং প্রত্যক্ষ করিয়াছে,

বা যে স্বয়ং অনুমান করিয়াছে, তাহার কথা শুনিয়া বিশ্বাস করি। ইতালীর উত্তরে যে আল নামে পর্বতশ্রেণী আছে তাহা ভূমি স্বয়ং প্রত্যক্ষ কর নাই। কিন্তু যাহারা দেখিয়াছেন তাঁহাদের শ্রীত পুস্তক পাঠ করিয়া ভূমি সে জ্ঞান লাভ করিলে। পরমাণু মাত্র যে অল্প পরমাণু মাত্রের দ্বারা আকৃষ্ট হয়, ইহা প্রত্যক্ষের বিষয় হইতে পারে না এবং ভূমিও ইহা গণনার দ্বারা সিদ্ধ করিতে পার নাই। এক্ষণে ভূমি নিউটনের কথায় বিশ্বাস করিয়া সে জ্ঞান লাভ করিলে।

স্মার, সাংখ্যাदि আৰ্যদর্শনশাস্ত্রে ইহা একটি তৃতীয় প্রমাণ বলিয়া গণ্য হইয়াছে। ইহার নাম শব্দ। তাঁহাদের বিবেচনায় বেদাদি এই প্রমাণের উপর নির্ভর করে। আপ্তবাক্য বা গুরুপদেশ, মূলতঃ যে বিশ্বাসযোগ্য তাহার উপদেশ,—আৰ্যমতে ইহা একটি স্বতন্ত্র প্রমাণ। তাহারই নাম শব্দ।

কিন্তু চার্বাগাদি কোন কোন আৰ্য দার্শনিক, ইহাকে প্রমাণ বলিয়াই স্বীকার করেন না। ইউরোপীয়েরাও ইহাকে স্বতন্ত্র প্রমাণ বলিয়া স্বীকার করেন না।

দেখা বাইতেছে, সকলের কথায় বিশ্বাস অকর্তব্য। যদি একজন বিখ্যাত মিথ্যাবাদী আসিয়া বলে যে, সে জলে অগ্নি জ্বলিতে দেখিয়া আসিয়াছে তবে এ কথা কেহই বিশ্বাস করিবে না। তাহার উপদেশে প্রমাজ্ঞানের উৎপত্তি নাই। ব্যক্তিবিশেষের উপদেশই প্রমাণ বলিয়া গ্রাহ্য। তবে, সেই জ্ঞানলাভের পূর্বে, আদৌ মীমাংসা

আবশ্যক যে কে বিশ্বাসযোগ্য, কে নহে। কোন্ প্রমাণের উপর নির্ভর করিয়া এ মীমাংসা করিব? কোন্ প্রমাণের উপর নির্ভর করিয়া, মন্মাদির কথা আপ্তবাক্য বলিয়া গ্রহণ করিব, এবং রামু শ্যামুর কথা অগ্রাহ করিব? দেখা যাইতেছে, যে অনুমানের দ্বারা ইহা সিদ্ধ করিতে হইবে। মনুর সঙ্গে পল্লীর পাদরি সাহেবের মতভেদ। তুমি চিরকাল শুনিয়া আসিয়াছ, যে মনু অভ্রান্ত ঋষি, এবং পাদরি সাহেব স্বার্থপর সামান্ত মনুষ্য; এজন্য তুমি অনুমান করিলে যে মনুর কথা গ্রাহ, পাদরির কথা অগ্রাহ। মনুর গায় অভ্রান্ত ঋষি গোমাংসভোজন নিষেধ করিয়াছেন বলিয়া তুমি অনুমান করিলে গোমাংস অভক্ষ্য। অতএব শব্দকে একটি স্বতন্ত্র প্রমাণ না বলিয়া, অনুমানের অন্তর্গত বল না কেন?

শুধু তাহাই নহে। যে ব্যক্তির কতকগুলি উপদেশ গ্রাহ কর, তাহারই আর কতকগুলি অগ্রাহ করিয়া থাক। মাধ্যাকর্ষণ সম্বন্ধে নিউটনের যে মত, তাহা তুমি শিরোধার্য কর, কিন্তু আলোক সম্বন্ধে তাঁহার যে মত, তাহা পরিত্যাগ করিয়া তুমি ক্ষুদ্রতর বুদ্ধিজীবী ইয়ঙ ও ফেনেলের মত গ্রহণ কর, ইহার কারণ কি? ইহার কারণ সন্দান করিলে, তলে অনুমিতিকেই পাওয়া যাইবে। অনুমানের দ্বারা তুমি জানিয়াছ যে মাধ্যাকর্ষণ সম্বন্ধে নিউটনের যে মত, তাহা সত্য, আলোক সম্বন্ধে তাঁহার যে মত তাহা অসত্য। যদি শব্দ একটি পৃথক্ প্রমাণ হইত, তবে তাঁহার সকল মতই তুমি গ্রাহ করিতে।

ভারতবর্ষে তাহাই ঘটয়া থাকে । ভারতবর্ষে তাহার মত .
গ্রন্থ বলিয়া স্থির হয় তাহার সকল মতই গ্রাহ্য । ইহার কারণ
শব্দ একটি স্বতন্ত্র প্রমাণ বলিয়া গণ্য—আপ্তবাক্য মাত্র গ্রাহ্য,
ইহা আর্ষ্য দর্শনশাস্ত্রের আশ্রয় । এইরূপ বিশেষ বিচার ব্যতীত
কিঞ্চিৎ ও পণ্ডিতদিগের মতমাত্রই গ্রহণ করা, ভারতবর্ষের
অবনতির একটি যে কারণ ইহা বলা বাহুল্য । অতএব
দার্শনিকদিগের এই একটি ক্ষুদ্র ভ্রান্তিতে সামান্য কুফল
ফলে নাই ।

প্রত্যক্ষ, অনুমান এবং শব্দ তিন নৈয়ায়িকের উপ-
মিতিকেও একটি স্বতন্ত্র প্রমাণ বিবেচনা করেন । বিচার
করিয়া দেখিলে সিদ্ধ হইবে যে উপমিতি, অনুমিতির
প্রকারভেদ মাত্র, এবং সেই জন্য সাংখ্যাদি দর্শনে উপ-
মিতি স্বতন্ত্র প্রমাণ বলিয়া গণ্য হয় নাই । অতএব উপ-
মিতির বিস্তারিত উল্লেখ প্রয়োজনীয় বোধ হইল না ।
বস্তুতঃ প্রত্যক্ষ, এবং অনুমানই জ্ঞানের মূল ।

তাহার পর দেখিতে হইবে, যে অনুমানও প্রত্যক্ষ-
মূলক । যে জাতীয় প্রত্যক্ষ কখন হয় নাই, সে বিষয়ে
অনুমান হয় না । তুমি যদি কখন পূর্বে মেঘ না দেখিতে
বা আর কেহ কখন না দেখিত, তবে তুমি রুদ্ধদ্বার গৃহ-
মধ্যে মেঘগর্জন শুনিয়া কখন মেঘানুমান করিতে পারিতে
না । তুমি যদি কখন যুথিকা-গন্ধ প্রত্যক্ষ না করিতে,
তবে অন্ধকার গৃহে থাকিয়া যুথিকা-প্রাণ পাইয়া তুমি কখন
অনুমান করিতে পারিতে না, যে গৃহমধ্যে যুথিকা আছে ।
এইরূপ অন্যান্য পদার্থ সম্বন্ধে বলা যাইতে পারে । তবে

অনেক সময়ে দেখা যাইবে, যে একটি অনুমানের মূল, বহুতর বহুজাতীয় পূর্বপ্রত্যক্ষ। এক একটি বৈজ্ঞানিক নিয়ম সহস্র সহস্র জাতীয় প্রত্যক্ষের ফল।

অতএব প্রত্যক্ষই জ্ঞানের একমাত্র মূল—সকল প্রমাণের মূল। (১) অনেকে দেখিয়া বিস্মিত হইবেন, যে দর্শনশাস্ত্র দুই তিন সহস্র বৎসরের পর, ঘুরিয়া ঘুরিয়া আবার সেই চার্ব্বাকের মতে আসিয়া পড়িতেছে। 'ধন্য আর্ঘ্যবুদ্ধি ! যাহা এতকালে হুম, মিল, বেন প্রভৃতির দ্বারা সংস্থাপিত হইয়াছে—দুই সহস্রাধিক বৎসর পূর্বে বৃহস্পতি তাহা প্রতিপন্ন করিয়া গিয়াছেন। কেহ না ভাবেন যে আমরা এমন বলিতেছি যে প্রত্যক্ষ ভিন্ন প্রমাণ নাই—আমরা বলিতেছি যে সকল প্রমাণের মূল প্রত্যক্ষ। বৃহস্পতি ঠিক তাহাই বলিয়াছিলেন কি না, তাঁহার গ্রন্থ সকল লুপ্ত হওয়ার নিশ্চয় করা কঠিন।

প্রত্যক্ষই জ্ঞানের একমাত্র মূল, কিন্তু এই তত্ত্বের মধ্যে ইউরোপীয় দার্শনিকদিগের মধ্যে একটি ঘোরতর বিবাদ আছে। কেহ কেহ বলেন, যে আমাদের এমনি অনেক জ্ঞান আছে, যে তাহার মূল প্রত্যক্ষে পাওয়া যায় না। যথা,—কাল, আকাশ, ইত্যাদি।

কথাটি বুঝা কঠিন। আকাশ সম্বন্ধে একটি সহজ কথা গ্রহণ করা যাউক,—যথা, দুইটি সমানান্তরাল রেখা যতদূর টানা যাউক, কখন মিলিত হইবে না, ইহা আমরা নিশ্চিত জানি। কিন্তু এ জ্ঞান আমরা কোথা পাইলাম ?

': এই সকল মত আমি এক্ষণে পরিত্যাগ করিয়াছি।

প্রত্যক্ষবাদী বলিবেন “প্রত্যক্ষের দ্বারা ! আমরা যত সমা-
নান্তরাল রেখা দেখিয়াছি, তাহা কখন মিলিত হয় নাই।”
তাহাতে বিপক্ষেরা প্রত্যুত্তর করেন, যে “জগতে যত সমা-
নান্তরাল রেখা হইয়াছে, সকল তুমি দেখ নাই,
—তুমি যাহা দেখিয়াছ, তাহা মিলে নাই বটে,
কিন্তু তুমি কি প্রকারে জানিলে যে কোন কালে কোথায় এমন
দুইটি সমানান্তরাল রেখা হয় নাই, বা হইবে না, যে তাহা
টানিতে টানিতে একস্থানে মিলিবে না ? যাহা মনুষ্যের প্রত্যক্ষ
হইয়াছে, তাহা হইতে তুমি কি প্রকারে অপ্রত্যক্ষীভূতের নিশ্চয়
করিলে ? অথচ আমরা জানিতেছি যে তুমি যাহা বলিতেছ
তাহা সত্য ;—কস্মিন্ কালে কোথাও এমন দুইটি সমানান্তরাল
রেখা হইতে পারে না যে তাহা মিলিবে। তবে প্রত্যক্ষ
ব্যতীত তোমার আর কোন জ্ঞানমূল আছে—নহিলে তুমি এই
প্রত্যক্ষের অতিরিক্ত জ্ঞানটুকু কোথায় পাইলে ?”

এই কথা বলিয়া, বিখ্যাত জার্মান দার্শনিক কান্ট, লক ও
হুন্মের প্রত্যক্ষবাদের প্রতিবাদ করেন। এই অতিরিক্ত জ্ঞানের
মূল তিনি এই নির্দেশ করেন, যে যেখানে বহির্কিষয়ের জ্ঞান
আমাদিগের ইন্দ্রিয়ের দ্বারা হইয়া থাকে, সেখানে বহির্কিষয়ের
প্রকৃতি সম্বন্ধে কোন তত্ত্বের নিত্যত্ব আমাদের জ্ঞানের অতীত
হইলেও, আমাদিগের ইন্দ্রিয় সকলের প্রকৃতির নিত্যত্ব আমা-
দিগের জ্ঞানের আয়ত্ত বটে। আমাদিগের ইন্দ্রিয় সকলের
প্রকৃতি অনুসারে আমরা বহির্কিষয় কতকগুলি নির্দিষ্ট অবস্থা-
পন্ন বলিয়া পরিজ্ঞাত হই। ইন্দ্রিয়ের প্রকৃতি সর্বত্র একরূপ,
এজন্য বহির্কিষয়ের তত্ত্ব অবস্থাও আমাদিগের নিকট সর্বত্র

একরূপ । এইজন্য আমরাদিগের কাল, আকাশাদির সমবায়ের নিত্যত্ব জানিতে পারি । এই জ্ঞান আমরাদিগেতেই আছে—
এজন্য কান্ত ইহাকে স্বতোলক বা আভ্যন্তরিক জ্ঞান বলেন ।

পাঠক আবার দেখিবেন যে আধুনিক ইউরোপীয় দর্শন, ফিরিয়া ফিরিয়া সেই প্রাচীন ভারতীয় দর্শনে মিলিতেছে । যেমন চার্বাকের প্রত্যক্ষবাদে, মিল ও বেনের প্রত্যক্ষবাদের সাদৃশ্য দেখা গিয়াছে, তেমনি বেদান্তের মায়াবাদের সঙ্গে কান্তের এই প্রত্যক্ষ প্রতিবাদের সাদৃশ্য দেখা যায় । আধ্যাত্মিক তত্ত্বে, প্রাচীন আর্ষ্যগণ কর্তৃক সূচিত হয় নাই, এমন তত্ত্ব অল্পই ইউরোপে আবিষ্কৃত হইয়াছে ।

কান্তীয় আভ্যন্তরিক মতের প্রধানতম প্রতিদ্বন্দ্বী জন ষ্টুয়ার্ট মিল । তিনি কার্যকারণসম্বন্ধের নিত্যত্বের উপর নির্ভর করেন । তিনি বলেন যে আমরা প্রত্যক্ষের দ্বারা একটি অকাট্য সংস্কার এই লাভ করিয়াছি, যে যেখানে কারণ বর্তমান আছে সেইখানেই তাহার কার্য বর্তমান থাকিবে । যেখানে পূর্বে দেখিয়াছি যে ক বর্তমান আছে, সেইখানে দেখিয়াছি যে খ আছে । পুনরায় যদি কোথাও ক দেখি, তবে আমরা জানিতে পারি যে খও এখানে আছে, কেন না আমরা প্রত্যক্ষের দ্বারা জানিয়াছি যেখানে কারণ থাকে সেইখানেই তাহার কার্য থাকে । সমানান্তরালতা কারণ, এবং সংমিলনবিরহ তাহার কার্য, কেন না আমরা যেখানে যেখানে সমানান্তরালতা প্রত্যক্ষ করিয়াছি, সেইখানে সেইখানে দেখিয়াছি মিল হয় নাই, অতএব সমানান্তরালতা, সংমিলনবিরহের নিয়ত পূর্ববর্তী । কাজেই আমরা জানিতেছি যে যখন যেখানে দুইটি সমানান্তরাল রেখা

থাকিবে, সেই খানেই আর তাহাদিগের মিলন হইবে না।
স্বতএব এ জ্ঞান প্রত্যক্ষমূলক।

শেষ মত, হর্বাট স্পেন্সরের। তিনিও প্রত্যক্ষবাদী, কিন্তু তিনি বলেন যে এই প্রত্যক্ষমূলক জ্ঞান সকলটুকু আমাদের নিজ প্রত্যক্ষজাত নহে। প্রত্যক্ষজাত সংস্কার পুরুষানুক্রমে প্রাপ্ত হওয়া যায়। আমার পূর্বপুরুষদিগের যে প্রত্যক্ষজাত সংস্কার, আমি তাহা কিয়দংশে প্রাপ্ত হইয়াছি। আমি যে সেই সকল সংস্কার লইয়া জন্মিয়াছি এমন নহে—তাহা হইলে সদ্যঃ প্রসূত শিশুও সংস্কারবিশিষ্ট হইত, কিন্তু তাহার বীজ আমার শরীরে (মন, শরীরের অন্তর্গত) আছে; প্রয়োজনমত সময়ে জ্ঞানে পরিণত হইবে। এইরূপে, যাহা কান্তীয় মতে আভ্যন্তরিক বা সহজ জ্ঞান স্পেন্সরের মতে তাহা পূর্বপুরুষ-পরম্পরাগত প্রত্যক্ষজাত জ্ঞান।

এই কথা আপাততঃ অপ্রামাণিক বোধ হইতে পারে, কিন্তু স্পেন্সর এরূপ দক্ষতার সহিত ইহার সমর্থন করিয়াছেন, যে ইউরোপে এই মতই এক্ষণে প্রচলিত হইয়া উঠিতেছে। (১)

(১) অনেকে কোমতের “Positive Philosophy” নামক দর্শনশাস্ত্রের নামানুবাদে প্রত্যক্ষবাদ লিখিয়া থাকেন। আমাদের বিবেচনায় সেটি ভ্রম। যাহাকে “Empirical Philosophy” বলে, অর্থাৎ লব, ছম, মিল, ও বেনের মতকেই প্রত্যক্ষবাদ বলা যায়। আমরা সেই অর্থেই প্রত্যক্ষবাদ শব্দ এই প্রবন্ধে ব্যবহার করিয়াছি।

সাংখ্যদর্শন ।

প্রথম পরিচ্ছেদ ।

উপক্রমণিকা ।

এ দেশীয় প্রাচীন দর্শন সকলের মধ্যে বঙ্গদেশে ন্যায়ের প্রাধান্য । দেশীয় পণ্ডিতেরা সচরাচর সাংখ্যের প্রতি তাদৃশ মনোযোগ করেন না । কিন্তু ভারতবর্ষে সাংখ্য যে কীর্তি করিয়াছে, তাহা অন্য দর্শন দরে থাকুক, অন্য কোন শাস্ত্রের দ্বারা হইয়াছে কি না, সন্দেহ । বহুকাল হইল, এই দর্শনের প্রকাশ হয় । কিন্তু অদ্যাপি হিন্দুসমাজের হৃদয়মধ্যে ইহার নানা মূর্তি বিরাজ করিতেছে । যিনি হিন্দুদিগের পুরাবৃত্ত অধ্যয়ন করিতে চাহেন, সাংখ্যদর্শন না বুঝিলে তাঁহার সম্যক্ জ্ঞান জন্মিবে না ; কেন না হিন্দুসমাজের পূর্বকালীয় গতি অনেক দূর সাংখ্যপ্রদর্শিত পথে হইয়াছিল । যিনি বর্তমান হিন্দুসমাজের চরিত্র বুঝিতে চাহেন, তিনি সাংখ্য অধ্যয়ন করুন । সেই চরিত্রের মূল সাংখ্যে অনেক দেখিতে পাইবেন । সংসার যে দুঃখময়, দুঃখ নিবারণমাত্র আমাদের পুরুষার্থ, এ কথা যেমন হিন্দুজাতির হাড়ে হাড়ে প্রবেশ করিয়াছে, এমন, বোধ হয়, পৃথিবীর আর কোন জাতির মধ্যে হয় নাই । তাহার বীজ সাংখ্যদর্শনে । তন্নিবন্ধন, ভারতবর্ষে যে পরিমাণে বৈরাগ্য

বহুকাল হইতে প্রবল, তেমন আর কোন দেশেই নহে। সেই বৈরাগ্য প্রাবল্যের ফল বর্তমান হিন্দুচরিত্র। যে কার্যপরতন্ত্রতার অভাব আমাদের প্রধান লক্ষণ বলিয়া বিদেশীদের নির্দেশ করেন, তাহা সেই বৈরাগ্যের সাধারণতা মাত্র। যে অদৃষ্টবাদিত্ব আমাদের দ্বিতীয় প্রধান লক্ষণ, তাহা সাংখ্যজাত বৈরাগ্যের ভিন্নমূর্তি মাত্র। এই বৈরাগ্যসাধারণতা এবং অদৃষ্টবাদিত্বের কৃপাতেই ভারতবর্ষীয়দিগের অসীম বাহুবল সত্ত্বেও আৰ্যভূমি মুসলমান-পদানত হইয়াছিল। সেই জন্য অদ্যাপি ভারতবর্ষ পরাধীন। সেই জন্যই বহুকাল হইতে এ দেশে সমাজোন্নতি মন্দ হইয়া শেষে অবরুদ্ধ হইয়াছিল।

আবার সাংখ্যের প্রকৃতি পুরুষ লইয়া তন্ত্রের সৃষ্টি। সেই তান্ত্রিককাণ্ডে দেশ ব্যাপ্ত হইয়াছে। সেই তন্ত্রের কৃপায় বিক্রমপুরে বসিয়া নিষ্ঠ ব্রাহ্মণ ঠাকুর অপরিমিত মদিরা উদরস্থ করিয়া, ধর্ম্মাচরণ করিলাম বলিয়া, পরম পরিতোষ লাভ করিতেছেন। সেই তন্ত্রের প্রভাবে, প্রায় শত যোজন দূরে, ভারতবর্ষের পশ্চিমাংশে কাণফোঁড়া যোগী উলঙ্গ হইয়া কদর্য্য উৎসব করিতেছে। সেই তন্ত্রের প্রসাদে আমরা হুর্গোৎসব করিয়া এই বাঙ্গাল্য দেশের ছয় কোটি লোক জীবন সার্থক করিতেছি। যখন গ্রামে গ্রামে, নগরে মাঠে জঙ্গলে শিবালয়, কালীর মন্দির দেখি, আমাদের সাংখ্য মনে পড়ে; যখন হুর্গা কালী জগদ্ধাত্রী পূজার বাদ্য শুনি, আমাদের সাংখ্যদর্শন মনে পড়ে।

সহস্র বৎসর কাল বৌদ্ধধর্ম্ম ভারতবর্ষের প্রধান ধর্ম্ম ছিল। ভারতবর্ষের পুরাতত্ত্ব মধ্যে যে সময়টি সর্ব্বাপেক্ষা

বিচিত্র এবং সৌষ্ঠব-লক্ষণযুক্ত, সেই সময়টিতেই বৌদ্ধধর্ম এই ভারতভূমির প্রধান ধর্ম ছিল। ভারতবর্ষ হইতে দূরীকৃত হইয়া, সিংহলে, নেপালে, তিব্বতে, চীনে, ব্রহ্মে, শ্রামে, এই ধর্ম অদ্যাপি ব্যাপিয়া রহিয়াছে। সেই বৌদ্ধধর্মের আদি এই সাংখ্যদর্শনে। বেদে অবজ্ঞা, নির্বাণ, এবং নিরোধরতা বৌদ্ধধর্মে এই তিনটি নূতন; এই তিনটিই ঐ ধর্মের কলেবর। উপস্থিত লেখক কর্তৃক ১০৬ সংখ্যক কলিকাতা রিবিউতে “বৌদ্ধধর্ম এবং সাংখ্য দর্শন” ইতি প্রবন্ধে প্রতিপন্ন করা হইয়াছে যে, এই তিনটিরই মূল সাংখ্যদর্শনে। নির্বাণ, সাংখ্যের মুক্তির পরিমাণ মাত্র। বেদের অবজ্ঞা সাংখ্যে প্রকাণ্ডে কোথাও নাই, বরং বৈদিকতার আড়ম্বর অনেক। কিন্তু সাংখ্যপ্রবচনকার বেদের দোহাই দিয়া শেষে বেদের মূলোচ্ছেদ করিয়াছেন।*

কথিত হইয়াছে যে, যত লোক বৌদ্ধধর্মাবলম্বী, তত সংখ্যক অন্য কোন ধর্মাবলম্বী লোক পৃথিবীতে নাই। সংখ্যা সম্বন্ধে খ্রীষ্ট ধর্মাবলম্বীরা তৎপরবর্তী। সুতরাং যদি কেহ জিজ্ঞাসা করে, পৃথিবীতে অবতীর্ণ মনুষ্যমধ্যে কে সর্বাপেক্ষা অধিক লোকের জীবনের উপর প্রভুত্ব করিয়াছেন, তখন আমরা প্রথমে শাক্যসিংহের, তৎপরে খ্রীষ্টের নাম করিব। কিন্তু শাক্যসিংহের সঙ্গে সঙ্গে কপিলেরও নাম করিতে হইবে।

* বৌদ্ধধর্ম যে সাংখ্যমূলক, তাহার প্রমাণ সবিলাসে দিবার স্থান এ নহে।

অতএব স্পষ্টাক্ষরে বলা যাইতে পারে যে, পৃথিবীতে, যে সকল দর্শনশাস্ত্র অবতীর্ণ হইয়াছে, সাংখ্যের গ্ৰন্থ কেহ বহু ফলোৎপাদক হয় নাই।

সাংখ্যের প্রথমোৎপত্তি কোন্ কালে হইয়াছিল, তাহা স্থির করা অতি কঠিন। সম্ভবতঃ উহা বৌদ্ধধর্মের পূর্বে প্রচারিত হইয়াছিল। কিম্বদন্তী আছে যে, কপিল উহার প্রণেতা। এ কিম্বদন্তীর প্রতি অবিশ্বাস করিবার কোন কারণ নাই। কিন্তু তিনি কে, কোন্ কালে জন্মগ্রহণ করিয়াছিলেন, তাহা জানিবার কোন উপায় নাই। কেবল ইহাই বলা যাইতে পারে যে, তাদৃশ বুদ্ধিশালী ব্যক্তি পৃথিবীতে অল্পই জন্মগ্রহণ করিয়াছেন। পাঠক স্মরণ রাখিবেন, যে আমরা “নিরীশ্বর সাংখ্যকেই” সাংখ্য বলিতেছি। পতঞ্জলি প্রণীত যোগশাস্ত্রকে সেখর সাংখ্য বলিয়া থাকে। এ প্রবন্ধে তাহার কোন কথা নাই।

সাংখ্য দর্শন অতি প্রাচীন হইলেও, বিশেষ প্রাচীন সাংখ্য গ্রন্থ দেখা যায় না। সাংখ্য প্রবচনকে অনেকেই কাপিলসূত্র বলেন, কিন্তু তাহা কখনই কপিলপ্রণীত নহে। উহা যে বৌদ্ধ, গ্ৰন্থ, মীমাংসা প্রভৃতি দর্শনের প্রচারের পরে প্রণীত হইয়াছিল, তাহার প্রমাণ ঐ গ্রন্থ-মধ্যে আছে। ঐ সকল দর্শনের মত সাংখ্যপ্রবচনে খণ্ডন করা দেখা যায়। তন্মিন্ন সাংখ্যকারিকা, তত্ত্ব, সমাস, ভোজবার্ত্তিক, সাংখ্যসার, সাংখ্যপ্রদীপ, সাংখ্য-তত্ত্বপ্রদীপ ইত্যাদি গ্রন্থ, এবং এই সকল গ্রন্থের ভাষ্য টীকা প্রভৃতি, বহুল গ্রন্থ অপেক্ষাকৃত অভিনব। কপিল,

“অর্থাৎ সাংখ্য দর্শনের প্রথম অধ্যাপকের যে মত, তাহাই ‘আমাদিগের’ আদরণীয় ও সমালোচ্য : এবং যাহা কাপিল-সূত্র বলিয়া চলিত, তাহাই আমরা অবলম্বন করিয়া, অতি সংক্ষেপে সাংখ্য দর্শনের মূল উদ্দেশ্য বুঝাইয়া দিবার যত্ন করিব। আমরা যাহা কিছু বলিতেছি, তাহাই যে সাংখ্যের মত, এমত বিবেচনা কেহ না করেন। যাহা কিছু বলিলে সাংখ্যের মত ভাল করিয়া বুঝা যায়, আমরা তাহাই বলিব।

কতকগুলি বিজ্ঞ লোকে বলেন, এ সংসার সুখের সংসার। আমরা সুখের জন্ম এ পৃথিবীতে প্রেরিত হইয়াছি। যাহা কিছু দেখি, জীবের সুখের জন্ম সৃষ্টি হইয়াছে। জীবের সুখ বিধান করিবার জন্মই সৃষ্টিকর্তা জীবকে সৃষ্ট করিয়াছেন। সৃষ্ট জীবের মঙ্গলার্থ সৃষ্টিমধ্যে কত কৌশল কে না দেখিতে পার ?

আবার কতকগুলি লোক আছেন, তাঁহারাও বিজ্ঞ—তাঁহারা বলেন, সংসারে সুখ ত কই দেখি না—দুঃখেরই প্রাধান্য। সৃষ্টিকর্তা কি অভিপ্রায়ে জীবের সৃষ্টি করিয়াছেন তাহা বলিতে পারি না—তাহা মনুষ্যবুদ্ধির বিচার্য্য নহে—কিন্তু সে অভিপ্রায় যাহাই হউক, সংসারে জীবের সুখের অপেক্ষা অসুখ অধিক। তুমি বলিবে, ঈশ্বর যে সকল নিয়ম অবধারিত করিয়া দিয়াছেন, সে গুলি রক্ষা করিয়া চলিলেই কোন দুঃখ নাই, নিয়মের লঙ্ঘনপৌনঃপুন্যেই এত দুঃখ। • আমি বলি, যেখানে ঈশ্বর এমন সকল নিয়ম করিয়াছেন যে, তাহা অতি সহজেই লঙ্ঘন করা যায়,

এবং তাহা লজ্জনের প্রবৃত্তিও আতি বলবতী করিয়া দিয়াছেন, তখন নিয়ম লজ্জন ব্যতীত নিয়ম রক্ষা যে তাহার অভিপ্রায়, এ কথা কে বলিবে? মাদক সেবন পরিণামে মনুষ্যের অত্যন্ত দুঃখদায়ক—তবে মাদক সেবনের প্রবৃত্তি মনুষ্যের হৃদয়ে রোপিত হইয়াছে কেন? এবং মাদক-সেবন এত সুস্বাদু এবং আশুস্বথকর কেন? কতকগুলি নিয়ম এত সহজে লুপ্তনীর যে, তাহা লজ্জন করিবার সময় কিছুই জানিতে পারা যায় না। ডাক্তার আঙ্গস স্মিথের পরীক্ষায় সপ্রমাণ হইয়াছে যে, অনেক সময়ে মহৎ অনিষ্টকারী কার্বনিক অ্যাসিড-প্রধান বায়ু নিশ্বাসে গ্রহণ করিলে আমাদের কোন কষ্ট হয় না। বসন্তাদি রোগের বিষবীজ কখন আমাদের শরীরে প্রবেশ করে, তাহা আমরা জানিতেও পারি না। অনেকগুলি নিয়ম এমন আছে যে, তাহার উল্লঙ্ঘনে আমরা সর্বদা কষ্ট পাইতেছি; কিন্তু সে নিয়ম কি, তাহা আমাদের জানিবার শক্তি নাই। ওলাউঠা রোগ কেন জন্মে, তাহা আমরা এ পর্যন্ত জানিতে পারিলাম না। অথচ লক্ষ লক্ষ লোক প্রতি বৎসর ইহাতে কত দুঃখ পাইতেছে। যদি নিয়মটি লজ্জনের ক্ষমতা দিয়া নিয়মটি জানিতে দেন নাই, তবে জীবের মঙ্গল কামনা কোথা? পণ্ডিত পিতার পুত্র গওমূর্খ; তাহার মূর্খতার যন্ত্রণায় পিতা রাত্রি দিন যন্ত্রণা পাইতেছেন। মনে কর, শিক্ষার অভাবে সে মূর্খতা জন্মে নাই। পুত্রটি স্থূলবুদ্ধি লইয়াই ভূমিষ্ঠ হইয়াছিল। কোন্ নিয়ম লজ্জন করায় পুত্রের মস্তিষ্ক, অসম্পূর্ণ, এ নিয়ম কি কখন মনুষ্যবুদ্ধির

আয়ত্ত হইবে ? মনে কর ভবিষ্যতে হইবে । তবে যত দিন সে নিয়ম আবিষ্কৃত না হইল, তত দিন যে মনুষ্য-জাতি দুঃখ পাইবে, ইহা সৃষ্টিকর্তার অভিপ্রেত নহে, কেমন করিয়া বলিব ?

আবার, আমরা সকল নিয়ম রক্ষা করিতে পারিলেও দুঃখ পাইব না, এমত দেখি না । একজন নিয়ম লঙ্ঘন করিতেছে, আর এক জন দুঃখভোগ করিতেছে । আমার প্রিয়বন্ধু আপনার কর্তব্য সাধনার্থ রণক্ষেত্রে গিয়া প্রাণ-ত্যাগ করিলেন, আমি তাঁহার বিরহবন্ধনা ভোগ করিলাম । আমার জন্মবার পঞ্চাশ বৎসর পূর্বে যে মন্দ আইন বা মন্দ রাজশাসন হইয়াছে আমি তাহার ফলভোগ করিতেছি । কাহারও পিতামহ ব্যাধিগ্রস্ত ছিলেন, পৌত্র কোন নিয়ম লঙ্ঘন না করিয়াও ব্যাধিগ্রস্ত হইতে পারে ।

আবার গোটাকত এমন গুরুতর বিষয় আছে, যে স্বাভাবিক নিয়মানুবর্তী হওয়াতেও দুঃখ । লোকসংখ্যা-বৃদ্ধি বিষয়ে মাল্খসের মত, ইহার একটি প্রমাণ । এক্ষণে সুবিবেচকেরা সকলেই স্বীকার করেন যে, মনুষ্য সাধারণতঃ নৈসর্গিক নিয়মানুসারে আপন আপন স্বভাবের পরিতোষ করিলেই লোকসংখ্যা বৃদ্ধি হইয়া মহৎ অনিষ্ট ঘটয়া থাকে ।

অতএব সংসার কেবল দুঃখময়, ইহা বলিবার যথেষ্ট কারণ আছে । সাংখ্যকারও তাহাই বলেন । সেই কথাই সাংখ্যদর্শন ও বৌদ্ধধর্মের মূল ।

কিন্তু পৃথিবীতে যে কিছু সুখ আছে, তাহাও অস্বীকার্য্য নহে । সাংখ্যকার বলেন যে, সুখ অল্প । কদাচ

কেহ সুখী, (৬ অধ্যায় ৭ সূত্র) এবং সুখ, দুঃখের সহিত^১ একরূপ মিশ্রিত যে বিবেচকেরা তাহা দুঃখপক্ষে নিক্ষেপ করেন। (ঐ, ৮) দুঃখ হইতে তাদৃশ সুখাকাজ্ঞা জন্মে না। (ঐ, ৬) অতএব দুঃখেরই প্রাধান্য।

সুতরাং মনুষ্যজীবনের প্রধান উদ্দেশ্য দুঃখমোচন। এই জন্ম সাংখ্যপ্রবচনের প্রথম সূত্র “ অথ ত্রিবিধদুঃখাত্যন্তনিবৃত্তিরত্যন্তপুরুষার্থঃ । ”

এই পুরুষার্থ কি প্রকারে সিদ্ধ হয়, তাহারই পর্য্যালোচনা সাংখ্যদর্শনের উদ্দেশ্য। দুঃখে পড়িলেই লোকে তাহার একটা নিবারণের উপায় করে। ক্ষুধায় কষ্ট পাইতেছ, আহার কর। পুত্রশোক পাইয়াছ, অগ্নি বিষয়ে চিন্তা নিবিষ্ট কর। কিন্তু সাংখ্যকার বলেন যে, এ সকল উপায়ে দুঃখ নিবৃত্তি নাই; কেন না আবার সেই সকল দুঃখের অনুরূতি আছে। তুমি আহার করিলে, তাহাতে তোমার আজিকার ক্ষুধা নিবৃত্তি হইল, কিন্তু আবার কালি ক্ষুধা পাইবে। বিষয়ান্তরে চিন্তা রত করিয়া, তুমি এবার পুত্রশোক নিবারণ করিলে, কিন্তু আবার অগ্নি পুত্রের জন্ম তোমাকে হয় ত সেইরূপ শোক পাইতে হইবে। পরন্তু একরূপ উপায় সর্বত্র সম্ভবে না। তোমার হস্ত পদ ছিন্ন হইলে, আর লব্ধ হইবে না। যেখানে সম্ভবে, সেখানেও তাহা সদুপায় বলিয়া গণ্য হইতে পারে না। অগ্নি বিষয়ে নিরত হইলেই পুত্রশোক বিস্মৃত হওয়া যায় না। (১ অধ্যায় ৪ সূত্র,)

তবে এ সকল দুঃখ নিবারণের উপায় নহে। আধু-

নিক বিজ্ঞানবিৎ কোম্ব্তের শিষ্য বলিবেন, তবে আর হুঃখ নিবারণের কি উপায় আছে? আমরা জানি যে, জলসেক করিলেই অগ্নি নির্বাণ হয়, কিন্তু শীতল ইন্ধন পুনর্জ্বালিত হইতে পারে বলিয়া তুমি যদি জলকে অগ্নি-নাশক না বল, তবে কথা ফুরাইল। তাহা হইলে দেহ-ধ্বংস ভিন্ন আর জীবের হুঃখনিবৃত্তি নাই।

সাংখ্যকার তাহাও মানেন না। মিত্তি জন্মান্তর মানেন, এবং লোকান্তরে জন্ম পৌনঃপুত্র আছে ভাবিয়া, এবং জরামরণাদি জ হুঃখ সমান ভাবিয়া তাহাও হুঃখনিবারণের উপায় বলিয়া গণ্য করেন না। (৩ অধ্যায়, ৫২—৫৩ সূত্র) আত্মা, বিশ্বকারণে বিলীন হইলেও তদবস্থাকে হুঃখনিবৃত্তি বলেন না, কেন না যে জলমগ্ন, তাহার আবার উত্থান আছে। (ঐ, ৫৪)

তবে হুঃখ নিবারণ কাহাকে বলি? অপবর্গই হুঃখ-নিবৃত্তি।

অপবর্গই বা কি? “দ্বয়োরেকতরশ্চ বৌদাসীগুমপবর্গঃ।” (তৃতীয় অধ্যায় ৬৫ সূত্র) সেই অপবর্গ কি, এবং কি প্রকারে তাহা প্রাপ্ত হওয়া যায়, তাহা পর পরিচ্ছেদে সविশেষ বলিব। “অপবর্গ” ইত্যাদি প্রাচীন কথা শুনিয়া পাঠক ঘৃণা করিবেন না। যাহা প্রাচীন, তাহাই যে উপধর্ম্মকলঙ্কিত, বা সর্বজনপরিজ্ঞাত, এমন মনে করিবেন না। বিবেচক দেখিবেন, সাংখ্যদর্শনে একটু সারও আছে। অসার বৃক্ষে এমন স্থায়ী ফল ফলিবে কেন?

দ্বিতীয় পরিচ্ছেদ ।—বিবেক ।

আমি যত দুঃখ ভোগ করি—কিন্তু আমি কে ? বাহ-
প্রকৃতি ভিন্ন আর কিছুই আমাদের ইন্দ্রিয়ের গোচর নহে ।
তুমি বলিতেছ, আমি বড় দুঃখ পাইতেছি,—আমি বড়
সুখী । কিন্তু একটি মনুষ্যদেহ ভিন্ন, “তুমি” বলিব, এমন
কোন সামগ্রী দেখিতে পাই না । তোমার দেহ এবং
দৈহিক প্রক্রিয়া, ইহাই কেবল আমার জ্ঞানগোচর । তবে
কি তোমার দেহেরই এই সুখ দুঃখ ভোগ বলিব ?

তোমার মৃত্যু হইলে, তোমার সেই দেহ পড়িয়া
থাকিবে ; কিন্তু তৎকালে তাহার সুখ দুঃখ ভোগের কোন
লক্ষণ দেখা যাইবে না । আবার মনে কর, কেহ তোমাকে
অপমান করিয়াছে ; তাহাতে দেহের কোন বিকার নাই,
তথাপি তুমি দুঃখী । তবে তোমার দেহ দুঃখভোগ করে
না । যে দুঃখ ভোগ করে, সে স্বতন্ত্র । সেই তুমি ।
তোমার দেহ তুমি নহে ।

এইরূপ সকল জীবের । অতএব দেখা যাইতেছে যে,
এই জগতের কিয়দংশ অনুমেয় মাত্র, ইন্দ্রিয়গোচর নহে,
এবং সুখ দুঃখাদির ভোগকর্তা । যে সুখ দুঃখাদির ভোগ-
কর্তা, সেই আত্মা । সাংখ্যে তাহার নাম পুরুষ । পুরুষ
ভিন্ন জগতে আর যাহা কিছু আছে, তাহা প্রকৃতি ।

আধুনিক মনস্তত্ত্ববিদেরা কহেন, যে আমাদের সুখ দুঃখ মানসিক বিকারমাত্র। সেই সকল মানসিক বিকার কেবল মস্তিষ্কের ক্রিয়া মাত্র। তুমি আমার অঙ্গে কণ্টক বিদ্ধ করিলে, বিদ্ধ স্থানস্থিত স্নায়ু তাহাতে বিচলিত হইল—সেই বিচলন মস্তিষ্ক পর্য্যন্ত গেল। তাহাতে মস্তিষ্কের যে বিকৃতি হইল, তাহাই বেদনা। সাংখ্য-মতাবলম্বীরা বলিতে পারেন, “মানি, তাহাই ব্যথা।” কিন্তু ব্যথা ভোগ করিল, সেই আত্মা।” এক্ষণকার অন্য সম্প্রদায়ের মনস্তত্ত্ববিদেরাও প্রায় সেইরূপ বলেন। তাঁহারা বলেন, মস্তিষ্কের বিকারই সুখ দুঃখ বটে, কিন্তু মস্তিষ্ক আত্মা নহে। ইহা আত্মার ইন্দ্রিয় মাত্র। এ দেশীয় দার্শনিকেরা যাহাকে অন্তরিন্দ্রিয় বলেন, উঁহারা মস্তিষ্ককে তাহাই বলেন।

শরীরাদি ব্যতিরিক্ত পুরুষ। কিন্তু দুঃখ ত শরীরাদিক। শরীরাদিতে যে দুঃখের কারণ নাই, এমন দুঃখ নাই। যাহাকে মানসিক দুঃখ বলি, বাহ্যপদার্থই তাহার মূল। আমার বাক্যে তুমি অপমানিত হইলে; আমার বাক্য প্রাকৃতিক পদার্থ। তাহা শ্রবণেন্দ্রিয়ের দ্বারা তুমি গ্রহণ করিলে, তাহাতে তোমার দুঃখ। অতএব প্রকৃতি ভিন্ন কোন দুঃখ নাই। কিন্তু প্রকৃতি ঘটিত দুঃখ পুরুষকে বর্তে কেন? “অসঙ্গোয়ম্পুরুষঃ।” পুরুষ একা, কাহারও সংসর্গবিশিষ্ট নহে। (১ অধ্যায় ১৫ সূত্র) অবস্থাাদি, সকল শরীরের, আত্মার নহে। (ঐ, ১৪ সূত্র) “ন বাহ্য-স্তরয়োৰূপরজ্যোপরঞ্জক ভাবোহপি দেশব্যবধানাং শ্ৰেয়স্ব-পাটলিপুত্রশ্চয়োরিব।” বাহ্য এবং আন্তরিকের মধ্যে উপ-

রজ্য এবং উপরঞ্জক ভাব নাই, কেন না তাহা পরস্পর সংলগ্ন নহে ; দেশ ব্যবধানবিশিষ্ট । যেমন একজন পাটলী-পুত্রনগরে থাকে, আর একজন শ্রম্বনগরে থাকে, ইহাদিগের পরস্পরের ব্যবধান তদ্রূপ । তবে পুরুষের দুঃখ কেন ?

প্রকৃতির সহিত সংযোগই পুরুষের দুঃখের কারণ । বাহ্যে আন্তরিকে, দেশব্যবধান আছে বটে, কিন্তু কোন প্রকার সংযোগ নাই, এমত নহে । যেমন স্ফাটিকপাত্রে নিকট জ্বা কুসুম রাখিলে, পাত্র পুষ্পের বর্ণবিশিষ্ট হয় বলিয়া, পুষ্প এবং পাত্রে একপ্রকার সংযোগ আছে বলা যায়, এ সেইরূপ সংযোগ । পুষ্প এবং পাত্রमध्ये ব্যবধান থাকিলেও পাত্রের বর্ণ বিকৃত হইতে পারে, ইহাও সেইরূপ । এ সংযোগ নিত্য নহে, দেখা যাইতেছে । সুতরাং তাহার উচ্ছেদ হইতে পারে । সেই সংযোগ উচ্ছেদ হইলেই, দুঃখের কারণ অপনীত হইল । অতএব এই সংযোগের উচ্ছিন্নিই দুঃখনিবারনের উপায় । সুতরাং তাহাই পুরুষার্থ । “যদ্বা তদ্বা তদুচ্ছিত্তিঃ পুরুষার্থস্তদুচ্ছিত্তিঃ পুরুষার্থঃ । (৬, ৭০)

সাংখ্যের মত এই । যদি আত্মা শরীর হইতে পৃথক হয়, যদি আত্মাই সুখ দুঃখভোগী হয়, যদি আত্মা দেহনাশের পরেও থাকে, যদি দেহ হইতে বিযুক্ত আত্মার সুখ দুঃখাদি ভোগের সম্ভাবনা থাকে, তবে সাংখ্যদর্শনের এ সকল কথা স্বার্থ বলিয়া স্বীকার করিতে হইবে । কিন্তু এই “যদি”গুলি অনেক । আধুনিক পজিটিবিষ্ট এখনই বলিবেন,—

১ম। আত্মা শরীর হইতে পৃথক্ কিসে জানিতেছ ? শরীরতত্ত্বে প্রতিপন্ন হইতেছে যে, শরীরই বা শরীরের অংশ বিশেষই আত্মা।

২য়। আত্মাই যে সুখ দুঃখভোগী, তাহারই বা প্রমাণ কি ? প্রকৃতি সুখ দুঃখভোগী নহে কেন ?

৩য়। দেহনাশের পর যে আত্মা থাকিবে, তাহা ধর্ম-পুস্তকে বলে ; কিন্তু তত্ত্বিন্ন অণুমাত্র প্রমাণ নাই। আত্মার নিত্যত্ব যদি মানিতে হয়, তবে ধর্মপুস্তকের আজ্ঞানু-সারে ; দর্শনশাস্ত্রের আজ্ঞানুসারে মানিব না।

৪র্থ। দেহধ্বংসের পর আত্মা থাকিলে, তাহার যে আবার জরামরণাদিজ দুঃখের সম্ভাবনা আছে, তাহার কিছুমাত্র প্রমাণ নাই।

অতএব যাহারা আত্মার পার্থক্য ও নিত্যত্ব মানেন, তাহারাও সাংখ্য মানিবেন না। এবং এ সকল মত যে এ কালে গ্রাহ্য হইবে, এমত বিবেচনায় আমরা সাংখ্য-দর্শন বুঝাইতে প্রবৃত্ত হই নাই। কিন্তু এক্ষণে যাহা অগ্রাহ্য, দুই সহস্র বৎসর পূর্বে তাহা আশ্চর্য্য আবিষ্ক্রিয়া। সেই আশ্চর্য্য আবিষ্ক্রিয়া কি, ইহাই বুঝান আমাদিগের অভিপ্রায়।

প্রকৃতি পুরুষের সংযোগের উচ্ছিত্তিই অপবর্গ বা মোক্ষ। তাহা কি প্রকারে প্রাপ্ত হওয়া যায় ?

সাংখ্যকার বলেন, বিবেকের দ্বারা। কিন্তু কোন্ প্রকার বিবেকের দ্বারা মোক্ষ লাভ হয় ? প্রকৃতি বিষয়ে যে

অবিবেক, সকল অবিবেক তাহার অন্তর্গত। অতএব প্রকৃতি পুরুষ সম্বন্ধীয় জ্ঞানধারাই মোক্ষ লাভ হয়।

অতএব জ্ঞানেই মুক্তি। পাশ্চাত্য সভ্যতার মূল কথা, “জ্ঞানেই শক্তি” (Knowledge is Power.) ; হিন্দুসভ্যতার মূল কথা, “জ্ঞানেই মুক্তি।” দুই জাতি, দুইটি পৃথক্ উদ্দেশ্যানুসন্ধানে একপথেই যাত্রা করিলেন। পাশ্চাত্যেরা শক্তি পাইয়াছেন—আমরা কি মুক্তি পাইয়াছি? বস্তুতঃ এক যাত্রার যে পৃথক্ ফল হইয়াছে, তাহাতে সন্দেহ নাই।

ইউরোপীয়েরা শক্তির অনুসারী, ইহাই তাঁহাদিগের উন্নতির মূল। আমরা শক্তির প্রতি যত্নহীন, ইহাই আমাদের অবনতির মূল। ইউরোপীয়দিগের উদ্দেশ্য ঐহিক; তাঁহারা ইহকালে জয়ী। আমাদের উদ্দেশ্য পারত্রিক—তাই ইহকালে আমরা জয়ী হইলাম না। পরকালে হইব কি না, তদ্বিষয়ে মতভেদ আছে।

কিন্তু জ্ঞানেই মুক্তি, এ কথা সত্য হইলেও ইহার দ্বারা ভারতবর্ষের পরম লাভ হইয়াছে বলিতে হইবে। প্রাচীন বৈদিক ধর্ম ক্রিয়াত্মক; প্রাচীন আর্ষ্যেরা প্রাকৃতিক শক্তির পূজা একমাত্র মঙ্গলোপায় বলিয়া জানিতেন। প্রাকৃতিক শক্তি সকল অতি প্রবল, স্থির, অশাসনীয়, কখন মহামঙ্গলকর, কখন মহৎ অমঙ্গলের কারণ, দেখিয়া প্রথম-জ্ঞানীরা তাহাদিগকে ইন্দ্র, বরুণ, মরুৎ, অগ্নি প্রভৃতি দেবতা কল্পনা করিয়া তাঁহাদিগের স্তুতি এবং উপাসনা করেন। ক্রমে তাঁহাদিগের প্রীত্যর্থ যাগ যজ্ঞাদির বড় প্রবলতা হইল। অবশেষে সেই সকল যাগ যজ্ঞা-

দিই মনুষ্যের প্রধান কার্য এবং পারত্রিক সুখের একমাত্র উপায় বলিয়া, লোকের একমাত্র অনুষ্ঠেয় হইয়া পড়িল। শাস্ত্র সকল কেবল তৎসমুদায়ের আলোচনাতে সৃষ্ট হইল—প্রকৃত জ্ঞানের প্রতি আর্ঘ্যজাতির তাদৃশ মনোযোগ হইল না। বেদের সংহিতা, ব্রাহ্মণ, উপনিষৎ, আরণ্যক, এবং সূত্রগ্রন্থ সকল কেবল ক্রিয়াকলাপের কথাই পরিপূর্ণ। যে কিছু প্রকৃত জ্ঞানের চর্চা হইত, তাহ কেবল বেদের আনুসঙ্গিক বলিয়াই। সে সকল শাস্ত্র বেদান্ত বলিয়া খ্যাত হইল। জ্ঞান এইরূপে ক্রিয়ার দাসত্বশৃঙ্খলে বদ্ধ হওয়াতে, তাহার উন্নতি হইল না। কর্মজ্ঞান মোক্ষ, এই বিশ্বাস ভারতভূমে অপ্রতিহত থাকতেই এরূপ ঘটিয়াছিল। প্রকৃত জ্ঞানের আলোচনার অভাবে বেদভক্তি আরও প্রবলা হইল। মনুষ্যচিত্তের স্বাধীনতা, একবারে লুপ্ত হইতে লাগিল। মনুষ্য বিবেকশূন্য মন্ত্রমুগ্ধ শৃঙ্খলবদ্ধ পশুবৎ হইয়া উঠিল।

সাংখ্যকার বলিলেন, কর্ম অর্থাৎ হোম যাগাদির অনুষ্ঠান, পুরুষার্থ নহে। জ্ঞানই পুরুষার্থ। জ্ঞানই মুক্তি। কর্মপীড়িত ভারতবর্ষ সে কথা শুনিল।

তৃতীয় পরিচ্ছেদ ।—সৃষ্টি ।

অতি প্রাচীন কাল হইতে দর্শন শাস্ত্রের উদ্দেশ্য, জগতের আদি কি, তাহা নিরূপিত হয়। আধুনিক ইউরোপীয় দার্শনিকেরা সে তত্ত্ব নিরূপণীয় নহে বলিয়া এক প্রকার ত্যাগ করিয়াছেন।

জগতের আদি সম্বন্ধে প্রথম প্রশ্ন এই যে, জগৎ সৃষ্ট, কি নিত্য। অনাদিকাল এইরূপ আছে, না কেহ তাহার সৃজন করিয়াছেন?

অধিকাংশ লোকের মত এই যে, জগৎ সৃষ্ট, জগৎকর্তা একজন আছেন। সামান্য ঘট পটাদি একটি কর্তা ব্যতীত হয় না; তবে এই অসীম জগতের কর্তা নাই ইহা কি সম্ভবে?

আর এক সম্প্রদায়ের লোক আছেন; তাঁহারা বলেন যে, এই জগৎ যে সৃষ্ট বা ইহার কেহ কর্তা আছেন, তাহা বিবেচনা করিবার কারণ নাই। ইহাদের সচরাচর নাড়ি নলে; কিন্তু নাস্তিক বলিলেই মুঢ় বুঝায় না। তাঁহারা বিচারের দ্বারা আপন পক্ষ সমর্থন করিতে চেষ্টা করেন। সেই বিচার অত্যন্ত দুর্বল, এবং এ স্থলে তাহার পরিচয় দিবার কোন প্রয়োজন নাই।

তবে ঐকটি কথা মনে রাখিতে হইবে, যে ঈশ্বরের অস্তিত্ব

• একটি পৃথক্ তত্ত্ব, সৃষ্টিপক্রিয়া আর একটি পৃথক্ তত্ত্ব ।
ঈশ্বরবাদীও বলিতে পারেন যে, “আমি ঈশ্বর মানি, কিন্তু সৃষ্টি-
ক্রিয়া মানি না। ঈশ্বর জগতের নিয়ন্তা, তাঁহার কৃত নিয়ম
দেখিতেছি, নিয়মতিরিক্ত সৃষ্টির কথা আমি বলিতে পারি
না।”

এক্ষণকার কোন কোন খ্রীষ্টীয়ান এই মতাবলম্বী। ইহার
মধ্যে কোন্ মত অর্থার্থ, কোন্ মত ষর্থার্থ, তাহা আমরা
কিছুই বলিতেছি না। বাঁহার বাহা বিশ্বাস, তদ্বিরুদ্ধ
আমাদের কিছুই বলব্য নাই। আমাদের বলিবার কেবল
এই উদ্দেশ্য যে, সাক্ষ্যকারকে প্রায় এই মতাবলম্বী বলিয়া
বোধ হয়। সাক্ষ্যকার ঈশ্বরের অস্তিত্ব মানেন না, তাহা
পশ্চাৎ বলিব। কিন্তু তিনি “সর্ববিৎ সর্বকর্তা” পুরুষ
মানেন, এইরূপ পুরুষ মানিয়াও তাঁহাকে সৃষ্টিকর্তা বলেন
না; সৃষ্টিই মানেন না। এই জগৎ প্রাকৃতিক ক্রিয়া মাত্র
বলিয়া স্বীকার করেন।

(ক)র কারণ (খ) ; (খ)র কারণ (গ) ; (গ)র কারণ (ঘ)।
এইরূপ কারণ পরম্পরা অনুসন্ধান করিতে করিতে অবশ্য
একস্থানে অন্ত পাওয়া যাইবে ; কেন না কারণশ্রেণী কখন অনন্ত
হইতে পারে না। আমি যে ফলটি ভোজন করিতেছি, ইহা
অমুক বৃক্ষে জন্মিয়াছে ; সেই বৃক্ষ একটি বীজে জন্মিয়াছে ;
সেই বীজ অণুবৃক্ষের ফলে জন্মিয়াছিল ; সেই বৃক্ষও
আর একটি বীজে জন্মিয়াছিল। এইরূপে অনন্তানুসন্ধান
করিলেও অবশ্য একটি আদিম বীজ মানিতে হইবে। এইরূপ
জগতে বাহা আদিম বীজ, যেখানে কারণানুসন্ধান বন্ধ

হইবে, সাক্ষ্যকার সেই আদিম কারণকে মূল প্রকৃতি বুলেন । (১৭৪)

জগৎপতি সম্বন্ধে দ্বিতীয় প্রশ্ন এই, যে মূল কারণ যাহাই হউক, সেই কারণ হইতে এই বিশ্ব সংসার কি প্রকারে এই রূপাবয়বাদি প্রাপ্ত হইল ? সাক্ষ্যকারের উত্তর এই;—

এই জাগতিক পদার্থ পঞ্চবিংশতি প্রকার,—

১। পুরুষ ।

২। প্রকৃতি ।

৩। মহৎ ।

৪। অহঙ্কার ।

৫, ৬, ৭, ৮, ৯। পঞ্চতন্মাত্র ।

১০, ১১, ১২, ১৩, ১৪, ১৫, ১৬, ১৭, ১৮, ১৯, ২০।

একাদশেন্দ্রিয় ।

২১, ২২, ২৩, ২৪, ২৫। স্মুলভূত ।

• ক্ষিতি, জল, তেজ, মরুৎ এবং আকাশ স্মুলভূত । পাঁচটি কর্মেন্দ্রিয়, পাঁচটি জ্ঞানেন্দ্রিয়, এবং অন্তরিন্দ্রিয়, এই একাদশ ইন্দ্রিয় । শব্দ স্পর্শ রূপ রস গন্ধ পাঁচটি তন্মাত্র । “আমি” জ্ঞান, অহঙ্কার । মহৎ মন । *

• স্মুলভূত হইতে পঞ্চতন্মাত্রের জ্ঞান । আমরা শুনিতে পাই, এজগৎ শব্দ আছে । আমরা দেখিতে পাই, এ জগৎ দৃশ্য অর্থাৎ রূপ আছে ইত্যাদি ।

অতএব শব্দস্পর্শাদির অস্তিত্ব নিশ্চিত, কিন্তু শব্দ

* Mind নহে ; Consciousness.

আমি শুনি, রূপ আমি দেখি। তবে “আমিও” আছি।
অতএব তন্মাত্র হইতে অহঙ্কারের অস্তিত্ব অনুভূত হইল।

আমি আছি কেন বলি? আমার মনে ইহা উদয় হই-
য়াছে, সেই জগৎ। তবে মনও আছে (Cogito ergo sum.)
অতএব অহঙ্কার হইতে মনের অস্তিত্ব স্থিরীকৃত
হইল।

মনের সুখ দুঃখ আছে। সুখ দুঃখের কারণ আছে। অত-
এব মূল কারণ প্রকৃতি আছে।

সাজ্যকার বলেন, প্রকৃতি হইতে মহৎ, মহৎ হইতে
অহঙ্কার, অহঙ্কার হইতে পঞ্চতন্মাত্র এবং একাদশেন্দ্রিয়, পঞ্চ-
তন্মাত্র হইতে স্মৃলভূত।

এ তত্ত্বের আর বিস্তারের আবশ্যক নাই। একালে ইহা
বড় সঙ্গত বা অর্থযুক্ত বলিয়া বোধ হয় না। কিন্তু
অস্বদেশীয় পুরাণ সকলে যে সৃষ্টিক্রিয়া বর্ণিত আছে
তাহা এই সাজ্যের মতে ব্রহ্মাণ্ডের কথার সংযোগ
মাত্র।

বেদে কোথাও সাজ্য দর্শনানুযায়ী সৃষ্টি বর্ণিত
হয় নাই। ঋগ্বেদে, অথর্ববেদে, শতপথব্রাহ্মণে সৃষ্টি কখন
আছে, কিন্তু তাহাতে মহাদাদির কোন উল্লেখ নাই।
মনুতেও সৃষ্টি কখন আছে, তাহাতেও নাই, রামায়ণেও
ঐরূপ। কেবল পুরাণে আছে। অতএব বেদ, মনু,
রামায়ণের পরে ও অন্ততঃ বিষ্ণু, ভাগবত এবং লিঙ্গ পুরা-
ণের পূর্বে সাজ্যদর্শনের সৃষ্টি। মহাভারতেও সাজ্যের
উল্লেখ আছে, কিন্তু মহাভারতের কোন অংশ নূতন,

কোন অংশ পুরাতন, তাহা নিশ্চিত করা ভার। কুমার-
সম্ভবের দ্বিতীয় সর্গে যে ব্রহ্মসত্ত্ব আছে তাহা সাজ্জ্যা-
নুকারী।

সাজ্জ্যা-প্রবচনে বিষ্ণু, হরি, রুদ্রাদির উল্লেখ নাই। পুরাণে
আছে, পৌরাণিকেরা নিরীধর সাজ্জ্যকে আপন মনোমত
করিয়া গড়িয়া লইয়াছেন।

চতুর্থ পরিচ্ছেদ ।—নিরীশ্বরতা ।

সাম্ভ্যদর্শন নিরীশ্বর বলিয়া খ্যাত, কিন্তু কেহ কেহ বলেন যে সাম্ভ্য নিরীশ্বর নহে । ডাক্তার হল একজন এই মতাবলম্বী । মক্ষমুলর, এই মতাবলম্বী ছিলেন, কিন্তু এক্ষণে তাঁহার মত পরিবর্তনের লক্ষণ দেখা গিয়াছে । কুসুমাজলিকর্তা উদয়নাচার্য্য বলেন যে সাম্ভ্যমতাবলম্বীরা আদি বিদ্বানের উপাসক । অতএব তাঁহার মতেও সাম্ভ্য নিরীশ্বর নহে । সাম্ভ্যপ্রবচনের ভাষ্যকার বিজ্ঞানভিক্ষুও বলেন যে ঈশ্বর নাই, এ কথা বলা কাপিল সূত্রের উদ্দেশ্য নহে । অতএব সাম্ভ্যদর্শনকে কেন নিরীশ্বর বলা যায়, তাহার কিছু বিস্তারিত লেখা যাউক ।

সাম্ভ্যপ্রবচনের প্রথমাধ্যায়ের বিখ্যাত ১২ সূত্র এই কথার মূল । সে সূত্র এই ; “ঈশ্বরাসিদ্ধেঃ ।” প্রথম এই সূত্রটি বুঝাইব ।

সূত্রকার প্রমাণের কথা বলিতেছিলেন । তিনি বলেন প্রমাণ ত্রিবিধ ; প্রত্যক্ষ, অনুমান, এবং শব্দ । ৮৯ সূত্রে প্রত্যক্ষের লক্ষণ বলিলেন, “যৎ সম্বন্ধং সত্তদাকারোল্লেখি-
বিজ্ঞানং তৎ প্রত্যক্ষম্ ।” অতএব যাহা সম্বন্ধ নহে, তাহার প্রত্যক্ষ হইতে পারে না । এই লক্ষণ প্রতি দুইটি দোষ পড়ে । যোগিগণ যোগবলে অসম্বন্ধও প্রত্যক্ষ করিতে

পারেন। ১০।২১ সূত্রে সূত্রকার সে দোষ অপনীত করিলেন। দ্বিতীয় দোষ, ঈশ্বরের প্রত্যক্ষ নিত্য, তৎসম্বন্ধে সম্বন্ধ কথাটি ব্যবহার হইতে পারে না। সূত্রকার তাহার এই উত্তর দেন, যে ঈশ্বরই সিদ্ধ নহেন—ঈশ্বর আছেন, এমত কোন প্রমাণ নাই—অতএব তাহার প্রত্যক্ষ সম্বন্ধে না বর্তিলে এই লক্ষণ দুষ্টি হইল না। তাহাতে ভাষ্যকার বলেন যে দেখ, ঈশ্বর অসিদ্ধ ইহা উক্ত হইয়াছে, কিন্তু ঈশ্বর নাই, এমত কথা বলা হইল না।

না হউক, তথাপি এই দর্শনকে নিরীশ্বর বলিতে হইবে। এমত নাস্তিক বিরল, যে বলে যে ঈশ্বর নাই। যে বলে যে ঈশ্বর আছেন, এমত কোন প্রমাণ নাই, তাহাকেও নাস্তিক বলা যায়।

যাহার অস্তিত্বের প্রমাণ নাই, এবং যাহার অনস্তিত্বের প্রমাণ আছে, এই দুইটি পৃথক বিষয়। রক্তবর্ণ কাকের অস্তিত্বের কোন প্রমাণ নাই, কিন্তু তাহার অনস্তিত্বেরও কোন প্রমাণ নাই। কিন্তু গোলাকার ও চতুষ্কোণের অনস্তিত্বের প্রমাণ আছে। গোলাকার চতুষ্কোণ মানিব না ইহা নিশ্চিত; কিন্তু রক্তবর্ণ কাক মানিব কি না? তাহার অনস্তিত্বেরও প্রমাণ নাই বটে, কিন্তু তাহার অস্তিত্বেরও প্রমাণ নাই। যেখানে অস্তিত্বের প্রমাণ নাই, সেখানে মানিব না। অনস্তিত্বের প্রমাণ নাই থাক, যতক্ষণ অস্তিত্বের প্রমাণ না পাইব, ততক্ষণ মানিব না। অস্তিত্বের প্রমাণ পাইলে তখন মানিব। ইহাই প্রত্যয়ের প্রকৃত নিয়ম। ইহার ব্যত্যয়ে যে বিশ্বাস তাহা ভ্রান্তি। “কোন পদার্থ আছে

এমত প্রমাণ নাই বটে, কিন্তু থাকিলে থাকিতে পারে,” ইহা ভাবিয়া যে সেই পদার্থের অস্তিত্ব কল্পনা করে সে ভ্রান্ত ।

অতএব নাস্তিকেরা দুই শ্রেণীতে বিভক্ত হইলেন। যাহারা কেবল ঈশ্বরের অস্তিত্বের প্রমাণাতাববাদী,— তাহারা বলেন ঈশ্বর থাকিলে থাকিতে পারেন,—কিন্তু আছেন এমত কোন প্রমাণ নাই ।

অপর শ্রেণীর নাস্তিকেরা বলেন যে ঈশ্বর আছেন, শুধু ইহারই প্রমাণাতাব, এমত নহে, ঈশ্বর যে নাই তাহারও প্রমাণ আছে। আধুনিক ইউরোপীয়েরা কেহ কেহ এই মতাবলম্বী। একজন ফরাসিস লেখক বলিয়াছেন, তোমরা বল ঈশ্বর নিরাকার, অথচ চেতনাদি মানসিক বৃত্তিবিশিষ্ট। কিন্তু কোথায় দেখিয়াছ যে চেতনাদি মানসিক বৃত্তি সকল শরীর হইতে বিযুক্ত? যদি তাহা কোথাও দেখ নাই, তবে হয় ঈশ্বর সাকার, নয় তিনি নাই। সাকার ঈশ্বর, এ কথা তোমরা মানিবে না, অতএব ঈশ্বর নাই, ইহা মানিতে হইবে। ইনি দ্বিতীয় শ্রেণীর নাস্তিক।

“ঈশ্বরাসিদ্ধেঃ।” শুধু এই কথার উপরে নির্ভর করিলে, সাংখ্যকারকে প্রথম শ্রেণীর নাস্তিক বলা যাইত। কিন্তু তিনি অগ্ৰাণ্ড প্রমাণের দ্বারা প্রতিপন্ন করিতে যত্ন করিয়াছেন, যে ঈশ্বর নাই।

সে প্রমাণ কোথাও দুই একটি সূত্রের মধ্যে নাই। অনেকগুলি সূত্র একত্র করিয়া, সাংখ্যপ্রবচনে ঈশ্বরের অনস্তিত্বসম্বন্ধে যাহা কিছু পাওয়া যায় তাহার মর্ম্ম সবিস্তারে বুঝাইতেছি।

তিনি বলেন যে ঈশ্বর অসিদ্ধ (১, ৯২) প্রমাণ নাই বলিয়াই অসিদ্ধ (প্রমাণাতাবাৎ ন তৎসিদ্ধিঃ। ৫, ১০)। সাংখ্যমতে প্রমাণ তিন প্রকার, প্রত্যক্ষ, অনুমান, শব্দ। প্রত্যক্ষের ত কথাই নাই। কোন বস্তুর সঙ্গে যদি অন্য বস্তুর নিত্য সম্বন্ধ থাকে, তবে একটিকে দেখিলে আর একটিকে অনুমান করা যায়। কিন্তু কোন বস্তুর সঙ্গে ঈশ্বরের কোন নিত্য সম্বন্ধ দেখা যায় নাই; অতএব অনুমানের দ্বারা ঈশ্বরের সিদ্ধি হয় না। (সম্বন্ধাতাবান্নানুমানম্। ৫, ১১)।

যদি এই সূত্র পাঠক না বুঝিয়া থাকেন, তবে আর একটু বুঝাই। পর্কতে ধূম দেখিয়া তুমি সিদ্ধ কর, যে তথায় অগ্নি আছে। কেন এ সিদ্ধান্ত কর? তুমি যেখানে যেখানে ধূম দেখিয়াছ, সেইখানে সেইখানে অগ্নি দেখিয়াছ বলিয়া। অর্থাৎ অগ্নির সহিত ধূমের নিত্য সম্বন্ধ আছে বলিয়া।

যদি তোমার জিজ্ঞাসা করি, তোমার প্রপিতামহের প্রপিতামহের কয়টি হাত ছিল, তুমি বলিবে দুইটি। তুমি তাঁহাকে কখন দেখ নাই—তবে কি প্রকারে জানিলে তাঁহার দুইটি হাত ছিল? বলিবে মানুষমাত্রেয়ই দুই হাত এই জগৎ। অর্থাৎ মানুষের সহিত দ্বিভুজতার নিত্য সম্বন্ধ আছে, এই জগৎ।

“এই নিত্য সম্বন্ধ বা ব্যাপ্তিই অনুমানের একমাত্র কারণ। যেখানে এ সম্বন্ধ নাই, সেখানে পদার্থান্তর অনুমিত হইতে পারে না। এক্ষণে, জগতে কিসের সঙ্গে ঈশ্বরের নিত্য সম্বন্ধ আছে, যে তাহা হইতে ঈশ্বরানু-

মান করা যাইতে পারে? সাংখ্যকার বলেন কিছুই সম্ভে না।

তৃতীয় প্রমাণ, শব্দ । আপ্ত বাক্য শব্দ । বেদেই আপ্তোপদেশ । সাংখ্যকার বলেন, বেদে ঈশ্বরের কোন প্রসঙ্গ নাই, বরং বেদে ইহাই আছে যে সৃষ্টি প্রকৃতিরই ক্রিয়া, ঈশ্বরকৃত নহে (সৃষ্টিরপি প্রধান-কার্যত্বম্ । ৫, ১২) কিন্তু যিনি বেদ পাঠ করিবেন তিনি দেখিবেন, এ অতি অসম্ভব কথা । এই আশঙ্কায় সাংখ্যকার বলেন যে বেদে ঈশ্বরের যে উল্লেখ আছে, তাহা হয় মুক্তাত্মার প্রশংসা, নয় প্রামাণ্য দেবতার (সিদ্ধম্) উপাসনা (মুক্তাত্মনঃ প্রশংসা উপাসা সিদ্ধম্ বা । ১,৯৫) ।

ঈশ্বরের অস্তিত্বের প্রমাণ নাই, এইরূপে দেখাইয়াছেন । ঈশ্বরের অনস্তিত্ব সম্বন্ধে যে প্রমাণ দেখাইয়াছেন, নিম্নে তাহার সম্প্রসারণ করা গেল ।

ঈশ্বর কাহাকে বল ? যিনি সৃষ্টিকর্তা এবং পাপপুণ্যের ফলবিধাতা । যিনি সৃষ্টিকর্তা তিনি মুক্ত না বদ্ধ ? যদি মুক্ত হয়েন, তবে তাঁহার স্বজনের প্রবৃত্তি হইবে কেন ? আর যিনি মুক্ত, নহেন বদ্ধ,—তাঁহার পক্ষে অনন্তজ্ঞান ও শক্তি সম্ভবে না । অতএব একজন সৃষ্টিকর্তা আছেন ইহা অসম্ভব । মুক্তবন্ধয়োরন্তরাতাবান্ন তৎসিদ্ধিঃ (১,৯৩) ; উভয়থাপ্যসংকরত্বম্ (১,৯৪) ।

সৃষ্টিকর্তৃত্ব সম্বন্ধে এই । পাপপুণ্যের দণ্ডবিধাতৃত্ব সম্বন্ধে মীমাংসা করেন, যে যদি ঈশ্বর কর্মফলের বিধাতা হয়েন, তবে তিনি অবশ্য কর্মানুযায়ী ফলাদিপ্পত্তি করিবেন,

পুণ্যের শুভ ফল পাপের অশুভ ফল অবশ্য প্রদান করিবেন । যদি তিনি তাহা না করেন, স্বেচ্ছামত ফলনিষ্পত্তি করেন, তবে কি প্রকারে ফলবিধান করিতে পারেন ? যদি সুবিচার করিয়া ফল বিধান না করেন, তবে আত্মোপকারের জন্ত করাই সম্ভব । তাহা হইলে তিনি সামান্ত লৌকিক রাজার ন্যায় আত্মোপকারী, এবং সুখ দুঃখের অধীন । যদি তাহা না হইয়া কর্মানুযায়ীই ফলনিষ্পত্তি করেন, তবে কেন কর্মকেই ফলবিধাতা বল না ? ফলনিষ্পত্তির জন্ত আবার কর্মের উপর ঈশ্বরানুমানের প্রয়োজন কি ?

অতএব সাংখ্যকার দ্বিতীয় শ্রেণীর ঘোরতর নাস্তিক । অথচ তিনি বেদ মানেন ।

ঈশ্বর না মানিয়াও কেন বেদ মানেন, তাহা আমরা পর পরিচ্ছেদে দেখাইব । সাংখ্যের এই নিরীশ্বরতা বৌদ্ধধর্মের পূর্নসূচনা বলিয়া বোধ হয় ।

ঈশ্বরতত্ত্ব সম্বন্ধে সাংখ্যদর্শনের একটি কথা বাকি রহিল । পূর্বেই বলিয়াছি অনেকে বলেন কাপিল দর্শন নিরীশ্বর নহে । এ কথা বলিবার কিছু একটু কারণ আছে । ত, অ, ৫৭ সূত্রে সূত্রকার বলেন, “ঈদৃশেশ্বর সিদ্ধিঃ সিদ্ধা ।” সে কি প্রকার ঈশ্বর ? “সহি সর্কবিৎ সর্ককর্তা,” ৩, ৫৬ । তবে সাংখ্য নিরীশ্বর হইল কই ?

বাস্তবিক এ কথা ঈশ্বর সম্বন্ধে উক্ত হয় নাই । সাংখ্যকার বলেন জ্ঞানেই মুক্তি, আর কিছুতেই মুক্তি নাই । পুণ্য, অথবা সদ্ভাবিশাল উর্দ্ধলোকেও মুক্তি নাই, কেননা তথা হইতে পুনর্জন্ম আছে, এবং জরামরণাদি দুঃখ আছে ।

শেষ এমনও বলেন, যে জগৎ কারণে লয় প্রাপ্ত হইলেও মুক্তি নাই, কেন না তাহা হইতে জন্মের পুনরুত্থানের ন্যায় পুনরুত্থান আছে (৩,৫৪)। সেই লয়প্রাপ্ত আত্মা সম্বন্ধে তিনি বলিয়াছেন, যে তিনি “সর্ববিৎ এবং সর্বকর্তা।” ইহাকে যদি ঈশ্বর বলিতে চাও, তবে ঈদৃশেশ্বর সিন্ধু। কিন্তু ইনি জগৎস্রষ্টা বা বিধাতা নহেন। “সর্বকর্তা” অর্থে সর্বশক্তিমান, সর্বসৃষ্টিকারক নহে।

পঞ্চম পরিচ্ছেদ—বেদ ।

আমরা পূর্বে বলিয়াছি, সাংখ্য প্রবচনকার ঐশ্বর মানেন না, বেদ মানেন । বোধ হয় পৃথিবীতে আর কোন দর্শন বা অন্য শাস্ত্র নাই, যাহাতে ধর্ম পুস্তকের প্রামাণ্য স্বীকার করে অথচ ধর্মপুস্তকের বিষয়ীভূত এবং প্রণেতা জগদীশ্বরের অস্তিত্ব স্বীকার করে না । এই বেদভক্তি ভারতবর্ষে অতিশয় বিস্ময়-কর পদার্থ । আমরা এ বিষয়টি কিঞ্চিৎ সবিস্তারে লিখিতে ইচ্ছা করি ।

মনু বলেন, বেদশব্দ হইতে সকলের নাম, কর্ম, এবং অবস্থা নির্মিত হইয়াছিল । বেদ, পিতৃ, দেবতা এবং মনুষ্যের চক্ষু ; অশক্য, অপ্রমেয় ; যাহা বেদ হইতে ভিন্ন তাহা পরকালে নিষ্ফল, বেদ ভিন্ন গ্রন্থ মিথ্যা । ভূত ভবিষ্যৎ বর্তমান, শব্দ স্পর্শ রূপ গন্ধ, চতুর্কর্ণ, ত্রিলোক, চতুরাশ্রম, সকলই বেদ হইতে প্রকাশ ; বেদ মনুষ্যের পরম সাধন ; যে বেদজ্ঞ সেই, সৈনাপত্য, রাজ্য, দণ্ডনে-তৃত্ব এবং সর্বলোকাধিপত্যের যোগ্য । যে বেদজ্ঞ সে, যে আশ্রমেই থাকুক না কেন, সেই ব্রহ্মে লীন হওয়ার যোগ্য । যাহারা ধর্ম-জিজ্ঞাসু, বেদই তাহাদের পক্ষে পরম প্রমাণ । বেদ অজ্ঞের শরণ, জ্ঞানীদিগেরও শরণ । যাহারা স্বর্গ বা আনন্ড্য কামনা করে, ইহাই তাহাদিগের শরণ । যে ব্রাহ্মণ তিন ভ্রোক হত্যা করে, যেখানে সেখানে খায়,

তাহার যদি ঋগ্বেদ মনে থাকে, তবে তাহার কোন পাপ হয় না

শতপথ ব্রাহ্মণ বলেন, বেদান্তর্গত সর্বভূত । বেদ, সকল ছন্দঃ, স্তোম, প্রাণ, এবং দেবতাগণের আত্মা । বেদই আছে । বেদ অমৃত । যাহা সত্য তাহাও বেদ ।

বিষ্ণু পুরাণে আছে, দেবাদের রূপ, নাম, কর্ম, প্রবর্তন, বেদশব্দ হইতে সৃষ্ট হইয়াছিল । অন্যত্র ঐ পুরাণে বিষ্ণুকে বেদময়, ও ঋগ্ যজুঃ সামাত্মক বলা হইয়াছে ।

মহাভারতে শান্তিপর্বেও আছে, যে বেদশব্দ হইতে সর্বভূতের রূপ নাম কর্মাতির উৎপত্তি ।

ঋক্‌সংহিতার ও তৈত্তিরীয় সংহিতার মঙ্গলাচরণে সায়নাচার্য্য ও মাধবাচার্য্য লিখিয়াছেন, “বেদ হইতে অখিল জগতের নিৰ্ম্মাণ হইয়াছে ।”

এইরূপ সর্বত্র বেদের মাহাত্ম্য । কোন দেশে কোন ধর্ম-গ্রন্থের, বাইবেল, কোরাণ প্রভৃতি কিছুই, ঐদৃশ মহিমা কীর্তিত হয় নাই ।

এখন জিজ্ঞাস্য এই যে, যে বেদ এইরূপ সকলের পূর্ব-গামী বা উৎপত্তির মূল, তাহা কোথা হইতে আসিল । এ বিষয়ে মত ভেদ আছে । কেহ কেহ বলেন, বেদের কর্তা কেহ নাই ।—এ গ্রন্থ কাহারও প্রণীত নহে, ইহা নিত্য এবং অপৌরুষেয় । অন্যে বলেন যে ইহা ঐশ্বরপ্রণীত স্মৃতির সৃষ্ট এবং পৌরুষেয় । কিন্তু হিন্দুশাস্ত্রের কি আশ্চর্য্য বৈচিত্র ! সকলেই বেদ মানেন কিন্তু বেদের উৎপত্তি সম্বন্ধে কোন হুই খানি শাস্ত্রীয় গ্রন্থের ঐক্য নাই । যথা—

- (১) ঋগ্বেদের পুরুষ সৃষ্টি আছে, বেদ পুরুষ যজ্ঞ হইতে উৎপন্ন ।
- (২) অথর্ষ বেদে আছে স্তম্ভ হইতে ঋগ্ যজুষ্ সাম অপাঙ্কিত হইয়াছিল ।
- (৩) অথর্ষ বেদে অন্যত্র আছে বে ইন্দ্র হইতে বেদের জন্ম ।
- (৪) ঐ বেদের অন্যত্র আছে, ঋগ্বেদ কাল হইতে উৎপন্ন ।
- (৫) ঐ বেদে অগ্নিত্র আছে, বেদ গায়ত্রীমধ্যে নিহিত ।
- (৬) শতপথ ব্রাহ্মণে আছে যে অগ্নি হইতে ঋচ, বায়ু হইতে যজুষ্, এবং সূর্য হইতে সাম বেদের উৎপত্তি ; ছান্দোগ্য উপনিষদেও ঐরূপ আছে । এবং মনুতেও তদ্রূপ আছে ।
- (৭) শতপথ ব্রাহ্মণের অগ্নিত্র আছে, বেদ প্রজাপতি কর্তৃক সৃষ্ট হইয়াছিল ।
- (৮) শতপথ ব্রাহ্মণের সেই স্থানেই আছে যে প্রজাপতি বেদসহিত জলমধ্যে প্রবেশ করেন । জল হইতে অগ্নির উৎপত্তি হয় । অগ্নি হইতে প্রথমে তিন বেদের উৎপত্তি ।
- (৯) শতপথ ব্রাহ্মণের অগ্নিত্র আছে যে বেদ মহাভূতের (ব্রহ্মার) নিষ্কাশ ।
- (১০) তৈত্তিরীয় ব্রাহ্মণে আছে প্রজাপতি সোমকে সৃষ্টি করিয়া তিন বেদের সৃষ্টি করিয়াছেন ।
- (১১) বৃহদারণ্যক উপনিষদে আছে, প্রজাপতি বাক্ সৃষ্টি করিয়া তদ্বারা বেদাদি সকল সৃষ্টি করিয়াছেন ।
- (১২) শতপথ ব্রাহ্মণে পুনশ্চ আছে, যে মনঃসমুদ্র হইতে

বাক্য রূপ সাবলের দ্বারা দেবতারা বেদ খুঁড়িয়া উঠাইয়া-
ছিলেন ।

(১৩) তৈত্তিরীয় ব্রাহ্মণে আছে, যে বেদ প্রজাপতির
শ্রুতি ।

(১৪) উক্ত ব্রাহ্মণে পুনশ্চ আছে, বাগ্‌দেবী বেদমাতা ।

(১৫) বিষ্ণুপুরাণে আছে, বেদ ব্রহ্মার মুখ হইতে উৎপন্ন ।
ভাগবত পুরাণে ও মার্কণ্ডেয়পুরাণেও ঐ রূপ ।

(১৬) হরিবংশে আছে, গায়ত্রীসম্বৃত ব্রহ্মতেজোময় পুরু-
ষের নেত্র হইতে ঋচ্ ও যজুষ্, জিহ্বাগ্র হইতে সাম, এবং
মূর্ধা হইতে অথর্ষের স্বজন হইয়াছিল ।

(১৭) মহাভারতের ভীষ্মপর্বে আছে যে সরস্বতী এবং বেদ
বিষ্ণু মন হইতে স্বজন করিয়াছিলেন । শান্তিপর্বে সরস্বতীকে
বেদমাতা বলা হইয়াছে ।

(১৮) অথর্ষ বেদান্তর্গত আয়ুর্বেদে আছে, যে আয়ুর্বেদ
ব্রহ্মা মনে মনে জানিয়াছিলেন । আয়ুর্বেদ অথর্ষবেদান্তর্গত
বলিয়া অথর্ষবেদের ঐরূপ উৎপত্তি বুঝিতে হইবে । :

বেদের মন্ত্র, ব্রাহ্মণ, উপনিষদ এবং আরণ্যকে, এবং স্মৃতি,
পুরাণ ও ইতিহাসে বেদোৎপত্তি বিষয়ে এইরূপ আছে । দেখা
যাইতেছে যে এ সকলে বেদের সৃষ্টত্ব এবং পৌরুষেয়ত্ব প্রায়
সর্বত্র স্বীকৃত হইয়াছে—কদাচিৎ অপৌরুষেয়ত্বও কথিত
হইয়াছে । কিন্তু পরবর্তী টীকাকার ও দার্শনিকেরা প্রায়
অপৌরুষেয়ত্ব-বাদী । তাঁহাদিগের মত নিয়ে লিখিত হই-
তেছে ।

(১৯) সায়নাচার্য্য বেদার্থপ্রকাশ নামে ঋগ্বেদের টীকা

করিয়াছেন। তাহাতে তিনি বলেন যে বেদ অপৌরুষেয়। কিন্তু বেদ মনুষ্যকৃত নহে বলিয়াই অপৌরুষেয় বলেন।

(২০) সায়নাচার্যের ভ্রাতা মাধবাচার্যও বেদার্থ প্রকাশ নামে তৈত্তিরীর যজুর্বেদের টীকা করিয়াছেন। তিনি বলেন বেদ নিত্য। তবে তিনি এই অর্থে নিত্য বলেন যে কাল আকাশাদি যেমন নিত্য সেইরূপ বেদ। ব্যবহার কালে কালিদাসাদি বাক্যবৎ পুরুষবিরচিত নহে বলিয়া নিত্য। এবং তিনি ব্রহ্মাকে বেদবক্তা বলিয়া স্বীকার করিয়াছেন।

(২১) মীমাংকেরা বলেন বেদ নিত্য এবং অপৌরুষেয়। শব্দ নিত্য বলিয়া বেদ নিত্য। শঙ্করাচার্য এই মতাবলম্বী।

(২২) নৈয়ায়িকেরা তাহার প্রতিবাদ করিয়া বলেন, বেদ পৌরুষেয়।—মন্ত্র ও আর্যুর্বেদের ঞ্চার, জ্ঞানী ব্যক্তির কথা প্রামাণ্য বলিয়াই বেদও প্রামাণ্য বোধ হয়। গোতমস্বতের ভাবে বেদকে মনুষ্যপ্রণীত বলিয়া নির্দেশ করা তাহার ইচ্ছা কিনা, নিশ্চিত বুঝা যায় না।

• (২৩) বৈশেষিকেরা বলেন, বেদ ঈশ্বরপ্রণীত। কুসুমাজ্জলিকর্তা উদয়নাচার্যের এই মত।

এই সমস্ত শাস্ত্রের আলোচনা করিয়া দেখা যায় যে, কেহ বলেন বেদ নিত্য এবং অপৌরুষেয়; কেহ বলেন বেদ সৃষ্ট এবং ঈশ্বরপ্রণীত। ইহা ভিন্ন তৃতীয় সিদ্ধান্ত হইতে পারে না। কিন্তু সাংখ্য-প্রবচনকারের মত সৃষ্টি ছাড়া। তিনি প্রথমতঃ বলেন, যে বেদ কদাপি নিত্য হইতে পারে না, কেন না, বেদেই তাহার কার্যত্বের প্রমাণ আছে—যথা “স-তপোহুপ্যতঁ তস্মাৎ তপস্তপানা ত্রয়ো বেদা অজায়ন্ত ”

যেখানে বেদেই বলে যে এই এই রূপে বেদের জন্ম হইয়াছিল, সেখানে বেদ কদাপি নিত্য এবং অপৌরুষেয় হইতে পারে না । কিন্তু যাহা অপৌরুষেয় নহে, তাহা অবশ্য পৌরুষেয় হইবে । কিন্তু সাংখ্যকারের মতে বেদ অপৌরুষেয় নহে, পৌরুষেও নহে । পুরুষ, অর্থাৎ ঈশ্বর নাই বলিয়া তাহা পৌরুষেয় নহে । সাংখ্যকার আরও বলেন যে বেদ করিতে যোগ্য যে পুরুষ তিনি হয় মূল নয় বদ্ধ । যিনি মুক্ত তিনি প্রবৃত্তির অভাবে বেদসৃজন করিবেন না ; যিনি বদ্ধ তিনি অসমর্ষিত বলিয়া তৎপক্ষে অক্ষম ।

তবে পৌরুষেয় নহে । অপৌরুষেয়ও নহে । তাহা কি কখন হইতে পারে ? সাংখ্যকার বলেন হইতে পারে যথা অঙ্কুরাদি (৫, ৮৪) । যাহারা হিন্দু-দর্শনশাস্ত্রের নাম শুনিলেই মনে করেন, তাহাতে সর্ষতই আশ্চর্য্য বুদ্ধির কৌশল, তাহাদিগের ভ্রম নিবারণার্থ এই কথার বিশেষ উল্লেখ করিলাম । সাংখ্যকারের বুদ্ধির তীক্ষ্ণতাও বিচিত্রা, ভ্রান্তিও বিচিত্রা । সাংখ্যকার যে এমন রহস্যজনক ভ্রান্তিতে অনবধানতা প্রযুক্ত পতিত হইয়াছিলেন, আমরা এমত বিবেচনা করি না । আমাদের বিবেচনায় সাংখ্যকার অন্তরে বেদ মানিতেন না কিন্তু তাৎকালিক সমাজে ব্রাহ্মণে এবং দার্শনিকে কেহ সাহস করিয়া বেদের অবজ্ঞা করিতে পারিতেন না । এজন্য তিনি ধর্মোখিক বেদভক্তি প্রকাশ করিয়াছিলেন এবং যদি বেদ মানিতে হইল তবে আবশ্যকমত প্রতিবাদীদিগকে নিরস্ত করিবার জন্য স্থানে স্থানে বেদের দোহাই দিয়াছেন । কিন্তু তিনি অন্তরে বেদ মানিতেন বোধ হয় না । বেদ পৌরুষেয় নহে, 'অপৌরু-

যেও নহে, একথা কেবল ব্যঙ্গ মাত্র । সূত্রকারের এই কথা বলিবার অভিপ্রায় বুঝা যায়, যে “দেখ, তোমরা যদি বেদকে সর্বজ্ঞানযুক্ত বলিতে চাহ, তবে বেদ না পৌরুষের, না অপৌরুষের হইয়া উঠে । বেদ অপৌরুষের নহে, ইহার প্রমাণ বেদে আছে । তবে ইহা যদি পৌরুষের হয়, তবে ইহাও বলিতে হইবে, যে ইহা মনুষ্যকৃত, কেন না সর্বজ্ঞ পুরুষ কেহ নাই তাহা প্রতিপন্ন করা গিয়াছে ।” যদি এ সকল সূত্রের এরূপ অর্থ করা যায়, তবে অদ্বিতীয় দূরদর্শী দার্শনিক সাংখ্যকারকে অল্পবুদ্ধি বলিতে হয় । তাহা কদাপি বলা যাইতে পারে না ।

বেদ যদি পৌরুষের নহে, অপৌরুষেরও নহে, তবে মানিব কেন ? সাংখ্যকার এ প্রশ্নের উত্তর দেওয়া আবশ্যিক বিবেচনা করিয়াছিলেন । আজি কালিকার কথা ধরিতে গেলে বোধ হয় এত বড় গুরুতর প্রশ্ন ভারতবর্ষে আর কিছুই নাই । একদল বলিতেছেন, সনাতন ধর্ম বেদমূলক, তোমরা এ সনাতন ধর্মে ভক্তিহীন কেন ? তোমরা বেদ মান না কেন ? আর এক দল বলিতেছেন, আমরা বেদ মানিব কেন । সমুদায় ভারতবর্ষ এই দুই দলে বিভক্ত । এই দুই প্রশ্নের উত্তর লইয়া বিবাদ হইতেছে । ভারতবর্ষের ভাবী মঙ্গলামঙ্গল এই প্রশ্নের মীমাংসার উপর নির্ভর করে । হিন্দুগণ সকলেরই কি স্বধর্ম থাকা উচিত ? না সকলেরই স্বধর্ম ত্যাগ করা উচিত ? অর্থাৎ আমরা বেদ মানিব ? না মানিব না ? যদি মানি তবে কেন মানিব ?

আর একবার এই প্রশ্ন উত্থাপিত হইয়াছিল । যখন

ধর্মশাস্ত্রের অত্যাচারে পীড়িত হইয়া ভারতবর্ষ ত্রাহি ত্রাহি করিয়া ডাকিতেছিল, তখন শাক্যসিংহ বুদ্ধদেব বলিয়াছিলেন, “তোমরা বেদ মানিবে কেন? বেদ মানিও না।” এই কথা শুনিয়া বেদবিৎ, বেদভক্ত, দার্শনিক-মণ্ডলী এই প্রশ্নের উত্তর দিয়াছিলেন। জৈমিনি, বাদরায়ণ, গোতম, কণাদ, কপিল ঝাঁহার যেমন ধারণা তিনি তেমনি উত্তর দিয়াছিলেন। অতএব প্রাচীন দর্শন শাস্ত্রে এই প্রশ্নের উত্তর থাকিতে দুইটি কথা জানা যাইতেছে। প্রথম, আজি কালি ইংরেজি শিক্ষার দোষেই লোকে বেদের অলঙ্ঘনীয়তার প্রতি নতন সন্দেহ করিতেছে, এমত নহে। এ সন্দেহ অনেক দিন হইতে। প্রাচীন দার্শনিকদিগের পরে শঙ্করাচার্য, মাধবাচার্য, সায়নাচার্য প্রভৃতি নব্যোরাও ঐ প্রশ্নের উত্তর দিবার জন্য ব্যস্ত হইয়াছিলেন। দ্বিতীয়, দেখা যায় যে এ প্রশ্ন বৌদ্ধেরা প্রথম উত্থাপিত করেন, এবং প্রাচীন দার্শনিকেরা প্রথম তাহার উত্তর দান করেন। অতএব বৌদ্ধধর্ম ও দর্শনশাস্ত্রের উৎপত্তি সমকালিক বলিয়া যাইতে পারে।

বেদ মানিব কেন? এই প্রশ্নের বিচার সময়ে মহারথী মীমাংসক জৈমিনি। তাঁহার প্রতিদ্বন্দ্বী নৈয়ায়িক গোতম। নৈয়ায়িকেরা বেদ মানেন না, এমত নহে। কিন্তু যে সকল কারণে মীমাংসকেরা বেদ মানেন, নৈয়ায়িকেরা তাহা অগ্রাহ্য করেন। মীমাংসকেরা বলেন, বেদ নিত্য এবং অপৌরুষেয়। নৈয়ায়িকেরা বলেন বেদ আপ্তবাক্য মাত্র। নৈয়ায়িকেরা, মীমাংসকের মত খণ্ডন জন্য যে সকল আপত্তি

উত্থাপন করিয়াছেন, মাধবাচার্য্য-প্রণীত সৰ্বদর্শনসংগ্রহ
ইহাতে তাহার সারমর্ম নিয়ে সংক্ষেপে লেখা গেল ।

মীমাংসকেরা বলেন, যে সম্প্রদায়বিচ্ছেদে বেদকর্তা,
অস্বর্ধ্যমান । সকল কথা লোক পরম্পরা স্মৃত হইয়া আসিতেছে
কিন্তু কাহারও স্মরণ নাই যে কেহ বেদ করিয়াছেন ।
ইহাতে নৈয়ায়িকেরা আপত্তি করেন যে, প্রলয়কালে
সম্প্রদায় বিচ্ছিন্ন হইয়াছিল । এক্ষণে যে বেদ প্রণয়ন
স্মরণে নাই, ইহাতে এমত প্রমাণ হইতেছে না যে
প্রলয়পূর্বে বেদ প্রণীত হয় নাই । আর ইহাও তোমরা
প্রমাণ করিতে পারিবে না, যে বেদকর্তা কাহা কর্তৃক
কখন স্মৃত ছিলেন না । নৈয়ায়িকেরা আরও বলেন যে
বেদবাক্য সকল, যেমন কালিদাসাদি বাক্য তেমনি বাক্য,
অতএব বেদবাক্যও পৌরুষেয় বাক্য । বাক্যত্ব হেতু,
মর্ষাদির বাক্যের ন্যায়, বেদবাক্যকেও পৌরুষেয় বলিতে
হইবে । আর মীমাংসকেরা বলিয়া থাকেন, যে যেই বেদাধ্য-
য়ন করে, তাহার পূর্বে তাহার গুরু অধ্যয়ন করিয়া-
ছিলেন, তাঁহার পূর্বে তাঁহার গুরু অধ্যয়ন করিয়াছিলেন,
তাঁহার পূর্বে তাঁহার গুরু ; এইরূপ যেখানে অনন্ত পার-
ম্পর্ষ্য আছে, সেখানে বেদ অনাদি । নৈয়ায়িক বলেন,
যে মহাভারতাদি সম্বন্ধেও ঐ রূপ বলা যাইতে পারে ।
যদি বলা যায়, যে মহাভারতের কর্তা যে ব্যাস ইহা স্বর্ধ্যমান,
তবে বেদ সম্বন্ধেও বলা যাইতে পারে, যে “ঋচঃ সামানি
যজ্ঞিরে । ছন্দাংসি যজ্ঞিরে তস্মাৎ যজুস্তস্মাদজায়ত ।” ইতি
পুরুষসূত্রে, বেদকর্তাও নির্দিষ্ট আছেন । আর মীমাংস-

কেরা বলেন, যে শব্দ নিত্য, এজন্য বেদ নিত্য । কিন্তু শব্দ নিত্য নহে, কেননা শব্দ সামান্যত্ব বশতঃ ঘটকং অজ্ঞাদির বাহ্যেন্দ্রিয়গ্রাহ্য । মীমাংসকেরা উত্তর করেন, যে গকারাদির শব্দ শুনিতে পাইলেই আমাদের প্রত্য-ভিজ্ঞান জন্মে যে ইহা গকার অতএব শব্দ নিত্য । নৈয়া-য়িক বলেন যে সে প্রত্যভিজ্ঞা সামান্য বিষয়ত্ব বশতঃ যেমন ছিন্ন তৎপরে পুনর্জাত কেশ, এবং দলিত কুন্দ, মীমাংসকেরা আরও বলিয়া থাকেন যে বেদ অপৌকুষেয় তাহার এক কারণ যে পরমেশ্বর অশরীরী, তাঁহার তাঙ্গাদি বর্ণোচ্চারণ-স্থান নাই । নৈয়ায়িকেরা উত্তর করেন যে পরমেশ্বর স্বভাবতঃ অশরীরী হইলেও ভক্তানুগ্রহার্থ তাঁহার শরীর গ্রহণ অসম্ভব নহে ।

মীমাংসকেরা এ সকল কথা উত্তর দিয়াছেন, কিন্তু তাহার “বিবরণ লিখিতে গেলে প্রবন্ধ বড় দীর্ঘ এবং কটমট হইয়া উঠে । ফলে বেদ মানিব কেন ? এই তর্কের তিনটি মাত্র উত্তর প্রাচীন দর্শন শাস্ত্র হইতে পাওয়া যায়—:

প্রথম বেদ নিত্য এবং অপৌকুষেয়, সুতরাং ইহা মান্য । কিন্তু বেদেই আছে যে ইহা অপৌকুষেয় নহে । যথা “ঋচঃ সামানি যজ্ঞিরে” ইত্যাদি ।

দ্বিতীয় । বেদ ঐশ্বরপ্রণীত এই জন্য মান্য । প্রতি-বাদীরা বলিবেন যে, বেদ যে ঐশ্বরপ্রণীত তাহার বিশিষ্ট প্রমাণ নাই । বেদে আছে, বেদ ঐশ্বরসম্ভূত, কিন্তু যেখানে তাঁহারা বেদ মানিতেছেন না তখন তাঁহারা বেদের কোন কথা মানিবেন না । এবিষয়ে যে বাদানুবাদ হইতে পারে,

তাহা সহজেই অনুমেয়, এবং তাহা সবিস্তারে লিখিবার আবশ্যিকতা নাই। যাহারা ঈশ্বর মানেন না, তাহারা বেদ ঈশ্বর-প্রণীত বলিয়া যে স্বীকার করিবেন না, তাহা বলা বাহুল্য।

তৃতীয়। বেদের নিজ শক্তির অভিব্যক্তির দ্বারাই বেদের প্রামাণ্য সিদ্ধ হইতেছে। সাংখ্যকার এই উত্তর দিয়াছেন। সায়নাচার্য্য বেদার্থপ্রকাশে, এবং শঙ্করাচার্য্য ব্রহ্মসূত্রের ভাষ্যে ঐরূপ নির্দেশ করিয়াছেন। এ সম্বন্ধে কেবল ইহাই বক্তব্য যে যদি বেদের এরূপ শক্তি থাকে, তবে বেদ অবশ্য মান্য। কিন্তু সে শক্তি আছে কি না, এই এক স্বতন্ত্র বিচার আবশ্যিক হইতেছে। অনেকে বলিবেন যে আমরা এরূপ শক্তি দেখিতেছি না। বেদের অর্গোরব হিন্দুশাস্ত্রেও আছে। বেদ মানিতে হইবে কি না, তাহা সকলেই আপনাপন বিবেচনামত মীমাংসা করিবেন, কিন্তু আমরা পক্ষপাতশূন্য হইয়া যেখানে লিখিতে প্রবৃত্ত হইয়াছি, এবং যখন বেদের গৌরব নির্বাচনাত্মক তত্ত্ব লিখিয়াছি, তখন হিন্দুশাস্ত্রে কোথায় কোথায় বেদের অর্গোরব আছে তাহাও আমাদিগকে নির্দেশ করিতে হয়।

১। মুণ্ডকোপনিষদের আরম্ভে “দ্বৈ বিদ্যে বেদিতব্যে ইতি হস্ম যদ্ ব্রাহ্মবিদো বদন্তি পরা চৈষাপরাচ। তত্রাপরা ঋগ্বেদো যজুর্বেদঃ সামবেদোহথর্কবেদঃ শিক্ষাকল্প ব্যাকরণং নিকৃৎসং ছন্দো জ্যোতিষমিতি। অথ পরা যয়া তদক্ষয়মগিগম্যতে।”

অর্থাৎ বেদাদি শ্রেষ্ঠতর বিদ্যা।

২। শ্রীমদ্ভাগবদগীতায়, ২।৪২, বেদপরায়ণদিগের নিন্দা আছে, যথা -

যমিমাং পুষ্পিতাং বাচস্প্রবদন্ত্যনিপশ্চিতঃ ।

বেদবাদরতাঃ পার্থ নাগ্ৰদন্তীতি বাদিনঃ ॥

কামাঙ্ক্ষনঃ স্বর্গপরাঃ জন্মকর্মফলপ্রদম্ ।

ক্রিয়াবিশেষবহুলাং ভোগৈশ্বর্য্য গতিং প্রতি ।

ভোগৈশ্বর্য্যপ্রসক্তানাং ভয়াপহৃতচেতসাম্ ।

ব্যবসায়াত্মিকাবুদ্ধিঃ সমাধৌ ন বিধিয়তে ।

ত্রৈগুণ্যবিষয়াঃ বেদাঃ নিস্ত্রৈগুণ্যো ভবাজ্জুন ॥

৩। ভাগবত পুরাণে নারদ বলিতেছেন যে পরমেশ্বর
যাহাকে অনুগ্রহ করেন সে বেদ ত্যাগ করে। ৪। ২৯, ৪২।

শকব্রহ্মণি দুম্পারে চরন্ত উরুবিস্তরে ।

মন্ত্রলিঙ্গ ব্যবচ্ছিন্নং ভজন্তো ন বিদুঃ পরম্ ।

যদা যশ্চানুগৃহ্ণাতি ভগবানাত্মভাবিতঃ ।

স জহাতি মতিং লোকে বেদে চ পরিনিষ্ঠতম্ ॥

৪। কঠোপনিষদে আছে যে বেদের দ্বারা আত্মা লভা
হয় না—যথা

“নায়মাত্মা প্রবচনেন লভ্যো ন মেধয়া বহুনা শ্রুতেন।”

শাস্ত্রানুসন্ধান করিলে এরূপ কথা আরও পাওয়া যায়।
পাঠক দেখিবেন, বেদ মানিব কেন? এ প্রশ্নের আমরা
কোন উত্তর দিই নাই। দিবারও আমাদের ইচ্ছা নাই।
যাঁহারা সক্ষম তাঁহারা সে মীমাংসা করিবেন। আমরা
পূর্ব্বেগামী পণ্ডিতদিগের প্রদর্শিত পথে পরিভ্রমণ করিয়া
যাহা দেখিয়াছি, তাহাই পাঠকের নিকট নিবেদিত হইল। *

* এই প্রবন্ধে বেদ পুরাণাদি হইতে যাহা উদ্ধৃত করিয়াছি, তাহা
মুদ্র সাহেব কৃত বিখ্যাত সংগ্রহ হইতে নীত হইয়াছে।

ভারত-কলঙ্ক ।

ভারতবর্ষ পরাধীন কেন ?

ভারতবর্ষ এতকাল পরাধীন কেন ? এ প্রশ্নের উত্তরে সকলে বলিয়া থাকেন, ভারতবর্ষীয়েরা হীনবল এইজন্য। “Effeminate Hindoos” ইয়ুরোপীয়দিগের মুখাগ্রে সর্বদাই আছে। ইহাই ভারতের কলঙ্ক। কিন্তু আবার ইউরোপীয়দিগের মুখেই ভারতবর্ষীয় সিপাহীদিগের বল ও সাহসের প্রশংসা শুনা যায়। সেই স্ত্রীস্বভাব হিন্দুদিগের বাহুবলেই কাবুল জিত হইল। বলিতে গেলে সেই স্ত্রীস্বভাব হিন্দুদিগের সাহায্যেই তাঁহারা ভারতবর্ষ জয় করিয়াছেন। তাঁহারা স্বীকার করুন বা না করুন, সেই স্ত্রীস্বভাব হিন্দুদিগের কাছে—মহারাষ্ট্র এবং শিকের কাছে অনেক রণক্ষেত্রে তাঁহারা পরাস্ত হইয়াছেন।

আধুনিক হিন্দুদিগের বলবীৰ্য্য এখন যাহাই হউক প্রাচীন হিন্দুদিগের অপেক্ষা যে তাহা ন্যূন তদ্বিষয়ে সংশয় নাই। শত শত বৎসরের অধীনতায় তাহার ক্রাস অবশ্য ঘটিয়া থাকিবে। প্রাচীন ভারতবর্ষীয়গণ পরজাতি কর্তৃক বিজিত হইবার পূর্বে যে বিশেষ বলশালী ছিলেন, এমত বিবেচনা করিবার অনেক কারণ আছে—দুর্বল বলিয়া তাঁহারা পরাধীন হইয়া নাই।

আমরা স্বীকার করি, যে এই পক্ষ সমর্থন করা সহজ নহে, এবং এতদ্বিষয়ে পর্যাপ্ত প্রমাণপ্রাপ্তি হুঃসাধ্য । এই তর্ক কেবল পুরাবৃত্ত অবলম্বন করিয়া মীমাংসা করা সম্ভব, কিন্তু হুঃভাগ্য ক্রমে অন্যান্য জাতীয়দিগের ন্যায় ভারতবর্ষীয়েরা আপনাদিগের কীর্তিকলাপ লিপিবদ্ধ করিয়া রাখেন নাই । প্রাচীন ভারতবর্ষীয় পুরাবৃত্ত নাই । সুতরাং ভারতবর্ষীয়দিগের যে শ্রাঘনীয় সমর-কীর্তি ছিল, তাহাও লোপ হইয়াছে । যে গ্রন্থগুলি “পুরাণ” বলিয়া খ্যাত আছে, তাহাতে প্রকৃত পুরাবৃত্ত কিছুই নাই । বাহা কিছু আছে তাহা অনৈসর্গিক এবং অতিমানুষ উপন্যাসে এরূপ আচ্ছন্ন, যে প্রকৃত ঘটনা কি, তাহা কোন রূপেই নিশ্চিত হয় না ।

ভাগ্যক্রমে, ভিন্নদেশীয় ইতিহাস-বেত্তাদিগের গ্রন্থে দুই স্থানে প্রাচীন ভারতবর্ষীয়দিগের যুদ্ধাদির উল্লেখ দেখিতে পাওয়া যায় । প্রথম, মাকিদনীয় আলেকজণ্ডর বা সেকন্দর দিগ্বিজয়ে যাত্রা করিয়া ভারতবর্ষে আসিয়া যুদ্ধ করিয়াছিলেন । রচনাকুশল যবনলেখকেরা তাহা পরিকীর্তিত করিয়াছেন । দ্বিতীয়, মুসলমানেরা ভারতবর্ষ জয়ার্থে সকল উদ্যম করিয়াছিলেন, তাহা মুসলমান ইতিবৃত্ত-লেখকেরা বিবরিত করিয়াছেন । কিন্তু প্রথমেই বক্তব্য যে, এরূপ সাক্ষীর পক্ষপাতিত্বের গুরুতর সম্ভাবনা । মনুষ্য চিত্রকর বলিয়াই চিত্রে সিংহ পরাজিত স্বরূপ লিখিত হয় । যে সকল ইতিহাসবেত্তা আত্ম-জাতির লাঘব স্বীকার করিয়া, সত্যের অনুরোধে শত্রুপক্ষের বশঃকীর্তন করেন, তাহারা অতি অল্পসংখ্যক । অপেক্ষাকৃত মুঢ়, আত্মগরিমাপরায়ণ মুসলমানদিগের কথা দূরে থাকুক,

কৃতবিদ্যা, সত্যনিষ্ঠাভিমানী ইউরোপীয় ইতিহাসবেত্তারা এই দোষে এরূপ কলঙ্কিত, যে তাঁহাদের রচনা পাঠ করিতে কখন কখন ঘণা করে । এই জন্ম দেশীয় এবং বিপক্ষদেশীয়, উভয়-বিধ ইতিহাসবেত্তাদিগের লিপির সাহায্য না পাইলে, কোন ঘটনারই যথার্থ্য নির্ণীত হয় না । কেবল আত্মগরিমাপরবশ, পর-ধর্ম্মদেষ্টা, সত্যভীত মুসলমান লেখকদিগের কথার উপর নির্ভর করিয়া, প্রাচীন ভারতবর্ষীয়দিগের রণনৈপুণ্য মীমাংসা করা যাইতে পারে না । সে যাহাই হউক, নিম্নলিখিত দুইটি কথা মুসলমান পুরাবৃত্ত হইতেই বিচারের দ্বারা সিদ্ধ হইতেছে ।

প্রথম, আরব-দেশীয়েরা এক প্রকার দিগ্বিজয়ী । যখন যে দেশ আক্রমণ করিয়াছে, তখনই তাহারা সেই দেশ জয় করিয়া পৃথিবীতে অতুল সাম্রাজ্য স্থাপন করিয়াছিল । তাহারা কেবল দুই দেশ হইতে পরাভূত হইয়া বহিষ্কৃত হয় । পশ্চিমে ক্রান্ত, পূর্বে ভারতবর্ষ । আরবেরা মিশর ও শিরিষ দেশ মহম্মদের মৃত্যুর পর ছয় বংশের মধ্যে, পারস্ত দশ বংশের, আফ্রিকা ও স্পেন এক এক বংশের, কাবুল অষ্টাদশ বংশের, তুর্কস্থান আট বংশের, সম্পূর্ণ-রূপে অধিকৃত করে । কিন্তু তাহারা ভারতবর্ষ জয়ের জন্ম তিন শত বংশের পর্য্যন্ত যত্ন করিয়াও ভারতবর্ষ হস্ত-গত করিতে পারে নাই । মহম্মদ বিনকাসিম সিন্ধুদেশ অধিকৃত করিয়াছিলেন বটে, কিন্তু তিনি রাজপুতানা হইতে পরাভূত হইয়া বহিষ্কৃত হইয়াছিলেন এবং তাঁহার মৃত্যুর কিছু কাল পরে সিন্ধু রাজপুতগণ কর্তৃক পুনরধিকৃত

হইয়াছিল। ভারত জয় দিগ্বিজয়ী আরব্যদিগের সাধ্য হয় নাই। এলফিন্‌ষ্টোন বলেন যে হিন্দুদিগের দেশীয় ধর্মের প্রতি দৃঢ়ানুরাগই এই অজেয়তার কারণ। আমরা বলি রণনৈপুণ্য, —যোধশক্তি। হিন্দুদিগের আত্মধর্ম্যানুরাগ অদ্যাপি ত বলবৎ।

তবে কেন হিন্দুরা সাত শত বৎসর পরজাতি-পদানত ?

দ্বিতীয়, যখন কোন প্রাচীন দেশের নৈকট্যে নবাত্ম্যদয়-বিশিষ্ট এবং বিজয়াভিলাষী জাতি অবস্থিতি করে, তখন প্রাচীন জাতি প্রায় নবীনের প্রভুত্বাধীন হইয়া যায়। এইরূপ সর্কান্তকারী বিজয়াভিলাষী জাতি প্রাচীন ইউরোপে রোমকেরা, আসিয়ায় আরব্য ও তুরকীয়েরা। যে যে জাতি ইহাদিগের সংশ্রবে আসিয়াছে, তাহারাই পরাভূত হইয়া ইহাদিগের অধীন হইয়াছে। কিন্তু তন্মধ্যে হিন্দুরা যত দূর দুর্জয় হইয়াছিল, এতদূশ আর কোন জাতিই হয় নাই। আরব্যগণ কর্তৃক যত অল্পকালমধ্যে মিশর, উত্তর আফ্রিকা, স্পেন, পারস্য, তুরক, এবং কাবুলরাজ্য উচ্ছিন্ন হইয়াছিল, তাহা পূর্বেই কথিত হইয়াছে। তদপেক্ষা সুবিখ্যাত কর্ণি-পয় সাম্রাজ্যের উদাহরণ দেওয়া যাইতে পারে। রোমকেরা প্রথম ২০০ খ্রীষ্ট পূর্বাব্দে গ্রীস আক্রমণ করে। তদবধি ৫২ বৎসর মধ্যে ঐ 'রাজ্য একেবারে নিঃশেষ বিজিত হয়। সুবিখ্যাত কার্থেজ রাজ্য ২৬৪ খ্রীষ্ট-পূর্বাব্দে প্রথম রোমকদিগের সহিত সংগ্রামে প্রবৃত্ত হয়। ১৪৬ খ্রীষ্ট-পূর্বাব্দে, অর্থাৎ এক শত বিশ বৎসর মধ্যে সেই রাজ্য রোমকগণ কর্তৃক ধ্বংসিত হয়। পূর্ব রোমক বা গ্রীক সাম্রাজ্য চতুর্দশ শতাব্দীর প্রথম ভূভাগে রকীয়গণ

কর্তৃক আক্রান্ত হইয়া ১৪৫৩ খ্রীষ্টাব্দে, অর্থাৎ পঞ্চাশৎ বৎসর মধ্যে তুরকী দ্বিতীয় মহম্মদের হস্তে বিলুপ্ত হয়। পশ্চিম রোমক, যাহার নাম অদ্যাপি জগতে বীরদর্পের পতাকাস্বরূপ, তাহাই ২৮৬ খ্রীষ্টাব্দে উত্তরীয় বর্করজাতি কর্তৃক প্রথম আক্রান্ত হইয়া ৪৭৬ খ্রীষ্টাব্দে, অর্থাৎ প্রথম বর্কর বিপ্লবের ১৯০ বৎসর মধ্যে ধ্বংসপ্রাপ্ত হয়। ভারত-বর্ষ ৬৬৪ খ্রীষ্টাব্দে আরব্য মুসলমানগণ কর্তৃক প্রথম আক্রান্ত হয়। তদক হইতে পাঁচ শত উনত্রিশ বৎসর পরে শাহাবুদ্দীন ঘোরী কর্তৃক উত্তর ভারত অধিকৃত হয়। শাহাবুদ্দীন বা তাঁহার অনুচরেরা আরব্য জাতীয় ছিলেন না। আরব্যেরা যেরূপ বিফলযত্ন হইয়াছিল, গজনী নগর-ধিষ্ঠাতা তুরকীয়েরা তদ্রূপ। যাহারা পৃথ্বীরাজ, জয়চন্দ্র এবং সেনরাজা প্রভৃতি হইতে উত্তর ভারতরাজ্য অপহরণ করে, তাহারা পাঠান বা আফগান। আরব্যদিগের প্রথম ভারতাক্রমণের ৫২৯ বৎসর ও তুরকীদিগের প্রথম ভারতাক্রমণের ২১৩ বৎসর পরে, তৎস্থানীয় পাঠানেরা ভারতরাজ্যাধিকার করিয়াছিল। পাঠানেরা কখনই আরব্য বা তুরকী-বংশীয়দিগের ন্যায়, সমৃদ্ধিসম্পন্ন বা প্রতাপাবিত নহে। তাহারা কেবল পূর্ণগত আরব্য ও তুরকীদিগের সূচিত কার্য সম্পন্ন করিয়াছিল। আরব্য, তুরকী, এবং পাঠান, এই তিন জাতির যত্ন-পারম্পর্যে সার্বিক পাঁচ শত বৎসরে ভারতবর্ষের স্বাধীনতা লুপ্ত হয়।*

* পশ্চিমাংশে আরব্য ও তুরকীয়েরা কিছু ভূমি আধিকার করিয়াছিল মাত্র।

মুসলমান সাক্ষীরা এইরূপ বলে । ইহাও স্মরণ রাখা কর্তব্য যে, ইহাদের নিকট হিন্দুরা যখন পরিচিত হইয়াছিলেন, তখন হিন্দু দিগের স্তম্ভময় প্রায় অতীত হইয়াছিল,— রাজলক্ষী ক্রমে ক্রমে মলিনা হইয়া আসিয়াছিলেন । খৃষ্টীয় অন্ধের পূর্বগত হিন্দুরা অধিকতর বলবান্ ছিলেন, তদ্বিষয়ে সন্দেহ নাই ।

সেই সময়ে গ্রীকদিগের সহিত পরিচয় । তাহারা নিজে অদ্বিতীয় বলবান্ । তাহারা ভূয়োভূয়ঃ ভারতবর্ষীয়দিগের সাহস ও রণনৈপুণ্যের প্রশংসা করিয়াছে । মাকিদনীয় বিপ্লব বর্ণন কালে, তাহারা এইরূপ পুনঃ পুনঃ নির্দেশ করিয়াছে যে, আসিয়া প্রদেশে এইরূপ রণপণ্ডিত দ্বিতীয় জাতি তাহারা দেখে নাই । এবং হিন্দুগণ কর্তৃক যে রূপ গ্রীক সৈন্যহানি হইয়াছিল, এরূপ অন্য কোন জাতি কর্তৃক হয় নাই । প্রাচীন ভারতবর্ষীয়দিগের রণদক্ষতা সম্বন্ধে যদি কাহারও সংশয় থাকে, তবে তিনি ভারতবর্ষের বৃত্তান্তলেখক গ্রীকদিগের গ্রন্থ পাঠ করিবেন ।

ভারতভূমি সর্ষরত্নপ্রসবিনী, পররাজগণের নিতান্ত লোভের পাত্রী । এই জগৎ সর্ষকালে নানা জাতি আসিয়া উত্তর পশ্চিমে পার্শ্বত্যাগে প্রবেশ লাভ পূর্বক ভারতাদিকারের চেষ্টা পাইয়াছে । পারসীক, যোন, বাহ্লিক, শক, হন, আরব্য, তুরকী সকলেই আসিয়াছে, এবং সিন্ধু পারে বা তদুত্তর তীরে স্বল্প প্রদেশ কিছু দিনের জগৎ অধিকৃত করিয়া, পরে বহিষ্কৃত হইয়াছে । পঞ্চদশ শতাব্দী কাল পর্য্যন্ত, আর্ঘ্যেরা সকল জাতিকে শীঘ্র বা বিলম্বে দূরীকৃত করিয়া আত্মদেশ রক্ষা করিয়াছিল ।

পঞ্চদশ শত বৎসর পর্যন্ত প্রবল জাতি মাত্রেরই আক্রমণশুলী-ভূঁই হইয়া এতকাল যে স্বতন্ত্রতা রক্ষা করিয়াছে, এরূপ অন্য কোন জাতি পৃথিবীতে নাই, এবং কখন ছিল কি না সন্দেহ । অতি দীর্ঘকাল পর্যন্ত যে হিন্দুদিগের সমৃদ্ধি অক্ষয় হইয়াছিল, তাহাদিগের বাহুবলই ইহার কারণ, সন্দেহ নাই । অন্য কারণ দেখা যায় না ।

এই সকল প্রমাণ সত্ত্বেও সর্বদা শুনা যায় যে, হিন্দুরা চিরকাল রণে অপারগ । অদূরদর্শীদিগের নিকট ভারতবর্ষের এই চিরকলঙ্কের তিনটি কারণ আছে ।

প্রথম,—হিন্দু ইতিবৃত্ত নাই ;—আপনার গুণগান আপনি না গায়িলে কে গায় ? লোকের ধর্ম্ম এই যে, যে আপনাকে মহাপুরুষ বলিয়া পরিচিত না করে, কেহ তাহাকে মানুষের মধ্যে গণ্য করে না । কোন্ জাতির সুখ্যাতি কবে অপর জাতি কর্তৃক প্রচারিত হইয়াছে ? রোমকদিগের রণ-পাণ্ডিত্যের প্রমাণ—রোমকলিখিত ইতিহাস । গ্রীকদিগের যোদ্ধৃগুণের পরিচয়,—গ্রীক লিখিত গ্রন্থ । মুসলমানেরা যে মহারণকুশল, ইহাও কেবল মুসলমানের কথাতেই বিশ্বাস করিয়া জানিতে পারিতেছি । কেবল সে গুণে হিন্দুদিগের গৌরব নাই—কেননা সে কথার হিন্দু সাক্ষী নাই ।

দ্বিতীয় কারণ,—যে সকল জাতি পররাজ্যাপহারী, প্রায় তাহাঁরাই রণপণ্ডিত বলিয়া অপর জাতির নিকট পরিচিত হইয়াছে । যাহারা কেবল আত্মরক্ষা মাত্রে সন্তুষ্ট হইয়া, পররাজ্য লাভের কখন ইচ্ছা করে নাই, তাহারা কখনই বীরগৌরব লাভ করে নাই । ন্যায়নিষ্ঠা এবং বীরগৌরব

একাধারে সচারাচর ঘটে না। অদ্যাপি এ দেশীয় ভাষায়, “ভাল মানুষ” শব্দের অর্থ ভীক্সুভাবে লোক—অকস্মী। “হরি নিতান্ত ভাল মানুষ।” অর্থ—হরি নিতান্ত অপদার্থ !

হিন্দুরাজগণ যে একেবারে পররাজ্যে লোভশূন্য ছিলেন, এমত আমরা বলি না। তাঁহারা পরস্পরকে আক্রমণ করিতে কখন ক্রটি করিতেন না। কিন্তু ভারতবর্ষ, হিন্দুরাজ্যকালে ক্ষুদ্র ক্ষুদ্র মণ্ডলে বিভক্ত ছিল। ভারতবর্ষ এতাদৃশ বিস্তৃত প্রদেশ যে, ক্ষুদ্র মণ্ডলাধিকারী রাজগণ কখন কেহ তাহার বাহিরে দেশজয়ে বাইবার বাসনা করিতেন না ; কোন হিন্দু রাজা কস্মিন্ কালে সমগ্র ভারত সাম্রাজ্যভুক্ত করিতে পারেন নাই। দ্বিতীয়তঃ, হিন্দুরা যখন স্বেচ্ছ প্রভৃতি অপর ধর্মাবলম্বী জাতিগণকে বিশেষ ঘৃণা করিতেন ; তাহাদিগের উপর প্রভুত্ব করিবার কোন প্রয়াস করিতেন, এমত সম্ভাবনা নহে ; বরং তদ্দেশ-জয়ে যাত্রা করিলে আপন জাতি-ধর্ম বিনাশের শঙ্কা করিবারই সম্ভাবনা। অতএব সম্ভব হইলেও হিন্দুরা ভারতবর্ষের বাহিরে বিজয়াজ্ঞায় বাইবার কোন সম্ভাবনা ছিল না। সত্য বটে, এক্ষণকার কাবুল রাজ্যের অধিকাংশ পূর্বকালে হিন্দুরাজ্যভুক্ত ছিল, কিন্তু সে প্রদেশ তৎকালে ভারতবর্ষের একাংশ বলিয়া গণ্য হইত।

প্রাচীন হিন্দুদিগের এ কলঙ্কের তৃতীয় কারণ.—হিন্দুরা বহুদিন হইতে পরাধীন। যে জাতি বহুকাল পরাধীন, তাহাদিগের আবার বীরগৌরব কি? কিন্তু এক্ষণকার হিন্দুদিগের বীর্য-লাঘব, প্রাচীন হিন্দুদিগের অবমানার উপযুক্ত কারণ

নহে । প্রায় অনেক দেশেই দেখা যায় যে, প্রাচীন, এবং আধুনিক লোকের মধ্যে চরিত্রগত সাদৃশ্য অধিক নহে । ইটালি ও গ্রীস, ভারতবর্ষের ন্যায় এই কথাই উদাহরণস্থল । মধ্যকালিক ইটালীয়, এবং বর্তমান গ্রীকদিগের চরিত্র হইতে প্রাচীন রোমক ও গ্রীকদিগকে কাপুরুষ বলিয়া সিদ্ধ করা যাদৃশ অন্যায়, আধুনিক ভারতবর্ষীয়দিগের পরাধীনতা হইতে প্রাচীনদিগের বললাঘব সিদ্ধ করা তাদৃশ অন্যায় ।

আমরা এমতও বলি না যে, আধুনিক ভারতবর্ষীয়েরা নিতান্ত কাপুরুষ, এবং সেই জন্য এত কাল পরাধীন । এ পরাধীনতার অন্য কারণ আছে । আমরা তাহার দুইটি কারণ সবিস্তারে এ স্থলে নির্দিষ্ট করি ।

প্রথম, ভারতবর্ষীয়েরা স্বভাবতই স্বাধীনতার আকাঙ্ক্ষারহিত । স্বদেশীয়, স্বজাতীয় লোকে আমাদিগকে শাসিত করুক, পরজাতীয়দিগের শাসনাধীন হইব না, এরূপ অভিপ্রায় ভারতবর্ষীয়দিগের মনে আইসে না । স্বজাতীয়ের রাজশাসন মঙ্গলকর বা সুখের আকর, পরজাতীয়ের রাজদণ্ড পীড়াদায়ক বা লাঘবের কারণ, এ কথা তাহাদের বড় হৃদয়ঙ্গম নহে । পরতন্ত্রতা অপেক্ষা স্বতন্ত্রতা ভাল, এরূপ একটা তাহাদিগের বোধ থাকিলে থাকিতে পারে, কিন্তু সেটি বোধমাত্র—সে জ্ঞান আকাঙ্ক্ষায় পরিণত নহে । অনেক বস্তু আমাদিগের ভাল বলিয়া জ্ঞান থাকিতে পারে, কিন্তু সে জ্ঞানে তৎপ্রতি সকল স্থানে আকাঙ্ক্ষা জন্মে না । কে না হরিশ্চন্দ্রের দাতৃত্ব বা কাশ্মীরসের দেশবাৎসল্যের প্রশংসা করে ? কিন্তু তাহার মধ্যে কয় জন হরি-

শব্দের ন্যায় সৰ্বত্যাগী বা কাশিয়সের গায় আত্মঘাতী হইতে প্রস্তুত ? প্রাচীন বা আধুনিক ইউরোপীয় জাতীয়দিগের মধ্যে স্বাতন্ত্র্যপ্রিয়তা বলবতী আকাঙ্ক্ষায় পরিণত । তাঁহাদিগের বিশ্বাস যে স্বতন্ত্রতা ত্যাগের অগ্রে প্রাণ এবং সৰ্বস্ব ত্যাগ কর্তব্য । হিন্দুদের মধ্যে তাহা নহে । তাঁহাদিগের বিবেচনা “যে ইচ্ছা রাজা হউক, আমাদের কি ? স্বজাতীয় রাজা, পরজাতীয় রাজা, উভয় সমান । স্বজাতীয় হউক পরজাতীয় হউক, সুশাসন করিলে দুই সমান । স্বজাতীয় রাজা সুশাসন করিবে পরজাতীয় সুশাসন করিবে না, তাহার স্থিরতা কি ? যদি তাহার স্থিরতা নাই, তবে কেন স্বজাতীয় রাজার জন্য প্রাণ দিব ? রাজ্য রাজার সম্পত্তি । তিনি রাখিতে পারেন রাখুন । আমাদিগের পক্ষে উভয় সমান । কেহই আমাদিগের বস্তু ভাগ ছাড়িবে না, কেহই চোরকে পুরস্কৃত করিবে না । যে রাজা হয় হউক, আমরা কাহারও জন্য অঙ্গুলি ক্ষত করিব না ।*

* আমরা এমত বলি না, যে ভারতবর্ষে কখন কোন স্বাতন্ত্র্যভক্ত জাতি ছিল না । মৌবার-রাজপুতাদিগের অপূৰ্ণ কাহিনী ঘাঁহারা টাডের এম্বে অবগত হইয়াছেন, তাঁহারা জানেন, যে ঐ রাজপুতগণ হইতে স্বাতন্ত্র্যভক্ত জাতি কখন পৃথিবীতে দেখা দেয় নাই । সেই স্বাতন্ত্র্য-প্রিয়তার ফলও চমৎকার । মৌবার ক্ষুদ্র রাজ্য হইয়াও ছয় শত বৎসর পর্যন্ত মুসলমান সাম্রাজ্যের মধ্যস্থলে স্বাধীন হিন্দু রাজপতাকা উড়াইয়াছে । আকবর বাদসাহের বাহুবলও মৌবার ধ্বংসে সক্ষম হয় নাই । অদ্যাপি উদয়পুরের রাজবংশ পৃথিবীর মধ্যে প্রাচীন রাজবংশ বলিয়া বিখ্যাত । কিন্তু এক্ষণে আর সে দিন নাই । সে রামও নাই সে অধোধ্যাও নাই । উপরে আমরা যাহা বলিয়াছি, তাহা সাধারণ হিন্দুসম্বন্ধে যথার্থ ।

আমরা এক্ষণে স্বাতন্ত্র্যপর ইংরেজদিগের নিকট শিক্ষাপ্রাপ্ত হইয়া এই সকল কথা ভ্রম দেখিতে পাইতেছি। কিন্তু ইহা অস্বাভাবিক নহে, এবং ইহার ভ্রান্তি সহজে অনুমেয়ও নহে। স্বভাববশতঃ কোন জাতি অসভ্যকাল হইতেই স্বাতন্ত্র্যপ্রিয়; স্বভাববশতঃ কোন জাতি সুসভ্য হইয়াও তৎপ্রতি আস্থাশূন্য। এই সংসারে অনেকগুলিন স্পৃহীনয় বস্তু আছে; তন্মধ্যে সকলেই সকল বস্তুর জন্ম যত্ববান্ হয় না। ধন এবং যশঃ উভয়েই স্পৃহনীয়। কিন্তু আমরা সচরাচর দেখিতে পাই, এক ব্যক্তি ধনসঞ্চয়েই রত, যশের প্রতি তাহার অনাদর; অন্য ব্যক্তি যশোলিপ্সু, ধনে হতাশ। রাম, ধনসঞ্চয়ে একত্রত হইয়া, কার্পণ্য, নীচাশয়তা প্রভৃতি দোষে যশোহানি করিতেছে; যত্ন, অমিত ধনরাশি নষ্ট করিয়া, দাতৃত্বাদি গুণে যশঃ সঞ্চয় করিতেছে। রাম ভ্রান্ত কি যত্ন ভ্রান্ত, তাহার মীমাংসা নিতান্ত সহজ নহে। অন্ততঃ ইহা স্থির যে উভয়মধ্যে কাহারও কার্য স্বভাববিরুদ্ধ নহে। সেইরূপ গ্রীকেরা স্বাধীনতাপ্রিয়; হিন্দুরা স্বাধীনতাপ্রিয় নহে, শান্তিসুখের অভিলাষী; ইহা কেবল জাতিগত স্বভাববৈচিত্র্যের ফল, বিশ্বয়ের বিষয় নহে।

কিন্তু অনেকে এ কথা মনে করেন না। হিন্দুরা যে পরাধীন, স্বাধীনতালাভের জন্য উৎসুক নহে, ইহাতে তাঁহারা অনুমান করেন যে হিন্দুরা দুর্বল, রণভীরু, স্বাধীনতালাভে অক্ষম; এ কথা তাঁহাদের মনে পড়ে না যে, হিন্দুরা সাধারণতঃ স্বাধীনতালাভে অভিলাষী বা যত্নবান্ নহে। অভিলাষী বা যত্নবান্ হইলেই লাভ করিতে পারে।

স্বাতন্ত্র্য অনাস্থা, কেবল আধুনিক হিন্দুদিগের স্বভাব এমত

আমরা বলি না ; ইহা হিন্দুজাতির চিরস্বভাব বোধ হয় । যিনি এমত বিবেচনা করেন যে, হিন্দুরা সাত শত বৎসর স্বাতন্ত্র্যহীন হইয়া, এক্ষণে তদ্বিষয়ে আকাজক্ষাশূন্য হইয়াছে, তিনি অবতারণা অনুমান করেন । সংস্কৃত সাহিত্যাদিতে কোথাও এমন কিছু পাওয়া যায় না যে, তাহা হইতে পূর্বতন হিন্দুগণকে স্বাধীনতা-প্রয়াসী বলিয়া সিদ্ধ করা যাইতে পারে । পুরাণোপপুরাণ কাব্য নাটকাদিতে কোথাও স্বাধীনতার গুণগান নাই । মীবার তিন্ন কোথাও দেখা যায় না যে, কোন হিন্দুসমাজ স্বাতন্ত্র্যের আকাজক্ষায় কোন কার্যে প্রবৃত্ত হইয়াছে । রাজার রাজ্য সম্পত্তি রক্ষায় যত্ন, বীরের বীরদর্প, ক্ষত্রিয়ের যুদ্ধপ্রয়াস, এ সকলের ভূরি ভূরি উল্লেখ দেখিতে পাওয়া যায় । কিন্তু স্বাতন্ত্র্য লাভাকাজক্ষা সে সকলের মধ্যগত নহে । স্বাতন্ত্র্য, স্বাধীনতা, এ সকল নূতন কথা ।

ভারতবর্ষীয়দিগের এইরূপ স্বভাবসিদ্ধ স্বাতন্ত্র্য অনাস্থার কারণানুসন্ধান করিলে তাহাও দুজের নহে । ভারতবর্ষের ভূমির উর্বরতাশক্তি এবং বায়ুর তাপাতিশয্য প্রভৃতি ইহার গৌণ কারণ । ভূমি উর্বরা, দেশ সর্বসামগ্রী-পরিপূর্ণ, অন্নায়ুসে জীবনযাত্রা নির্বাহ হয় । লোককে অধিক পরিশ্রম করিতে হয় না, এ জন্য 'অবকাশ যথেষ্ট । শারীরিক পরিশ্রম হইতে অধিক অবকাশ হইলে, সহজেই মনের গতি আভ্যন্তরিক হয় ; ধ্যানের বাহুল্য ও চিন্তার বাহুল্য হয় । তাহার এক ফল কবিত্ব, জগত্তত্তে পাণ্ডিত্য । এই জন্ত হিন্দুরা অল্পকালে অদ্বিতীয় কবি এবং দার্শনিক হইয়াছিলেন । কিন্তু মনের আভ্যন্তরিক গতির দ্বিতীয় ফল বাহ্যস্থে অনাস্থা । বাহ্যস্থে

অনায়া হইলে সুভরাং নিশ্চেষ্টতা জন্মিবে । স্বাতন্ত্র্য অনায়া এই স্বাভাবিক নিশ্চেষ্টতার এক অংশ মাত্র । আৰ্য্য ধর্মতত্ত্বে, আৰ্য্য দর্শনশাস্ত্রে এই অচেষ্টা-পরতা সর্বত্র বিদ্যমান । কি বৈদিক, কি বৌদ্ধ, কি পৌরণিক ধর্ম, সকলেই এই নিশ্চেষ্টতারই সম্বন্ধনাপরিপূর্ণ । বেদ হইতে বেদান্ত সাংখ্যাদি দর্শনের উৎপত্তি ; তদনুসারে লয় বা ভোগক্ষান্তিই মোক্ষ ; নিকামত্বই পুণ্য । বৌদ্ধধর্মের সার,—নির্বাণই মুক্তি ।

এক্ষণে জিজ্ঞাসা হইতে পারে যে, হিন্দুজাতি যদি চিরকাল স্বাতন্ত্র্য হতাদর, তবে মুসলমানকৃত জয়ের পূর্বে সার্ব্বিক সহস্র বৎসর তাহারা কেন যত্ন করিয়া পুনঃ পুনঃ পরজাতি বিমুখ পূর্বক স্বাধীনতা রক্ষা করিয়াছিল ? পরজাতিগণ সহজে কখন বিমুখ হয় নাই, অনেক কষ্টে হইয়া থাকিবে । যে সুখের প্রতি আস্থা নাই, সে সুখের জন্য হিন্দুসমাজ কেন এত কষ্ট স্বীকার করিয়াছিল ?

উত্তর, হিন্দুসমাজ যে কখন শক যবনপ্রভৃতিকে বিমুখীকরণ জন্য বিশেষ যত্নবান্ হইয়াছিল, তাহার প্রমাণ কোথাও নাই । হিন্দুরাজগণ আপনার রাজ্যসম্পত্তি রক্ষার জন্য যত্ন করিয়াছিলেন, তাঁহাদিগের সংগৃহীত সেনায় যুদ্ধ করিত ; যখন পারিত শত্রু বিমুখ করিত, তাহাতেই দেশের স্বাতন্ত্র্য রক্ষা হইত ; তন্নিম্ন যে “আমাদের দেশে ভিন্ন জাতীয় রাজা হইতে দিব না” বলিয়া সাধারণ জনগণ কখন উৎসাহযুক্ত বা উদ্যমশালী হইয়াছিল, ইহার প্রমাণ কোথাও নাই । বরং তদ্বিপরীতই প্রকৃত বলিয়া বিবেচনা হয় । যখনই সমরলক্ষ্মীর কোপদৃষ্টি-প্রভাবে হিন্দু রাজা বা হিন্দু সেনাপতি রণে হত হইয়াছেন,

তখনই হিন্দুসেনা রণে ভঙ্গ দিয়া পলায়ন করিয়াছে, আর যুদ্ধে সমবেত হয় নাই। কেন না আর কাহার জন্য যুদ্ধ করিবে ? যখনই রাজা নিধনপ্রাপ্ত, বা অন্য কারণে রাজ্য রক্ষার নিশ্চেষ্ট হইয়াছেন, তখনই হিন্দুযুদ্ধ সমাধা হইয়াছে। আর কেহ তাহার স্থানীয় হইয়া স্বাতন্ত্র্য পালনের উপায় করে নাই ; সাধারণ সমাজ হইতে অরক্ষিত রাজ্যরক্ষার কোন উদ্যম হয় নাই। যখন বিধির বিপাকে যবন বা পারসিক, শক বা বাহ্লিক, কোন প্রদেশ খণ্ডের রাজাকে রণে পরাজিত করিয়া তাঁহার সিংহাসনে বসিয়াছে, প্রজাগণ তখনই তাহাকে পূৰ্ব্বপ্রভুর তুল্য সমাদর করিয়াছে, রাজ্যাপহরণে কোন আপত্তি করে নাই। তিন সহস্র বৎসরের অধিক কাল ধরিয়া, আৰ্য্যের সঙ্গে আৰ্য্যজাতীয়, আৰ্য্যজাতীয়ের সঙ্গে ভিন্ন জাতীয়, ভিন্ন জাতীয়ের সঙ্গে ভিন্ন জাতীয় ; — মগধের সঙ্গে কাণ্ডকুজ, কাণ্ডকুজের সঙ্গে দিল্লী, দিল্লীর সঙ্গে লাহোর, হিন্দুর সঙ্গে পাঠান, পাঠানের সঙ্গে মোগল, মোগলের সঙ্গে ইংরেজ ; — সকলের সঙ্গে সকলে বিবাদ করিয়া, চিরপ্রজ্বলিত সমরানলে দেশ দগ্ধ করিয়াছে। কিন্তু সে সকল কেবল রাজায় রাজায় যুদ্ধ ; সাধারণ হিন্দুসমাজ কখন কাহারও হইয়া কাহারও সহিত যুদ্ধ করে নাই। হিন্দুরাজগণ অথবা হিন্দুস্থানের রাজগণ, ভূয়োভূয়ঃ ভিন্ন জাতি কর্তৃক জিত হইয়াছে, কিন্তু সাধারণ হিন্দুসমাজ যে কখন কোন পরজাতি কর্তৃক পরাজিত হইয়াছে, এমত বলা যাইতে পারে না ; কেন না সাধারণ হিন্দুসমাজ কখন কোন পরজাতির সঙ্গে যুদ্ধ করে নাই।

এই বিচারে হিন্দুজাতির দীর্ঘকালগত পরাধীনতার দ্বিতীয়

কারণ আসিয়া পড়িল। সে কারণ,—হিন্দুসমাজের অনৈক্য, সমাজমধ্যে জাতি-প্রতিষ্ঠার অভাব, জাতি-হিতৈষার অভাব, অথবা অন্য যাহাই বলুন। আমরা সবিস্তারে তাহা বুঝাই-তেছি।

আমি হিন্দু, তুমি হিন্দু, রাম হিন্দু, যত্ন হিন্দু, আরও লক্ষ লক্ষ হিন্দু আছে। এই লক্ষ লক্ষ হিন্দুমাত্রেরই যাহাতে মঙ্গল, তাহাতেই আমার মঙ্গল। যাহাতে তাহাদের মঙ্গল নাই, আমারও তাহাতে মঙ্গল নাই। অতএব সকল হিন্দুর যাহাতে মঙ্গল হয়, তাহাই আমার কর্তব্য। যাহাতে কোন হিন্দুর অমঙ্গল হয়, তাহা আমার অকর্তব্য। যেমন আমার এইরূপ কর্তব্য, আর এইরূপ অকর্তব্য তোমারও তদ্রূপ, রামের তদ্রূপ, যত্নেরও তদ্রূপ, সকল হিন্দুরই তদ্রূপ। সকল হিন্দুরই যদি এক রূপ কার্য হইল, তবে সকল হিন্দুর কর্তব্য যে এক পরামর্শী, একমতাবলম্বী, একত্র মিলিত হইয়া কার্য করে। এই জ্ঞান জাতিপ্রতিষ্ঠার প্রথম ভাগ ; অর্দ্ধাংশ মাত্র।

‘ হিন্দুজাতি ভিন্ন পৃথিবীতে অন্য অনেক জাতি আছে। তাহাদের মঙ্গল মাত্রেরই আমাদের মঙ্গল হওয়া সম্ভব নহে। অনেক স্থানে তাহাদের মঙ্গলে আমাদের অমঙ্গল। যেখানে তাহাদের মঙ্গলে আমাদের অমঙ্গল, সেখানে তাহাদের মঙ্গল যাহাতে না হয়, আমরা তাহাই করিব। ইহাতে পরজাতিপীড়ন করিতে হয়, করিব। অপিচ, যেমন তাহাদের মঙ্গলে আমাদের অমঙ্গল ঘটিতে পারে, তেমনি আমাদের মঙ্গলে তাহাদের অমঙ্গল হইতে পারে। হয় হউক, আমরা সে জন্য আত্মজাতির মঙ্গল স্বার্থে বিরত হইব না ; পরজাতির অমঙ্গল সাধন

করিয়া আত্মমঙ্গল সাধিতে হয় তাহাও করিব । জাতিপ্রতিষ্ঠার এই দ্বিতীয় ভাগ ।

দেখা যাইতেছে যে, এইরূপ মনোর্ত্তি নিস্পাপ পরিশুদ্ধ ভাব বলিয়া স্বীকার করা যাইতে পারে না । ইহার গুরুতর দোষাবহ বিকার আছে । সেই বিকারে, জাতিসাধারণের এরূপ ভ্রান্তি জন্মে যে, পরজাতির মঙ্গল মাত্রেই স্বজাতির অমঙ্গল, পরজাতির অমঙ্গল মাত্রেই স্বজাতির মঙ্গল বলিয়া বোধ হয় । এই কুসংস্কারের বশবর্ত্তী হইয়া ইউরোপীয়েরা অনেক দুঃখ ভোগ করিয়াছে । অনর্থক ইহার জন্যে অনেকবার সমরানলে ইউরোপ দগ্ধ করিয়াছে ।

স্বজাতি-প্রতিষ্ঠা ভালই হউক বা মন্দই হউক, যে জাতি-মধ্যে ইহা বলবতী হয়, সে জাতি অন্য জাতি অপেক্ষা প্রবলতা লাভ করে । আজি কালি এই জ্ঞান ইউরোপে বিশেষ প্রধান, এবং ইহার প্রভাবে তথায় অনেক বিষম রাজ্যবিপ্লব ঘটিতেছে । ইহার প্রভাবে ইটালি এক রাজ্যভুক্ত হইয়াছে । ইহারই প্রভাবে বিষম প্রতাপশালী নূতন জার্মান সাম্রাজ্য স্থাপিত হইয়াছে । আরও কি হইবে বলা যায় না ।

এমত বলি না যে, ভারতবর্ষে এই জাতিপ্রতিষ্ঠা কন্দিন কালে ছিল না । ইউরোপীয় পণ্ডিতেরা সিদ্ধান্ত করিয়াছেন যে, আৰ্য্য জাতীয়েরা চিরকাল ভারতবর্ষবাসী নহে । অন্যত্র হইতে ভারতবর্ষে আসিয়া, তদ্দেশ অধিকার করিয়াছিল । প্রথম আৰ্য্যজয়ের সময়ে বেদাদির সৃষ্টি হয়, এবং সেই সময়কেই পণ্ডিতেরা বৈদিক কাল কহেন । বৈদিককালে এবং তাহার অব্যবহিত পরেই জাতিপ্রতিষ্ঠা যে আৰ্য্যপদের মধ্য বিশেষ

বলবতী ছিল, তাহার অনেক প্রমাণ বৈদিক মন্ত্রাদি মধ্যে পাওয়া যায়। তৎকালিক সমাজ-নিয়ন্তা ব্রাহ্মণেরা যে রূপে সমাজ বিধিবদ্ধ করিয়াছিল, তাহাও ঐ জ্ঞানের পরিচয়স্থল। আৰ্য্য বর্ষে এবং শূদ্রে যে বিষম বৈলক্ষণ্য বিধিবদ্ধ হইয়াছে, তাহাও ইহার ফল। কিন্তু ক্রমে আৰ্য্যবংশ বিস্তৃত হইয়া গড়িলে আর সে জাতিপ্রতিষ্ঠা রহিল না। আৰ্য্যবংশীয়েরা বিস্তৃত ভারতবর্ষের নানা প্রদেশ অধিকৃত করিয়া স্থানে স্থানে এক এক খণ্ড সমাজ স্থাপন করিল। ভারতবর্ষ এরূপ বহুসংখ্যক খণ্ড-সমাজে বিভক্ত হইল। সমাজভেদ, ভাষার ভেদ, আচার ব্যবহারের ভেদ, নানা ভেদ, শেষে জাতিভেদে পরিণত হইল। বাহ্লিক হইতে পৌণ্ড্র পর্য্যন্ত, কাশ্মীর হইতে চোলা ও পাণ্ড্য পর্য্যন্ত সমস্ত ভারত-ভূমি মক্ষিকাসমাকুল মধুচক্রের গ্ৰায় নানা জাতি, নানা সমাজে পরিপূর্ণ হইল। পরিশেষে, কপিলবাস্তুর রাজকুমার শাক্যসিংহের হস্তে এক অভিনব ধর্ম্মের সৃষ্টি হইলে, অন্ত্যন্ত প্রভেদের উপর ধর্ম্মভেদ জন্মিল। ভিন্ন দেশ, ভিন্ন ভাষা, ভিন্ন রাজ্য, ভিন্ন ধর্ম্ম ; আর এক জাতীয়ত্ব কোথায় থাকে ? সাগরমধ্যস্থ মীনদলবৎ ভারতবর্ষীয়েরা একতাসূন্য হইল। পরে আবার মুসলমান আসিল। মুসলমানদিগের বংশবৃদ্ধি হইতে লাগিল। কালে, সাগরোশ্বির উপর সাগরোশ্বিবৎ নূতন নূতন মুসলমান সম্প্রদায়, পাশ্চাত্য পর্ব্বতপার হইতে আসিতে লাগিল। দেশীয় লোকে সহস্রে সহস্রে রাজানুকম্পার লোভে বা রাজপীড়নে মুসলমান হইতে লাগিল। অতএব ভারতবর্ষ-বাসিগণ মুসলমান হিন্দু মিশ্রিত হইল। হিন্দু, মুসলমান, দ্রোণাল,

পাঠান, রাজপুত, মহারাষ্ট্র, একত্র কর্ম করিতে লাগিল । তখন জাতির ঐক্য কোথায় ? ঐক্যজ্ঞান কিমে থাকিবে ?

এই ভারতবর্ষে নানা জাতি । বাসস্থানের প্রভেদে, ভাষার প্রভেদে, বংশের প্রভেদে, ধর্মের প্রভেদে, নানা জাতি । বাঙ্গালি, পঞ্জাবী, তৈলঙ্গী, মহারাষ্ট্রী, রাজপুত, জাঠ, হিন্দু, মুসলমান, ইহার মধ্যে কে কাহার সঙ্গে একতাবুক্ত হইবে ? ধর্মগত ঐক্য থাকিলে বংশগত ঐক্য নাই, বংশগত ঐক্য থাকিলে ভাষাগত ঐক্য নাই, ভাষাগত ঐক্য থাকিলে নিবাসগত ঐক্য নাই । রাজপুত জাঠ, এক ধর্মাবলম্বী হইলে, ভিন্ন বংশীয় বলিয়া ভিন্ন জাতি ; বাঙ্গালি বেহারী এক বংশীয় হইলে, ভাষাভেদে ভিন্ন জাতি ; মৈথিলি কনোজী একভাষী হইলে, নিবাসভেদে ভিন্ন জাতি । কেবল ইহাই নহে । ভারতবর্ষের এমনই অদৃষ্ট, যেখানে কোন প্রদেশীয় লোক সর্ব্বাংশে এক ; যাহাদের এক ধর্ম, এক ভাষা, এক জাতি, এক দেশ, তাহাদের মধ্যেও জাতির একতাজ্ঞান নাই । বাঙ্গালির মধ্যে বাঙ্গালিজাতির একতা বোধ নাই, শীকের মধ্যে শীকজাতির একতা বোধ নাই । ইহারও বিশেষ কারণ আছে । বহুকাল পর্য্যন্ত বহুসংখ্যক ভিন্ন জাতি এক বৃহৎ সাম্রাজ্যভুক্ত হইলে ক্রমে জাতিজ্ঞান লোপ হইতে থাকে । ভিন্ন ভিন্ন নদীর মুখনির্গত জলরাশি যেমন সমুদ্রে আসিয়া পড়িলে, আর তন্মধ্যে ভেদজ্ঞান করা যায় না, বৃহৎ সাম্রাজ্যভুক্ত ভিন্ন জাতিগণের সেইরূপ ঘটে । তাহা-দিগের পার্থক্য যায়, অথচ ঐক্য জন্মে না । রোমক সাম্রাজ্য-মধ্যগত জাতিদিগের এইরূপ দশা ঘটিয়াছিল । হিন্দুদিগেরও তাহাই ঘটিয়াছে । জাতি-প্রতিষ্ঠা নানা কারণে ভারতবর্ষে

অনেক দিন হইতে লোপ হইয়াছে । লোপ হইয়াছে বলিয়া কখন হিন্দু সমাজ কর্তৃক কোন জাতীয় কার্য সমাধা হয় নাই । লোপ হইয়াছে বলিয়া, সকল জাতীয় রাজাই হিন্দু রাজ্যে বিনা বিবাদে সমাজ কর্তৃক অভিষিক্ত হইয়াছেন । এই জগুই স্বাতন্ত্র্যরক্ষার কারণ হিন্দুসমাজ কখন উর্জনীর বিক্ষেপও করে নাই ।

ইতিহাসকীর্তিত কালমধ্যে কেবল দুইবার হিন্দুসমাজ মধ্যে জাতিপ্রতিষ্ঠার উদয় হইয়াছিল । একবার, মহারাষ্ট্রে শিবজী এই মহামন্ত্র পাঠ করিয়াছিলেন । তাঁহার সিংহনাদে মহারাষ্ট্রে জাগরিত হইয়াছিল । তখন মহারাষ্ট্রীয়ে মহারাষ্ট্রীয়ে ভ্রাতৃত্ব হইল । এই আশ্চর্য মন্ত্রের বলে অজিতপূর্ব মোগল সাম্রাজ্য মহারাষ্ট্রীয় কর্তৃক বিনষ্ট হইল । চিরজয়ী মুসলমান হিন্দু কর্তৃক বিজিত হইল । সমুদায় ভারতবর্ষ মহারাষ্ট্রের পদাবনত হইল । অদ্যাপি মার্হাট্টা, ইংরেজের সঙ্গে ভারতবর্ষ ভাগে ভাগ করিতেছে ।

দ্বিতীয়বারের ঐন্দ্রজালিক রণজিৎ সিংহ; ইন্দ্রজাল খালসা । জাতীয় বন্ধন দৃঢ় হইলে পাঠানদিগের স্বদেশেরও কিয়দংশ হিন্দুর হস্তগত হইল । শতক্রপারে সিংহনাদ শুনিয়া, নির্ভীক ইংরেজও কম্পিত হইল ! ভাগ্যক্রমে ঐন্দ্রজালিক মরিল । পটুতর ঐন্দ্রজালিক ডালহৌসির হস্তে খালসা ইন্দ্রজাল ভাঙ্গিল । কিন্তু রামনগর এবং চিলিয়ানওয়ালা ইতিহাসে লেখা রহিল ।

যদি কদাচিৎ কোন প্রদেশখণ্ডে জাতিপ্রতিষ্ঠার উদয়ে এতদূর ঘটিয়াছিল, তবে সমুদায় ভারত এক জাতীয় বন্ধনে বদ্ধ হইলে কি না হইতে পারিত ?

ইংরেজ ভারতবর্ষের পরমোপকারী। ইংরেজ আমাদেরকে নূতন কথা শিখাইতেছে। যাহা আমরা কখন জানিতাম না, তাহা জানাইতেছে ; যাহা কখন দেখি নাই, শুনি নাই, বুঝি নাই, তাহা দেখাইতেছে, শুনাইতেছে, বুঝাইতেছে ; যে পথে কখন চলি নাই, সে পথে কেমন করিয়া চলিতে হয়, তাহা দেখাইয়া দিতেছে। সেই সকল শিক্ষার মধ্যে অনেক শিক্ষা অমূল্য। যে সকল অমূল্য রত্ন আমরা ইংরেজের চিত্তভাণ্ডার হইতে লাভ করিতেছি, তাহার মধ্যে দুইটির আমরা এই প্রবন্ধে উল্লেখ করিলাম—স্বাভাব্যপ্রিয়তা এবং জাতিপ্রতিষ্ঠা*। ইহা কাহাকে বলে তাহা হিন্দু জানিত না।

* এই প্রবন্ধে জাতি শব্দে Nationality বা Nation বুঝিতে হইবে।

ভারতবর্ষের স্বাধীনতা এবং পরাদীনতা ।

মানুষের এমন ছুরবস্থা কখন হইতে পারে না, যে তাহাতে
শুভ কিছুই দেখা যায় না। আমাদের গুরুতর দুর্ভাগ্যেও
কিছু না কিছু মঙ্গল খুঁজিয়া পাওয়া যায়। যে অশুভের মধ্যে
শুভের অনুসন্ধান করিয়া তাহার আলোচনা করে সেই বিজ্ঞ।
দুঃখও যে কেবল দুঃখ নহে দুঃখের দিনে এ কথার আলোচ-
নার কিছু সুখ আছে।

ভারতবর্ষ পূর্বে স্বাধীন ছিল—এখন অনেক শত বৎসর
হইতে পরাদীন। নব্য ভারতবর্ষীয়েরা ইহা ঘোরতর দুঃখ মনে
করেন। আমাদের ইচ্ছা যে সেই প্রাচীন স্বাধীনতার এবং
আধুনিক পরাদীনতার একবার তুলনা করিয়া দেখি। দেখি যে
দুঃখই বা কি সুখ কি।

কিন্তু স্বাধীনতা ও পরাদীনতা এই সকল কথার তাৎপর্য
কি, তাহা একবার বিবেচনা করা আবশ্যিক হইতেছে। আমরা
প্রাচীন ভারতবর্ষের সঙ্গে আধুনিক ভারতবর্ষের তুলনায় প্রবৃত্ত
হইয়াছি। তুলনার উদ্দেশ্য তারতম্য নির্দেশ। কিন্তু কোন্
বিষয়ের তারতম্য আমাদের অনুসন্ধানের বিষয়? প্রাচীন
ভারত স্বাধীন, আধুনিক ভারত পরাদীন, একথা বলিয়া কি উপ-
কার? আমাদের বিবেচনায়, এরূপ তুলনায় একটি মাত্র

উদ্দেশ্য এই হওয়া আবশ্যিক, যে প্রাচীন ভারতে মনুষ্য সুখী ছিল, কি আধুনিক ভারতবর্ষে অধিক সুখী ?

এতক্ষণে অনেকে আমাদের প্রতি খড়্গহস্ত হইয়াছেন। স্বাধীনতায় যে সুখ তাহাতে সংশয় কি ? যে সংশয় করে সে পাষণ্ড, নরাধম, ইত্যাদি। স্বীকার করি। কিন্তু স্বাধীনতা পরাধীনতা অপেক্ষা কিসে ভাল, তাহা জিজ্ঞাসা করিলে, ইহার সহুত্তর পাওয়া ভার।

বান্দালি ইংরেজি পড়িয়া এ বিষয়ে দুইটি কথা শিখিয়াছেন —“Liberty” “Independence”, তাহার অনুবাদে আমরা স্বাধীনতা এবং স্বতন্ত্রতা দুইটি কথা পাইয়াছি। অনেকেরই মনে বোধ আছে যে দুইটি শব্দে এক পদার্থকে বুঝায়। স্বজাতির শাসনাধীন অবস্থাকেই ইহা বুঝায়, এইটি সাধারণ প্রতীতি। রাজ্য যদি ভিন্নদেশীয় হইবে, তবে তাহার প্রজাগণ পরাধীন, এবং সেই রাজ্য পরতন্ত্র। এই হেতু, এক্ষণে ইংরেজের শাসনাধীন ভারতবর্ষকে পরাধীন ও পরতন্ত্র বলা গিয়া থাকে। এইজন্ত মোগলদিগের শাসিত ভারতবর্ষকে, বা সেরাজউদ্দৌলার শাসিত বান্দালাকে পরাধীন বা পরতন্ত্র বলা গিয়া থাকে। এইরূপ সংস্কারের সমূলকতা বিবেচনা করা যাউক।

মহারাণী বিক্টোরিয়াকে ইংরেজকন্যা বলা যাইতে পারে, কিন্তু তাহার পূর্বপুরুষ প্রথম বা দ্বিতীয় জর্জ ইংরেজ ছিলেন না। তাহার জার্মান। তৃতীয় উইলিয়াম ওলন্দাজ ছিলেন। বোনাপার্টি কর্তৃকার ইতালীয় ছিলেন। স্পেনের ভূতপূর্ব প্রাচীন বুর্ভো বংশীয় রাজারা ফরাসী ছিলেন। রোম সাম্রাজ্যের সিংহাসনে অনেক বর্ষের জাতীয় সম্রাট মারোহণ

করিয়াছিলেন। এইরূপ শত শত ঘটনার উল্লেখ করা যাইতে পারে। দেখা যাইতেছে এই সকল রাজ্যে তত্বেদবস্থায় রাজা ভিন্নজাতীয় ছিলেন। ঐ সকল রাজ্য তৎকালে পরাধীন বা পরতন্ত্র ছিল, বলা যাইতে পারে কি না? কেহই বলিবেন না, বলা যাইতে পারে। যদি প্রথম জর্জ শাসিত ইংলণ্ডকে, বা ত্রেজান-শাসিত রোমকে পরাধীন বলা না গেল, তবে শাহ জাঁহা শাসিত ভারতবর্ষকে বা আলীবর্দি-শাসিত বাঙ্গালাকে পরাধীন বলি কেন?

দেখা যাইতেছে, যে শাসনকর্তা ভিন্নজাতীয় হইলেই, রাজ্য পরতন্ত্র হইল না। পক্ষান্তরে, শাসনকর্তা স্বজাতীয় হইলেই রাজ্য যে স্বতন্ত্র হয় না, তাহারও অনেক উদাহরণ দেওয়া যাইতে পারে। ওয়াশিংটনের কৃত যুদ্ধের পূর্বে আমেরিকার শাসনকর্তৃগণ, স্বজাতীয় ছিল। উপনিবেশ মাত্রেরই প্রথমাবস্থায় শাসনকর্তা স্বজাতীয় হইয়া থাকে, কিন্তু সে অবস্থায় উপনিবেশ সকলকে কদাচ স্বতন্ত্র বলা যায় না।

∴ তবে পরতন্ত্র কাহাকে বলি?

ইহা নিশ্চিত যে ইংরেজের অধীন আধুনিক ভারত পরতন্ত্র রাজ্য বটে। রোমক-জিত, ব্রিটেন হইতে সিরিয়া পর্যন্ত রাষ্ট্র সকল পরতন্ত্র ছিল বটে। আলজিয়ার্স বা জামেকা পরতন্ত্র রাজ্য বটে। কিসে এই সকল রাজ্য পরতন্ত্র? এ সকল এক একটি পৃথক রাজ্য নহে, ভিন্নদেশবাসী রাজার রাজ্যের অংশ মাত্র। ভারতেশ্বরী ভারতবর্ষে থাকেন না—ভারতবর্ষের রাজা ভারতবর্ষে নাই। অন্তর্দেশে। যে দেশের রাজা অন্য দেশের সিংহাসনারূঢ় এবং অন্তর্দেশবাসী, সেই দেশ পরতন্ত্র।

দুইটি রাজ্যের এক রাজা হইলে তাহার একটি পরতন্ত্র একটি স্বতন্ত্র । যে দেশে রাজা বাস করেন, সেইটি স্বতন্ত্র, যে দেশে বাস করেন না সেইটি পরতন্ত্র ।

এইরূপ পরিভাষায় কতকগুলি আপত্তি উত্থাপিত হইতে পারে । ইংলণ্ডের প্রথম জেম্‌স্, স্কটলণ্ড ও ইংলণ্ড দুই রাজ্যের অধীশ্বর হইয়া, স্কটলণ্ড ত্যাগ করিয়া ইংলণ্ডে বাস করিলেন । স্কটলণ্ড কি ইংলণ্ডকে রাজা দিয়া পরতন্ত্র হইল ? বাবরশাহ, ভারত জয় করিয়া, দিল্লীতে সিংহাসন স্থাপন পূর্বক, তথা হইতে পৈতৃক রাজ্য শাসিত কবিত্তে লালিলেন—তাঁহার স্বদেশ কি ভারতবর্ষের অধীন হইল ? প্রথম জর্জ ইংলণ্ডের সিংহাসন প্রাপ্ত হইয়া তথায় অধিষ্ঠান করিয়া, পৈতৃক রাজ্য হানোবর শাসিত করিতে লাগিলেন ;—হানোবর কি তখন পরতন্ত্র হইরাছিল ?

পরিভাষার অনুরোধে আমাদিগকে বলিতে হইবে যে প্রথম জেম্‌স্ বা প্রথম জর্জ বা প্রথম মোগলের পূর্বরাজ্যের পরতন্ত্রতা ঘটিয়াছিল । কিন্তু পরতন্ত্র্য ঘটিয়াছিল মাষ্ট্র, পরাধীনতা ঘটে নাই । আমরা Independence শব্দের পরিবর্তে স্বতন্ত্রতা, এবং Liberty শব্দের স্থানে স্বাধীনতা শব্দ এবং তত্তদভাব স্থানে তত্তদভাব সূচক শব্দ ব্যবহার করিতেছি ।

তবে পরতন্ত্র্য এবং পরাধীনতায় প্রভেদ কি ? অথবা, স্বাতন্ত্র্য এবং স্বাধীনতার প্রভেদ কি ?

ইংলণ্ডে রাজনৈতিক স্বাধীনতার একটি বিশেষ প্রয়োগ প্রচলিত আছে, আমরা সে অর্থ অবলম্বন করিতে বাধ্য

নহি। কেন না, সে অর্থ এই উপস্থিত বিচারের উপযোগী নহে। যে অর্থ ভারতবর্ষায়েরা বুঝেন, আমরাও সেই অর্থ বুঝাইব।

ভিন্নদেশীয় লোক, কোন দেশে রাজা হইলে একটি অত্যাচার ঘটে। যাহারা রাজার স্বজাতি, দেশীয় লোকাপেক্ষা তাঁহাদিগের প্রাধান্য ঘটে। তাহাতে প্রজা পরজাতিপীড়িত হয়। যেখানে দেশীয় প্রজা, এবং রাজার স্বজাতীয় প্রজার এইরূপ ভারতম্য, সেই দেশকে পরাধীন বলিব। যে রাজ্য পরজাতিপীড়ন শূন্য তাহা স্বাধীন।

অতএব পরতন্ত্র রাজ্যকেও কখন স্বাধীন বলা যাইতে পারে। যথা প্রথম জর্জের সময়ে হানোবর, মোগলদিগের সময়ে কাবুল। পক্ষান্তরে কখন স্বতন্ত্র রাজ্যকেও পরাধীন বলা যাইতে পারে, যথা নর্ম্মানদিগের সময়ে ইংলণ্ড, ওরঞ্জের সময়ে ভারতবর্ষ। আমরা কুতবউদ্দিনের অধীন উত্তর ভারতবর্ষকে পরতন্ত্র ও পরাধীন বলি, আকবরের শাসিত ভারতবর্ষকে স্বতন্ত্র ও স্বাধীন বলি।

সে যাহাই হউক, প্রাচীন ভারত স্বতন্ত্র ও স্বাধীন; আধুনিক ভারতবর্ষ পরতন্ত্র ও পরাধীন। প্রথমে স্বাতন্ত্র্য পারতন্ত্র্য জন্ম যে বৈষম্য ঘটিতেছে, তাহার আলোচনা করা যাউক—পশ্চাৎ স্বাধীনতা ও পরাধীনতার কথা বিবেচনা করা যাইবে। রাজা অন্য দেশবাসী হইলে দুইটি অনিষ্টাপাতের সম্ভাবনা; প্রথম, রাজা দূরে থাকিলে সূশাসনের বিঘ্ন হয়। দ্বিতীয়, রাজা যে দেশে অধিষ্ঠান করেন সেই সেই দেশের প্রতি তাঁহার অধিক আদর হয়, তাহার মঙ্গলার্থ দূরস্থ

রাজ্যের অমঙ্গলও করিয়া থাকেন। এই দুইটি দোষ যে আধুনিক ভারতবর্ষে ঘটিতেছে না, এমত নহে। মহারাজী বিষ্টোরিয়ার সিংহাসন দিল্লী বা কলিকাতায় স্থাপিত হইলে, ভারতবর্ষের শাসনপ্রণালী উৎকৃষ্টতর হইত তাহার সন্দেহ নাই, কেন না যাহা রাজার নিকটবর্তী তাহার প্রতি রাজপুরুষদিগের অধিক মনোযোগ হয়। দ্বিতীয় দোষটিও ঘটিতেছে। ইংলণ্ডের গৌরবার্থ আভিসিনায় যুদ্ধ হইল, ব্যয়ের দায়ী ভারতবর্ষ। “হোমচার্জেস” বলিয়া যে ব্যয় বজেটভুক্ত হয়, তাহার মধ্যে অনেকগুলিই এইরূপ ইংলণ্ডের মঙ্গলের জন্ত ভারতবর্ষের ক্ষতি স্বীকার। এইরূপ অনেক আছে।

রাজা দূরস্থিত বলিয়া আধুনিক ভারতবর্ষের সুশাসনের বিষয় ঘটে বটে, কিন্তু তেমন, রাজা স্বেচ্ছাচারী বলিয়া সুশাসনের যে সকল বিষয় ঘটিবার সম্ভাবনা, তাহা ঘটে না। কোন রাজা, ইন্দ্রিয়পরতন্ত্র,—অন্তঃপুরেই বাস করেন, রাজ্য দুর্দশাগ্রস্ত হইল। কোন রাজা নিষ্ঠুর, কোন রাজা অর্থগৃধ্রু। প্রাচীন ভারতবর্ষে এ সকলে গুরুতর ক্ষতি জন্মিত। আধুনিক ভারতবর্ষে দূরস্থিত রাজা বা রাজ্যীর কোন প্রকার দোষ ঘটিলে তাহার ফল, ভারতবর্ষে ফলিবার সম্ভাবনা নাই।

দ্বিতীয়, যেমন আধুনিক ভারতবর্ষে ইংলণ্ডের মঙ্গলের জন্ত ভারতবর্ষের মঙ্গল কখন কখন নষ্ট হয়, তেমনি প্রাচীন ভারতে রাজার আত্মসুখের জন্ত রাজ্যের মঙ্গল নষ্ট হইত। পৃথ্বীরাজ, জয়চন্দ্রের কন্যা হরণ করিয়া আত্মসুখ বিধান করিলেন, তাহাতে উভয়মধ্যে সমরাগ্নি প্রজ্বলিত হইয়া, উভয়ের অপ্রীতি ও তেজোহানি ঘটিতে লাগিল। ত্রিবিদ্বান উভয়েই মুসলমানের

হস্তে পতিত হইলেন। আধুনিক ভারতবর্ষে দূরবাসী রাজার আত্মসুখের অনুরোধে কোন অনিষ্টাপাতের সম্ভাবনা নাই।

কিন্তু এটি কেবল পরতন্ত্রতা সম্বন্ধে উক্ত হইল, আমরা পরাধীনতা ও পরতন্ত্রতায় প্রভেদ করিয়াছি। ভারতবর্ষে ইংরেজের প্রাধান্য, এবং দেশীয় প্রজা সকল তাঁহাদিগের নিকট অবনত, তাঁহাদিগের সুখের জন্য কিয়দংশে যে ভারতবাসীদিগের সুখের লাঘব ঘটয়া থাকে, তাহা এ দেশীয় কোন লোকেই অস্বীকার করিবেন না। এরূপ জাতির উপর জাতির প্রাধান্য প্রাচীন ভারতে ছিল না। ছিল না বটে, কিন্তু ততুল্য বর্ণপীড়ন ছিল। ইহা কেহই অস্বীকার করিবেন না, যে চিরকালই ভারতবর্ষের সাধারণ প্রজা শূদ্র; উৎকৃষ্ট বর্ণত্রয় শূদ্রের তুলনার অল্পসংখ্যক ছিলেন। সেই বর্ণত্রয়ের মধ্যে, ব্রাহ্মণ ও ক্ষত্রিয় দেশের শাসনকর্তা। কিন্তু এ সকল কথা একটু সবিস্তারে লেখা আবশ্যিক হইল।

লোকের বিশ্বাস আছে যে প্রাচীন ভারতে কেবল ক্ষত্রিয়ই রাজা ছিলেন। বাস্তবিক তাহা নহে, রাজকার্য্য দুই অংশে বিভক্ত ছিল। যুদ্ধাদির ভার ক্ষত্রিয় জাতির প্রতি ছিল; রাজব্যবস্থা নির্মাচন, বিচার ইত্যাদি কার্য্যের ভার ব্রাহ্মণের উপর ছিল। এক্ষণে যেমন সিবিল ও মিলিটারি এই দুই অংশে রাজকার্য্য বিভক্ত, তখনকার কর্ম্মভাগ কতকটা সেইরূপই ছিল। ব্রাহ্মণেরা সিবিল কর্ম্মচারী, ক্ষত্রিয়েরা মিলিটারি। এখনও যেমন মিলিটারি অপেক্ষা সিবিল কর্ম্মচারীদিগের প্রাধান্য, তখনও সেইরূপ ছিল; রাজপুরুষদিগের মধ্যে, ক্ষত্রিয়েরাই রাজা ন্যম ধারণ করিতেন, কিন্তু কার্য্যতঃ তাঁহাদিগের উপরেও

ব্রাহ্মণের প্রাধান্য ছিল। প্রাচীন ভারতে ক্ষত্রিয়েরাই সর্বদা রাজা ছিলেন এমত নহে। বোধ হয় আদ্যকালে ক্ষত্রিয়েরাই রাজা ছিলেন, কিন্তু বৌদ্ধকালে মৌর্য প্রভৃতি সঙ্করজাতীয় রাজবংশ দেখা যায়। চীনপরিব্রাজক হোয়েন সাঙ সিদ্ধুপারে ব্রাহ্মণ রাজা দেখিয়া গিয়াছিলেন। অন্ততও ব্রাহ্মণেরা রাজা নাম ধারণ করিয়াছিলেন। মধ্যকালে অধিকাংশ রাজাই রাজপুত্র। রাজপুত্রেরা ক্ষত্রিয়বংশসম্ভূত সঙ্করজাতি মাত্র। ক্ষত্রিয়দিগের প্রাধান্য, প্রাচীন ভারতে চিরকাল অপ্রতিহত ছিল না, ব্রাহ্মণদিগের গৌরব এক দিনের জন্ম লঘু হয় নাই। বেদদেবী বৌদ্ধদিগের সময়েও রাজকার্য্য ব্রাহ্মণদিগের হস্ত হইতে অন্ত হস্তে যায় নাই—কেন না তাঁহারা পণ্ডিত, সুশিক্ষিত, এবং কার্য্যক্ষম। অতএব প্রাচীন ভারতে ব্রাহ্মণেরাই প্রকৃতরূপে রাজপুরুষ পদে বাচ্য। সুবিজ্ঞ লেখক, বাবু তারাপ্রসাদ চট্টোপাধ্যায়, বেঙ্গল মাগাজিনে একটি প্রবন্ধে যথার্থই লিখিয়াছিলেন, যে ব্রাহ্মণেরাই প্রাচীন ভারতের ইংরেজ ছিলেন।

এক্ষণে জিজ্ঞাস্য যে আধুনিক ভারতবর্ষে দেশী বিলাতিতে যে বৈষম্য, তাহা প্রাচীন ভারতে ব্রাহ্মণ শূদ্রের বৈষম্যের অপেক্ষা কি গুরুতর ?

রাজা ভিন্নজাতীয় হইলে যে জাতিপীড়া জন্মে, তাহা দুই প্রকারে ঘটে। এক রাজব্যবস্থাজনিত ; আইনে বিধি থাকে যে রাজার স্বজাতীয়গণের পক্ষে এই এই রূপ ষটিবেক, দেশীয় লোকের পক্ষে অন্য প্রকার ষটিবেক। দ্বিতীয়, স্বজাতিপক্ষপাতী রাজার ইচ্ছাজনিত ; রাজপ্রসাদ, রাজা স্বজাতিকৈ দিয়া

থাকেন এবং তিনি স্বজাতিপক্ষপাতী বলিয়া রাজ্যের কার্যে স্বজাতিকেই নিযুক্ত করিয়া থাকেন। ইংরেজ-শাসিত ভারতে, এবং ব্রাহ্মণশাসিত ভারতে এই দুইটি দোষ কি প্রকার বর্তমান ছিল দেখা যাউক।

১ম। ইংরেজদিগের কৃত রাজব্যবস্থানুসারে, দেশী অপরাধীর জন্য এক বিচারালয়, বিলাতি অপরাধীর জন্য অন্য বিচারালয়। দেশী লোক ইংরেজ কর্তৃক দণ্ডিত হইতে পারে, কিন্তু ইংরেজ দেশী বিচারক কর্তৃক দণ্ডিত হইতে পারে না। ইহা ভিন্ন ব্যবস্থাগত বৈষম্য আর বড় নাই। কিন্তু ইহা অপেক্ষা কত গুরুতর বৈষম্য ব্রাহ্মণরাজ্যে দেখা যায়! ইংরেজের জন্য পৃথক বিচারালয় হউক, কিন্তু আইন পৃথক নহে। যেমন একজন দেশীয় লোক ইংরেজ বধ করিলে বধাৰ্হ, ইংরেজ, দেশী লোককে বধ করিলে, আইন অনুসারে সেইরূপ বধাৰ্হ। কিন্তু ব্রাহ্মণ-রাজ্যে শূদ্রহত্যা ব্রাহ্মণের এবং ব্রাহ্মণহত্যা শূদ্রের দণ্ডের কত বৈষম্য! কে বলিবে, এ বিষয়ে প্রাচীন ভারতবর্ষ হইতে আধুনিক ভারতবর্ষ নিকৃষ্ট ?

ইংরেজের রাজ্যে যেমন ইংরেজ দেশী লোক কর্তৃক দণ্ডিত হইতে পারে না, প্রাচীন ভারতেও সেইরূপ ব্রাহ্মণ শূদ্র কর্তৃক দণ্ডিত হইতে পারিত না। বাবু দ্বারকানাথ মিত্র, প্রধানতম বিচারালয়ে বসিয়া আধুনিক ভারতবর্ষের মুখোজ্জ্বল করিয়াছেন—“রামরাজ্যে” তিনি কোথা থাকিতেন ?

২য়। ইংরেজের রাজ্যে রাজপ্রসাদ প্রায় ইংরেজেরই প্রাপ্য কিন্তু কিয়ৎপরিমাণে দেশীয়েরাও উচ্চপদে প্রতিষ্ঠিত। ব্রাহ্মণরাজ্যে শূদ্রদিগের ততটা যত্ন কি না সন্দেহ। কিন্তু

যখন শূদ্র, কখন কখন রাজসিংহাসনারোহণ করিতে সক্ষম হইয়াছিল, তখন অন্যান্য উচ্চপদও যে শূদ্রেরা সময়ে সময়ে অধিকৃত করিত তাহার সন্দেহ নাই। এক্ষণে দেখা যাইতেছে যে, আধুনিক ভারতে প্রাথমিক বিচার কার্য প্রায় দেশীয় লোকের দ্বারাই হইয়া থাকে,—প্রাচীন ভারতে কি প্রাথমিক বিচার কার্য শূদ্রের দ্বারা হইত ? আমরা প্রাচীন ভারতবর্ষ সম্বন্ধে এত অল্পই জানি যে এ কথা স্থির বলিতে পারি না। অনেক বিচার কার্য গ্রাম্য সমাজের দ্বারা নির্বাহ হইত বোধ হয়। কিন্তু সাধারণতঃ কি বিচার, কি সৈন্যপত্য, কি অন্যান্য প্রধান পদ সকল যে ব্রাহ্মণ ও ক্ষত্রিয়ের হস্তে ছিল, তাহা প্রাচীন গ্রন্থাদি পাঠে বোধ হয়।

অনেকেই বলিবেন, ইংরেজের প্রাধান্য এবং ব্রাহ্মণ ক্ষত্রিয়ের প্রাধান্যে সাদৃশ্য কল্পনা সুকল্পনা নহে, কেন না ব্রাহ্মণ ক্ষত্রিয় শূদ্রপীড়ক হইলেও স্বজাতি—ইংরেজেরা ভিন্ন জাতি। ইহার এইরূপ উত্তর দিতে ইচ্ছা করে, যে, যে পীড়িত হয়, তাহার পক্ষে স্বজাতির পীড়ন ও ভিন্ন জাতির পীড়ন উভয়ই সমান। স্বজাতীয়ের হস্তে পীড়া কিছু মিষ্ট, পরজাতীয়ের কৃত পীড়া কিছু তিক্ত লাগে, এমত বোধ হয় না। কিন্তু আমরা সে উত্তর দিতে চাহি না। যদি স্বজাতীয়ের কৃত পীড়ায় কাহারও প্রীতি থাকে, তাহা হইতে আমাদের আপত্তি নাই। আমাদের এইমাত্র বলিবার উদ্দেশ্য, যে আধুনিক ভারতের জাতিপ্রাধান্যের স্থানে প্রাচীন ভারতে বর্ণপ্রাধান্য ছিল। অধিকাংশ লোকের পক্ষে উভয়ই সমান।

তবে ইহা অবশ্য স্বীকার করিতে হইবে, যে পরাধীন

ভারতবর্ষে উচ্চ শ্রেণীস্থ লোকে স্বীয় বুদ্ধি, শিক্ষা, বংশ, এবং মর্যাদানুসারে প্রাধান্য লাভ করিতে পারেন না। বাহার বিদ্যা এবং বুদ্ধি আছে, তাহাকে যদি বুদ্ধিসঞ্চালনের এবং বিদ্যার ফলোৎপত্তির স্থল না দেওয়া যায়, তবে তাহার প্রতি গুরুতর অত্যাচার করা হয়। আধুনিক ভারতবর্ষে এরূপ ঘটিতেছে। প্রাচীন ভারতবর্ষে, বর্ণ বৈষম্য গুণে তাহাও ছিল, কিন্তু এ পরিমাণে ছিল না। আর এক্ষণে রাজকার্য্যাদি সকল ইংরেজের হস্তে—আমরা পরহস্তরক্ষিত বলিয়া নিজে কোন কার্য্য করিতে পারি-তেছি না। তাহাতে আমাদের রাজ্যরক্ষা ও রাজ্যপালন বিদ্যা শিক্ষা হইতেছে না—জাতীয় গুণের ক্ষুণ্ণ হইতেছে না। অতএব স্বীকার করিতে হইবে, পরাধীনতা এদিকে উন্নতিরোধক। তেমন, আমরা ইউরোপীয় সাহিত্য ও বিজ্ঞানে শিক্ষালাভ করিতেছি। ইউরোপীয় জাতির অধীন না হইলে আমাদের কপালে এ সুখ ঘটিত না। অতএব আমাদের পরাধীনতায় যেমন একদিকে ক্ষতি, তেমন আর একদিকে উন্নতি হইতেছে।

অতএব ইহাই বুঝা যায় যে আধুনিকাপেক্ষা প্রাচীন ভারতবর্ষে উচ্চ শ্রেণীর লোকের স্বাধীনতাজনিত কিছু সুখ ছিল। কিন্তু অধিকাংশ লোকের পক্ষে প্রায় দুই তুল্য, বরং আধুনিক ভারতবর্ষ ভাল।

তুলনায় আমরা বাহা পাইলাম তাহা সংক্ষেপে পুন-রুক্ত করিতেছি, অনেকের বুঝিবার সুবিধা হইবে।

১। ভিন্ন জাতীয় রাজা হইলেই রাজ্য পরতন্ত্র বা পরাধীন হইল না।

ভিন্ন জাতীয় রাজার অধীন রাজ্যকেও স্বতন্ত্র ও স্বাধীন ঘলা' যাইতে পারে ।

২। স্বতন্ত্রতা ও স্বাধীনতা, পরতন্ত্রতা ও পরাধীনতা, ইহার আমরা ভিন্ন ভিন্ন পারিভাষিক অর্থ নির্দেশ করিয়াছি ।

বিদেশনিবাসী রাজশাসিত রাজ্য পরতন্ত্র । যেখানে ভিন্ন জাতির প্রাধান্য, সেই রাজ্য পরাধীন । অতএব কোন রাজ্য পরতন্ত্র অথচ পরাধীন নহে । কোন রাজ্য স্বতন্ত্র অথচ স্বাধীন নহে । কোন রাজ্য পরতন্ত্র এবং পরাধীন ।

৩। কিন্তু তুলনার উদ্দেশ্য উৎকর্ষাপকর্ষ । যে রাজ্যে লোক সুখী তাহাই উৎকৃষ্ট, যে রাজ্যে লোক দুঃখী তাহাই অপকৃষ্ট । স্বাতন্ত্র্য ও পরাধীনতার আধুনিক ভারতে প্রজা কি পরিমাণে দুঃখী তাহাই বিবেচ্য ।

৪। প্রথমতঃ স্বাতন্ত্র্য ও পরতন্ত্র্য । ইহার অন্তর্গত দুইটি ভঙ্গ । প্রথম, রাজা বিদেশস্থিত বলিয়া ভারতবর্ষের সুশাসনের বিঘ্ন হইতেছে কি না? স্বদেশের মঙ্গলার্থ শাসন-কর্তৃগণ এদেশের অমঙ্গল ঘটাইয়া থাকেন কি না? স্বীকার করিতে হইবে যে তত্ত্বংকারণে সুশাসনের বিঘ্ন ঘটতেছে বটে এবং ভারতবর্ষে অমঙ্গল ঘটতেছে বটে ।

কিন্তু রাজার চরিত্র দোষে যে সকল অনিষ্ট ঘটত, আধুনিক ভারতবর্ষে তাহা ঘটে না । অতএব প্রাচীন বা আধুনিক ভারতবর্ষে এ সম্বন্ধে বিশেষ ভারতম্য লক্ষিত হয় না ।

৫। দ্বিতীয়তঃ স্বাধীনতা ও পরাধীনতা । আধুনিক

ভারতবর্ষ প্রভুগণপীড়িত বটে, কিন্তু প্রাচীন ভারতও বড় ব্রাহ্মণপীড়িত ছিল। সে বিষয়ে বড় ইতরবিশেষ নাই। তবে, ব্রাহ্মণ ক্ষত্রিয়ের একটু সুখ ছিল।

৬। আধুনিক ভারতে কার্যগত জাতীয় শিক্ষা লোপ হইতেছে, কিন্তু বিজ্ঞান ও সাহিত্যচর্চার অপূর্ব স্ফূর্তি হইতেছে।

অনেকে রাগ করিয়া বলিবেন, তবে কি স্বাধীনতা পরাধীনতা তুল্য? তবে পৃথিবীর তাবজ্জাতি স্বাধীনতার জন্য প্রাণপণ করে কেন? যাহারা এরূপ বলিবেন, তাঁহাদের নিকট আমাদের এই নিবেদন যে আমরা সে তত্ত্বের মীমাংসায় প্রবৃত্ত নহি। আমরা পরাধীন জাতি—অনেক কাল পরাধীন থাকিব—সে মীমাংসায় আমাদের প্রয়োজন নাই। আমাদের কেবল ইহাই উদ্দেশ্য যে প্রাচীন ভারতবর্ষের স্বাধীনতার হেতু তদ্বাসিগণ সাধারণতঃ আধুনিক ভারতীয় প্রজাদিগের অপেক্ষা সুখী ছিল কি না? আমরা এই মীমাংসা করিয়াছি, যে আধুনিক ভারতবর্ষে ব্রাহ্মণ ক্ষত্রিয় অর্থাৎ উচ্চশ্রেণীস্থ লোকের অবনতি ঘটিয়াছে, শূদ্র অর্থাৎ সাধারণ প্রজার একটু উন্নতি ঘটিয়াছে।

প্রাচীন ভারতবর্ষের রাজনীতি ।

নারদবাক্য ।

মহাভারতের সভাপর্বে, দেবর্ষি নারদ যুধিষ্ঠিরকে প্রশ্নচ্ছলে কতকগুলি রাজনৈতিক উপদেশ দিয়াছেন । প্রাচীন ভারতে রাজনীতি কতদূর উন্নতিপ্রাপ্ত হইয়াছিল, উহা তাহার পরিচয় । মুসলমানদিগের অপেক্ষা হিন্দুরা যে রাজনীতিতে বিজ্ঞতর ছিলেন, উহা পাঠ করিলে সংশয় থাকে না । প্রাচীন রোমক এবং আধুনিক ইউরোপীয়গণ ভিন্ন আর কোন জাতি তাদৃশ উন্নতি লাভ করিতে পারেন নাই । ভারতবর্ষীয় রাজারা যে অন্যান্য সকল জাতির অপেক্ষা অধিক কাল আপনাদিগের গৌরব রক্ষা করিয়াছিলেন, এই রাজনীতিজ্ঞতা তাহার এক কারণ । হিন্দুদিগের ইতিবৃত্ত নাই ; এক একটি শাসনকর্তার গুণগান করিয়া শত শত পৃষ্ঠা লিখিবার উপায় নাই । কিন্তু তাঁহাদিগের কৃত কার্যের যে কিছু পরিচয় পাওয়া যায়, তাহাতেই অনেক কথা বলা যাইতে পারে । চন্দ্রগুপ্ত মৌর্যের সহিত পৃথিবীর যে কোন রাজপুরুষের তুলনা করা যায় । চন্দ্রগুপ্ত আলেকজণ্ডরের বিজিত ভারতভাগের পুনরুদ্ধার করিয়া, তক্ষশীলা হইতে তাম্রলিপ্তি পর্যন্ত সাম্রাজ্য সংস্থাপন করিয়া,

মহতী কীর্তি স্থাপিতা করিয়াছিলেন। ভুবনবিখ্যাত যবন রাজাধিরাজ সিলিউকসকে লাঘব স্বীকার করাইয়া তাঁহার কন্যা বিবাহ করিয়াছিলেন। (হিন্দু হইয়া ঠিক বিবাহ করিয়াছিলেন এমনও বোধ হয় না।) ইতিহাসে তিনজন সাম্রাজ্যনির্মাতা বিশেষ পরিচিত—শার্লমান, দ্বিতীয় ফ্রেডেরিক, প্রথম পিটার। আলেকজণ্ডর, নাপোলিয়ন, বা ক্রম্বেল সে শ্রেণীমধ্যে আসন পান নাই, কেন না তাঁহাদের কীর্তি তাঁহাদের মৃত্যু পর্যন্ত স্থায়ী, বা তাহাও নহে। গজনবী মহম্মদের প্রায় সেইরূপ। আরবসাম্রাজ্য ও মোগল সাম্রাজ্য এক এক জনের নির্মিত নহে। কিন্তু মগধসাম্রাজ্য একা চন্দ্রগুপ্তের নির্মিত। এবং পুরুষানুক্রমে স্থায়ী বটে। তিনি শার্লমান, ফ্রেডেরিক ও পিটারের সঙ্গে উচ্চাসনে বসিতে পারেন।

নারদের যে উপদেশবাক্যের কথা উল্লেখ করিয়াছি, তাহাতে এমত তত্ত্ব অনেক আছে, যে রাজনীতিবিশারদ ইংরেজেরও তাহা গ্রহণ করিয়া তদনুসারে চলিলে, তাঁহাদিগের উপকার হয়। এমত কদাচ বক্তব্য নহে যে হিন্দুরা এই সকল নৈতিক উক্তি অনুসারী হইয়া সর্বত্র সর্ব প্রকারে চলিতেন। কিন্তু সূদৃশ নৈতিকতত্ত্ব যে তাঁহাদিগের দ্বারা উদ্ভূত হইয়াছিল, ইহা অল্প প্রশংসার কথা নহে। যেখানে উদ্ভূত হইয়াছিল, সেখানে যে উহা কিয়দংশে কার্যে পরিণত হইয়াছিল, তদ্বিষয়ে সংশয় করা অন্যায্য। প্রাচীন ভারতবর্ষে রাজনীতির কতদূর উন্নতি হইয়াছিল, তাহার কিঞ্চিৎ আলোচনা করিলে, ক্ষতি নাই। এজন্য আমরা উল্লিখিত নারদবাক্য হইতে কিঞ্চিৎ উদ্ধৃত করিব। 'ঐ কথা পাঠকেরা অনেকেই পড়িয়াছেন

তথাপি উহার পুনঃপাঠে কষ্ট বোধ হইবে, এমন বিবেচনা হয় না ।

নারদ জিজ্ঞাসা করিতেছেন, “মহারাজ ! কৃষি, বাণিজ্য, দুর্গসংস্কার, সেতুনির্মাণ, আয়ব্যয় শ্রবণ, পৌরকার্য্য দর্শন ও জনপদ পর্য্যবেক্ষণ প্রভৃতি অষ্টবিধ রাজকার্য্য ত সম্যক্ প্রকারে সম্পাদিত হয় ?*** নিঃশঙ্কচিত্ত কপট দূতগণ ত তোমার বা তোমার অমাত্যদিগের গুণমন্ত্রণাসকল ভেদ করিতে পারে না ? মিত্র, উদাসীন ও শত্রুদিগের অভিসন্ধি সমস্ত আপনি ত বুঝিয়া থাকেন ? যথাকালে সন্ধিস্থাপনে ও বিগ্রহবিধানে প্রবৃত্ত হইয়েন ? উদাসীন ও মধ্যমের প্রতি ত মাধ্যম্ ভাব অবলম্বন করিয়া থাকেন ? আত্মানুরূপ, বৃদ্ধ, বিশুদ্ধস্বভাব, সম্বোধনক্ষম, সংকুলজাত, অনুরক্ত ব্যক্তিগণ মন্ত্রিপদে ত অভিষিক্ত হইয়া থাকেন ?”

সর জর্জ কাম্বেল সাহেব “আত্মানুরূপ” ব্যক্তিকে স্বীয় মন্ত্রিত্বে বরণ করিয়াছেন বলিয়া দেশের লোক তাঁহার উপর রাগ করিয়াছিলেন, কিন্তু তিনি বলিতে পারিতেন যে নারদবাক্য আমার পক্ষে । আধুনিক ভারতীয় শাসন-কর্তাদিগের ছুরদৃষ্ট এই যে বৃদ্ধ মন্ত্রী তাঁহাদিগের কপালে প্রায় ঘটে না । কিন্তু ইউরোপে নারদীয় বাক্য প্রতিপালিত হইয়া থাকে—বিস্মার্ক, গ্লাডষ্টোন, ডিস্ট্রেলি, টিয়র প্রভৃতি উদাহরণ । পরে,—

“একাকী বা বহুজনপরিবৃত হইয়া ত মন্ত্রণা করেন না ? মন্ত্র ত জনপদ মধ্যে অপ্রচলিত থাকে ?”

ইংরেজেরা এই নীতির বশবর্তী হইয়া কার্য্য করেন,

কেবল অতিরিক্ত এই বলেন, যে “মন্ত্রণাবিশেষ জনপদ মধ্যে প্রচার হওয়াই ভাল। অতএব সেই গুলি বাছিয়া বাছিয়া গেজেটে ছাপাই।” পরে—

“স্বল্পায়ামসাধ্য মহোদয় বিষয় সকল ত শীঘ্রই সম্পন্ন করিয়া থাকেন ?”

আমাদিগের অনুরোধ যে প্রাচীন ঋষির এই বাক্য ইংরেজেরা স্বর্ণাক্ষরে লিপিবদ্ধ করিয়া কার্যালয়ে প্রকটিত করুন। তৎপরে,—

“কৃষীবলেরা আপনার পরোক্ষে প্রকৃত ব্যবহার করিয়া থাকে ? কারণ প্রভুর প্রতি অকৃত্রিম স্নেহ না থাকিলে এরূপ হওয়া নিতান্ত অসম্ভব সন্দেহ নাই।”

‘বিলাতী শাসনকর্তা কিম্বা তাঁহাদিগের দেশী সমালোচক, কেহই অদ্যাপি এ কথার সারবত্তা অনুভূত করিতে সক্ষম হইলেন না। তৎপরে—

“অনারক্ষ কার্যের, পরীক্ষার্থ ধর্ম্মজ্ঞ শাস্ত্রকোবিদ বিচক্ষণ পরীক্ষক সকল ত নিযুক্ত করিয়া থাকেন ?”

ইংরেজেরা এই কথার সম্যকপ্রকারে অনুবর্তী। সকল কার্যের পূর্বেই কমিটি নিযুক্ত হইয়া থাকে। সকল কার্য করিবার পূর্বে ইংরেজেরা এক একটা কমিটি নিযুক্ত করেন কেন ? এ কথা যিনি জিজ্ঞাসা করিবেন, তাঁহাকে দেয় উত্তর উল্লিখিত নারদবাক্যে আছে। তৎপরে—

“সহস্র মূর্খ বিনিময় দ্বারা এক জন পণ্ডিতকে ত ক্রয় করিয়া থাকেন ?”

আমরা এই কথাটির অনুমোদন করি না। মূর্খের দ্বারাই

পৃথিবীর কার্য নিরূপিত হইতেছে—পণ্ডিত কোন কাজে লাগে ? মিল পার্লামেন্টে কৃতকার্য হইতে পারিলেন না,—ওয়েস্টমিনস্টার কর্তৃক পরিত্যক্ত হইলেন। লাপ্লাসকে বোনাপার্ট পণ্ডিত দেখিয়া উচ্চপদে অভিষিক্ত করিয়াছিলেন—কিন্তু লাপ্লাস কার্য সম্পাদনে অক্ষম হইয়া দূরীভূত হইলেন। প্রবাদ আছে, একজন ভট্টাচার্য বক্ষ্য ভাষ্যার বিনিময়ে দুগ্ধবতী গো লইয়া আসিয়াছিলেন। সেইরূপ রাজপুরুষেরা অপ্রিয়বাদী, আত্মমতভক্ত, পণ্ডিতের বিনিময়ে আত্মকারী মূর্খই গ্রহণ করিয়া থাকেন। নারদ বলিয়াছেন বটে, যে “কোন প্রকার বিপদ উপস্থিত হইলে পণ্ডিতব্যক্তি অনায়সে তাহার প্রতিবিধান করিতে সমর্থ হইবেন।” এ কথা সত্য বটে, অতএব বিপদকালে পণ্ডিতের আশ্রয় লইবে। সুখের দিনে মূর্খ ;—দুঃখের দিনে পণ্ডিত ।

পরে নারদ বলিতেছেন, “দুর্গ সকল ত ধন ধান্য উদক যন্ত্র পরিপূর্ণ রাখিয়াছেন। তথায় শিল্পিগণ ও ধনুর্দ্ধর পুরুষ সকল ত সর্বদা সতর্কতা পূর্বক কালযাপন করে ?”

মিউটিনির পূর্বে ইংরেজেরা যদি এই কথা স্মরণ রাখিতেন তবে তাহঁদের বিপদ ঘটিত না। সর হেনরি লরেন্স এই কথা বুঝিতেন বলিয়া লাক্সোর রেসিডেন্সির রক্ষা হইয়াছিল।

“প্রচণ্ড দণ্ড বিধান দ্বারা প্রজাদিগকে ত অত্যন্ত উদ্বেজিত করেন না ?”

ইউরোপীয়েরা অতি অল্পকাল হইল, এ কথা শিখিয়াছেন। এক পয়সা চুরীর জন্য প্রাণদণ্ড প্রভৃতি প্রচণ্ড দণ্ড, অতি অল্পকাল হইল, ইংলণ্ড হইতে অন্তর্হিত হইয়াছে।

“নির্দিষ্ট সময়ে সেনাদিগের বেতনাদি প্রদানে ত্রুটিবিমুক্ত হইলেন না ? তাহা হইলে সূচাক্রমে কার্য্য নিৰ্ব্বাহ হওয়া দূরে থাকুক, প্রত্যুত তাহাদিগের দ্বারা পদে পদে অনিষ্ট ঘটনা ও বিদ্রোহের সম্পূর্ণ সম্ভাবনা হইয়া উঠে ।”

এই নীতির বিপরীতাচরণ কার্থেজ রাজ্য লোপের মূল । একা রোম কার্থেজ ধ্বংস করে নাই ।

“সংকুলজাত প্রধান প্রধান লোক ত তোমার প্রতি অনুরক্ত রহিয়াছে ? তাহারা ত তোমার নিমিত্ত রণক্ষেত্রে প্রাণ পরিত্যাগ করিতেও সম্মত আছে ?”

এই নীতির অবজ্ঞায় ষ্টুয়ার্ট বংশ নষ্ট হইলেন । ভারতবর্ষীয় ইংরেজ রাজপুরুষেরা ইহা বিলক্ষণ বুঝেন । বুঝিয়া, কর্ণওয়ালিস চিরস্থায়ী বন্দোবস্ত করিয়াছিলেন, ও কানিং ভারতীয় রাজগণকে পোষ্যপুত্র লইতে অনুমতি দিয়াছেন । লর্ড লিটন আর কিছু করিতে না পারিয়া উপাধি বিতরণ করিয়াছেন ।

পরে, নারদ পেনশ্যান দেওয়ার পরামর্শ দিতেছেন,

“মহারাজ ! বাহারা কেবল আপনার উপকারের নিমিত্ত কালকবলে নিপতিত ও যৎপরোনাস্তি দুর্দশাগ্রস্ত হইয়াছে, তাহাদিগের পুত্র কলত্র প্রভৃতিকে ত ভরণ পোষণ করিতেছেন ?”

ক্ষিপ্ৰকারিতার বিষয়ে—

“শত্রুকে ব্যসনাসক্ত দেখিয়া স্বীয় মন্ত্র কোষ ও ভৃত্য ত্রিবিধ বল সম্যক্ বিবেচনা করিয়া অবিলম্বে তাহাকে ত আক্রমণ করেন ?”

অতি প্রধান রাজ্যাধ্যক্ষেরা এ তত্ত্ব সম্যক্ বুঝিয়াছিলেন ।

“অবিলম্বে” কাহাকে বলে প্রথম নাপোলিয়ন বুঝিতেন। তাঁহার রণজয় সেই বুদ্ধির ফল। তৃতীয় নাপোলিয়ন “অবিলম্বে” প্রসীয়াদিগকে আক্রমণ করিতে গিয়াছিলেন বটে, কিন্তু প্রথম নাপোলিয়নের মত “মন্ত্র কোষ ও ভৃত্য” ত্রিবিধ, বলের সম্যক বিচার না করিয়াই আক্রমণ করিয়াছিলেন। তিনি, নারদ্য বাক্যে অবহেলা করিয়া নষ্ট হইলেন।

পরে সমদৃষ্টি পক্ষে,—

“যেমন পিতা মাতা সকল সন্তানকে সমান স্নেহ করেন, তদ্রূপ আপনি ত সমদৃষ্টিতে সমুদ্রমেখলা সমুদয় পৃথিবী অবলোকন করিতেছেন?”

ইংরেজেরা ভারতবর্ষে এই নারদীয় বাক্য মনোযোগ পূর্বক অধ্যয়ন করুন।

নিম্নলিখিত কথাটি বিস্মার্কের যোগ্য ;—

“সৈন্যদিগের ব্যবসায় ও জয়লাভসামর্থ্য বুঝিয়া তাহা দিগকে ত অগ্রিম বেতন প্রদান পূর্বক উপযুক্ত সময়ে যাত্রা করিয়া থাকেন?”

নিম্নলিখিত কথাটির আমরা অনুমোদন করি না, কিন্তু চতুর্দশ লুই শুনিলে অনুমোদন করিতেন,—

“পরস্পরের ভেদ উপস্থিত করিবার নিমিত্ত শত্রুপক্ষীয় প্রধান প্রধান সৈন্যদিগকে ত যথাযোগ্য ধনদান করেন?”

নিম্নলিখিত কথাগুলি গ্রেগরি বা ইগ্নেশ্যাস লয়লার যোগ্য—

“স্বয়ং জিতেন্দ্রিয় হইয়া আত্মপরাজয় পূর্বক, ইন্দ্রিয়পরতন্ত্র প্রমত্ত বিপক্ষ দিগকে ত পরাজয় করিতেছেন?”

পরে,—

“বিপক্ষের রাজ্য আক্রমণ কালে আপন অধিকার তঁদৃঢ়-
রূপে সুরক্ষিত করেন ?”

পৃথিবীতে যত সৈনিক জন্মিয়াছেন, তন্মধ্যে হানিবল এক জন অত্যাংকুষ্ট । কিন্তু তিনি এই কথা বিস্মৃত হওয়াতে, সব হারাইয়াছিলেন । তিনি যখন ইতালিতে অনিবার্য, সিপিও তখন আফ্রিকাতে সৈন্য লইয়া গিয়া তাঁহার কৃত রণজয় সকল বিফল করিয়াছিলেন ।

“এবং তাহাদিগকে পরাজিত করিয়া পুনর্বার স্ব স্ব পদে ত প্রতিষ্ঠিত করিয়া থাকেন ?”

রোমকেরা ইহা করিতেন, এবং ভারতবর্ষে ইংরেজেরা ইহা করেন । এই জন্ত এতদূতর সাম্রাজ্য ঈদৃশ বিস্তার লাভ করিয়াছে ।

নিম্নলিখিত তিনটী বাক্যে সমুদায় রাজকার্য নিঃশেষে বর্ণিত হইয়াছে —

“আপনি ত আভ্যন্তরিক ও বাহ্যজনগণ হইতে আপনাকে, আত্মীয়লোক হইতে তাহাদিগকে, এবং পরস্পর হইতে পরস্পরকে রক্ষা করিয়া থাকেন ?”

তাহার পর বজেট ও ঐষ্টিমেটের কথা—

“আয় ব্যয় নিমুক্ত গণক ও লেখকবর্গ আপনার আয় সকল পূর্নাঙ্কে ত নিরূপণ করিতেছে ?”

আমরা জানিতাম এটা ভারতবর্ষে উইলসন সাহেবের দৃষ্টি ; কিন্তু তাহা নহে ।

পরে—

“রাজ্যস্থ কৃষকেরা ত সঙ্কটচিত্তে কালযাপন করিতেছে ?”

এই কথা, নারদ যেমন যুধিষ্ঠিরকে জিজ্ঞাসা করিয়াছিলেন, আমরা তেমনি ভারতবর্ষীয় রাজপ্রতিনিধিকে জিজ্ঞাসা করি ।

অনেকের বোধ আছে, “ইরিগেশ্যান ডিপার্টমেন্ট”টী ভারত-বর্ষে একটী নূতন কাণ্ড দেখাইতেছে । তাহা নহে । নারদ বলিতেছেন—

“রাজ্যমধ্যে স্থানে স্থানে সলিলপূর্ণ বৃহৎ বৃহৎ তড়াগ ও সরোবর সকল ত নিখাত হইয়াছে ? কৃষিকার্য্য ত বৃষ্টিনির-পেক্ষ হইয়া সম্পন্ন হইতেছে ?”

একথা ইংরেজদিগের মনে থাকিলে উড়িয়াদিতে দুর্ভিক্ষ ঘটিত না ।

নিম্নলিখিত বাক্যটির প্রতি ব্রিটিশ গবর্ণমেন্ট মনোযোগ করিলে আমাদের বিবেচনার ভাল হয় ।

“কৃষকদিগের গৃহে বীজ ও অন্নাদির ত অসম্ভাব নাই ? আবশ্যিক হইলে ত পাদিক বৃদ্ধিতে অনুগ্রহ স্বরূপ শত সংখ্যক ঋণ দান করিয়া থাকেন ?”

এক্ষণে এই নিয়মের অভাবে এ দেশের কৃষকেরা মহাজনের নিকট বিক্রীত । মহাজনের নিকটেও সকলে সকল সময়ে পায় না—অনেকেই অন্নাভাবে শীর্ণ—বীজাভাবে ভরসাশূন্য । যে পায় সেও দ্বিপাদ বৃদ্ধিতে নহিলে পায় না । অনেকে বলিবেন যে, যে অর্থশাস্ত্র অনবগত সেই রাজাকে মহাজনি করিতে পরামর্শ দিবে—রাজার ব্যবসায়, সমাজের অনিষ্টকারক । অর্থশাস্ত্র-ঘটিত যে আপত্তি তাহা আমরা অবগত আছি এবং মহাভারত-কারও অবগত ছিলেন । এই জন্যই নারদের ঐ বাক্যমধ্যেই তিনটী গুরুতর নিয়ম সন্নিবিষ্ট আছে । প্রথম—“আবশ্যিক

হইলে" ঋণ দিতে বলিতেছেন—ইহার অর্থ যে যাহাকে না দিলে চলে না তাহাকেই দিবেন । অতএব যে মহাজনের নিকট ঋণ পাইতে পারিবে, তাহাকে ঋণ দেওয়া এই কথায় প্রতিষেধ হইল । সুতরাং রাজা ব্যবসায়ী হইলেন না । যাহাকে রাজা না দিলে সে দুর্দশাগ্রস্ত হইবে, তাহাকেই দিবেন । দ্বিতীয়তঃ “অনুগ্রহ স্বরূপ” দিবেন—অর্থাৎ ব্যবসায়ীর ন্যায় লাভাকাজক্ষায় দিবেন না । তবে পাদিক বৃদ্ধির কথা কেন ? এ নিয়ম না করিলে যে সে নিষ্পয়োজনেও ঋণ লইবার সম্ভাবনা—বঞ্চক জাতি সর্বত্রই আছে । আর ঋণ দিলেই কতক আদায় হয়, কতক আদায় হয় না । যদি বৃদ্ধির নিয়ম না থাকে তবে রাজাকে ক্ষতিগ্রস্ত হইতে হয় । ক্ষতি স্বীকার করিয়া রাজকোষ হইতে ঋণ দিতে হইলে রাজ্য চলা ভার । তৃতীয়তঃ “শত-সঙ্খ্যক” ঋণ দিবে—ইহার উদ্ধ দিবে না । অর্থাৎ প্রজার জীবননির্বাহার্থে যে পর্য্যন্ত প্রয়োজন, তাহাই রাজা ঋণস্বরূপ দিতে পারেন । ততোধিক ঋণদান ব্যবসায়ীর কাজ । এই তিনটি নিয়মের দ্বারা অর্থশাস্ত্রবেত্তাদিগের আপত্তির মীমাংসা হইতেছে । প্রাচীন হিন্দুরা অর্থশাস্ত্র বিলক্ষণ বুঝিতেন ।

নিম্নোক্ত নীতি, ইংরেজেরা এপর্য্যন্ত শিখিলেন না । না শিখাতে তাঁহাদিগের ক্ষতি হইতেছে ;—

“হে মহারাজ ! যথাকালে গাত্রোথান পূর্ব্বক বেশভূষা সমাধান করিয়া কালজ্ঞ মন্ত্রিগণে পরিবৃত হইয়া দর্শনার্থী প্রজাগণকে ত দর্শন প্রদান করেন ?”

যে রাজাকে প্রজাগণ কখন দেখিতে পায় না—তাঁহার প্রতি প্রজাদিগের অনুরাগ সঞ্চার হয় না বিশেষতঃ এদেশের

লোকের স্বভাব এই । আর রাজদর্শন প্রজাগণের দুর্লভ হইলে, তাহাদিগের সকল প্রকার দুঃখ ও প্রকৃত অবস্থা রাজা বা রাজপুরুষেরা কখন জানিতে পারেন না ।

হিন্দুরাজাদিগের স্থায় মুসলমানেরাও এ কথা বুঝিতেন । এখন যেখানে সম্মুখসরে একটা দরবার বা “লেবী” হয়, সেখানে হিন্দু ও মুসলমানদিগের প্রাত্যাহিক দরবার হইত ।

পরে,—

“দুর্বল শত্রুকে ত বলপ্রকাশপূর্বক সাতিশয় পীড়িত করেন না ?”

তাহা হইলে দুর্বল শত্রুও বলবান হইয়া উঠে । এই দোষে, স্পেনের দ্বিতীয় ফিলিপ “নিয়দেশ” অর্থাৎ হ্লাণ্ড হইতে বহিস্কৃত হইয়াছিলেন । ইংলও যে আমেরিক উপনিবেশ হইতে বহিস্কৃত হইয়াছিলেন, তাহারও কারণ প্রায় এই রূপ ।

তৎপরে,

“দুষ্ট অহিতকারী কদর্যস্বভাব দণ্ডার্থ তঙ্কর লোপ্ত্র সহ গৃহীত হইয়াও তাহাদিগের নিকটে ত ক্ষমা লাভ করিয়া থাকে না ?”

যে দেশে জুরির বিচার আছে, সে দেশের রাজপুরুষদিগকে আমরাও একথা জিজ্ঞাসা করি ।

নারদ যে চতুর্দশ রাজদোষ কীর্তন করিয়াছেন তাহাও শ্রবণযোগ্য,—বখা,

“নাস্তিক্য, অনৃত, ক্রোধ, প্রমাদ, দীর্ঘশ্রুতা, জ্ঞানবান বক্তৃদিগের সাক্ষাৎকার ত্যাগ, আলস্য, চিত্তচাপল্য, নির-

স্তর অর্থচিন্তা, অনর্থক ব্যক্তির সহিত পরামর্শ, নিশ্চিত বিষয়ের অনারম্ভ, মন্ত্রণার অপরিরক্ষণ, মন্ত্রণ কার্যের অপ্রয়োগ ও প্রত্যাখ্যান, এই চতুর্দশ রাজদোষ ।”

আর একটা বাক্যমাত্র উদ্ধৃত করিয়া আমরা নিরস্ত হইব—

“অন্ধ, মূক, পঙ্গু, বিকলাঙ্গ, বন্ধুবিহীন, প্রব্রজিত ব্যক্তিদিগকে ত পিতার স্থায় প্রতিপালন করেন ?”

এই প্রকার সারবান্ এবং একালেও আদরণীয় কথা আরও অনেক আছে



প্রাচীনা এবং নবীনা ।

আমাদিগের সমাজসংস্কারকেরা, নূতন কীর্তি স্থাপনে যাদৃশ ব্যগ্র, সমাজের গতি পর্যবেক্ষণায় তাদৃশ মনোযোগী নহেন। “এই হইলে ভাল হয়, অতএব এই কর,” ইহাই তাহাদিগের উক্তি, কিন্তু কি করিতে কি হইতেছে, তাহা কেহ দেখেন না। বাঙ্গালিরা যে ইংরেজি শিখে, ইহাতে সকলেরই উৎসাহ। কিন্তু ইহার ফল কি তাহার সমালোচনা কেবল আজি কালি হইতেছে। এক শ্রেণীর লোক বলেন, ইহার ফল মাইকেল মধুসূদন দত্ত, দ্বারকানাথ মিত্র প্রভৃতি ; দ্বিতীয় শ্রেণীর লোক বলেন, দুই একটি ফল সুপক্ক এবং সুমধুর বটে, কিন্তু অধিকাংশ তিক্ত ও বিষময়—উদাহরণ মাতালের দল এবং সাধারণ বাঙ্গালী লেখকের পাল। আবার দিন কত ধূম পড়িল, স্ত্রীলোকদিগের অবস্থার সংস্কার কর, স্ত্রী শিক্ষা দাও, বিধবাবিবাহ দাও, স্ত্রীলোককে গৃহপিঞ্জর হইতে বাহির করিয়া উড়াইয়া দাও, বহুবিবাহ নিবারণ কর ; এবং অন্যান্য প্রকারে পাঁচী রামী মাধীকে বিলাতি মেম করিয়া তুল। ইহা করিতে পারিলে যে ভাল, তাহাতে কোন সন্দেহ নাই ; কিন্তু পাঁচী যদি কখন বিলাতি মেম হইতে পারে, তবে আমাদিগের শালতরুও এক দিন ওকুবক্ষে পরিণত হইবে, এমন ভরসা করা যাইতে পারে। যে রীতিগুলির চলন আপাততঃ অসম্ভব, সে গুলি চলিত হইল না ;

স্ত্রীশিক্ষা সম্ভব, এ জন্ত তাহা এক প্রকার প্রচলিত হইয়া উঠিতেছে । পুস্তক হইতে এক্ষণে বাঙ্গালী স্ত্রীগণ যে শিক্ষা প্রাপ্ত হয়, তাহা অতি সামান্য ; পরিবর্তনশীল সমাজে অবস্থিতি জন্ত অর্থাৎ শিক্ষিত এবং ইংরেজের অনুকরণকারী পিতা ভ্রাতা স্বামী প্রভৃতির সংসর্গে থাকায় তাহারা যে শিক্ষাপ্রাপ্ত হয়, তাহা প্রবলতর । এই দ্বিবিধ শিক্ষার ফল কিরূপ দাঁড়াইতেছে ? বাঙ্গালী যুবকের চরিত্রে যে রূপ পরিবর্তন দেখা যাইতেছে, বাঙ্গালী যুবতীগণের চরিত্রে সে রূপ লক্ষণ কিছু দেখা যাইতেছে কি না ? যদি দেখা যাইতেছে, সেগুলি ভাল না মন্দ ? তাহার উৎসাহদান বিধেয়, না তাহার দমন আবশ্যিক ? এ সকল প্রশ্ন সাধারণ লেখকদিগকে আলোচনা করিতে আমরা প্রায় দেখিতে পাই না, অথচ, ইহার অপেক্ষা গুরুতর সামাজিক তত্ত্বও আর নাই । তাই বলিতেছিলাম, যে আমাদের সমাজ-সংস্কারকেরা নূতন কীর্ত্তি স্থাপনে যাদৃশ ব্যগ্র, সমাজের বর্তমান গতির আলোচনায় তাদৃশ মনোযোগী নহেন ।

বিষয়টি অতি গুরুতর । সমাজে স্ত্রীজাতির যে বল, তাহা বর্নিত করিবার প্রয়োজন নাই । মাতা বাল্যকালের শিক্ষাদাত্রী, স্ত্রী বয়ঃপ্রাপ্তের মঙ্গলী, ইত্যাদি প্রাচীন কথা পুনরুক্ত করিবার প্রয়োজন নাই । সকলেই জানেন, স্ত্রীলোকের সম্মতি এবং সাহায্য ব্যতীত সংসারের কোন গুরুতর কার্য সম্পন্ন হয় না । গইনা গড়ান ও গোকু কেনা হইতে ফরাসিস্ রাজ্যবিপ্লব এবং লুথরের ধর্মবিপ্লব পর্য্যন্ত সকলেই স্ত্রীসাহায্যসাপেক্ষ । ফরাসিস্ স্ত্রীগণ ফরাসিস্ রাজ্যবিপ্লবে মহারথী ছিলেন । আন বলীন হইতে ইংলণ্ড প্রটেষ্ট্যান্ট—

—Gospel light first dawned

From Bullen's eyes—

ইহা বলা যাইতে পারে যে আমাদের শুভাশুভের মূল আমাদের কর্ম, কর্মের মূল প্রবৃত্তি ; এবং অনেক স্থানেই আমাদের প্রবৃত্তি সকলের মূল আমাদের গৃহিণীগণ । অতএব স্ত্রীজাতি আমাদের শুভাশুভের মূল । স্ত্রীজাতির মহত্ব কীর্তন কালে, এই সকল কথা বলা প্রাচীন প্রথা আছে এজন্য আমরাও এ কথা বলিলাম ; কিন্তু এ কথাগুলি বাহারা ব্যবহার করেন তাঁহাদিগের আন্তরিক ভাব এই যে পুরুষই মনুষ্যজাতি ; যাহা পুরুষের পক্ষে শুভাশুভ বিধান করিতে সক্ষম, তাহাই গুরুতর বিষয় ; স্ত্রীগণ, পুরুষের শুভাশুভ বিধায়িনী বলিয়াই তাঁহাদিগের উন্নতি বা অবনতির বিষয় গুরুতর বিষয় । বাস্তবিক, আমরা সেরূপ কথা বলি না । আমাদের প্রধান কথা এই, যে স্ত্রীগণ সংখ্যায় পুরুষগণের তুল্য, বা অধিক ; তাঁহারা সমাজের অর্দ্ধাংশ । তাঁহারা পুরুষগণের শুভাশুভবিধায়িনী হউন, বা না হউন, তাঁহাদিগের উন্নতিতে সমাজের উন্নতি ; যেমন পুরুষদিগের উন্নতিতে সমাজের উন্নতি, ঠিক সেই পরিমাণে স্ত্রীজাতির উন্নতিতে সমাজের উন্নতি, কেন না স্ত্রীজাতি সমাজের অর্দ্ধেক ভাগ । স্ত্রী পুরুষের সমান ভাগের সমষ্টিকে সমাজ বলে ; উভয়ের সমান উন্নতিতে সমাজের উন্নতি । এক ভাগের উন্নতি সমাজসংস্কারের মুখ্য উদ্দেশ্য, তাহার উন্নতিসহায় বলিয়াই অন্যভাগের উন্নতি গৌণ উদ্দেশ্য, এ কথা নীতিবিরুদ্ধ ।

কিন্তু সমাজের নিয়ন্তৃ বর্গ সর্বকালে সর্বদেশে, এই ভ্রমে

পতিত । তাঁহারা বিধান করেন যে স্ত্রীলোকেরা এইরূপ এই-
রূপ আচরণ করিবে ।—কেন করিবে ? উত্তর, তাহা হইলে,
পুরুষের অমুক মঙ্গল ঘটিবে, বা অমুক অমঙ্গল নিবারিত
হইবে । সমাজবিধাতৃদিগের সর্বত্র এইরূপ উক্তি ; কোথাও এ
উদ্দেশ্য স্পষ্ট কোথাও অস্পষ্ট, কিন্তু সর্বত্রই বিদ্যমান ।
এই জন্যই সর্বত্র স্ত্রীজাতির সতীত্বের জন্য এত পীড়াপীড়ি ;
পুরুষের সেই ধর্মের অভাব, কোথাও তত বড় গুরুতর
দোষ বলিয়া গণনীয় নহে । বাস্তবিক নীতিশাস্ত্রের স্বাভাবিক
মূল ধরিতে গেলে এমত কোন বিষয়ই পাওয়া যায় না, যদ্বারা
স্ত্রীকৃতব্যভিচার পুরুষকৃত পরদারগ্রহণ অপেক্ষা গুরুতর
দোষ বিবেচনা করা যায় । পাপ দুই সমান ; একপুরুষ-
ভাগিনী স্ত্রীতে পুরুষের যে স্বাভাবিক অধিকার, এক স্ত্রীভাগী
পুরুষে স্ত্রীলোকের ঠিক সেইই স্বাভাবিক অধিকার, কিছু
মাত্র নূন নহে । তথাপি পুরুষে এ নিয়ম লঙ্ঘন করিলে,
তাহা বাবুগিরির মধ্যে গণ্য ; স্ত্রীলোক এ দোষ করিলে,
সংসারের সকল সুখ তাহার পক্ষে বিলুপ্ত হয় ; সে অধমের
মধ্যে অধম বলিয়া গণ্য হয়, কুষ্ঠগ্রস্তের অধিক অস্পৃশ্য
হয় । কেন ? পুরুষের সুখের পক্ষে স্ত্রীর সতীত্ব আবশ্যিক ।
স্ত্রীজাতির সুখের পক্ষেও পুরুষের ইন্দ্রিয় সংযম আবশ্যিক,
কিন্তু পুরুষই সমাজ, স্ত্রীলোক কেহ নহে । অতএব স্ত্রীর
পাতিব্রত্যাচ্যুতি গুরুতর পাপ বলিয়া সমাজে বিহিত হইল ;
পুরুষের পক্ষে নৈতিক বন্ধন শিথিল রছিল ।

সকল সমাজেই স্ত্রীজাতি পুরুষাপেক্ষা অনুন্নত ; পুরুষের
আত্মপক্ষপাতিতাই ইহার কারণ ; পুরুষ বলিষ্ঠ, সুতরাং পুরুষই

কার্যকর্তা ; স্ত্রীজাতিকে কাজে কাজেই তাঁহাদিগের বাহুবলের অধীন হইয়া থাকিতে হয় । আত্মপক্ষপাতী পুরুষগণ, যতদূর আত্মস্বার্থের প্রয়োজন, ততদূর পর্য্যন্ত স্ত্রীগণের উন্নতির পক্ষে মনোযোগী ; তাহার অতিরেকে তিলার্দ্ধি নহে । এ কথা অন্যান্য সমাজের অপেক্ষা আনাদিগের দেশে বিশেষ সত্য । প্রাচীন কালের কথা বলিতে চাহি না ; তৎকালীন স্ত্রীজাতির চিরাধীনতার বিধি ; কেবল অবস্থা বিশেষ ব্যতীত স্ত্রীগণের ধনাধিকারে নিষেধ ; স্ত্রী, ধনাধিকারিণী হইলেও স্ত্রীর দান বিক্রয়ে ক্ষমতার অভাব ; সহমরণ বিধি ; বহু কাল প্রচলিত বিধবার বিবাহ নিষেধ ; বিধবার পক্ষে প্রচলিত কঠিন নিয়ম সকল, স্ত্রীপুরুষে গুরুতর বৈষম্যের প্রমাণ । তৎপরে মধ্য-কালেও স্ত্রীজাতির অবনতি আরও গুরুতর হইয়াছিল । পুরুষ, প্রভু, স্ত্রী দাসী ; স্ত্রী জল ডুলে, রন্ধন করে, বাটনা বাটে, কুটনা কোটে । বরং বেতনভাগিনী দাসীর কিঞ্চিৎ স্বাধীনতা আছে, কিন্তু বনিতা দুহিতা স্বসার তাহাও ছিল না । আজ কাল, পুরুষের শিক্ষার গুণে হউক, স্ত্রীশিক্ষার গুণে হউক, না ইংরাজের দৃষ্টান্তের গুণে হউক, অবস্থার পরিবর্তন হইতেছে । কিন্তু যে রূপ পরিবর্তন হইতেছে, তাহার সর্বাংশই কি উন্নতি-সূচক ? বঙ্গীয় যুবকদিগের যে অবস্থান্তর ঘটিতেছে তাহার বিশেষ আন্দোলন শুনিতে পাই কিন্তু বঙ্গীয় যুবতীগণের যে অবস্থান্তর ঘটিয়াছে, তাহা কি উন্নতি ?

এ প্রশ্নের উত্তর দিবার পূর্বে পূর্বকালে বঙ্গীয় যুবতী কি ছিলেন, এক্ষণে কি হইতেছেন, তাহা স্মরণ করা আবশ্যিক । প্রাচীনার সহিত নবীনীর তুলনা আবশ্যিক । পূর্ব-

কালের যুবতীগণের নাম করিতে গেলে, আগে শাখা শাড়ী
সিন্দূরকোঁটা মনে পড়িবে ; বাঁকমলের মুটাম হাত উপরে মনসা
পেড়ে শাড়ীর রান্ধা পাড় আসিয়া পড়িয়াছে ; হাতে পৈছা,
কঙ্কণ, এবং শঙ্খ, (যাহার জুটিল তাহার বাউটি নামে সোনার
শঙ্খ)—মুষ্টিমধ্যে দৃঢ়তর সন্মার্জ্জনী, বা রক্তনের বেড়ী ;
কপালে কলা বউয়ের মত সিন্দূরের রেখা, নাকে চন্দ্রমণ্ডলের
মত নখ ; দাঁতে স্নমাবস্তার মত মিশি ; এবং মস্তকের ঠিক
মধ্যভাগে, পর্কিত শৃঙ্গের গায় তুঙ্গ কবরীশিখর । আমরা
স্বীকার করি যে সেকালে মেয়ে যখন গাছকোমর বাঁধিয়া,
কাঁটা হাতে, খোঁপা খাড়া করিয়া, নখ নাড়িয়া, দাঁড়াইত,
তখন অনেক পুরুষের সংকম্প হইত । যাহারা এবন্দিধা
প্রাঙ্গণবিহারিণী রসবতীর সঙ্গে বাদানুবাদ সাহস করিতেন,
তাঁহারা একটু সতর্ক হইয়া দূরে দাঁড়াইতেন । ইঁহারা কোন্দলে
বিশেষ পরিপক ছিলেন, পরস্পরের পৃষ্ঠত্বগের সঙ্গে তাঁহাদের
হস্তের সন্মার্জ্জনীর বিশেষ কোন সম্বন্ধ ছিল । তাঁহাদিগের
ভাষাও যে বিশেষ প্রকারে অভিধানসম্মত ছিল, এমত
বলিতে পারি না, কেন না তাঁহারা “পোড়ার মুখো” “ডেকুরা”
ইত্যাদি নিপাতনসাধ্য শব্দ আধুনিক প্রাণনাথ প্রাণকান্তা-
দির স্থলে ব্যবহার করিতেন, এবং “আবাগী” “শতেক খুরারী”
প্রভৃতি শব্দ আধুনিক “সখী” “ভগিনী” স্থানে প্রয়োগ
করিতেন ।

এক্ষণে যে সুন্দরীকুল চরণালককে বঙ্গভূমিকে উজ্জ্বলা
করিতেছেন, তাঁহারা ভিন্নপ্রকৃতি । সে শাখা শাড়ী সিন্দূর
মিশি মল মাছলী, কিছুই নাই ; অনাভিধানিক প্রিয় সম্বোধন

সকল সুন্দরীগণের রসনা ত্যাগ করিয়া বাঙ্গলা নাটকে আশ্রয় লইয়াছে ; যেখানে আগে মোটা মনসা পেড়ে শাড়ী মেয়ে মোড়া গনিক্লাথ ছিল, এক্ষণে তাহার স্থানে শান্তিপু্রে ডুরে রূপের জাহাজের পাল হইয়া সোহাগ বাতাসে ফরফর করিয়া উড়িতেছে । হাতাবেড়ী কাঁটা কলসীর পরিবর্তে, সূচ সূতা কার্পেট কেতাব হইয়াছে ; পরিধেয় আট ছাড়িয়া চরণে নামিয়াছে ; কবরী মূক্কা ছাড়িয়া স্কন্ধে পড়িয়াছে ; এবং অঙ্গের সুবর্ণ পিণ্ড ছাড়িয়া অলঙ্কারে পরিণত হইতেছে । ধূলিকর্দম-রঙ্গিনীগণ, সাবান সুগন্ধাদির মহিমা বুঝিয়াছেন ; কলকণ্ঠধ্বনি, পাপিয়ার মত গগনপ্লাবী না হইয়া মার্জ্জারের মত অক্ষুট হইয়াছে । পতির নাম এক্ষণে আর ডেকরা সর্ব্বনেশে নহে ; তত্তৎস্থানে সম্বোধন পদ সকল দীনবন্ধু বাবুর ঐশ্ব হইতে বাছিয়া রাখিয়া নীত হইয়া ব্যবহৃত হইতেছে । স্থূল কথা এই, প্রাচীনার অপেক্ষা নবীনার রুচি কিছু ভাল । স্ত্রীজাতির রুচির কিছু সংস্কার হইয়াছে ।

কিন্তু অগ্রান্ত বিষয়ে, তাদৃশ উন্নতি হইয়াছে কি না বলিতে পারি না । কয়েকটি বিষয়ে নবীনাগণকে আমরা নিন্দনীয়া বিবেচনা করি । তাঁহাদিগের কোন প্রকার নিন্দা করা আমা-বিগের ঘোরতর বেআদবি । তবে চন্দ্রের সঙ্গে তাঁহাদিগের সাদৃশ্য সম্পূর্ণ করিবার জন্য তাঁহাদিগের কিঞ্চিৎ কলঙ্করটনার প্রবৃত্ত হইলাম ।

১ । তাঁহাদের প্রথম 'দোষ' অালম্ব । প্রাচীনা অত্যন্ত ভ্রমশালিনী এবং গৃহকর্মে সুপটু ছিলেন ; নবীনা, ঘোরতর বাবু ; জলের উপর পদ্মের মত স্থিরভাবে বসিয়া স্বচ্ছ 'দর্শনে

আপনার রূপের ছায়া আপনি দেখিয়া দিন কাটান । গৃহকুশলের ভার, প্রায় পরিচারিকার প্রতি সমর্পিত । ইহাতে অনেক অনিষ্ট জন্মিতেছে ;—প্রথম, শারীরিক পরিশ্রমের অল্পভার, যুবতীগণের শরীর বলশূন্য এবং রোগের আগার হইয়া উঠিতেছে । প্রাচীনাদিগের, অর্থাৎ পূর্বকালের যুবতীগণের শরীর স্বাস্থ্যজনিত এক অপূর্ব লাভ্যবিশিষ্ট ছিল, এক্ষণে তাহা কেবল নিম্নশ্রেণীর স্ত্রীলোকের মধ্যে দেখা যায় । নবীনাদিগের প্রাত্যহিক রোগভোগে তাহাদিগের স্বামী পিতা পুত্র প্রভৃতি সর্বদা জ্বালাতন এবং অসুখী ; এবং সংসারও কাজে কাজেই বিশৃঙ্খলাযুক্ত এবং দুঃখময় হইয়া উঠে । গৃহিণী রুগ্ন শয্যা-শায়িনী হইলে, গৃহের শ্রী থাকে না ; অর্থের ধ্বংস হইতে থাকে ; শিশুগণের প্রতি অযত্ন হয় ; সূতরাং তাহাদিগের স্বাস্থ্যক্ষতি ও কুশিক্ষা হয় ; এবং গৃহমধ্যে সর্বত্র দুর্নীতির প্রচার হয় । যাহারা ভালবাসে, তাহারাও নিত্য রুগ্নের সেবার দুঃখ সহ্য করিতে পারে না ; সূতরাং দম্পতীপ্রীতিরও লাঘব হইতে থাকে । এবং মাতার অকাল মৃত্যুতে শিশুগণের এমত অনিষ্ট ঘটে, যে তাহাদিগের মৃত্যুকাল পর্যন্ত তাহারা উহার ফলভোগ করে । সত্য বটে, ইংরেজ জাতীয় স্ত্রীগণকে আলস্যপরবশ দেখিতে পাই, কিন্তু তাহারা অশ্বারোহণ, বায়ু-সেবন, ইত্যাদি অনেকগুলি স্বাস্থ্যরক্ষক ক্রিয়া নিয়মিতরূপে সম্পাদন করে । আমাদিগের গৃহাপঞ্জরের বিহঙ্গিনীগণের সে সকল কিছুই হয় না ।

দ্বিতীয়, স্ত্রীগণের আনন্দের আর একটি গুরুতর কুফল এই যে সন্তান দুর্বল এবং ক্ষীণজীবী হয় । শিশুদিগের নিত্য রোগ,

এবং অকালমৃত্যু অনেক সময়েই জননীরা শ্রমে অনুরাগ শূন্য, তার ফল। অনেকে বলেন, আগে এত রোগ ছিল না; এখন নিত্য পীড়া; আগে লোকে দীর্ঘজীবী ছিল; এক্ষণে অল্পবয়সে মরে। অনেকের বিশ্বাস আছে, এ সকল কালমহিমা; কলিতে অনৈসর্গিক ব্যাপার ঘটিতেছে। বুদ্ধিমান ব্যক্তি জানেন যে নৈসর্গিক নিয়ম কখন কালমাছাত্ম্যে পরিবর্তিত হয় না; যদি আধুনিক বাঙ্গালিরা বহুরোগী এবং অল্পাষু হইয়া থাকে, তবে তাহার অবশ্য নৈসর্গিক কারণ আছে সন্দেহ নাই। আধুনিক প্রস্তুতিগণের শ্রমে বিরতিই সেই সকল নৈসর্গিক কারণের মধ্যে অগ্রগণ্য। যে বঙ্গদেশের ভরসা লোকের শারীরিক বলোন্নতির উপর বর্তিয়াছে, সেই বঙ্গদেশে জননীগণের আলস্যবশতাব এ রূপ বৃদ্ধি যে অতি শোচনীয় ব্যাপার তাহার সন্দেহ নাই।

আলস্যের তৃতীয় কুফল এই যে নবীনাগণ গৃহকর্মে নিতান্ত অনিশ্চিত। এবং অপটু। কখনও সে সকল কাজ করেন না, এজন্ত শিখেনও না, ইহাতে অনেক অনিষ্ট ঘটে। প্রাচীনরা নিতান্ত ধনী না হইলে, জল তুলিতেন, বাসন মাজিতেন, উঠান কাঁট দিতেন; রন্ধন তাঁহাদের জীবনের প্রধান কার্য ছিল। এ কিছু বাড়াবাড়ি; নবীনাগণের এতদূর করিতে আমরা অনুরোধ করি না; যাহার যেমন অবস্থা, সে তদনুসারে কার্য করিলেই যথেষ্ট; কেবল কার্পেট তুলিয়া কাল কাটাইলে, অতি ঘণিতরূপে জীবননির্ব্বাহ করা হয় বিবেচনা করি। পরস্পরের সুখবর্দ্ধন জন্ত সকলেরই জন্ম; যে স্ত্রী, ভূমণ্ডলে আসিয়া, শয্যায় গড়াইয়া, দর্পণ সম্মুখে কেশরঞ্জন করিয়া কার্পেট তুলিয়া, সীতার বনবাস পড়িয়া, এবং সন্তান প্রসব করিয়া কাল কাটা-

ইলেন, আপনার ভিন্ন কাহারও সুখ বৃদ্ধি করিলেন না, তিনি পশুজাতির অপেক্ষা কিঞ্চিৎ ভাল হইলে হইতে পারেন, কিন্তু তাঁহার স্ত্রীজন্ম নিরর্থক। এ শ্রেণীর স্ত্রীলোকগণকে আমরা গলায় দড়ি দিয়া মরিতে পরামর্শ দিই; পৃথিবী তাহা হইলে অনেক নিরর্থক ভারবহনবন্ত্রণা হইতে বিমুক্তা হইবেন।

গৃহিণী গৃহকর্ম্ম না জানিলে রুগ্নগৃহিণীর গৃহের গ্যায় সকলই নিশৃঙ্খল হইয়া পড়ে; অর্থে উপকার হয় না; অর্থ অনর্থক ব্যয় হয়; দ্রব্য সামগ্রী লুপ্ত যায়; অর্দ্ধেক দাস দাসী এবং অপর লোক চুরি করে। বহুব্যয়েও খাদ্যাদির অপ্রতুল ঘটে; ভাল সামগ্রীর খরচ দিয়া মন্দ সামগ্রী ব্যবহার করিতে হয়; ভাল সামগ্রী গৃহস্থের কপালে ঘটে না। পৌরজনে পৌরজনে অপ্রণয় এবং কলহ ঘটিয়া উঠে। অতিথি অভ্যাগতের উপযুক্ত সম্মান হয় না। সংসার কণ্টকময় হয়।

২। নবীনাদিগের দ্বিতীয় দোষ ধর্ম্ম সম্বন্ধে। আমরা এক্ষণকার বঙ্গাঙ্গনাগণকে অধার্ম্মিক বলিতেছি না,—বঙ্গীয় যুবকদিগের তুলনায় তাঁহারা ধর্ম্মভক্ত এবং বিপুলস্বাভা বটেন, কিন্তু প্রাচীনাদিগের সম্প্রদায়ের তুলনায় তাঁহারা ধর্ম্মে লঘু, সন্দেহ নাই। বিশেষ যে সকল ধর্ম্ম গৃহস্থের ধর্ম্ম বলিয়া পরিচিত সেই গুলিতে এক্ষণকার যুবতীগণের লাঘব দেখিয়া কষ্ট হয়।

স্ত্রীলোকের প্রথম ধর্ম্ম পাতিব্রত্য। অদ্যাপি বঙ্গমহিলাগণ পৃথিবীতলে পাতিব্রত্য ধর্ম্মে তুলনারহিতা। কিন্তু যাহা ছিল তাহা কি আর আছে? এ প্রশ্নের উত্তর শীঘ্র দেওয়া যায় না। প্রাচীনাগণের পাতিব্রত্য ষেরূপ দৃঢ়গ্রন্থির দ্বারা হৃদয়ে নিবদ্ধ ছিল, 'পাতিব্রত্য ষেরূপ তাহাদিগের অস্থি মজ্জা শোণিতে

প্রবিষ্ট ছিল, নবীনাদিগেরও কি তাই? অনেকের বটে, কিন্তু অধিকাংশের কি তাই? নবীনাগণ পতিব্রতা বটে, কিন্তু যত লোকনিন্দা ভরে, তত ধর্ম ভরে নহে।

তাহার পর, দানাদিতে প্রাচীনাদিগের যেরূপ মনোনিবেশ ছিল, নবীনাদিগের সেরূপ দেখা যায় না। প্রাচীনাগণের দৃঢ় বিশ্বাস ছিল, যে দানে পরমার্থের কাজ হয়। যে দান করে, সে স্বর্গে যায়। এক্ষণকার যুবতীগণের স্বর্গে বিশ্বাস তত দৃঢ় নহে; তাহাদের পরলোকে স্বর্গপ্রাপ্তিকামনা তত বলবতী নহে। ইংরেজী সভ্যতার ফলে, দেশে নানাবিধ সামগ্রীর প্রাচুর্য হওয়াতে সকলেরই অর্থের প্রয়োজন বাড়িয়াছে, স্ত্রীলোকদিগেরও বাড়িয়াছে; এজন্য দানে তাদৃশ অনুরাগ আর নাই। তত দান করিলে, আর কুলায় না। টাকায় যে সকল সুখ কেনা যায়, তাহার সংখ্যা এবং বৈচিত্র্য বাড়িয়াছে; দানের আধিক্য করিলে, এখন অনেক বাঙালীর সুখে বঞ্চিত হইতে হয়। সুতরাং স্ত্রীলোকে (এবং পুরুষে) আর তত দানশালী নহে।

হিন্দুদিগের একটি প্রধান ধর্ম অতিথিসংকার। যে গৃহে আসে, তাহাকে আহারাদির দ্বারা পরিতুষ্ট করণ পক্ষে এতদেশীয় লোকের তুল্য কোন জাতি ছিল না। প্রাচীনাগণ এই গুণে বিশেষ গুণশালিনী ছিলেন। নবীনাদিগের মধ্যে সে ধর্ম একেবারে বিলুপ্ত হইতেছে। গৃহে অতিথি অভ্যাগত আসিলে, প্রাচীনারা কৃতার্থ হইতেন, নবীনাগণ বিরক্ত হইতেন। লোককে আহার করান, প্রাচীনাগণের প্রধান সুখ ছিল, নবীনাগণ ইহাকে ঘোরতর বিপদ মনে করেন।

ধর্ম্মে যে নবীনাগণ প্রাচীনাদিগের অপেক্ষা নিকৃষ্ট, তাহার একটি বিশেষ কারণ অসম্পূর্ণ শিক্ষা। লেখা পড়া বা অন্য প্রকারের শিক্ষা তাহারা যাহা কিঞ্চিৎ প্রাপ্ত হইলেন, তাহাতেই বুদ্ধিতে পারেন যে প্রাচীন ধর্ম্মের শাসন অমূলক। অতএব তাহাতে বিশ্বাস হারাইয়া, ধর্ম্মের যে বন্ধন ছিল, তাহা হইতে বিমুক্ত হইলেন। তাহার স্থানে আর নূতন বন্ধন কিছুই গ্রন্থিবদ্ধ হইতেছে না। আমরা লেখা পড়ার নিন্দা করিতেছি না। ধর্ম্ম ভিন্ন বিদ্যার অপেক্ষা মূল্যবান্ বস্তু যে পৃথিবীতে কিছুই নাই, ইহা আমরা ভুলিয়া বাইতেছি না। তবে বিদ্যার ফল ইহা সর্বত্র ঘটয়া থাকে, যে তাহাতে চক্ষু কুটে, মিথ্যাকে মিথ্যা বলিয়া বোধ হয়, সত্যকে সত্য বলিয়া জানা যায়। বিদ্যার ফলে লোকে, প্রাচীন ধর্ম্মশাস্ত্রঘাটিত ধর্ম্মের মূলের অলীকত্ব দেখিতে পায়; প্রাকৃতিক যে সত্য ধর্ম্ম, তাহা সত্য বলিয়া চিনিতে পারে। অতএব বিদ্যার ধর্ম্মের ক্ষতি নাই, বরং বৃদ্ধি আছে। সচরাচর পণ্ডিতে যাদৃশ ধর্ম্মিষ্ঠ, মূর্খে তাদৃশ পাপিষ্ঠ হয়। কিন্তু অল্প বিদ্যার দোষ এই যে ধর্ম্মের মিথ্যা মূল তদ্বারা উচ্ছিন্ন হয়; অথচ সত্য ধর্ম্মের প্রাকৃতিক মূল সংস্থাপিত হয় না। সেটুকু কিছু অধিক জ্ঞানের ফল। পরোপকার করিতে হইবে, এটী যথার্থ ধর্ম্মনীতি বটে। মূর্খেও ইহা জানে, এবং মূর্খদিগের মধ্যে ধর্ম্মে যাহাদের মতি আছে, তাহারাও ইহার বশবর্তী হয়। তাহার কারণ এই যে এই নৈতিক আজ্ঞা প্রচলিত ধর্ম্মশাস্ত্রে উক্ত হইয়াছে; মূর্খের তাহাতে দৈবাজ্ঞা বলিয়া বিশ্বাস আছে। দৈববিধি লঙ্ঘন করিলে ইহলোকে ও পরলোকে ক্ষতিপ্রাপ্ত হইতে হইবে বলিয়া

মূৰ্খ সে নীতির বশবর্তী ; পণ্ডিতও সে নীতির বশবর্তী, কিন্তু তিনি ধর্মশাস্ত্রোক্ত বলিয়া তদুক্তির অনুসরণ করেন না। তিনি জানেন যে ধর্মের কতকগুলি প্রাকৃতিক নিয়ম আছে তাহা অবশ্য পালনীয় ; এবং পরোপকারবিধি সেই সকল নিয়মের ফল। অতএব এ স্থলে ধর্মের ক্ষতি হইল না। কিন্তু যদি কেহ ঐদৃশ পরিমাণে মাত্র বিদ্যার আলোচনা করে যে তদ্বারা প্রাচীন ধর্মশাস্ত্রে বিশ্বাস বিনষ্ট হয়, অথচ যতদূর বিদ্যার আলোচনায় প্রাকৃতিক ধর্মে বিশ্বাস জন্মে, তত দূর না যায়, তবে তাহার পক্ষে ধর্মের কোন মূল থাকে না। লোকনিন্দা-ভয়ই তাহাদিগের একমাত্র ধর্মবন্ধন হইয়া উঠে। সে বন্ধন অতি দুর্বল। আধুনিক অল্পশিক্ষিত যুবক যুবতীগণ, কিয়দংশে এই অবস্থাপন্ন ; এজন্ত ধর্মাংশে তাঁহারা প্রাচীনাদিগের সম-কক্ষ নহেন। যাহারা স্ত্রীশিক্ষার ব্যতিব্যস্ত, তাঁহাদিগের আমরা জিজ্ঞাসা করি, যে আপনারা বালিকাদিগের হৃদয় হইতে প্রাচীন ধর্মবন্ধন বিযুক্ত করিতেছেন, তাহার পরিবর্তে কি সংস্থাপন করিতেছেন ?*

তিন রকম ।

নং ১

বঙ্গদর্শনে “নবীনা এবং প্রাচীনা” কে লিখিল ? যিনি লিখুন, তিনি মনে করিয়াছেন, অবলা স্ত্রীজাতি কিছু কথা

* “নবীনা ও প্রাচীনা।” এই প্রবন্ধ বঙ্গদর্শনে প্রকাশিত হইলে পর, স্ত্রীলোকের পক্ষ হইতে যে উত্তর আছে, তাহা নিম্নলিখিত ক্রান্তম পত্র তিন খানিতে লিখিত হইয়া ছিল।

কহিবে না, অতএব যাহা ইচ্ছা তাহা লিখি। জানেন না যে
সম্ভার্জুনী স্ত্রীলোকেরই আয়ুধ।

ভাল, নবীন মহাশয়, আপনারা নবীনা প্রাচীনার গুণ
দোষের তুলনা করিয়াছেন, নবীন ও প্রাচীনে কি তুলনা হয়
না ? তুলনা করিলে দোষের ভাগ কোন দিকে ভারি হইবে ?

প্রাচীনের অপেক্ষা নবীনের গুণের মধ্যে দেখি, তোমরা
একটু ইংরেজি শিখিয়াছ। কিন্তু ইংরেজি শিখিয়া কাহার কি
উপকার করিয়াছ ? ইংরেজি শিখিয়া কেরাণীগিরি শিখিয়াছ
দেখিতে পাই। কিন্তু মনুষ্যত্ব ? শুন, প্রাচীনে নবীনে প্রভেদ
কি, বলি। প্রাচীনেরা পরোপকারী ছিলেন ; তোমরা আত্মো-
পকারী। প্রাচীনেরা সত্যবাদী ছিলেন ; তোমরা কেবল
প্রিয়বাদী। প্রাচীনেরা ভক্তি করিতেন, পিতা মাতাকে ; নবী-
নের ভক্তি করা পত্নী বা উপপত্নীকে। প্রাচীনেরা দেবতা
ব্রাহ্মণের পূজা করিতেন ; তোমাদের দেবতা টেম ফিরিঙ্গী,
তোমাদের ব্রাহ্মণ সোণার বেনে। সত্য বটে, তাঁহারা পৌত্ত-
লিক ছিলেন, কিন্তু তোমরা বোতলিক ! জগদীশ্বরের স্থানে,
তোমরা অনেকেই ধাত্তেশ্বরীকে স্থাপনা করিয়াছ ; ব্রহ্মা বিষ্ণু
মহেশ্বরের স্থানে, ব্রাণ্ডি, রম, জিন। বিয়র, সেরি, তোমাদের
ষষ্ঠী মনসার মধ্যে। বঙ্গীয় বাবুর ভ্রাতৃস্নেহ, সম্বন্ধীর উপর
বর্তিয়াছে, অপত্যস্নেহ ঘোড়া কুকুরের উপর বর্তিয়াছে ; পিতৃ-
ভক্তি আপিসের সাহেবের উপর বর্তিয়াছে, আর মাতৃভক্তি ?
পাচিকার উপরে। আমরা অতিথি অভ্যাগত দেখিলে মহা
বিপদ মনে করি বটে, তোমরা তাহাদিগকে গলা ধাক্কা দাও।
আমরা অলস ; তোমরা শুধু অলস নও— তোমরা বাবু ! তবে

ইংরেজু বাহাদুর, নাকে দড়ি দিয়া তোমাদের ঘানিগাছে ঘুরায়,
বল নাই বলিয়া ঘোর । আর আমরাও নাকে দড়ি দিয়া ঘুরাই,
বুদ্ধি নাই বলিয়া ঘোর । আমরা লেখা পড়া শিখি নাই বলিয়া
আমাদের ধর্মের বন্ধন নাই, আর তোমাদের ? তোমাদের
ধর্মের বন্ধন বড় দৃঢ়, কেন না তোমাদের সে বন্ধনের দড়ী, এক-
দিগে শুঁড়ী, আর একদিকে বারস্ত্রী টানিয়া আঁটিয়া দিতেছে ;
তোমরা ধর্ম দড়িতে মদের কলসী গলায় বাঁধিয়া, প্রেমসাগরে
সাঁপ দিতেছ—গরিব “নবীনা” খুনের দায়ে ধরা পড়িতেছে ।
তোমাদের আবার ধর্মের ভয় কি ? তোমরা কি মান ? ঠাকুর
দেবতা ? যিশুখ্রীষ্ট ? ধর্ম মান ? পাপ পুণ্য মান ? কিছু না—
কেবল আমাদের এই আলতা পরা মল বেড়া শ্রীচরণ মান ;
সেও নাথির জ্বালায় ।

শ্রীচণ্ডিকামুন্দরী দেবী ।

নং ২

সম্পাদক মহাশয় ! আপনাদের শ্রীচরণে একিঙ্করীকুল
কোন্ দোষে দোষী ? আমরা কি জানি ?—আপনারা শিখাই-
বেন, আমরা শিখিব—আপনারা গুরু, আমরা শিষ্য,—কিন্তু
শিক্ষাদান এক, নিন্দা আর । বঙ্গদর্শনে “নবীনার” প্রতি এত
কটুক্তি কেন ?

আমাদের সহস্র দোষ আছে স্বীকার করি । একে স্ত্রীজাতি
তাতে বাঙ্গালির মেয়ে ; জাতিতে কাঠ মল্লিকা, তাহাতে মরু-
ভূমে জন্মিয়াছি—দোষ না থাকিবে কেন ? তবে কতকগুলি
দোষ আপনাদেরই গুণে জন্মিয়াছে । আপনাদের গুণে,

দোষে নহে। আপনারা আমাদের এত ভাল না বাসিলে, আমাদের এত দোষ ঘটিত না। আপনারা আমাদের সুখী করিয়াছেন, এজন্য আমরা অলস। মাথার ফুলটি খসিয়া পড়িলে, আপনারা তুলিয়া পরান। আপনারা জল হইয়া যে নলিনী হৃদয়ে ধারণ করেন, সে কেন স্বচ্ছ সলিলে আপনার রূপের ছায়া দেখিয়া দিন না কাটাইবে ?

আমরা 'অতিথি' অভ্যাগতের প্রতি অমনোযোগী—তাহার কারণ আমরা স্বামী পুত্রের প্রতি অধিক মনোযোগী। আমাদের ক্ষুদ্র হৃদয়ে আপনারা এতস্থান গ্রহণ করিয়াছেন, যে অশ্রু ধর্মের আর স্থান নাই।

আর—শেষ কথা, আমরা কি ধর্মভীতা নহি ? ছি ? ধর্মভীতা বলিয়াই, আপনাদিগকে আর কিছু বলিতে পারিলাম না। তোমরাই আমাদের ধর্ম। তোমাদের ভয়ে ভীতা বলিয়া, অশ্রু ধর্মের ভয় করি না। সকল ধর্ম কর্ম আমরা স্বামী পুত্রে সমর্পণ করিয়াছি—অন্য ধর্ম জানি না। লেখা পড়া শিখাইয়া আমাদেরিগকে কোন ধর্মে বাধিবেন ? যত শিখান না কেন—আমরা বাঙ্গালির মেয়ে, সকল বন্ধন ছিঁড়িয়া এই পাতিত্রত্য বন্ধনে আপনা আপনি বাঁধা পড়িব। যদি ইহাতে অধর্ম হয়, সে আপনাদের দোষ, আপনাদেরই গুণ। আর, যদি আমার ন্যায় মুখরা বালিকার কথায় রাগ না করেন, তবে জিজ্ঞাসা করি, আপনারা গুরু, আমরা শিষ্য—আপনারা আমাদের কোন ধর্ম শিখাইয়া থাকেন ?

লেখা পড়া শিখিব ? কেন ? তোমাদের মুখচন্দ্র দেখিয়া যে সুখ, লেখা পড়ার কি তত ? তোমাদের সুখসাধনে যে

ধর্মশিখা, লেখা পড়ায় কি তত ? দেখ, তোমাদের দেখিয়া আমরা আত্মবিসর্জন শিখিয়াছি, লেখা পড়ায় কি তাহা শিখাইবে ? আর লেখা পড়া শিখিব কখন ? তোমাদের মুখ ভাবিতে ভাবিতে দিন যায়, ছাই লেখা পড়া শিখিব কখন ?

ছি ! দাসীদিগের নিন্দা !

শ্রীলক্ষ্মীমণি দেবী ।

৩ নং

ভাল, কোন্ রসিকচূড়ামণি “নরীনা এবং প্রবীণা” লিখিলেন ?

লেখক মহাশয় ! তুমি যা বলিয়াছ, সব সত্য—একটি মিথ্যা নহে । আমরা অলস বটে, — কিন্তু আমরা অলস না হইয়া, কাজ করিয়া বেড়াইলে, তোমাদের দশা কি হইত ? এ বিজরি, তোমাদের হৃদয়াকাশে স্থির না থাকিলে, কাহার প্রতি চাহিয়া, এ দীর্ঘ হৃৎখদারিদ্র্যময় জীবন কাটাইতে ? এ সৌদামিনী স্থির না থাকিলে, তোমরা এ সংসারান্বকারে কোথায় আলো পাইতে ? আমরা কাজ করিব ? করিব, ক্ষতি কি, কিন্তু দেখ যেন, আমাদের তিলেক না দেখিয়া, তোমরা তৈলশূন্য প্রদীপের মত হঠাৎ নিবিয়া বসিও না ; জলশূন্য মাছের মত বার বার পুচ্ছ আছড়াইতে থাকিও না ; আর রাখালশূন্য বাছুরের মত হান্দারকে তোমাদের গৃহগোহাল পরিপূর্ণ করিও না । আমরা কাজ করিতে

যাইব, কিন্তু তোমরা এ চল চুল চঞ্চল রূপতরঙ্গ যে দেখিতে পাইবে না ! এ কলকণ্ঠধ্বনি ক্রণেক না শুনিলে যে গীতি-মুক্ত হরিণের ন্যায় সংসারারণ্যে শকাব্ধেষণ করিয়া বেড়াইবে !—কপাল খানা ! আবার বলেন কি না কাজ করে না !

আমরা অতিথি অভ্যাগতকে খাইতে দিই না ;—দিব কি তোমরা যে ঘরে কিছু রাখ না । ইংরেজের আগিসের কি গুণ বলিতে পারি না—যাইবার সময় যাও যেন নন্দদুলাল—ফিরে এস যেন কুন্তকর্ণ ! নিজের নিজের উদর—এর একটি আধমণি বস্তা—আমরা যেই হিন্দুর মেয়ে, তাই তাহাতে কোন মতে ত্রিশ সের ঠাসিয়া দিই—তার উপর আবার অতিথি অভ্যাগত !

ধর্মের বন্ধনে বাঁধিবেন ? ক্ষতি নাই, কিন্তু যে একাদশী নিরামিষের বাঁধনে বাঁধিয়া রাখিয়াছেন, তার উপর এ বন্ধনে আর কাজ কি ? আপনারা একাদশীর ভার নিন, আমরা লেখা পড়া শিখিয়া,—ধর্মের বন্ধন আঁটো করিয়া বাঁধিতে রাজি আছি । আমার মনে বড় সাধ, একবার আপনাদিগের সঙ্গে অবস্থার বিনিময় করি । গালিগালাজ দিবার আগে, একবার কত সুখ দুঃখ বুঝিয়া লউন । আমরা মরিলে আপনারা, একাদশী করিবেন, নিরামিষ খাইবেন, ঠেঁ টি পরিবেন ; আপনারা স্বর্গারোহণ করিলে, আমরা, “দ্বিতীয় সংসার” করিব—জীয়েন্তে , আপনারা সন্তান প্রসব করিবেন, রন্ধনশালার তত্ত্বাবধারণ করিবেন,—বাড়ীতে বিবাহ উপস্থিত হইলে, গোঁপের উপর ঘোমটা টানিয়া বরণডালা মাথায় করিয়া, স্ত্রী আচার করিবেন, বাসর ঘরে রসের হাসি হাসিয়া বাসর জাগিবেন, সুখের সীমা

থাকিবে না।—আমরা যৌবনে বহি হাতে করিয়া কালেজে যাইব—বয়সকালে, ফিরিঙ্গী খোঁগার উপর, পাগরী তেঁড়া করিয়া বাধিয়া আপিসে যাইব—টোনহলে নথ নাড়িয়া স্পীচ করিব,—চসমার ভিতর হইতে এই চোখের বিলোল কটাক্ষে সৃষ্টি স্থিতি প্রলয় করিব—সাধের ধর্মের দড়ি গলায় বাধিয়া সংসার গোহালে ধোলা বিচালি যাইব।—কতি কি ! তোমরা বিনিময় করিবে ? কিন্তু একটা কথা সাবধান করিয়া দিই—তোমরা যখন মানে বসিবে—আমরা যখন মান ভাঙ্গিতে বসিব—মুখখানি কান্দো কান্দো করিয়া, কর্ণভূষা একটু ঈষৎ রসের দোলনে দোলাইয়া, এই সভমর সরোজনয়নে একবার চোরা চাহনি চাহিয়া, যখন গহনা পরা হাতখানি, তোমাদের পারে দিব—তখন ? তখন কি তোমরা, আমাদের মড় মানের মান রাখিতে পারিবে ?

বড়াই ছাড়িয়া তাই কর ; তোমরা অন্তঃপুরে এস—আমরা আপিসে যাই। যাহারা সাতশত বৎসর পরের জুতা নাথায় বহিতেছে তাহারা আবার পুরুষ ! বলিতে লজ্জা করে না ?

শ্রীরসময়ী দাসী ।

বঙ্কিম বাবুর পুস্তকের বিজ্ঞাপন ।

বিশেষ নিয়ম ।

কোন বিক্রেতা এক বৎসর মধ্যে একহাজার
টাকার বহি বিক্রয় করিলে, তাঁহাকে ২৫১ টাকা
হিসাবে কমিশন দেওয়া যায় । অর্থাৎ ৭৫০১
টাকা রাখিয়া, ২৫০১ টাকা তাঁহাকে দেওয়া যায় ।
১লা জানুয়ারি হইতে ১লা জানুয়ারি বা ১লা
বৈশাখ হইতে ১লা বৈশাখ হিসাব হয় ।

শ্রী উমাচরণ বন্দ্যোপাধ্যায় ।

৫ নং প্রতাপচন্দ্র চাট্টোয়্যের লেন, কলিকাতা ।

পুস্তকের তালিকা ।

পুস্তক		মূল্য
দুর্গেশনন্দিনী	১১০
কপালকুণ্ডলা	১৫
য়ুগালিনী	১১০
বিষয়ক্ষ	১১০
চন্দ্রশেখর	১৫০
কৃষ্ণকান্তের উইল	১১০
দেবী চৌধুরাণী	২১
সীতারাম	২১
আনন্দমঠ	১১০
রজনী	১৫০
রাজসিংহ	১১০
ইন্দিরা	১৫০

যুগলাঙ্গুরীয়	১০
রাধারাণী	১০
ক্ষুদ্র ক্ষুদ্র উপন্যাস (রাজসিংহ, ইন্দিরা, যুগলাঙ্গুরীয়, রাধারাণী একত্রে)	১১০
কমলাকান্তের দপ্তর	১১০
লোকরহস্য (পরিবর্দ্ধিত)	১১০
কৃষ্ণচরিত্র	১১০
ধর্মতত্ত্ব	১১০
বিবিধ প্রবন্ধ	১১০
কবিতা পুস্তক	১১০
বিজ্ঞান-রহস্য	১১০

নিম্নলিখিত স্থানে ঐ সকল গ্রন্থ.

পাওয়া যায়—

বাবু গুরুদাস চট্টোপাধ্যায়

২০১, কর্ণওয়ালিস স্ট্রীট ।

„ পদ্ম চন্দ্র নাথ ৪৭/২, পুরাতন চীনাবাজার ।

সংস্কৃত প্রেস ডিপজিটরি

১৪৮, বারাণসী ঘোষের স্ট্রীট ।

কলেজ লাইব্রেরী ৬৩, কলেজ

পপুলার লাইব্রেরী ৭, „

ক্যানিং লাইব্রেরী ৫৫, „

চার্চ্যা ব্রাদার্স ৬৬, „

শ্রীরাম লাইব্রেরী ৫৭, „

বি, বাঁড়ুয়ে কোম্পানি

২৫-২৭, কর্ণওয়ালিস

প্রেসিডেন্সি লাইব্রেরী „

এবং অন্যান্য সকল দোকানে পাওয়া যায় ।

প্রকাশক

শ্রীউমাচরণ বন্দ্যোপাধ্যায় ।

৫ নং প্রতাপচন্দ্র চার্চুয়ের লেন, কলিকাতা ।

